



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>





LELAND • STANFORD • JUNIOR • VNIVERSITY



844.3

M761ea

LES ESSAIS
de Montaigne

LES ESSAIS
de
Montaigne

*Accompagnés d'une Notice sur sa vie et ses ouvrages,
d'une Étude bibliographique, de Variantes, de
Notes, de Tables & d'un Glossaire,*

par
E. COURBET & CH. ROYER.

Tome quatrième



PARIS

ALPHONSE LEMERRE, ÉDITEUR

27-31, PASSAGE CHOISEUL, 27-31

M. DCCC. LXXVII.

287827

Y8A78U 09078A7



LIVRE TROISIESME.

(SVITE.)

De l'incommodité de la grandeur.

CHAPITRE VII.



PVISQVE nous ne la pouuons auendre, vengeons nous à en mesdire. Si n'est-ce pas entierement mesdire de quelque chose, d'y trouuer des deffauts : il s'en trouue en toutes choses, pour belles & desirables qu'elles soyent. En general, elle a cet euident auantage, qu'elle se raualle quand il luy plaist, & qu'à peu pres, elle a le choix, de l'une & l'autre condition. Car on ne tombe pas de toute hauteur, il en est plus, desquelles on peut descendre, sans tomber. Bien me semble-il, que nous la faisons trop valoir : & trop valoir aussi la resolution de ceux que nous auons ou veu ou ouy dire,

L'auoir mesprisee, ou s'en estre desmis, de leur propre dessein. Son essence n'est pas si euidentement commode, qu'on ne la puisse refuser sans miracle. Je trouue l'effort bien difficile à la souffrance des maux, mais au contentement d'une mediocre mesure de fortune, & fuite de la grandeur, i'y trouue fort peu d'affaire. C'est vne vertu, ce me semble, où moy, qui ne suis qu'un oyson, arriuerois sans beaucoup de contention. Que doiuent faire ceux, qui mettroient encores en consideration, la gloire qui accompagne ce refus, auquel il peut escheoir plus d'ambition, qu'au desir mesme & iouissance de la grandeur? D'autant que l'ambition ne se conduit iamais mieux selonc soy, que par vne voye esgaree & inusitee. L'aiguise mon courage vers la patience, ie l'affoiblis vers le desir. Autant ay-je à souhaitter qu'un autre, & laisse à mes souhaits autant de liberté & d'indiscretion : mais pourtant, si ne m'est-il iamais aduenu, de souhaitter ny empire ny royauté, ny l'eminence de ces hautes fortunes & commandementes. Je ne vise pas de ce costé là : ie m'aime trop. Quand ie pense à croistre, c'est bassément : d'une accroissance contrainte & coïarde : proprement pour moy : en resolution, en prudence, en santé, en beauté, & en richesse encore. Mais ce credit, cette auctorité si puissante, foule mon imagination. Et tout à l'opposite de l'autre, m'aymerois à l'auanture mieux, deuxiesme ou troisieme à Perigeux, que premier à Paris : au moins sans mentir, mieux troisieme à Paris, que premier en charge. Je ne veux ny debattre avec un huissier de porte, miserable incognu : ny faire fendre en adoration, les presses où ie passe. Je suis duit à un estage moyen, comme par mon sort, aussi par mon goust. Et ay

montré en la conduite de ma vie, & de mes entreprises, que i'ay plustost fuy, qu'autrement, d'eniamber par dessus le degré de fortune, auquel Dieu logea ma naissance. Toute constitution naturelle, est pareillement iuste & aysee. I'ay ainsi l'ame poltrone, que ie ne mesure pas la bonne fortune selon sa hauteur, ie la mesure selon sa facilité. Mais si ie n'ay point le cœur gros assez, ie l'ay à l'equipollent ouuert, & qui m'ordonne de publier hardiment sa foiblesse. Qui me donneroit à conferer la vie de L. Thorius Balbus, gallant homme, beau, sçauant, sain, entendu & abondant en toute sorte de commoditez & plaisirs, conduisant vne vie tranquille, & toute sienne, l'ame bien preparee contre la mort, la superstition, les douleurs, & autres encombriers de l'humaine necessité, mourant en fin en bataille, les armes en la main, pour la defense de son païs, d'une part : & d'autre part la vie de M. Regulus, ainsi grande & hautaine, que chascun la cognoist, & sa fin admirable : l'une sans nom, sans dignité : l'autre exemplaire & glorieuse à merueilles : i'en diroy certes ce qu'en dit Cicero, si ie sçauoy aussi bien dire que luy. Mais s'il me les falloit coucher sur la mienne, ie diroy aussi, que la premiere est autant selon ma portee, & selon mon desir, que ie conforme à ma portee, comme la seconde est loing au delà. Qu'à cette cy, ie ne puis aduenir que par veneration : i'aduiendroy volontiers à l'autre par vsage. Retournons à nostre grandeur temporelle, d'où nous sommes partis. Ie suis desgousté de maistrise, & actiue & passiue. Otanez l'un des sept, qui auoient droit de pretendre au royaume de Perse, print un party, que i'eusse prins volontiers : c'est qu'il quitta à ses compagnons son droit d'y pouuoir arri-

uer par election, ou par sort : pourueu que luy & les siens, vescuissent en cet empire hors de toute subiection & maistrise, sauf celle des loix antiques : & y eussent toute liberté, qui ne porteroit preiudice à icelles : impatient de commander, comme d'estre commandé. Le plus aspre & difficile mestier du monde, à mon gré, c'est, faire dignement le Roy. L'excuse plus de leurs fautes, qu'on ne fait communement, en consideration de l'horrible poix de leur charge, qui m'estonne. Il est difficile de garder mesure, à vne puissance si desmesuree. Si est-ce que c'est enuers ceux-mesmes qui sont de moins excellente nature, vne singuliere incitation à la vertu, d'estre logé en tel lieu, où vous ne faciez aucun bien, qui ne soit mis en registre & en compte : & où le moindre bien faire, porte sur tant de gens : & où vostre suffisance, comme celle des prefeurs, s'adresse principalement au peuple, iuge peu exacte, facile à piper, facile à contenter. Il est peu de choses, ausquelles nous puissions donner le iugement syncere, par ce qu'il en est peu, ausquelles en quelque façon nous n'ayons particulier interest. La superiorité & inferiorité, la maistrise, & la subiection, sont obligees à vne naturelle enuie & contestation : il faut qu'elles s'entrepillent perpetuellement. Je ne crois ny l'une ny l'autre, des droicts de sa compagne : laissons en dire à la raison, qui est inflexible & impassible, quand nous en pourrons finer. Je feuilletois il n'y a pas vn mois, deux liures Escossois, se combattans sur ce subiect. Le populaire rend le Roy de pire condition qu'un charretier, le monarchique le loge quelques brasses au dessus de Dieu, en puissance & souueraineté. Or l'incommodité de la grandeur, que j'ay pris icy à remer-

quer, par quelque occasion qui vient de m'en aduertir, est cette-cy. Il n'est à l'auanture rien plus plaissant au commerce des hommes, que les essais que nous faisons les vns contre les autres, par ialousie d'honneur & de valeur, soit aux exercices du corps ou de l'esprit : ausquels la grandeur souueraine n'a aucune vraye part. A la verité il m'a semblé souuent, qu'à force de respect, on y traite les Princes desdaigneusement & iniurieusement. Car ce dequoy ie m'offençois infiniment en mon enfance, que ceux qui s'exerçoient avec moy, espargnassent de s'y employer à bon escient, pour me trouuer indigne contre qui ils s'efforçassent : c'est ce qu'on voit leur aduenir tous les iours, chacun se trouuant indigne de s'efforcer contre eux. Si on recognoist qu'ils ayent tant soit peu d'affection à la victoire, il n'est celui, qui ne se trauaille à la leur prestre : & qui n'ayme mieux trahir sa gloire, que d'offenser la leur. On n'y employe qu'autant d'effort qu'il en faut pour seruir à leur honneur. Quelle part ont ils à la meslee, en laquelle chacun est pour eux ? Il me semble voir ces paladins du temps passé, se presentans aux ioustes & aux combats, avec des corps, & des armes faëes. Briffon courant contre Alexandre, se feignit en la course : Alexandre l'en tança : mais il luy en deuoit faire donner le fouët. Pour cette consideration, Carneades disoit, que les enfans des Princes n'apprennent rien à droict qu'à manier des cheuaux : d'autant qu'en tout autre exercice, chacun fleschit soubz eux, & leur donne gaigné : mais vn cheual qui n'est ny flateur ny courtisan, verse le fils du Roy par terre, comme il feroit le fils d'un crocheur. Homere a esté contrainct de consentir que Venus fut blessée au combat de Troye, vne si douce

saincte & si delicate, pour luy donner du courage & de la hardiesse, qualitez qui ne tombent aucunement en ceux qui sont exempts de danger. On fait courroucer, craindre, fuyr les Dieux, s'enialouser, se douloir, & se passionner, pour les honorer des vertus qui se bastissent entre nous, de ces imperfections. Qui ne participe au hazard & difficulté, ne peut pretendre interest à l'honneur & plaisir qui suit les actions hazardeuses. C'est pitié de pouuoir tant, qu'il aduienne que toutes choses vous cedent. Vostre fortune reiette trop loing de vous la société & la compaignie, elle vous plante trop à l'escart. Cette aysance & lasche facilité, de faire tout baïsser sous soy, est ennemye de toute sorte de plaisir. C'est glisser cela, ce n'est pas aller : c'est dormir, ce n'est pas viure. Conceuez l'homme accompagné d'omnipotence, vous l'abyfmez : il faut qu'il vous demande par aumosne, de l'empeschement & de la resistance. Son estre & son bien est en indigence. Leurs bonnes qualitez sont mortès & perdues : car elles ne se sentent que par comparaison, & on les en met hors : ils ont peu de cognoissance de la vraye louïange, estans batus d'une si continuelle approbation & vniforme. Ont ils affaire au plus sot de leurs subiects ? ils n'ont aucun moyen de prendre aduantage sur luy : en disant, C'est pour ce qu'il est mon Roy, il luy semble auoir assez dict, qu'il a presté la main à se laisser vaincre. Cette qualité estouffe & confomme les autres qualitez vrayes & essentielles : elles sont enfoncées dans la royauté : & ne leur laisse à eux faire valoir, que les actions qui la touchent directement, & qui luy seruent : les offices de leur charge. C'est tant estre Roy, qu'il n'est que par là. Cette lueur estrangere qui l'enuironne, le

cache, & nous le desrobe : nostre veuë s'y rompt & s'y dissipe, estant remplie & arrestee par cette forte lumiere. Le Senat ordonna le prix d'eloquence à Tybere : il le refusa, n'estimant pas que d'un iugement si peu libre, quand bien il eust esté veritable; il s'en peust ressentir. Comme on leur cede tous auantages d'honneur, aussi conforte lon & auctorise les deffauts & vices qu'ils ont : non seulement par approbation, mais aussi par imitation. Chacun des suiuaus d'Alexandre portoit comme luy, la teste à costé. Et les flateurs de Dionisius, s'entrehurtoient en sa presence, pouffoyent & verfoient ce qui se rencontroit à leurs pieds, pour dire qu'ils auoient la veuë aussi courte que luy. Les greueurs ont aussi par fois seruy de recommandation & faueur. l'en ay veu la turdité en affectation. Et par ce que le maistre hayssoit sa femme, Plutarque a veu les courtisans repudier les leurs, qu'ils aymoyent. Qui plus est, la paillardise s'en est veuë en credit, & toute dissolution : comme aussi la desloyauté, les blasphemés, la cruauté : comme l'heresie, comme la superstition, l'irreligion, la mollesse, & pis si pis il y a. Par vn exemple encores plus dangereux, que celui des flateurs de Mithridates, qui d'autant que leur maistre pretendoit à l'honneur de bon medecin, luy portoient à inciser & cauteriser leurs membres. Car ces autres souffrent cauteriser leur ame, partie plus delicate & plus noble. Mais pour acheuer par où i'ay commencé : Adrian l'Empereur debatant avec le philosophe Fauorinus de l'interpretation de quel que mot : Fauorinus luy en quitta bien tost la victoire : ses amys se plaignans à luy : Vous vous moquez, fit-il, voudriez vous qu'il ne fust pas plus sçauant que moy, luy qui commande à trente legions ?

Auguste escriuit des vers contre Afinius Pollio : Et moy, dit Pollio, ie me tais : ce n'est pas sagesse d'escrire à l'enuy de celuy, qui peut proscrire. Et auoient raison. Car Dionysius pour ne pouoir esgaller Philoxenus en la poésie, & Platon en discours : en condamna l'un aux carrieres, & enuoya vendre l'autre esclau en l'isle d'Ægine.





De l'art de conferer.

CHAPITRE VIII.



'EST vn vſage de noſtre iuſtice, d'en condamner aucuns, pour l'aduertiſſement des autres. De les condamner, par ce qu'ils ont failly, ce feroit beſtiſe, comme dit Platon. Car ce qui eſt fait, ne ſe peut deffaire : mais c'eſt afin qu'ils ne faillent plus de meſmes, ou qu'on fuye l'exemple de leur faute. On ne corrige pas celuy qu'on pend, on corrige les autres par luy. Je fais de meſmes. Mes erreurs ſont tantost naturelles & incorrigibles & irremediabiles. Mais ce que les honeſtes hommes profitent au public en ſe faiſant imiter, ie le profiteray à l'auanture à me faire euit.

*Nonne vides Albi vt malè viuat filius, vtque
Barrus inops? magnum documentum, ne patriam rem
Perdere quis velit.*

Publiant & accusant mes imperfections, quelqu'un apprendra de les craindre. Les parties que i'eſtime le plus en moy, tirent plus d'honneur de m'accuſer, que de me recommander. Voylà pourquoy i'y re-

tombe, & m'y arreste plus souuent. Mais quand tout est compté, on ne parle iamais de soy, sans perte. Les propres condamnations sont tousiours accreües, les louanges mescruës. Il en peut estre aucuns de ma complexion, qui m'instruis mieux par contrarieté que par similitude : & par fuite que par fuite. A cette sorte de discipline regardoit le vieux Caton, quand il dict, que les sages ont plus à apprendre des fols, que les fols des sages. Et cet ancien ioueur de lyre, que Pausanias recite, auoir accoustumé contraindre ses disciples d'aller ouyr vn mauuais sonneur, qui logeoit vis à vis de luy : où ils apprinssent à hayr ses defaccords & fauces mesures. L'horreur de la cruauté me reiecte plus auant en la clemence, qu'aucun patron de clemence ne me scauroit attirer. Vn bon escuyer ne redresse pas tant mon assiete, comme fait vn procureur, ou vn Venitien à cheual. Et vne mauuaise façon de langage, reforme mieux la mienne, que ne fait la bonne. Tous les iours la fotte contenance d'vn autre, m'aduertit & m'aduise. Ce qui poinct, touche & esueille mieux, que ce qui plaist. Ce temps est propre à nous amender à reculons, par disconuenance plus que par conuenance; par difference, que par accord. Estant peu apprins par les bons exemples, ie me fers des mauuais : desquels la leçon est ordinaire. Ie me suis efforcé de me rendre autant agreable comme i'en voyoy de fascheux : aussi ferme, que i'en voyoy de mols : aussi doux, que i'en voyoy d'aspres : aussi bon, que i'en voyoy de meschans. Mais ie me proposoy des mesures inuincibles. Le plus fructueux & naturel exercice de nostre esprit, c'est à mon gré la conference. I'en trouue l'usage plus doux, que d'aucune autre action de nostre vie. Et c'est la raison pour-

quoy, si i'estois à cette heure forcé de choisir, ie consentirois plustost, ce crois-ie, de perdre la veuë, que l'ouyr ou le parler. Les Atheniens, & encore les Romains, conféroient en grand honneur cet exercice en leurs Academies. De nostre temps, les Italiens en retiennent quelques vestiges, à leur grand profit : comme il se voit par la comparaison de nos entendemens aux leurs. L'estude des liures, c'est vn mouuement languissant & foible qui n'eschauffe point : là où la conference, apprend & exerce en vn coup. Si ie confere avec vne ame forte, & vn roide iousteur, il me presse les flancs, me picque à gauche & à dextre : ses imaginations ellacent les miennes. La ialousie, la gloire, la contention, me poussent & rehaussent au dessus de moy-mesmes. Et l'vnisson, est qualité du tout ennuyeuse en la conference. Mais comme nostre esprit se fortifie par la communication des esprits vigoureux & reglez, il ne se peut dire, combien il perd, & s'abastardit, par le continuel commerce, & frequentation, que nous auons avec les esprits bas & maladifs. Il n'est contagion qui s'espande comme celle-là. Ie sçay par assez d'experience, combien en vaut l'aune. I'ayme à contester, & à discourir, mais c'est avec peu d'hommes, & pour moy. Car de seruir de spectacle aux grands, & faire à l'enuy parade de son esprit, & de son caquet, ie trouue que c'est vn mestier tres-messeant à vn homme d'honneur. La sottise est vne mauuaise qualité, mais de ne la pouuoir supporter, & s'en despiter & ronger, comme il m'aduient, c'est vne autre sorte de maladie, qui ne doit guere à la sottise, en importunité. Et est ce qu'à present ie veux accuser du mien. I'entre en conference & en dispute, avec grande liberté & facilité : d'autant que

l'opinion trouue en moy le terrain mal propre à y penetrer, & y pouffer de hautes racines. Nulles propositions m'estonnent, nulle creance me blesse, quelque contrariété qu'elle aye à la mienne. Il n'est si friuole & si extrauagante fantasie, qui ne me semble bien sortable à la production de l'esprit humain. Nous autres, qui priuons nostre iugement du droit de faire des arrests, regardons mollement les opinions diuerfes : & si nous n'y prestons le iugement, nous y prestons aysement l'oreille. Où l'un plat est vuide du tout en la balance, ie laisse vaciller l'autre, sous les songes d'une vieille. Et me semble estre excusable, si j'accepte plustost le nombre impair : le ieudy au prix du vendredy : si ie m'aime mieux douziesme ou quatorziesme, que treziesme à table : si ie vois plus volontiers un lieure costoyant, que trauersant mon chemin, quand ie voyage : & donne plustost le pied gauche, que le droit, à chauffer. Toutes telles reuasseries, qui sont en credit autour de nous, meritent au moins qu'on les escoute. Pour moy, elles emportent seulement l'inanité, mais elles l'emportent. Encores sont en poids, les opinions vulgaires & casuelles, autre chose, que rien, en nature. Et qui ne s'y laisse aller iusques là, tombe à l'auanture au vice de l'opiniastreté, pour euitier celui de la superstition. Les contradictions donc des iugemens, ne m'offencent, ny m'alterent : elles m'esueillent seulement & m'exercent. Nous fuyons la correction, il s'y faudroit presenter & produire notamment quand elle vient par forme de conference, non de regence. A chasque opposition, on ne regarde pas si elle est iuste, mais, à tort, ou à droit, comment on s'en deffera. Au lieu d'y tendre les bras, nous y tendons les griffes.

Je souffrirois estre rudement heurté par mes amis, Tu és vn sot, tu refuses. l'ayme entre les galans hommes, qu'on s'exprime courageusement : que les mots aillent où va la pensee. Il nous faut fortifier l'ouye, & la durcir, contre cette tendreur du son seremonieux des parolles. l'ayme vne société, & familiarité forte, & virile : vne amitié, qui se flatte en l'aspreté & vigueur de son commerce : comme l'amour, és morsures & esgratigneures sanglantes. Elle n'est pas assez vigoureuse & genereuse, si elle n'est querelleuse : si elle est ciuillisee & artiste : si elle craint le heurt, & a ses allures contreintes. *Neque enim disputari sine reprehensione potest.* Quand on me contrarie, on esueille mon attention, non pas ma cholere : ie m'auance vers celuy qui me contredit, qui m'instruit. La cause de la verité, deuroit estre la cause commune à l'un & à l'autre. Que respondra-il ? la passion du courroux luy a desia frappé le iugement : le trouble s'en est saisi, auant la raison. Il seroit vtile, qu'on passast par gageure, la decision de nos disputes : qu'il y eust vne marque materielle de nos pertes : affin que nous en tinssions estat, & que mon valet me peüst dire : Il vous cousta l'annee passée cent escus, à vingt fois, d'auoir esté ignorant & opiniastre. Je festoye & caresse la verité en quelque main que ie la trouue, & m'y rends alaigrement, & luy tends mes armes vaincues, de loing que ie la vois approcher. Et pourueu qu'on n'y procede d'une troigne trop imperieusement magistrale, ie prens plaisir à estre reprints. Et m'accommode aux accusateurs, souuent plus, par raison de ciuilité, que par raison d'amenagement : ayment à gratifier & à nourrir la liberté de m'aduertir, par la facilité de ceder. Toutesfois il est

malaisé d'y attirer les hommes de mon temps. Ils n'ont pas le courage de corriger, par ce qu'ils n'ont pas le courage de souffrir à l'estre. Et parlent toujours avec dissimulation, en presence les vns des autres. Je prens si grand plaisir d'estre iugé & cogneu, qu'il m'est comme indifférent, en quelle des deux formes ie le foy. Mon imagination se contredit elle mesme si souuent, & condamne, que ce m'est tout vn, qu'un autre le face : veu principalement que ie ne donne à sa reprehension, que l'autorité que ie veux. Mais ie romps paille avec celuy, qui se tient si haut à la main : comme i'en cognoy quelqu'un, qui plaint son aduertissement, s'il n'en est creu : & prend à iniure, si on estruie à le fuiure. Ce que Socrates recueilloit tousiours riant, les contradictions, qu'on opposoit à son discours, on pourroit dire, que sa force en estoit cause : & que l'auantage ayant à tomber certainement de son costé, il les acceptoit, comme matiere de nouuelle victoire. Toutesfois nous voyons au rebours, qu'il n'est rien, qui nous y rende le sentiment si delicat, que l'opinion de la préeminence, & desdaing de l'aduersaire. Et que par raison, c'est au foible plustost, d'accepter de bon gré les oppositions qui le redressent & rabillent. Je cherche à la verité plus la frequentation de ceux qui me gourment, que de ceux qui me craignent. C'est vn plaisir fade & nuisible, d'auoir affaire à gens qui nous admirent & facent place. Antisthenes commanda à ses enfans, de ne sçauoir iamais gré ny grace, à homme qui les louast. Je me sens bien plus fier, de la victoire que ie gaigne sur moy, quand en l'ardeur mesme du combat, ie me fais plier sous la force de la raison de mon aduersaire : que ie ne me sens gré, de la victoire que ie gaigne

sur luy, par sa foiblesse. En fin, ie reçois & aduoue toute sorte d'atteinctes qui sont de droit fil, pour foibles qu'elles soient : mais ie suis par trop impatient, de celles qui se donnent sans forme. Il me chaut peu de la matiere, & me sont les opinions vnes, & la victoire du subiect à peu pres indifferente. Tout vn iour ie contesteray paisiblement, si la conduicte du debat se fait avec ordre. Ce n'est pas tant la force & la subtilité, que ie demande, comme l'ordre. L'ordre qui se voit tous les iours, aux altercations des bergers & des enfans de boutique : iamais entre nous. S'ils se detraquent, c'est en incuillité : si faisons nous bien, Mais leur tumulte & impatience, ne les déuoye pas de leur theme. Leur propos suit son cours. S'ils preuiennent l'un l'autre, s'ils ne s'attendent pas, au moins ils s'entendent. On respond tousiours trop bien pour moy, si on respond à ce que ie dis. Mais quand la dispute est trouble & des-reglée, ie quitte la chose, & m'attache à la forme, avec despit & indiscretion : & me iette à vne façon de debattre, testue, malicieuse, & imperieuse, dequoy i'ay à rougir apres. Il est impossible de traiter de bonne foy avec vn sot. Mon iugement ne se corrompt pas seulement à la main d'un maistre si impetueux : mais aussi ma conscience. Noz disputes deuoient estre defendues & punies, comme d'autres crimes verbaux. Quel vice n'esueillent elles & n'amoncellent, tousiours regies & commandees par la cholere ? Nous entrons en inimitié, premierement contre les raisons, & puis contre les hommes. Nous n'apprenons à disputer que pour contredire : & chascun contredisant & estant contredit, il en aduient que le fruit du disputer, c'est perdre & aneantir la verité. Ainsi Pla-

ton en sa republique, prohibe cet exercice aux esprits ineptes & mal nays. A quoy faire vous mettez vous en voye de quester ce qui est, avec celuy qui n'a ny pas, ny alleure qui vaille ? On ne fait point tort au subiect, quand on le quiste, pour voir du moyen de le traicter. Je ne dis pas moyen scholastique & artiste, ie dis moyen naturel, d'un sain entendement. Que sera-ce en fin ? l'un va en Orient, l'autre en Occident. Ils perdent le principal, & l'escartent dans la presse des incidens. Au bout d'une heure de tempeste, ils ne scauent ce qu'ils cherchent : l'un est bas, l'autre haut, l'autre costier. Qui se prend à un mot & une similitude. Qui ne sent plus ce qu'on luy oppose, tant il est engagé en sa course, & pense à se suiure, non pas à vous. Qui se trouuant foible de reins, craint tout, refuse tout, mesle dez l'entree, & confond le propos : ou sur l'effort du debat, se mutine à se taire tout plat : par une ignorance despitée, affectant un orgueilleux mespris : ou une forttement modeste fuite de contention. Pourueu que cettuy-cy frappe, il ne luy chaut combien il se descouure. L'autre compte ses mots, & les poise pour raisons. Celuy-là n'y employe que l'auantage de sa voix, & de ses poulmons. En voyla un qui conclud contre soy-mesme : & cettuy-cy qui vous assourdit de prefaces & digressions inutiles. Cet autre s'arme de pures iniures, & cherche une querelle d'Alemaigne, pour se deffaire de la société & conference d'un esprit, qui presse le sien. Ce dernier ne voit rien en la raison, mais il vous tient assiégué sur la closture dialectique de ses clauses, & sur les formules de son art. Or qui n'entre en defiance des sciences, & n'est en doubte, s'il s'en peut tirer quelque solide fruit, au besoin de la vie : à

considerer l'usage que nous en auons? *Nihil sanantibus litteris.* Qui a pris de l'entendement en la logique? où sont ses belles promesses? *Nec ad melius viuendum, nec ad commodius differendum.* Voit-on plus de barbouillage au caquet des harengeres, qu'aux disputes publiques des hommes de cette profession? l'aymeroy mieux, que mon fils apprint aux tauernes à parler, qu'aux escholes de la parlerie. Ayez vn maistre és arts, conferez avec luy, que ne nous fait-il sentir cette excellence artificielle, & ne rait les femmes, & les ignorans comme nous sommes, par l'admiration de la fermeté de ses raisons, de la beauté de son ordre? que ne nous domine-il & persuade comme il veut? Vn homme si auantageux en matiere, & en conduite, pourquoy melle-il à son ecrime les iniures, l'indiscrétion & la rage? Qu'il oste son chapperon, sa robbe, & son Latin, qu'il ne batte pas nos aureilles d'Aristote tout pur & tout creu, vous le prendrez pour l'un d'entre nous, ou pis. Il me semble de cette implication & entrelasseure du langage, par où ils nous pressent, qu'il en va comme des ioueurs de passe-passe : leur soupleste combat & force nos sens, mais elle n'esbranle aucunement nostre creance : hors ce bastelage, ils ne font rien qui ne soit commun & vil. Pour estre plus sçauans, ils n'en sont pas moins ineptes. l'ayme & honore le sçauoir, autant que ceux qui l'ont. Et en son vray usage, c'est le plus noble & puissant acquest des hommes. Mais en ceux-là, & il en est vn nombre infiny de ce genre, qui en establisent leur fondamentale suffisance & valeur : qui se rapportent de leur entendement à leur memoire, *sub aliena umbra latentes* : & ne peuuent rien que par liure : ie le hay, si ie l'ose dire, vn peu plus que la bestise.

En mon pays, & de mon temps, la doctrine amande assez les bourses, nullement les ames. Si elle les rencontre mouffes, elle les aggraue & suffoque : masse crue & indigeste : si desliees, elle les purifie volontiers, clarifie & subtilise iusques à l'exinanition. C'est chose de qualité à peu pres indifferente : tres-vtile accessoire, à vne ame bien nee, pernicieux à vne autre ame & dommageable. Ou plustost, chose de tres-precieux vsage, qui ne se laisse pas posseder à vil prix : en quelque main c'est vn sceptre, en quelque autre, vne marotte. Mais suyons. Quelle plus grande victoire attendez vous, que d'apprendre à vostre ennemy qu'il ne vous peut combattre ? Quand vous gaignez l'auantage de vostre proposition, c'est la verité qui gaigne : quand vous gaignez l'auantage de l'ordre, & de la conduite, c'est vous qui gaignez. Il m'est aduis qu'en Platon & en Xenophon Socrates dispute plus, en faueur des disputants qu'en faueur de la dispute : & pour instruire Euthydomus & Protagoras de la cognoissance de leur impertinence, plus que de l'impertinence de leur art. Il empoigne la premiere matiere, comme celuy qui a vne fin plus vtile que de l'a esclarcir, assauoir esclarcir les esprits, qu'il prend à manier & exercer. L'agitation & la chasse est proprement de nostre gibier, nous ne sommes pas excusables de la conduire mal & impertinemment : de faillir à la prise, c'est autre chose. Car nous sommes nais à quester la verité, il appartient de la posseder à vne plus grande puissance. Elle n'est pas, comme disoit Democritus, cachee dans le fonds des abysses : mais plustost esleuee en hauteur infinie en la cognoissance diuine. Le monde n'est qu'une escole d'inquisition. Ce n'est pas à qui mettra dedans, mais à qui fera les

plus belles courses. Autant peut faire le sôt, celuy qui dit vray, que celuy qui dit faux : car nous sommes sur la maniere, non sur la matiere du dire. Mon humeur est de regarder autant à la forme, qu'à la substance : autant à l'advocat qu'à la cause, comme Alcibiades ordonnoit qu'on fist. Et tous les iours m'amuse à lire en des auteurs, sans soing de leur science : y cherchant leur façon, non leur subiect. Tout ainsi que ie poursuy la communication de quelque esprit fameux, non affin qu'il m'enseigne, mais affin que ie le cognoisse, & que le cognoissant, s'il le vaut, ie l'inite. Tout homme peut dire veritablement, mais dire ordonnement, prudemment, & suffisamment, peu d'hommes le peuvent. Par ainsi la fauceté qui vient d'ignorance, ne m'offense point : c'est l'ineptie. L'ay rompu plusieurs marchez qui m'estoient vtils, par l'impertinence de la contestation de ceux, avec qui ie marchandais. Je ne m'esmeux pas vne fois l'an, des fautes de ceux sur lesquels i'ay puissance : mais sur le point de la bestise & opiniastreté de leurs allegations, excuses & defences, asnieres & brutales, nous sommes tous les iours à nous en prendre à la gorge. Ils n'entendent ny ce qui se dit, ny pourquoy, & respondent de mesme : c'est pour desesperer. Je ne sens heurter rudement ma teste, que par vne autre teste. Et entre plustost en composition avec le vice de mes gens, qu'avec leur temerité, importunité & leur sottise. Qu'ils facent moins, pourveu qu'ils soient capables de faire. Vous vivez en esperance d'eschauffer leur volonté. Mais d'une foudre, il n'y a ny qu'esperer, ny que iouyr qui vaille. Or quoy, si ie prens les choses autrement qu'elles ne sont ? Il peut estre. Et pourtant i'accuse mon impatience. Et tiens, premiere-

ment, qu'elle est esgallement vicieuse en celui qui a droit, comme en celui qui a tort. Car c'est tousiours vn' aigreur tyrannique, de ne pouuoir souffrir vne forme diuerse à la sienne. Et puis, qu'il n'est à la verité point de plus grande fadese, & plus constante, que de s'esmouuoir & piquer des fadesses du monde, ny plus heteroclite. Car elle nous formalise principalement contre nous : & ce philosophe du temps passé n'eust iamais eu faute d'occasion à ses pleurs, tant qu'il se fust considéré. Mison l'un des sept sages, d'une humeur Timonienne & Democritienne interrogé, dequoy il rioit seul : De ce que ie ris seul : respondit-il. Combien de sottises dis-je, & respons-je tous les iours, selon moy : & volontiers donq combien plus frequentes, selon autrui ? Si ie m'en mors les leures, qu'en doiuent faire les autres ? Somme, il faut viure entre les viuants, & laisser la riuiera courre sous le pont, sans nostre soing : ou à tout le moins, sans nostre alteration. De vray, pourquoy sans nous esmouuoir, rencontrons nous quelqu'un qui ayt le corps tortu & mal basti, & ne pouuons souffrir le rencontre d'un esprit mal rengé, sans nous mettre en cholere ? Cette vicieuse aspreté tient plus au iuge, qu'à la faute. Ayons tousiours en la bouche ce mot de Platon : Ce que ie treuve mal sain, n'est-ce pas pour estre moy-mesmes mal sain ? Ne suis-je pas moy-mesmes en coulpe ? mon aduertissement se peut-il pas renuerfer contre moy ? Sage & diuin refrain, qui fouete la plus vniuerselle, & commune erreur des hommes. Non seulement les reproches, que nous faisons les uns aux autres, mais noz raisons aussi, & noz arguments & matieres controuerfées, sont ordinairement retorquables à nous : & nous enferrons de noz armes. Dequoy l'ancien-

neté m'a laissé assez de graues exemples. Ce fut ingenieusement dit & bien à propos, par celui qui l'inuenta :

Stercus cuique suum bene olet.

Noz yeux ne voyent rien en derriere. Cent fois le iour, nous nous moquons de nous sur le subiect de nostre voyfin, & detestons en d'autres, les defauts qui sont en nous plus clairement : & les admirons d'une merueilleuse impudence & inaduertence. Encores hier ie fus à mesmes, de veoir vn homme d'entendement se moquant autant plaifamment que iustement, de l'inepte façon d'un autre, qui rompt la teste à tout le monde du registre de ses genealogies & alliances, plus de moitié fauces (ceux-là se iettent plus volontiers sur tels sots propos, qui ont leurs qualitez plus douteuses & moins seures) & luy s'il eust reculé sur soy, se fust trouué non guere moins intemperant & ennuyeux à semer & faire valoir la prerogative de la race de sa femme. O importune presumption, de laquelle la femme se voit armee par les mains de son mary mesme ! S'il entendoit du Latin, il luy faudroit dire,

Age si hæc non insanit satis sua sponte, instiga.

Ie ne dis pas, que nul n'accuse, qui ne soit net : car nul n'accuseroit : voire ny net, en mesme sorte de tache. Mais j'entens, que nostre iugement chargeant sur vn autre, duquel pour lors il est question, ne nous espargne pas, d'une interne & seure iurisdiction. C'est office de charité, que, qui ne peut oster vn vice en soy, cherche ce neantmoins à l'oster en

autrui : où il peut auoir moins maligne & reueſche femence. Ny ne me ſemble reſponce à propos, à celuy, qui m'aduertit de ma faute, dire qu'elle eſt auſſi en luy. Quoy pour cela? Touſiours l'aduertiſſement eſt vray & vtile. Si nous auions bon nez, noſtre ordure nous deuroit plus puir, d'autant qu'elle eſt noſtre. Et Socrates eſt d'aduiz, que qui ſe trouueroit coupable, & ſon fils, & vn eſtranger, de quelque violence & iniure, deuroit commencer par ſoy, à ſe preſenter à la condamnation de la iuſtice, & implorer, pour ſe purger, le ſecours de la main du bourreau : ſecondement pour ſon fils : & dernièrement pour l'eſtranger. Si ce precepte prend le ton vn peu trop haut : au moins ſe doit il preſenter le premier, à la punition de ſa propre conſcience. Les ſens ſont nos propres & premiers iuges, qui n'apperçoient les choſes que par les accidens externes : & n'eſt merueille, ſi en toutes les pieces du ſeruice de noſtre ſociété, il y a vn ſi perpetuel, & vniuerſel meſlange de ceremonies & apparences ſuperficielles : ſi que la meilleure & plus eſſectuelle part des polices, conſiſte en cela. C'eſt touſiours à l'homme que nous auons affaire, duquel la condition eſt merueilleuſement corporelle. Que ceux qui nous ont voulu baſtir ces annees paſſees, vn exercice de religion, ſi contemplatif & immateriel, ne ſ'eſtonnent point, s'il ſ'en trouue, qui penſent, qu'elle fuſt eſchappée & fondue entre leurs doigts, ſi elle ne tenoit parmy nous, comme marque, tiltre, & instrument de diuiſion & de part, plus que par ſoy-meſmes. Comme en la conference. La grauité, la robbe, & la fortune de celuy qui parle, donne ſouuent credit à des propos vains & ineptes. Il n'eſt pas à preſumer, qu'un monsieur, ſi ſuiuy, ſi

redouté, n'aye au dedans quelque suffisance autre que populaire : & qu'un homme à qui on donne tant de commissions, & de charges, si desdaigneux & si morguant, ne soit plus habile, que cet autre, qui le salue de si loing, & que personne n'employe. Non seulement les mots, mais aussi les grimaces de ces gens là, se considerent & mettent en compte : chacun s'appliquant à y donner quelque belle & solide interpretation. S'ils se rabaissent à la conference commune, & qu'on leur presente autre chose qu'approbation & reuerence, ils vous affomment de l'autorité de leur experience : ils ont ouy, ils ont veu, ils ont fait, vous estes accablé d'exemples. Le leur dirois volontiers, que le fruit de l'experience d'un chirurgien, n'est pas l'histoire de ses pratiques, & se souuenir qu'il a guarý quatre empestez & trois gouteux, s'il ne sçait de cet vsage, tirer dequoy former son iugement, & ne nous sçait faire sentir, qu'il en soit deuenu plus sage à l'vsage de son art. Comme en un concert d'instruments, on n'oit pas un leut, une espinete, & la flutte : on oyt une harmonie en globe : l'assemblage & le fruit de tout cet amas. Si les voyages & les charges les ont amendez, c'est à la production de leur entendement de le faire paroistre. Ce n'est pas assez de compter les experiences, il les faut poiser & assortir : & les faut auoir digerées & alambiquees, pour en tirer les raisons & conclusions qu'elles portent. Il ne fut iamais tant d'historiens. Bon est-il tousiours & vtile de les ouyr, car ils nous fournissent tout plein de belles instructions & louables du magasin de leur memoire. Grande partie certes, au secours de la vie. Mais nous ne cherchons pas cela pour cette heure, nous cherchons si ces recitateurs & recueilleurs sont louables eux-

mesmes. Je hay toute sorte de tyrannie, & la parliere, & l'effectuelle. Je me bande volontiers contre ces vaines circonstances, qui pipent nostre iugement par les sens : & me tenant au guet de ces grandeurs extraordinaires, ay trouué que ce sont pour le plus, des hommes comme les autres :

*Rarus enim fermè sensus communis in illa
Fortuna.*

A l'auanture les estime lon, & apperçoit moindres qu'ils ne sont, d'autant qu'ils entreprennent plus, & se montrent plus, ils ne respondent point au faix qu'ils ont pris. Il faut qu'il y ayt plus de vigueur, & de pouuoir au porteur, qu'en la charge. Celuy qui n'a pas remply sa force, il vous laisse deuiner, s'il a encore de la force au delà, & s'il a esté essayé iusques à son dernier poinct. Celuy qui succombe à sa charge, il descouure sa mesure, & la foiblesse de ses espaules. C'est pourquoy on voit tant d'ineptes ames entre les sçauantes, & plus que d'autres. Il s'en fust fait des bons hommes de mesnage, bons marchans, bons artizans : leur vigueur naturelle estoit taillee à cette proportion. C'est chose de grand poix que la science, ils fondent deffous. Pour estaller & distribuer cette riche & puissante matiere, pour l'employer & s'en ayder : leur engin n'a, ny assez de vigueur, ny assez de manient. Elle ne peut qu'en vne forte nature : or elles sont bien rares. Et les foibles, dit Socrates, corrompent la dignité de la philosophie, en la maniant. Elle paroist & inutile & vicieuse, quand elle est mal estuyee. Voyla comment ils se gastent & affolent.

Humani qualis simulator finius oris,

*Quem puer arridens, pretioso stamine serum
Velavit, nudasque nates ac terga reliquit,
Ludibrium mensis.*

A ceux pareillement, qui nous regissent & commandent, qui tiennent le monde en leur main, ce n'est pas assez d'avoir un entendement commun : de pouvoir ce que nous pouvons. Ils sont bien loing au dessous de nous, s'ils ne sont bien loing au dessus. Comme ils promettent plus, ils doivent aussi plus. Et pourtant leur est le silence, non seulement contenance de respect & gravité, mais encore souvent de profit & de ménage. Car Megabyfus étant allé voir Apelles en son ouvrage, fut long temps sans mot dire : & puis commença à discourir de ses ouvrages. Dont il reçut cette rude reprimende : Tandis que tu as gardé silence, tu semblois quelque grande chose, à cause de tes chaînes & de ta pompe : mais maintenant, qu'on t'a ouy parler, il n'est pas jusques aux garçons de ma boutique qui ne te méprisent. Ces magnifiques atours, ce grand estat, ne luy permettoient point d'estre ignorant d'une ignorance populaire : & de parler impertinemment de la peinture. Il devoit maintenir muet, cette externe & presomptueuse suffisance. A combien de sottises ames en mon temps, a servi une mine froide & taciturne, de titre de prudence & de capacité ? Les dignitez, les charges, se donnent nécessairement, plus par fortune que par mérite : & a lon tort souvent de s'en prendre aux Roys. Au rebours c'est merueille qu'ils y aient tant d'heur, y ayans si peu d'adresse : *Principis est virtus maxima, nosse suos*. Car la nature ne leur a pas donné la veüe, qui se puisse estendre à tant de peuple, pour en discerner la precellence : & per-

fer nos poitrines, où loge la cognoissance de nostre volonté & de nostre meilleure valeur. Il faut qu'ils nous trient par coniecture, & à tastons : par la race, les richesses, la doctrine, la voix du peuple : tres-foibles argumens. Qui pourroit trouuer moyen, qu'on en peust iuger par iustice, & choisir les hommes par raison, establirait de ce seul trait, vne parfaite forme de police. Ouy mais, il a mené à point ce grand affaire. C'est dire quelque chose ; mais ce n'est pas assez dire. Car cette sentence est iustement receüe, Qu'il ne faut pas iuger les conseils par les euenemens. Les Carthaginois punissoient les mauuais aduis de leurs capitaines, encore qu'ils fussent corrigez par vne heureuse yssue. Et le peuple Romain a souuent refusé le triomphe à des grandes & tres-vtiles victoires, par ce que la conduite du chef ne respondoit point à son bon heur. On s'apperoit ordinairement aux actions du monde, que la fortune, pour nous apprendre, combien elle peut en toutes choses : & qui prent plaisir à rabatre nostre presomption : n'ayant peu faire les malhabiles sages, elle les fait heureux, à l'enuy de la vertu. Et se mesle volontiers à fauoriser les executions, où la trame est plus purement sienne. D'où il se voit tous les iours, que les plus simples d'entre nous, mettent à fin de tres-grandes besongnes & publiques & priuees. Et comme Sيرانnez le Persien, respondit à ceux qui s'estonnoient comme ses affaires succedoient si mal, veu que ses propos estoient si sages : Qu'il estoit seul maistre de ses propos, mais du succez de ses affaires, c'estoit la fortune. Ceux-cy peuuent respondre de mesme : mais d'yn contraire biais. La

plus part des choses du monde se font par elles mesmes.

Fata viam inueniunt.

L'issuë autorise souuent vne tresinepte conduite. Nostre entremise n'est quasi qu'une routine : & plus communement consideration d'usage, & d'exemple, que de raison. Estonné de la grandeur de l'affaire, j'ay autrefois sçeu par ceuz qui l'auoient mené à fin, leurs motifs & leur adresse : ie n'y ay trouué que des aduis vulgaires : & les plus vulgaires & vitez, sont aussi peut-estre, les plus seurs & plus commodes à la pratique, sinon à la montre. Quoy si les plus plattes raisons, sont les mieux assises : les plus basses & lasches, & les plus battues, se couchent mieux aux affaires ? Pour conseruer l'autorité du conseil des Roys, il n'est pas besoing que les personnes profanes y participent, & y voyent plus auant que de la premiere barriere. Il se doit reuerer à credit & en bloc, qui en veut nourrir la reputation. Ma consultation esbauche vn peu la matiere, & la considere legerement par ses premiers visages : le fort & principal de la besongne, j'ay accoustumé de le resigner au ciel,

Permitte diuis cætera.

L'heur & le mal'heur, sont à mon gré deux souveraines puissances. C'est imprudence, d'estimer que l'humaine prudence puisse remplir le rolle de la fortune. Et vaine est l'entreprise de celuy, qui presume d'embrasser & causer & consequences, & mener par la main, le progres de son faict. Vaine sur tout aux

deliberations guerrieres. Il ne fut iamais plus de circonspection & prudence militaire, qu'il s'en voit par fois entre nous. Seroit ce qu'on crainct de se perdre en chemin, se reseruant à la catastrophes de ce ieu? Je dis plus, que nostre sagesse mesme & consultation, fuit pour la plus part la conduite du hazard. Ma volonté & mon discours, se remue tantost d'un air, tantost d'un autre : & y a plusieurs de ces mouuemens, qui se gouvernent sans moy. Ma raison a des impulsions & agitations iournallieres, & casuelles :

*Vertuntur species animorum, & pectora motus
Nunc alios, alios dum nubila ventus agebat,
Concipiunt.*

Qu'on regarde qui sont les plus puissans aux villes, & qui sont mieux leurs besongnes : on trouuera ordinairement, que ce sont les moins habiles. Il est adueni aux femmelettes, aux enfans, & aux infensez, de commander des grands estats, à l'esgal des plus suffisans Princes. Et y rencontrent, dit Thucydides, plus ordinairement les grossiers que les subtils. Nous attribuons les effets de leur bonne fortune à leur prudence.

*vt quisque Fortuna vititur,
Ita præcellet : atque exinde sapere illum omnes dicimus.*

Parquoy ie dis bien, en toutes façons, que les euene-mens, sont maigres tesmoins de nostre prix & capacité. Or i'estois sur ce poinct, qu'il ne faut que voir vn homme esleué en dignité : quand nous l'aurions cogneu trois iours deuant, homme de peu : il coule insensiblement en nos opinions, vne image de gran-

deur, de suffisance, & nous persuadons que croissant de train & de credit, il est creu de merite. Nous iugeons de luy non selon sa valeur : mais à la mode des getons, selon la prerogative de son rang. Que la chance tourne aussi, qu'il retombe & se mette à la presse : chacun s'enquiert avec admiration de la cause qui l'auoit guindé si haut. Est-ce luy ? fait-on : n'y scauait il autre chose quand il y estoit ? les Princes se contentent ils de si peu ? nous estions vraiment en bonnes mains. C'est chose que j'ay veu souuent de mon temps. Voyre & le masque des grandeurs, qu'on represente aux comedies, nous touche aucunement & nous pippe. Ce que j'adore moy-mesmes aux Roys, c'est la foule de leurs adorateurs. Toute inclination & soubmission leur est dueë, sauf celle de l'entendement. Ma raison n'est pas dueite à se courber & fieschir, ce sont mes genoux. Melanthius interrogé ce qu'il luy sembloit de la tragedie de Dionysius : Je ne l'ay, dit-il, point veüe, tant elle est offusquee de langage. Aussi la pluspart de ceux qui iugent les discours des grans, deburoient dire : Je n'ay point entendu son propos, tant il estoit offusqué de grauité, de grandeur, & de majesté. Antisthenes suadoit vn iour aux Atheniens, qu'ils commandassent, que leurs asnes fussent aussi bien employez au labourage des terres, comme estoient les cheuaux : sur quoy il luy fut respondu, que cet animal n'estoit pas nay à vn tel seruice : C'est tout vn, repliqua il ; il n'y va que de vostre ordonnance : car les plus ignorans & incapables hommes, que vous employez aux commandemens de vos guerres, ne laissent pas d'en deuenir incontinent tres-dignes, par ce que vous les y employez. A quoy touche l'vsage de tant de peuples, qui canonisent le

qu'au lieu de nous apprendre l'excellence de l'auteur, ils nous apprennent leur propre ignorance. Cette exclamation est feure : Voyla qui est beau : ayant oüy vne entiere page de Vergile. Par là se fauuent les fins. Mais d'entreprendre à le fuiure par espaulettes, & de iugement expres & trié, vouloir remarquer par où vn bon autheur se surmonte : poisant les mots, les phrafes, les inuentions & ses diuerfes vertus, l'une apres l'autre : ostez vous de là. *Videndum est non modo, quid quisque loquatur, sed etiam, quid quisque sentiat, atque etiam qua de causa quisque sentiat.* L'oy iournellement dire à des fots, des mots non fots. Ils disent vne bonne chose : sçachons iusques où ils la cognoissent, voyons par où ils la tiennent. Nous les aydons à employer ce beau mot, & cette belle raison, qu'ils ne possèdent pas, ils ne l'ont qu'en garde : ils l'auront produite à l'auanture, & à tastons, nous la leur mettons en credit & en prix. Vous leur prestez la main. A quoy faire ? Ils ne vous en sçauent nul gré, & en deuiennent plus ineptes. Ne les secondez pas, laissez les aller : ils manieront cette matiere, comme gens qui ont peur de s'eschauder, ils n'osent luy changer d'affiete & de iour, ny l'enfoncer. Croulez la tant soit peu ; elle leur eschappe : ils vous la quittent, toute forte & belle qu'elle est. Ce sont belles armes : mais elles sont mal emmanchees. Combien de fois en ay-ie veu l'experience ? Or si vous venez à les esclaircir & confirmer, ils vous saisissent & defroben incontinent cet aduantage de vostre interpretation : C'estoit ce que ie voulois dire : voyla iustement ma conception : si ie ne l'ay ainsin exprimé, ce n'est que faute de langue. Soufflez. Il faut employer la malice mesme, à corriger cette fiere bestise. Le dogme

d'Hegeſias, Qu'il ne faut ny haïr, ny accuſer : ains inſtruire : a de la raiſon ailleurs. Mais icy, c'eſt iniuſtice & inhumanité de ſecourir & redreſſer celuy, qui n'en a que faire, & qui en vaut moins. L'ayme à les laiſſer embourber & empeſtrer encore plus qu'ils ne ſont : & ſi auant, ſ'il eſt poſſible, qu'en fin ils ſe recognoiſſent. La ſottiſe & deſreglement de ſens, n'eſt pas choſe gueriffable par vn traiçt d'aduertiſſement. Et pouuons proprement dire de cette reparation, ce que Cyrus reſpond à celuy, qui le preſſe d'enhorter ſon oſt, ſur le point d'une bataille : Que les hommes ne ſe rendent pas courageux & belliqueux ſur le champ, par vne bonne harangue : non plus qu'on ne deuient incontinent muſicien, pour ouyr vne bonne chanſon. Ce ſont apprentiſſages, qui ont à eſtre faiçts auant la main, par longue & conſtante inſtitution. Nous deuons ce ſoing aux noſtres, & cette aſſiduité de correction & d'inſtruction : mais d'aller preſcher le premier paſſant, & regenter l'ignorance ou ineptie du premier rencontré, c'eſt vn vſage auquel ie veux grand mal. Rarement le fais-ie, aux propos meſme qui ſe paſſent avec moy, & quitte pluſtoſt tout, que de venir à ces inſtructions reculees & magiſtrales. Mon humeur n'eſt propre, non plus à parler qu'à eſcrire, pour les principians. Mais aux choſes qui ſe diſent en commun, ou entre autres, pour fauces & abſurdes que ie les iuge, ie ne me iette iamais à la trauerſe, ny de parole ny de ſigne. Au demeurant rien ne me deſpite tant en la ſottiſe, que, dequoy elle ſe plaïſt plus, que aucune raiſon ne ſe peut raiſonnablement plaïre. C'eſt mal'heur, que la prudence vous deſſend de vous ſatisfaire & fier de vous, & vous en enuoye touſiours mal content & craintif : là où l'opiniaſtre & la temerité, rempliſſent leurs

hostes d'effouiffance & d'affeurance. C'est aux plus mal habiles de regarder les autres hommes par dessus l'espaule, s'en retournans tousiours du combat, pleins de gloire & d'allegresse. Et le plus souuent encore cette outrecuidance de langage & gayeté de visage, leur donne gaigné, à l'endroit de l'assistance, qui est communément foible & incapable de bien iuger, & discerner les vrays aduantages. L'obstination & ardeur d'opinion, est la plus seure preuue de bestise. Est il rien certain, resolu, dedaigneux, contemplatif, serieux, graue, comme l'asne? Pouuons nous pas meller au tiltre de la conference & communication, les deuis poinctus & coupez que l'allegresse & la priuauté introduit entre les amis, gauffans & gaudiffans plaifamment & vifurement les vns les autres? Exercice auquel ma gayeté naturelle me rend assez propre. Et s'il n'est aussi tendu & serieux que cet autre exercice que ie viens de dire, il n'est pas moins aigu & ingenieux, ny moins profitable, comme il sembloit à Lycurgus. Pour mon regard i'y apporte plus de liberté que d'esprit, & y ay plus d'heur que d'inuention : mais ie suis parfait en la souffrance : car i'endure la reuenche, non seulement aspre, mais indiscrete aussi, sans alteration. Et à la charge qu'on me fait, si ie n'ay dequoy repartir brusquement sur le champ, ie ne vay pas m'amusant à fuiure cette poincte, d'une contestation ennuyeuse & lasche, tirant à l'opiniastreté. Je la laisse passer, & baissant ioyeusement les oreilles, remets d'en auoir ma raison à quelque heure meilleure. Il n'est pas marchant qui tousiours gaigne. La plus part changent de visage, & de voix, où la force leur faut : & par vne importune cholere, au lieu de se venger, accusent leur foiblesse, ensemble & leur

impatience. En cette gaillardise nous pinçons par fois des cordes secrettes de nos imperfections, lesquelles, raffis, nous ne pouuons toucher sans offence : & nous entraduertissons vtilement de nos deffauts. Il y a d'autres ieux de main, indiscrets & aspres, à la Françoisise : que ie hay mortellement : i'ay la peau tendre & sensible : i'en ay veu en ma vie, enterrer deux Princes de nostre sang royal. Il fait laid se battre en s'esbatant. Au reste, quand ie veux iuger de quelqu'un, ie luy demande combien il se contente de soy : iusques où son parler ou sa besongne luy plaist. Ie veux euter ces belles excuses, Ie le fis en me iouant :

Ablatum mediis opus est incudibus istud :

ie n'y fus pas vne heure : ie ne l'ay reueu depuis. Or dis-ie, laissons donc ces pieces, donnez m'en vne qui vous represente bien entier, par laquelle il vous plaise qu'on vous mesure. Et puis : que trouuez vous le plus beau en vostre ouurage ? est-ce ou cette partie, ou cette cy ? la grace, ou la matiere, où l'inuention, ou le iugement, ou la science ? Car ordinairement ie m'apperçoy, qu'on faut autant à iuger de sa propre besongne, que de celle d'autrui. Non seulement pour l'affection qu'on y mesle : mais pour n'auoir la suffisance de la cognoistre & distinguer. L'ouurage de sa propre force, & fortune, peult seconder l'ouurier & le deuancer outre son inuention, & cognoissance. Pour moy, ie ne iuge la valeur d'autre besongne, plus obscurément que de la mienne : & loge les Essais tantost bas, tantost haut, fort inconstamment & douteusement. Il y a plusieurs liures viles à raison de leurs subiects, desquels l'au-

theur ne tire aucune recommandation : & des bons liures, comme des bons ouurages, qui font honte à l'ouurier. l'escriray la façon de nos conuiues, & de nos vestemens : & l'escriray de mauuaise grace : ie publieray les edicts de mon temps, & les lettres des Princes qui passent és mains publiques : ie feray vn abbrege sur vn bon liure (& tout abbrege sur vn bon liure est vn fort abbrege) lequel liure viendra à se perdre : & choses semblables. La posterité retirera vtilité singuliere de telles compositions : moy quel honneur, si ce n'est de ma bonne fortune? Bonne part des liures fameux, font de cette condition. Quand ie leuz Philippes de Comines, il y a plusieurs anneés, tresbon autheur certes; i'y remarquay ce mot pour non vulgaire : Qu'il se faut bien garder de faire tant de seruice à son maistre, qu'on l'empesche d'en trouuer la iuste recompence. Ie deuois louer l'inuention, non pas luy. Ie la rencontray en Tacitus, il n'y a pas long temps : *Beneficia eò vsque læta sunt, dum videntur exolui posse, vbi multum anteuenerè, pro gratia odium redditur.* Et Seneque vigoureulement. *Nam qui putat esse turpe non reddere, non vult esse cui reddat.* Q. Cicero d'un biais plus lasche : *Qui se non putat satisfacere, amicus esse nullo modo potest.* Le subiect selon qu'il est, peut faire trouuer vn homme sçauant & memoireux : mais pour iuger en luy les parties plus fiennes, & plus dignes, la force & beauté de son ame : il faut sçauoir ce qui est sien, & ce qui ne l'est point : & en ce qui n'est pas sien, combien on luy doit en consideration du choix, disposition, ornement, & langage qu'il aourny. Quoy, s'il y a emprunté la matiere, & empiré la forme? comme il aduiert souuent. Nous autres qui auons peu de

pratique avec les liures, sommes en cette peine : que quand nous voyons quelque belle inuention en vn poëte nouveau, quelque fort argument en vn prescheur, nous n'osons pourtant les en louer, que nous n'ayons prins instruction de quelque sçauant, si cette piece leur est propre, ou si elle est estrangere. Iusques lors ie me tiens tousiours sur mes gardes. Ie viens de courre d'un fil, l'histoire de Tacitus (ce qui ne m'aduient guere, il y a vingt ans que ie ne mis en liure, vne heure de suite) & l'ay fait, à la suasion d'un Gentil-homme que la France estime beaucoup : tant pour sa valeur propre, que pour vne constante forme de suffisance, & bonté, qui se voit en plusieurs freres qu'ils sont. Ie ne sçache point d'auteur, qui mesle à vn registre public, tant de consideration des mœurs, & inclinations particulieres. Et me semble le rebours, de ce qu'il luy semble à luy : qu'ayant specialement à suiure les vies des Empereurs de son temps, si diuerses & extremes, en toute sorte de formes : tant de notables actions, que nommément leur cruauté produisit en leurs subiects : il auoit vne matiere plus forte & attirante, à discourir & à narrer, que s'il eust eu à dire des batailles & agitations vniuerselles. Si que souuent ie le trouue sterile, courant par dessus ces belles morts, comme s'il craignoit nous fascher de leur multitude & longueur. Cette forme d'histoire, est de beaucoup la plus vile. Les mouuemens publics, dependent plus de la conduite de la Fortune, les priuez de la nostre. C'est plustost vn iugement, que deduction d'histoire : il y a plus de preceptes, que de contes : ce n'est pas vn liure à lire, c'est vn liure à estudier & apprendre : il est si plein de sentences, qu'il y en a à tort & à droict : c'est vne

pepinere de discours ethiques, & politiques, pour la prouision & ornement de ceux, qui tiennent quelque rang au maniemment du monde. Il plaide tousiours par raisons solides & vigoureuses, d'une façon poinctue, & subtile : suyuant le stile affecté du siecle. Ils aymoyent tant à s'enfler, qu'ou ils ne trouuoient de la poincte & subtilité aux choses, ils l'empruntoient des parolles. Il ne retire pas mal à l'escire de Seneque. Il me semble plus charnu, Seneque plus aigu. Son seruice est plus propre à vn estat trouble & malade, comme est le nostre present : vous diriez souuent qu'il nous peinct & qu'il nous pinse. Ceux qui doubtent de sa foy, s'accusent assez de luy vouloir mal d'ailleurs. Il a les opinions saines, & pend du bon party aux affaires Romaines. Je me plains vn peu toutesfois, dequoy il a iugé de Pompeius plus aigrement, que ne porte l'aduis des gens de bien, qui ont vescu & traité avec luy : de l'auoir estimé dutout pareil à Marius & à Sylla, sinon d'autant qu'il estoit plus couuert. On n'a pas exempté d'ambition, son intention au gouuernement des affaires, ny de vengeance : & ont crainct ses amis mesmes, que la victoire l'eust emporté outre les bornes de la raison : mais non pas iusques à vne mesure si effrenee. Il n'y a rien en sa vie, qui nous ayt menassé d'une si expresse cruauté & tyrannie. Encores ne faut-il pas contrepoiser le soupçon à l'euidence : ainsi ie ne l'en crois pas. Que ses narrations soient naifues & droictes, il se pourroit à l'auanture argumenter de cecy mesme : Qu'elles ne s'appliquent pas tousiours exactement aux conclusions de ses iugemens : lesquels il suit selon la pente qu'il y a prise, souuent outre la matiere qu'il nous montre : laquelle il n'a daigné incliner d'un seul

air. Il n'a pas befoin d'excuse, d'auoir approuué la religion de son temps, selon les loix qui luy commandoient, & ignoré la vraye. Cela, c'est son malheur, non pas son defaut. J'ay principalement confideré son iugement, & n'en fuis pas bien esclairey par tout. Comme ces mots de la lettre que Tibere vieil & malade, enuoyoit au Senat : Que vous escriray-ie messieurs, ou comment vous escriray-ie, ou que ne vous escriray-ie point, en ce temps? Les dieux, & les deesses me perdent pirement, que ie ne me sens tous les iours perir, si ie le sçay. Je n'apperçoy pas pourquoy il les applique si certainement, à vn poignant remors qui tourmente la conscience de Tibere. Aumoins lors que i'estois à mesme, ie ne le vis point. Cela m'a semblé aussi vn peu lasche, qu'ayant eu à dire, qu'il auoit exercé certain honorable magistrat à Rome, il s'aille excusant que ce n'est point par ostentation, qu'il l'a dict. Ce traict me semble bas de poil, pour vne ame de sa sorte. Car le n'oser parler rondement de foy, accuse quelque faute de cœur. Vn iugement roide & hautain, & qui iuge sainement, & seurement : il vse à toutes mains, des propres exemples, ainsi que de chose estrangere : & tesmoigne franchement de luy, comme de chose tierce. Il faut passer par dessus ces regles populaires, de la ciuilité, en faueur de la verité, & de la liberté. J'ose non seulement parler de moy : mais parler seulement de moy. Je fouruoye quand i'escry d'autre chose, & me desrobe à mon subiect. Je ne m'ayme pas si indiscretement, & ne fuis si attaché & meslé à moy, que ie ne me puisse distinguer & confiderer à quartier : comme vn voyfin, comme vn arbre. C'est pareillement faillir, de ne veoir pas iusques où on vaut, ou d'en dire

plus qu'on n'en void. Nous deuons plus d'amour à Dieu, qu'à nous, & le cognoissons moins, & si en parlons tout nostre saoul. Si ses escrits rapportent aucune chose de ses conditions : c'estoit vn grand personnage, droicturier, & courageux, non d'vne vertu superstitieuse, mais philosophique & genereuse. On le pourra trouuer hardy en ses tesmoignages. Comme où il tient, qu'vn soldat portant vn fais de bois, ses mains se roidirent de froid, & se collerent à sa charge, si qu'elles y demurerent attachees & mortes, s'estants departies des bras. I'ay accoustumé en telles choses, de plier sous l'autorité de si grands tesmoings. Ce qu'il dit aussi, que Vespasian, par la faueur du Dieu Serapis, guarit en Alexandrie vne femme aueugle, en luy oignant les yeux de sa salie : & ie ne sçay quel autre miracle : il le fait par l'exemple & deuoir de tous bons historiens. Ils tiennent registres des euenements d'importance. Parmy les accidens publics, sont aussi les bruits & opinions populaires. C'est leur rolle, de reciter les communes creances, non pas de les regler. Cette part touche les theologiens, & les philosophes directeurs des consciences. Pourtant tres-sagement, ce sien compagnon & grand homme comme luy : *Equidem plura transcribo quàm credo : Nam nec affirmare sustineo, de quibus dubito, nec subducere quæ accepi :* & l'autre : *Hæc neque affirmare neque refellere operæ precium est : famæ rerum standum est.* Et escriuant en vn siecle, auquel la creance des prodiges commençoit à diminuer, il dit ne vouloir pourtant laisser d'inferer en ses annales, & donner pied à chose receuë de tant de gens de bien, & avec si grande reuerence de l'antiquité. C'est tresbien dict. Qu'ils nous rendent l'histoire, plus selon qu'ils re-

çoquent, que selon qu'ils estiment. Moy qui suis Roy de la matiere que ie traite, & qui n'en dois compte à personne, ne m'en crois pourtant pas du tout. Je hazarde souuent des boutades de mon esprit, desquelles ie me deffie : & certaines finesses verbales dequoy ie secoue les oreilles : mais ie les laisse courir à l'auanture, ie voys qu'on s'honore de pareilles choses : ce n'est pas à moy seul d'en iuger. Je me presente debout ; & couché ; le deuant & le derriere ; à droite & à gauche ; & en tous mes naturels plis. Les esprits, voire pareils en force, ne sont pas tousiours pareils en application & en goust. Voyla ce que la memoire m'en presente en gros, & assez incertainement. Tous iugemens en gros, sont lasches & imparfaits.





De la vanité.

CHAPITRE IX.



L n'en est à l'auanture aucune plus expresse, que d'en escrire si vainement. Ce que la diuinité nous en a si diuinement exprimé, deburoit estre soigneusement & continuellement medité, par les gens d'entendement. Qui ne voit, que i'ay pris vne route, par laquelle sans cesse & sans trauail, i'iray autant, qu'il y aura d'ancre & de papier au monde? Je ne puis tenir registre de ma vie, par mes actions : Fortune les met trop bas : ie le tiens par mes fantasies. Si ay-ie veu vn Gentilhomme, qui ne communiquoit sa vie, que par les operations de son ventre. Vous voyiez chez luy, en montre, vn ordre de bassins de sept ou huit iours. C'estoit son estude, ses discours. Tout autre propos luy pouoit. Ce sont icy, vn peu plus ciuilement, des excremens d'un vieil esprit : dur tantost, tantost lasche : & tousiours indigeste. Et quand seray-ie à bout de representer vne continuelle agitation & mutation de mes pensees, en quelque matiere qu'elles tombent, puisque Diomedes remplit six mille liures, du seul subiect de la grammaire? Que doit produire

le babil, puisque le begaiement & desnouement de la langue, estouffa le monde d'une si horrible charge de volumes ? Tant de paroles, pour les paroles seules. O Pythagoras, que n'esconjuras-tu cette tempeste ! On accusoit vn Galba du temps passé, de ce qu'il viuoit oyseusement. Il respondit, que chacun deuoit rendre raison de ses actions, non pas de son sejour. Il se trompoit : car la iustice a cognoissance & animaduersion aussi, sur ceux qui chaument. Mais il y deuroit auoir quelque coërtion des loix, contre les escriuains ineptes & inutiles, comme il y a contre les vagabons & faineants. On banniroit des mains de nostre peuple, & moy, & cent autres. Ce n'est pas moquerie. L'escriuailerie semble estre quelque symptome d'un siecle debordé. Quand escriuismes nous tant, que depuis que nous sommes en trouble ? quand les Romains tant, que lors de leur ruyne ? Outre-ce que l'affinement des esprits, ce n'en est pas l'affaigissement, en vne police : cet embefognement oisif, naist de ce que chacun se prent laschement à l'office de sa vacation, & s'en desbauche. La corruption du siecle se fait, par la contribution particuliere de chacun de nous. Les vns y conferent la trahison, les autres l'iniustice, l'irreligion, la tyrannie, l'auarice, la cruauté, selon qu'ils sont plus puissans : les plus foibles y apportent la sottise, la vanité, l'oisuete : desquels ie suis. Il semble que ce soit la saison des choses vaines, quand les dommageables nous pressent. En vn temps, où le meschamment faire est si commun, de ne faire qu'inutilement, il est comme louable. Je me console que ie seray des derniers, sur qui il faudra mettre la main. Ce pendant qu'on pouruoirà aux plus pressans, j'auray loy de m'amender. Car il me semble

que ce seroit contre raison, de pourfuyure les menus inconueniens, quand les grands nous infestent. Et le medecin Philotimus, à vn qui luy presentoit le doigt à penser, auquel il recognoissoit au visage, & à l'haleine, vn vlcere aux poulmons : Mon amy, fit-il, ce n'est pas à cette heure le temps de t'amuser à tes ongles. Je vis pourtant sur ce propos, il y a quelques annees, qu'un personnage, de qui i'ay la memoire en recommandation singuliere, au milieu de nos grands maux, qu'il n'y auoit ny loy, ny iustice, ny magistrat, qui fist son office : non plus qu'à cette heure : alla publier ie ne sçay quelles chetiues reformatiōs, sur les habillemens, la cuisine & la chicane. Ce sont amusoires dequoy on paist vn peuple mal-mené, pour dire qu'on ne l'a pas du tout mis en oubly. Ces autres font de mesme, qui s'arrestent à deffendre à toute instance, des formes de parler, les dāces, & les ieux, à vn peuple abandonné à toute sorte de vices execrables. Il n'est pas temps de se lauer & decrasser, quand on est atteint d'une bonne fiēure. C'est à faire aux seuls Spartiates, de se mettre à se peigner & testonner, sur le point qu'ils se vont precipiter à quelque extreme hazard de leur vie. Quant à moy, i'ay cette autre pire coustume, que si i'ay vn escarpin de trauers, ie laisse encores de trauers, & ma chemise & ma cappe : ie desdaigne de m'amender à demy. Quand ie suis en mauuais estat, ie m'acharne au mal. Je m'abandonne par desespoir, & me laisse aller vers la chēute, & iette, comme lon dit, le manche apres la coignée. Je m'obstine à l'empirement : & ne m'estime plus digne de mon soing. Ou tout bien ou tout mal. Ce m'est faueur, que la desolatiō de cet estat, se rencontre à la desolatiō de mon aage. Je souffre plus

volontiers, que mes maux en soient rechargés, que si mes biens en eussent esté troublez. Les paroles que i'exprime au mal-heur, sont paroles de despit. Mon courage se herisse au lieu de s'applatir. Et au rebours des autres, ie me trouue plus deuost, en la bonne, qu'en la mauuaïse fortune : suyuant le precepte de Xenophon, sinon suyuant sa raison. Et fais plus volontiers les doux yeux au ciel, pour le remercier, que pour le requerir. L'ay plus de soing d'augmenter la santé, quand elle me rit, que ie n'ay de la remettre, quand ie l'ay escartee. Les prosperitez me seruent de discipline & d'instruction, comme aux autres, les aduersitez & les verges. Comme si la bonne fortune estoit incompatible avec la bonne conscience : les hommes ne se rendent gents de bien, qu'en la mauuaïse. Le bon heur m'est vn singulier aiguillon, à la moderation, & modestie. La priere me gaigne, la menace me rebuté, la faueur me ploye, la crainte me roydit. Parmy les conditions humaines, cette-cy est assez commune, de nous plaire plus des choses estrangeres que des nostres, & d'aymer le remuement & le changement.

*Ipsa dies ideo nos grato perluit haustu,
Quòd permutatis hora recurrit equis.*

I'en tiens ma part. Ceux qui suyuent l'autre extremité, de s'aggreer en eux-mêmes : d'estimer ce qu'ils tiennent au dessus du reste : & de ne recognoistre aucune forme plus belle, que celle qu'ils voyent : s'ils ne sont plus aduisez que nous, ils sont à la verité plus heureux. Ie n'enuie point leur sagesse, mais ouy leur bonne fortune. Cette humeur auide des choses nouvelles & incognues, ayde bien à nourrir en moy,

le desir de voyager : mais assez d'autres circonstances y conferent. Je me destourne volontiers du gouuernement de ma maison. Il y a quelque commodité à commander, fust ce dans vne grange, & à estre obey des siens. Mais c'est vn plaisir trop vniforme & languissant. Et puis il est par necessité meslé de plusieurs pensements fascheux. Tantost l'indigence & l'oppression de vostre peuple : tantost la querelle d'entre vos voyfins : tantost l'vsurpation qu'ils font sur vous, vous afflige :

*Aut verberatæ grandine vineæ,
Fundusque mendax, arbore nunc aquas
Culpante, nunc torrentia agros
Sydera, nunc hyemes iniquas.*

Et qu'à peine en six mois, enuoyera Dieu vne saison, dequoy vostre receueur se contente bien à plain : & que si elle sert aux vignes, elle ne nuyse aux prez.

*Aut nimis torret feruoribus ætherius sol,
Aut subiti perimunt imbres, gelidæque pruinae,
Flabræque ventorum violento turbine vexant.*

Ioinct le foulier neuf, & bien formé, de cet homme du temps passé, qui vous blesse le pied. Et que l'estranger n'entend pas, combien il vous couste, & combien vous prestez, à maintenir l'apparence de cet ordre, qu'on voit en vostre famille : & qu'à l'auanture l'achetez vous trop cher. Je me suis pris tard au mefnage. Ceux que Nature auoit fait naistre auant moy, m'en ont deschargé long temps. L'auois def-jà pris vn autre ply, plus selon ma complexion. Toutesfois de ce que i'en ay veu, c'est vn' occupation plus empeschante, que difficile. Quiconque est

capable d'autre chose, le fera bien aisément de celle là. Si ie cherchois à m'enrichir, cette voye me sembleroit trop longue. L'eusse seruy les Roys, trafique plus fertile que toute autre. Puis que ie ne pretens acquerir que la reputation de n'auoir rien acquis, non plus que dissipé : conformément au reste de ma vie, impropre à faire bien & à faire mal qui vaille : & que ie ne cherche qu'à passer, ie le puis faire, Dieu mercy, sans grande attention. Au pis aller, courez tousiours par retranchement de despence, deuant la pauureté. C'est à quoy ie m'attends, & de me reformer, auant qu'elle m'y force. L'ay estably au demeurant, en mon ame, assez de degrez, à me passer de moins, que ce que i'ay. Je dis, passer avec contentement. *Non abstinatione census, verum victu atque cultu, terminatur pecuniæ modus.* Mon vray besoing n'occupe pas si iustement tout mon auoir, que sans venir au vif, Fortune n'ait où mordre sur moy. Ma presence, toute ignorante & desdaigneuse qu'elle est, preste grande espaule à mes affaires domestiques. Je m'y employe, mais despiteusement. Ioin&t que i'ay cela chez moy, que pour brusler à part, la chandelle par mon bout, l'autre bout ne s'espargne de rien. Les voyages ne me blessent que par la despence, qui est grande, & outre mes forces : ayant accoustumé d'y estre avec equippage non nécessaire seulement, mais aussi honneste. Il me les en faut faire d'autant plus courts, & moins frequents : & n'y employe que l'escume, & ma reserue, temporisant & differant, selon qu'elle vient. Je ne veux pas, que le plaisir de me promener, corrompe le plaisir de me retirer. Au rebours, i'entens qu'ils se nourrissent, & fauorisent l'un l'autre. La Fortune m'a aydé en cecy : que puis que ma principale pro-

feſſion en cette vie, eſtoit de la viure mollement, & pluſtoſt laſchement qu'affaireuſement ; elle m'a oſté le beſoing de multiplier en richesses, pour pouruoir à la multitude de mes heritiers. Pour vn, s'il n'a aſſez de ce, dequoy i'ay eu ſi plantureuſement aſſez, à ſon dam. Son imprudence ne meritera pas, que ie luy en deſire d'auantage. Et chaſcun, ſelon l'exemple de Phocion, pouruoid ſuffiſamment à ſes enfans, qui leur pouruoid, entant qu'ils ne luy ſont diſſemblables. Nullement ſeroy-ie d'aduſ du fait de Crates. Il laiſſa ſon argent chez vn banquier, avec cette condition : Si ſes enfans eſtoient des ſots, qu'il le leur donnaſt ; s'ils eſtoient habiles, qu'il le diſtribuaſt aux plus ſots du peuple. Comme ſi les ſots, pour eſtre moins capables de s'en paſſer, eſtoient plus capables d'uſer des richesses. Tant y a, que le dommage qui vient de mon abſence, ne me ſemble point meriter, pendant que i'auray dequoy le porter, que ie reſuſe d'accepter les occaſions qui ſe preſentent, de me diſtraire de cette aſſiſtance penible. Il y a touſiours quelque piece qui va de trauers. Les negoces, tantost d'une maiſon, tantost d'une autre, vous tiraſſent. Vous eſclairez toutes choſes de trop pres. Voſtre perſpicacité vous nuit icy, comme ſi fait elle ailleurs. Ie me deſrobe aux occaſions de me faſcher : & me deſtourne de la cognoiſſance des choſes, qui vont mal. Et ſi ne puis tant faire, qu'à toute heure ie ne heurte chez moy, en quelque rencontre, qui me deſplaie. Et les fripponneries, qu'on me cache le plus, ſont celles que ie ſçay le mieux. Il en eſt que pour faire moins mal, il faut ayder ſoy meſme à cacher. Vaines pointures : vaines par fois, mais touſiours pointures. Les plus menus & graiſles empeſchemens, ſont les plus perſans. Et

comme les petites lettres lassent plus les yeux, aussi nous piquent plus les petites affaires : la tourbe des menus maux, offense plus, que la violence d'un, pour grand qu'il soit. A mesure que ces espines domestiques sont drues & desliées, elles nous mordent plus aigu, & sans menace, nous surprenant facilement à l'impourveu. Je ne suis pas philosophe. Les maux me fouillent selon qu'ils poisent : & poisent selon la forme, comme selon la matière : & fouent plus. J'y ay plus de perspicacité que le vulgaire, si j'y ay plus de patience. En fin s'ils ne me blessent, ils me poisent. C'est chose tendre que la vie, & assée à troubler. Depuis que j'ay le visage tourné vers le chagrin, *nemo enim resistit sibi cum ceperit impelli*, pour forte cause qui m'y ayt porté : j'irrite l'humeur de ce côté là : qui se nourrit après, & s'exaspère, de son propre branle, attirant & ammoncellant une matière sur autre, dequoy se paistre.

Stillicidij casus lapidem cauat.

Ces ordinaires gouttières me mangent, & m'ulcerent. Les inconueniens ordinaires ne sont iamais légers. Ils sont continuels & irréparables, quand ils naissent des membres du ménage, continuels & inséparables. Quand je considère mes affaires de loing, & en gros ; je trouve, soit pour n'en auoir la mémoire gueres exacte, qu'ils sont allez iusques à cette heure, en prosperant, outre mes contes & mes raisons. J'en retire ce me semble plus, qu'il n'y en a : leur bon heur me trahit. Mais suis-je au dedans de la besongne, voy-je marcher toutes ces parcelles ?

Tum verò in curas animum diducimus omnes :

politique aura bel accuser la bassesse & sterilité de mon occupation, si i'en puis vne fois prendre le gouft, comme luy. Je suis de cet auis, que la plus honorable vacation, est de seruir au publicq, & estre vtile à beaucoup. *Fructus enim ingenij & virtutis, omnifque præstantiæ tum maximus accipitur, quum in proximum quemque confertur.* Pour mon regard ie m'en despars : partie par conscience : (car par où ie vois le poix qui touche telles vacations, ie vois aussi le peu de moyen que i'ay d'y fournir : & Platon maistre ouurier en tout gouvernement politique, ne laissa de s'en abstenir) partie par poltronerie. Je me contente de iouir le monde, sans m'en empresser : de viure vne vie, seulement excusable : & qui seulement ne poise, ny à moy, ny à autrui. Iamais homme ne se laissa aller plus plainement & plus lâchement, au soing & gouvernement d'un tiers, que ie ferois, si i'auois à qui. L'un de mes souhaits pour cette heure, ce seroit de trouuer vn gendre, qui sceust appaster commodément mes vieux ans, & les endormir : entre les mains de qui ie déposasse en toute souueraineté, la conduite & vsage de mes biens : qu'il en fist ce que i'en fais, & gaignast sur moy ce que i'y gaigne : pourueu qu'il y apportast vn courage vrayement recognoissant, & amy. Mais quoy? nous viuons en vn monde, où la loyauté des propres enfans est incognue. Qui a la garde de ma bourse en voyage, il l'a pure & sans contreroolle : aussi bien me tromperoit il en comptant. Et si ce n'est vn diable, ie l'oblige à bien faire, par vne si abandonnee confiance. *Multi fallere docuerunt, dum timent falli, & aliis ius peccandi suspicando fecerunt.* La plus commune seureté, que ie prens de mes gens, c'est la mesconnoissance. Je ne presume les vices qu'après

que ie les ay veuz : & m'en fie plus aux ieunes, que i'estime moins gastez par mauuais exemple. I'oy plus volontiers dire, au bout de deux mois, que i'ay despandu quatre cens escus, que d'auoir les oreilles battues tous les soirs, de trois, cinq, sept. Si ay-ie esté desrobé aussi peu qu'un autre de cette sorte de larrecin. Il est vray, que ie preste la main à l'ignorance. Je nourris à escient, aucunement trouble & incertaine la science de mon argent. Iusques à certaine mesure, ie suis content, d'en pouuoir doubter. Il faut laisser vn peu de place à la desloyauté, ou imprudence de vostre valet. S'il nous en reste en gros, dequoy faire nostre effect, cet excez de la liberalité de la Fortune, laissons le vn peu plus courre à sa mercy. La portion du glanneur. Apres tout, ie ne prise pas tant la foy de mes gents, comme ie mesprise leur iniure. O le vilain & sot estude, d'estudier son argent, se plaie à le manier & recomter ! c'est par là, que l'auarice fait ses approches. Depuis dixhui& ans, que ie gouuerne des biens, ie n'ay sceu gaigner sur moy, de voir, ny tiltres, ny mes principaux affaires, qui ont necessairement à passer par ma science, & par mon soing. Ce n'est pas vn mespris philosophique, des choses transitoires & mondaines : ie n'ay pas le goust si espuré, & les prise pour le moins ce qu'elles valent : mais certes c'est paresse & negligence inexcusable & puerile. Que ne feroiy ie plustost que de lire vn contract ? Et plustost, que d'aller secoüant ces paperasses poudreuses, serf de mes negoces ? ou encore pis, de ceux d'autrui, comme font tant de gents à prix d'argent ? Je n'ay rien cher que le soucy & la peine : & ne cherche qu'à m'anonchalir & auachir. I'estoy, ce croy-je, plus propre, à viure de la fortune d'autrui, s'il se

pouuoit, sans obligation & sans seruitude. Et si ne sçay, à l'examiner de pres, si selon mon humeur & mon sort, ce que i'ay à souffrir des affaires, & des seruiteurs, & des domestiques, n'a point plus d'abiection, d'importunité, & d'aigreur, que n'auroit la suite d'un homme, nay plus grand que moy, qui me guidast un peu à mon aise. *Seruitus obedientia est fracti animi & abiectionis, arbitrio carentis suo.* Crates fit pis, qui se ietta en la franchise de la pauureté, pour se deffaire des indignitez & cures de la maison. Cela ne ferois-je pas. Je hay la pauureté à pair de la douleur : mais ouy bien, changer cette sorte de vie, à une autre moins braue, & moins affaireuse. Absent, ie me despoille de tous tels pensemens : & fentirois moins lors la ruyne d'une tour, que ie ne fais present, la cheute d'une ardoyse. Mon ame se démesle bien aysément à part, mais en presence, elle souffre, comme celle d'un vigneron. Une rene de trauers à mon cheual, un bout d'estriuiere qui batte ma iambe, me tiendront tout un iour en eschec. L'esleue assez mon courage à l'encontre des inconueniens, les yeux, ie ne puis.

Sensus ô superi sensus !

Je suis chez moy, respondant de tout ce qui va mal. Peu de maistres, ie parle de ceux de moyenne condition, comme est la mienne : & s'il en est, ils sont plus heureux : se peuuent tant reposer, sur un second, qu'il ne leur reste bonne part de la charge. Cela oste volontiers quelque chose de ma façon, au traitement des suruenants : & en ay peu arrester quelcun par aduenture plus par ma cuisine, que par ma grace : comme font les facheux : & oste beaucoup du plai-

sir que ie deurois prendre chez moy, de la visitation & assemblees de mes amys. La plus sotte contenance d'un Gentil-homme en sa maison, c'est de le voir empesché du train de sa police; parler à l'oreille d'un valet, en menacer un autre des yeux. Elle doit couler insensiblement, & representer un cours ordinaire. Et treuve laid, qu'on entretienne ses hostes, du traitement qu'on leur fait, autant à l'excuser qu'à le vanter. l'ayme l'ordre & la netteté,

*☞ cantharus ☞ lanx,
Offendunt mihi me,*

au prix de l'abondance : & regarde chez moy exactement à la nécessité, peu à la parade. Si un valet se bat chez autrui, si un plat se verse, vous n'en faites que rire : vous dormez ce pendant que monsieur renga avec son maistre d'hôtel, son faict, pour vostre traitement du lendemain. l'en parle selon moy. Ne laissant pas en general d'estimer, combien c'est un doux amusement à certaines natures, qu'un ménage paisible, prospere, conduit par un ordre réglé. Et ne voulant attacher à la chose, mes propres erreurs & inconuenients. Ny desdire Platon, qui estime la plus heureuse occupation à chascun, faire ses particuliers affaires sans iniustice. Quand ie voyage, ie n'ay à penser qu'à moy, & à l'employe de mon argent : cela se dispose d'un seul precepte. Il est requis trop de parties à amasser : ie n'y entens rien. A despendre, ie m'y entens un peu, & à donner iour à ma despence : qui est de vray son principal vsage. Mais ie m'y attens trop ambitieusement; qui la rend inegalle & difforme : & en outre immoderee en l'un & l'autre visage. Si elle paroist, si elle sert,

ie m'y laisse indiscretement aller : & me resserre autant indiscretement, si elle ne luyt, & si elle ne me rit. Qui que ce soit, ou art, ou nature, qui nous imprime cette condition de viure, par la relation à autrui, nous fait beaucoup plus de mal que de bien. Nous nous defraudons de nos propres vtilitez, pour former les apparences à l'opinion commune. Il ne nous chaut pas tant, quel soit nostre estre, en nous, & en effect, comme quel il soit, en la cognoissance publique. Les biens mesmes de l'esprit, & la sagesse, nous semblent sans fruiet, si elle n'est iouye que de nous : si elle ne se produict à la veuë & approbation estrangere. Il y en a, de qui l'or coule à gros bouillons, par des lieux fouterreins, imperceptiblement : d'autres l'estendent tout en lames & en feuilles. Si qu'aux vns les liars valent escuz, aux autres le contraire : le monde estimant l'emploite & la valeur, selon la montre. Tout soing curieux autour des richesses sent à l'auarice. Leur dispensation mesme, & la liberalité trop ordonnee & artificielle : elles ne valent pas vne aduertance & sollicitude penible. Qui veut faire sa despenfe iuste, la fait estroite & contrainte. La garde, ou l'emploite, sont de foy choses indifferentes, & ne prennent couleur de bien ou de mal, que selon l'application de nostre volonté. L'autre cause qui me conuie à ces promenades, c'est la disconuenance aux mœurs presentes de nostre estat : ie me consolerois aysement de cette corruption, pour le regard de l'interest public :

*peioraque sæcula ferri
Temporibus, quorum scelerei non inuenit ipsa
Nomen, & à nullo posuit natura metallo :*

mais pour le mien, non. l'en suis en particulier trop

pressé. Car en mon voisinage, nous sommes tantost par la longue licence de ces guerres ciuiles, enuieillis en vne forme d'estat si delbordee,

Quippe vbi fas versum atque nefas :

qu'à la verité, c'est merueille qu'elle se puisse maintenir.

*Armati terram exercent, sempérque recentes
Conuetfare iuuat prædas, & viuere raptò.*

En fin ie vois par nostre exemple, que la société des hommes se tient & se coust, à quelque prix que ce soit. En quelque assiette qu'on les couche, ils s'appi-
lent, & se rengent, en se remuant & s'entassant :
comme des corps mal vnís qu'on empoche sans or-
dre, trouuent d'eux mesmes la façon de se ioindre,
& s'emplacer, les vns parmy les autres : souuent
mieux, que l'art ne les eust sçeu disposer. Le Roy
Philippus fit vn amas, des plus meschans hommes
& incorrigibles qu'il peut trouuer, & les logea tous
en vne ville, qu'il leur fit bastir, qui en portoit le
nom. L'estime qu'ils dresserent des vices mesme,
vne contexture politique entre eux, & vne commode
& iuste société. Je vois, non vne action, ou trois, ou
cent, mais des mœurs, en vsage commun & receu,
si farouches, en inhumanité sur tout & desloyauté,
qui est pour moy la pire espece des vices, que ie
n'ay point le courage de les conceuoir sans horreur :
et les admire, quasi autant que ie les deteste. L'exer-
cice de ces meschancetez insignes, porte marque de
vigueur & force d'ame, autant que d'erreur & des-
reglement. La necessité compose les hommes & les

assemble. Cette cousture fortuite se forme apres en loix. Car il en a esté d'aussi sauuages qu'aucune opinion humaine puisse enfanter, qui toutesfois ont maintenu leurs corps, auec autant de fanté & longueur de vie, que celles de Platon & Aristote scauroient faire. Et certes toutes ces descriptions de police, feintes par art, se trouuent ridicules, & ineptes à mettre en pratique. Ces grandes & longues altercations, de la meilleure forme de société : & des regles plus commodés à nous attacher, sont altercations propres seulement à l'exercice de nostre esprit. Comme il se trouue es arts, plusieurs subiects qui ont leur essence en l'agitation & en la dispute, & n'ont aucune vie hors de là. Telle peinture de police, seroit de mise, en vn nouueau monde : mais nous prenons vn monde desia fait & formé à certaines coustumes. Nous ne l'engendrons pas comme Pyrrha, ou comme Cadmus. Par quelque moyen que nous ayons loy de le redresser, & renger de nouueau, nous ne pouuons guerres le tordre de son accoustumé ply, que nous ne rompions tout. On demandoit à Solon, s'il auoit estably les meilleures loyx qu'il auoit peu aux Athéniens : Ouy bien, respondit-il, de celles qu'ils eussent receuës. Varro s'excuse de pareil air : Que s'il auoit tout de nouueau à escrire de la religion, il diroit ce, qu'il en croid. Mais, estant desia receuë, il en dira selon l'vsage, plus que selon nature. Non par opinion, mais en verité, l'excellente & meilleure police, est à chacune nation, celle sous laquelle elle s'est maintenuë. Sa forme & commodité essentielle despend de l'vsage. Nous nous desplaisons volontiers de la condition presente. Mais ie tiens pourtant, que d'aller desirant le commandement de peu, en vn estat populaire : ou en la mo-

narchie, vne autre espece de gouuernement, c'est vice & folie.

*Ayme l'estat tel que tu le vois estre,
S'il est royal, ayme la royauté,
S'il est de peu, ou bien communauté,
Ayme l'aussi, car Dieu t'y a fait naistre.*

Ainsin en parloit le bon monsieur de Pibrac, que nous venons de perdre : vn esprit si gentil, les opinions si saines, les mœurs si douces. Cette perte, & celle qu'en mesme temps nous auons faite de monsieur de Foix, sont pertes importantes à nostre couronne. Je ne sçay s'il reste à la France dequoy substituer vne autre couppe, pareille à ces deux Gascons, en sincérité, & en suffisance, pour le conseil de nos Roys. C'estoyent ames diuersement belles, & certes selon le siecle, rares & belles, chacune en sa forme. Mais qui les auoit logees en cet aage, si desconuenables & si disproportionnees à nostre corruption, & à nos tempestes ? Rien ne presse vn estat que l'innouation : le changement donne seul forme à l'injustice, & à la tyrannie. Quand quelque piece se démanche, on peut l'estayer : on peut s'opposer à ce, que l'alteration & corruption naturelle à toutes choses, ne nous esloigne trop de nos commencemens & principes. Mais d'entreprendre à refondre vne si grande masse, & à changer les fondemens d'un si grand bastiment, c'est à faire à ceux qui pour descrasser effacent : qui veulent amender les deffauts particuliers, par vne confusion vniuerselle, & guarir les maladies par la mort : *non tam commutandarum quam euertendarum rerum cupidi*. Le monde est inepte à se guarir. Il est si impatient de ce qui le presse, qu'il ne vise qu'à s'en deffaire, sans regarder à quel

prix. Nous voyons par mille exemples, qu'il se guarit ordinairement à ses despens : la descharge du mal present, n'est pas guarison, s'il n'y a en general amendement de condition. La fin du chirurgien, n'est pas de faire mourir la mauuaise chair : ce n'est que l'acheminement de sa cure : il regarde au delà, d'y faire renaistre la naturelle, & rendre la partie à son deu estre. Quiconque propose seulement d'emporter ce qui le masche, il demeure court : car le bien ne succede pas necessairement au mal : vn autre mal luy peut succeder ; & pire. Comme il aduint aux tueurs de Cesar, qui ietterent la chose publique à tel point, qu'ils eurent à se repentir de s'en estre meslez. A plusieurs depuis, iusques à nos siecles, il est aduenue de mesmes. Les François mes contemporanees sçauent bien qu'en dire. Toutes grandes mutations esbranlent l'estat, & le desordonnent. Qui viseroit droit à la guarison, & en consulteroit auant toute œuvre, se refroidiroit volontiers d'y mettre la main. Pacuius Calaius corrigea le vice de ce proceder, par vn exemple insigne. Ses concitoyens estoient mutinez contre leurs magistrats : luy personnage de grande autorité en la ville de Capouë, trouua vn iour moyen d'enfermer le Senat dans le Palais : & conuoquant le peuple en la place, leur dit : Que le iour estoit venu, auquel en pleine liberté ils pouuoient prendre vengeance des tyrans qui les auoyent si long temps oppressez, lesquels il tenoit à sa mercy seuls & desarmez. Fut d'aduis, qu'au fort on les tiraist hors, l'vn apres l'autre : & de chacun on ordonnaist particulièrement : faisant sur le champ, executer ce qui en seroit decreté : pourueu aussi que tout d'vn train ils aduisassent d'establir quelque homme de bien, en la place du condamné, affin qu'elle ne demeurast

vuide d'officier. Ils n'eurent pas plustost ouy le nom d'un Sénateur, qu'il s'esleua vn cry de mescontentement vniuersel à l'encontre de luy : Je voy bien, dit Pacuius, il faut demettre cettuy-cy : c'est vn meschant : ayons en vn bon en change. Ce fut vn prompt silence : tout le monde se trouuant bien empesché au choix. Au premier plus effronté, qui dit le sien : voyla vn consentement de voix encore plus grand à refuser celuy là. Cent imperfections, & iustes causes, de le rebuter. Ces humeurs contradictoires, s'estans eschauffees, il aduint encore pis du second Sénateur, & du tiers. Autant de discorde à l'election, que de conuenance à la demission. S'estans inutilement laissez à ce trouble, ils commencent, qui deçà, qui delà, à se desrober peu à peu de l'assemblée : rapportant chacun cette resolution en son ame, que le plus vieil & mieux cogneu mal, est tousiours plus supportable, que le mal recent & inexperimenté. Pour nous voir bien piteusement agitez : car que n'auons nous fait ?

*Eheu cicatricum & sceleris pudet,
Fratrumque : quid nos dura refugimus
Aetas ? quid intactum nefasti
Liquimus ? vnde manus iuuentus
Metu Deorum continuit ? quibus
Pepercit aris ?*

ie ne vay pas soudain me resoluant,

*ipsa si velit salus,
Seruare prorsus non potest hanc familiam.*

Nous ne sommes pas pourtant à l'auanture, à nostre dernier periode. La conseruation des estats, est

chose qui vray-semblablement surpasse nostre intelligence. C'est, comme dit Platon, chose puissante, & de difficile dissolution, qu'une civile police, elle dure souvent contre des maladies mortelles & intestines : contre l'injure des loix iniustes, contre la tyrannie, contre le debordement & ignorance des magistrats, licence & sedition des peuples. En toutes nos fortunes, nous nous comparons à ce qui est au dessus de nous, & regardons vers ceux qui sont mieux. Mesurons nous à ce qui est au dessous : il n'en est point de si miserable, qui ne trouue mille exemples où se consoler. C'est nostre vice, que nous voyons plus mal volontiers, ce qui est dessus nous, que volontiers, ce qui est dessous. Si disoit Solon, qui dresseroit un tas de tous les maux ensemble, qu'il n'est aucun, qui ne choisist plustost de remporter avec soy les maux qu'il a, que de venir à diuision legitime, avec tous les autres hommes, de ce tas de maux, & en prendre sa quote part. Nostre police se porte mal. Il en a esté pourtant de plus malades, sans mourir. Les dieux s'esbatent de nous à la pelote, & nous agitent à toutes mains, *enimvero Di nos homines quasi pilas habent*. Les astres ont fatalement destiné l'estat de Rome, pour exemplaire de ce qu'ils peuuent en ce genre. Il comprend en soy toutes les formes & auantures, qui touchent un estat : tout ce que l'ordre y peut, & le trouble, & l'heur, & le mal'heur. Qui se doit desesperer de sa condition, voyant les secouffes & mouuemens dequoy celui là fut agité, & qu'il supporta ? Si l'estendue de la domination, est la santé d'un estat, dequoy ie ne suis aucunement d'aduis (& me plaist Isocrates, qui instruit Nicocles, non d'enuier les Princes, qui ont des dominations larges, mais qui

ſçaient bien conſeruer celles qui leur ſont eſcheuës) celui-là ne fut iamais ſi ſain, que quand il fut le plus malade. La pire de ſes formes, luy fut la plus fortunee. A peine reconnoiſt-on l'image d'aucune police, ſoubs les premiers Empereurs : c'eſt la plus horrible & la plus eſpeſſe confuſion qu'on puiſſe concevoir. Toutesfois il la ſupporta : & y dura, conſervant, non pas vne monarchie reſſerree en ſes limites, mais tant de nations, ſi diuerſes, ſi eſloignees, ſi mal affectionnees, ſi deſordonnement commandees, & iniuſtement conquiſes.

*nec gentibus vllis
Commodat in populum terræ pelagique potentem,
Inuidiam fortuna ſuam.*

Tout ce qui branle ne tombe pas. La contexture d'un ſi grand corps tient à plus d'un clou. Il tient meſme par ſon antiquité : comme les vieux baſtimens, auſquels l'aage a deſrobé le pied, ſans crouſte & ſans cyment, qui pourtant viuent & ſe ſouſtiennent en leur propre poix,

*nec iam validis radicibus hærens,
Pondere tuta ſuo eſt.*

D'auantage ce n'eſt pas bien procedé, de reconnoiſtre ſeulement le flanc & le foſſé : pour iuger de la ſeureté d'une place, il faut voir, par où on y peut venir, en quel eſtat eſt l'afſaillant. Peu de vaiſſeaux fondent de leur propre poix, & ſans violence eſtrangere. Or tournons les yeux par tout, tout croulle autour de nous. En tous les grands eſtats, ſoit de Chreſtienté, ſoit d'ailleurs, que nous cognoiſſons, re-

gardez y, vous y trouuerez vne euidente menasse de changement & de ruyne :

*Et sua sunt illis incommoda, pârque per omnes
Tempestas.*

Les astrologues ont beau ieu, à nous aduertir, comme ils font, de grandes alterations, & mutations prochaines : leurs deuinations sont presentes & palpables, il ne faut pas aller au ciel pour cela. Nous n'auons pas seulement à tirer consolation, de cette societé vniuerselle de mal & de menasse : mais encores quelque esperance, pour la durée de nostre estat : d'autant que naturellement, rien ne tombe, là où tout tombe. La maladie vniuerselle est la santé particuliere. La conformité, est qualité ennemie à la dissolution. Pour moy, ie n'en entre point au desespoir, & me semble y voir des routes à nous sauuer :

*Deus hæc fortasse benigna
Reducet in sedem vice.*

Qui sçait, si Dieu voudra qu'il en aduienne, comme des corps qui se purgent, & remettent en meilleur estat, par longues & griefues maladies : lesquelles leur rendent vne santé plus entiere & plus nette, que celle qu'elles leur auoient osté ? Ce qui me poise le plus, c'est qu'à conter les symptomes de nostre mal, i'en vois autant de naturels, & de ceux que le ciel nous enuoye, & proprement siens, que de ceux que nostre desreglement, & l'imprudence humaine y conferent. Il semble que les autres mesmes ordonnent, que nous auons assez duré, & outre les termes ordinaires. Et cecy aussi me poise, que le plus voyfin mal,

qui nous menace, ce n'est pas alteration en la masse, entiere & solide, mais sa dissipation & diuulsion : l'extreme de noz craintes. Encores en ces reuasseries icy crains-je la trahison, de ma memoire, que par inaduertance, elle m'aye fait enregistrer vne chose deux fois. Je hay à me recognoistre : & ne retaste iamais qu'enuis ce qui m'est vne fois eschappé. Or ie n'apporte icy rien de nouuel apprentissage. Ce sont imaginations communes : les ayant à l'auanture conceuës cent fois, j'ay peur de les auoir desia enrollees. La redicte est par tout ennuyeuse, fut ce dans Homere. Mais elle est ruyneuse, aux choses qui n'ont qu'une montre superficielle & passagere. Je me desplaïs de l'inculcation, voire aux choses viles, comme en Seneque. Et l'usage de son escole Stoïque me desplaïst, de redire sur chascune matiere, tout au long & au large, les principes & presuppositions, qui seruent en general : & realleguer tousiours de nouveau les arguments & raisons communes & vniuerselles. Ma memoire s'empire cruellement tous les iours :

*Pocula Lethæos vt si ducentia somnos,
Arente fauce traxerim.*

Il faudra dorefnauant (car Dieu mercy iusques à cette heure, il n'en est pas aduenue de faute) qu'au lieu que les autres cherchent temps, & occasion de penser à ce qu'ils ont à dire, ie fuye à me preparer, de peur de m'attacher à quelque obligation, de laquelle j'aye à despendre. L'estre tenu & obligé, me fouruoie : & le despendre d'un si foible instrument qu'est ma memoire. Je ne lis iamais cette hïstoire, que ie ne m'en offence, d'un ressentiment propre

& naturel. Lyncestez accusé de coniuration, contre Alexandre, le iour qu'il fut mené en la presence de l'armée, suiuant la coustume, pour estre ouy en ses deffences, auoit en sa teste vne harangue estudiée, de laquelle tout hesitant & begayant il prononça quelques paroles. Comme il se troubloit de plus en plus, ce pendant qu'il lucte avec sa memoire, & qu'il la retaste, le voila chargé & tué à coups de pique, par les soldats, qui luy estoient plus voisins : le tenans pour conuaincu. Son estonnement & son silence, leur seruit de confession. Ayant eu en prison tant de loysir de se preparer, ce n'est à leur aduis, plus la memoire qui luy manque : c'est la conscience qui luy bride la langue, & luy oste la force. Vrayement c'est bien dit. Le lieu estonne, l'assistance, l'expectation, lors mesme qu'il n'y va que de l'ambition de bien dire. Que peut-on faire, quand c'est vne harangue, qui porte la vie en conséquence ? Pour moy, cela mesme, que ie sois lié à ce que i'ay à dire, sert à m'en desprendre. Quand ie me suis commis & assigné entierement à ma memoire, ie pends si fort sur elle, que ie l'accable : elle s'effraye de sa charge. Autant que ie m'en rapporte à elle, ie me mets hors de moy : iusques à essayer ma contenance. Et me suis veu quelque iour en peine, de celer la seruitude en laquelle i'estois entraué. Là où mon dessein est, de représenter en parlant, vne profonde nonchalance d'accent & de visage, & des mouuemens fortuites & impremeditez, comme naissans des occasions presentes : ayment aussi cher ne rien dire qui vaille, qu'à montrer estre venu préparé pour bien dire : chose mefféante, sur tout à gens de ma profession : & chose de trop grande obligation, à qui ne peut beaucoup tenir. L'apprest donne plus à esperer, qu'il

ne porte. On se met fouuent sottement en pourpoint, pour ne sauter pas mieux qu'en saye. *Nihil est his, qui placere volunt, tam aduersarium, quàm expectatio.* Ils ont laissé par escrit de l'orateur Curio, que quand il propoisoit la distribution des pieces de son oraison, en trois, ou en quatre; ou le nombre de ses arguments & raisons, il luy aduenoit volontiers, ou d'en oublier quel-qu'un, ou d'y en adiouster vn ou deux de plus. J'ay tousiours bien euité, de tomber en cet inconuenient : ayant hay ces promesses & prescriptions : non seulement pour la deffiance de ma memoire : mais aussi pource que cette forme retire trop à l'artiste. *Simpliciora militares decent.* Baste, que ie me suis meshuy promis, de ne prendre plus la charge de parler en lieu de respect. Car quant à parler en lisant son escript : outre ce qu'il est tresinepte, il est de grand desauantage à ceux, qui par nature pouuoient quelque chose en l'action. Et de me ietter à la mercy de mon inuention presente, encore moins : ie l'ay lourde & trouble, qui ne sçauroit fournir aux soudaines necessitez, & importantes. Laisse Lecteur courir encore ce coup d'essay, & ce troisieme alongeail, du reste des pieces de ma peinture. L'adiouste, mais ie ne corrige pas. Premièrement, par ce que celuy qui a hypothéqué au monde son ouurage, ie trouue apparence, qu'il n'y ayt plus de droit. Qu'il die, s'il peut, mieux ailleurs, & ne corrompe la besongne qu'il a venduë. De telles gens, il ne faudroit rien acheter qu'apres leur mort. Qu'ils y pensent bien, auant que de se produire. Qui les haste ? Mon liure est tousiours vn : sauf qu'à mesure, qu'on se met à le renoueller, afin que l'acheteur ne s'en aille les mains du tout vuides, ie me donne loy d'y attacher

(comme ce n'est qu'une marquerie mal jointe) quelque embleme supernumeraire. Ce ne sont que surpoids, qui ne condamnent point la première forme, mais donnent quelque prix particulier à chacune des suivantes, par une petite subtilité ambitieuse. De là toutesfois il adviendra facilement, qu'il s'y mêle quelque transposition de chronologie : mes contes prenant place selon leur opportunité, non toujours selon leur âge. Secondement, à cause que pour mon regard, ie crains de perdre au change. Mon entendement ne va pas toujours auant, il va à reculations aussi. Je ne me desfie gueres moins de mes fantaisies, pour estre secondes ou tierces, que premières : ou presentes, que passees. Nous nous corrigeons aussi sottement souuent, comme nous corrigeons les autres. Je suis enuieilly de nombre d'ans, depuis mes premières publications, qui furent l'an mille cinq cens quatre vingts. Mais ie fais doute que ie fois assagi d'un pouce. Moy à certe heure, & moy tantost, sommes bien deux. Quand meilleur, ie n'en puis rien dire. Il feroit bel estre vieil, si nous ne marchions, que vers l'amendement. C'est un mouuement d'yuroigne, titubant, vertigineux, informe : ou des ionchez, que l'air manie casuellement selon soy. Antiochus auoit vigoureusement escript en faueur de l'Academie : il print sur ses vieux ans un autre party : lequel des deux ie suyuisse, feroit ce pas toujours suiure Antiochus ? Apres auoir estably le doute, vouloir establi la certitude des opinions humaines, estoit ce pas establi le doute, non la certitude ? & promettre, qui luy eust donné encore un âge à durer, qu'il estoit toujours en termes de nouvelle agitation : non tant meilleure, qu'autre ? La faueur publique m'a donné un peu plus de har-

dieffe que ie n'esperois : mais ce que ie crains le plus, c'est de faouler. L'aymerois mieux poindre que lasser. Comme a fait vn sçauant homme de mon temps. La louange est tousiours plaifante, de qui, & pourquoy elle vienne. Si faut-il pour s'en aggreer iustement, estre informé de sa cause. Les imperfections mesme ont leur moyen de se recommander. L'estimation vulgaire & commune, se voit peu heureuse en rencontre. Et de mon temps, ie suis trompé, si les pires escrits ne sont ceux qui ont gagné le dessus du vent populaire. Certes ie rends graces à des honnestes hommes, qui daignent prendre en bonne part, mes foibles efforts. Il n'est lieu où les fautes de la façon paroissent tant, qu'en vne matiere qui de soy n'a point de recommandation. Ne te prens point à moy, Lecteur, de celles qui se coulent icy, par la fantasie, ou inaduertance d'autrui : chasque main, chasque ouurier, y apporte les siennes. Je ne me mesle, ny d'orthographe, & ordonne seulement qu'ils suiuent l'ancienne, ny de la punctuation : ie suis peu expert en l'un & en l'autre. Où ils rompent du tout le sens, ie m'en donne peu de peine, car au moins ils me deschargent. Mais où ils en substituent vn faux, comme ils font si souuent, & me destournent à leur conception, ils me ruynent. Toutesfois quand la sentence n'est forte à ma mesure, vn honneste homme la doit refuser pour mienne. Qui cognoistra combien ie suis peu laborieux, combien ie suis fait à ma mode, croira facilement, que ie redicterois plus volontiers, encore autant d'Essais, que de m'assuiettir à resuiure ceux-cy, pour cette puerile correction. Je disois donc tantost, qu'estant planté en la plus profonde miniere de ce nouveau metal, non seulement ie suis priué

de grande familiarité, avec gens d'autres mœurs que les miennes : & d'autres opinions, par lesquelles ils tiennent ensemble d'un nœud, qui commande tout autre nœud. Mais encore ie ne suis pas sans hazard, parmy ceux, à qui tout est esgalement loisible : & desquels la plus part ne peut empirer meshuy son marché, vers nostre iustice. D'où naist l'extreme degré de licence. Comptant toutes les particulieres circonstances qui me regardent, ie ne trouue homme des nostres, à qui la deffence des loix, couste, & en gain cessant, & en dommage emergeant, disent les clerks, plus qu'à moy. Et tels font bien les braues, de leur chaleur & aspreté, qui font beaucoup moins que moy, en iuste balance. Comme maison de tout temps libre, de grand abbord, & officieuse à chacun (car ie ne me suis iamais laissé induire, d'en faire un outil de guerre : laquelle ie vois chercher plus volontiers, où elle est le plus esloingnee de mon voisinage) ma maison a merité assez d'affection populaire : & seroit bien mal-aisé de me gourmander sur mon fumier. Et i'estime à un merueilleux chef d'œuvre, & exemplaire, qu'elle soit encore vierge de sang, & de sac, sous un si long orage, tant de changemens & agitations voisines. Car à dire vray, il estoit possible à un homme de ma complexion, d'eschaper à une forme constante, & continue, telle qu'elle fust. Mais les inuasions & incursions contraires, & alternations & vicissitudes de la fortune, au tour de moy, ont iusqu'à cette heure plus exasperé qu'amolli l'humeur du pays : & me rechargent de dangers, & difficultez inuincibles. l'eschape. Mais il me desplaist que ce soit plus par fortune : voire, & par ma prudence, que par iustice : & me desplaist d'estre hors la protection des loix,

& fous autre fauuegarde que la leur. Comme les choses font, ie vis plus qu'à demy, de la faueur d'autrui : qui est vne rude obligation. Ie ne veux debuoir ma feureté, ny à la bonté, & benignité des grands, qui s'aggreent de ma legalité & liberté : ny à la facilité des mœurs de mes predeceffeurs, & miennes : car quoy si i'estois autre ? Si mes deportemens & la franchise de ma conuersation, obligent mes voisins, ou la parenté : c'est cruauté qu'ils s'en puissent acquitter, en me laissant viure, & qu'ils puissent dire : Nous luy condonnons la libre continuation du seruice diuin, en la chapelle de sa maison, toutes les eglises d'autour, estants par nous desertées : & luy condonnons l'vsage de ses biens, & sa vie, comme il conserue nos femmes, & nos bœufs au besoing. De longue main chez moy, nous auons part à la louange de Lycurgus Athenien, qui estoit general depositaire & gardien des bourses de ses concitoyens. Or ie tiens, qu'il faut viure par droit, & par auctorité, non par recompence ny par grace. Combien de galans hommes ont mieux aymé perdre la vie, que la deuoir ? Ie fuis à me submettre à toute sorte d'obligation. Mais sur tout, à celle qui m'attache, par deuoir d'honneur. Ie ne trouue rien si cher, que ce qui m'est donné : & ce pourquoy, ma volonté demeure hypothee par tiltre de gratitude. Et reçois plus volontiers les offices, qui sont à vendre. Ie croy bien. Pour ceux-cy, ie ne donne que de l'argent : pour les autres, ie me donne moy-mesme. Le neud, qui me tient par la loy d'honnesteté, me semble bien plus pressant & plus poissant, que n'est celui de la contraincte ciuile. On me garrote plus doucement par vn notaire, que par moy. N'est-ce pas raison, que ma conscience soit

beaucoup plus engagee, à ce, en quoy on s'est simplement fié d'elle? Ailleurs, ma foy ne doit rien : car on ne luy a rien presté. Qu'on s'ayde de la fiance & assurance, qu'on a prise hors de moy. L'aymeroy bien plus cher, rompre la prison d'une muraille, & des loix, que de ma parole. Je suis delicat à l'observation de mes promesses, iusques à la superstition : & les fay en tous subiects volontiers incertaines & conditionnelles. A celles, qui sont de nul poids, ie donne poids de la ialousie de ma regle : elle me gehenne & charge de son propre interest. Ouy, es entreprinſes toutes miennes & libres, si i'en dy le poinct, il me semble, que ie me les presery : & que, le donner à la science d'autrui, c'est le preordonner à foy. Il me semble que ie le promets, quand ie le dy. Ainsi i'eunte peu mes propositions. La condamnation que ie fais de moy, est plus vifue & roide, que n'est celle des iuges, qui ne me prennent que par le visage de l'obligation commune : l'estreinte de ma conscience plus ferree, & plus seuer. Je suy laschement les debvoirs ausquels on m'entraineroit, si ie n'y allois. *Hoc ipsum ita iustum est quod rectè fit, si est voluntarium.* Si l'action n'a quelque splendeur de liberté, elle n'a point de grace, ny d'honneur.

Quod me ius cogit, vix voluntate impetrent.

Où la necessité me tire, i'ayme à lacher la volonté. *Quia quicquid imperio cogitur, exigenti magis, quam præstanti acceptum refertur.* I'en sçay qui suyuent cet air, iusques à l'iniustice : donnent plustost qu'ils ne rendent, prestent plustost qu'ilz ne payent : sont plus escharfement bien à celui, à qui ils en sont tenus. Je ne vois pas là, mais ie touche contre.

I'ayme tant à me descharger & desobliger, que i'ay parfois compté à profit, les ingrátitudes, offences, & indignitez, que i'auois reęu de ceux, à qui ou par nature, ou par accident, i'auois quelque deuoir d'amitié : prenant cette occasion de leur faute, pour autant d'acquit, & descharge de ma debte. Encore que ie continue à leur payer les offices apparens, de la raifon publique, ie trouue grande espargne pourtant à faire par iustice, ce que ie faifoy par affećtion, & à me foulager vn peu, de l'attention & sollicitude, de ma volonté au dedans. *Est prudentis sustinere vt cursum, sic impetum beneuolentia.* Laquelle i'ay trop vrgente & pressante, où ie m'addonne : au moins pour vn homme, qui ne veut estre aucunement en presse. Et me sert cette mesnagerie, de quelque consolation, aux imperfections de ceux qui me touchent. Ie suis bien desplaisant qu'ils en vaillent moins, mais tant y a, que i'en espargne aussi quelque chose de mon application & engagement enuers eux. I'approuue celuy qui ayme moins son enfant, d'autant qu'il est ou teigneux ou bossu. Et non seulement, quand il est malicieux ; mais aussi quand il est malheureux, & mal nay (Dieu mesme en a rabbatu cela de son prix, & estimation naturelle) pourueu qu'il se porte en ce refroidissement, avec moderation, & iustice exacte. En moy, la proximité n'allege pas les deffauts, elle les aggraué plustost. Apres tout, selon que ie m'entends en la science du bien-faict & de recognoissance, qui est vne subtile science & de grand vsage, ie ne vois personne, plus libre & moins endebté, que ie suis iusques à cette heure. Ce que ie dois, ie le dois simplement aux obligations communes & naturelles. Il n'en est point, qui soit plus nettement quitte d'ailleurs.

nec sunt mihi nota potentum

Munera.

Les Princes me donnent prou, s'ils ne m'ostent rien : & me font assez de bien, quand ils ne me font point de mal : c'est tout ce que i'en demande. O combien ie suis tenu à Dieu, de ce qu'il luy a pleu, que i'aye reçu immédiatement de sa grace, tout ce que i'ay : qu'il a retenu particulièrement à soy toute ma dette ! Combien ie supplie instamment sa sainte misericorde, que iamais ie ne doive vn essentiel grammercy à personne ! Bien heureuse franchise : qui m'a conduit si loing. Qu'elle acheue. l'essaye à n'auoir expres befoing de nul. *In me omnis spes est mihi.* C'est chose que chacun peut en soy : mais plus facilement ceux, que Dieu a mis à l'abry des necessitez naturelles & vrgentes. Il fait bien piteux, & hazardeux, despendre d'un autre. Nous mesmes qui est la plus iuste adresse, & la plus seure, ne nous sommes pas assez asseurez. Je n'ay rien mien, que moy ; & si en est la possession en partie manque & empruntée. Je me cultiue & en courage, qui est le plus fort : & encores en fortune, pour y trouuer de quoy me satisfaire, quand ailleurs tout m'abandonneroit. Eleus Hippias ne se fournit pas seulement de science, pour au giron des muses se pouoir ioyeusement esquarter de toute autre compagnie au befoing : ny seulement de la cognoissance de la philosophie, pour apprendre à son ame de se contenter d'elle, & se passer virilement des commoditez qui luy viennent du dehors, quand le sort l'ordonne. Il fut si curieux, d'apprendre encore à faire sa cuisine, & son poil, ses robes, ses fouliers, ses bragues, pour se fonder en soy, autant qu'il pourroit, & soustraire au secours estranger. On iouyt bien plus librement,

& plus gayement, des biens empruntez : quand ce n'est pas vne iouyſſance obligee & contrainte par le beſoing : & qu'on a, & en ſa volenté, & en ſa fortune, la force & les moyens de ſ'en paſſer. Je me connoy bien. Mais il m'eſt malaiſé d'imaginer nulle ſi pure liberalité de perſonne enuers moy, nulle hoſpitalité ſi franche & gratuite, qui ne me ſemblast diſgratiée, tyrannique, & teinte de reproche, ſi la neceſſité m'y auoit encheueſtré. Comme le donner eſt qualité ambitieufe, & de prerogatiue, auſſi eſt l'accepter qualité de ſummiſſion. Teſmoin l'iniurieux, & querelleux refus, que Baiazet feit des preſents, que Temir luy enuoyoit. Et ceux qu'on offrit de la part de l'Empereur Solyman, à l'Empereur de Calicut, le mirent en ſi grand deſpit, que non ſeulement il les refuſa rudement : diſant, que ny luy ny ſes predeceſſeurs n'auoient accouſtumé de prendre : & que c'eſtoit leur office de donner : mais en outre feit mettre en vn cul de foſſe, les ambaffadeurs enuoyez à cet eſſect. Quand Thetis, dit Ariſtote, flatte Iuppiter : quand les Lacedemoniens flattent les Atheniens : ils ne vont pas leur rafreſchiſſant la memoire des biens, qu'ils leur ont faits, qui eſt touſiours odieufe : mais la memoire des bienfaicts qu'ils ont receuz d'eux. Ceux que ie voy ſi familiarement employer tout chacun & ſ'y engager : ne le feroient pas, ſ'ils ſauouroient comme moy la douceur d'une pure liberté : & ſ'ils poiſoient autant que doit poiſer à vn ſage homme, l'engageure d'une obligation. Elle ſe paye à l'aduenture quelquefois : mais elle ne ſe diſſout iamais. Cruel garrotage, à qui ayme d'affranchir les coudees de ſa liberté, en tout ſens. Mes cognoiſſants, & au deſſus & au deſſous de moy, ſçauent, ſ'ils en ont iamais veu, de moins ſollicitant, requerant, ſup-

pliant, ny moins chargeant sur autrui. Si ie le suis, au delà de tout exemple moderne, ce n'est pas grande merueille : tant de pieces de mes mœurs y contribuant. Vn peu de fierté naturelle : l'impatience du refus : contraction de mes desirs & desseins : inhabileté à toute sorte d'affaires. Et mes qualitez plus fauories, l'oysiuete, la franchise. Par tout cela, i'ay prins à haine mortelle, d'estre tenu ny à autre, ny par autre que moy. L'employe bien viuement, tout ce que ie puis, à m'en passer : auant que i'employe la beneficence d'un autre, en quelque, ou legere ou poissante occasion ou besoing que ce soit. Mes amis m'importunent estrangement, quand ils me requierent, de requierir vn tiers. Et ne me semble guere moins de coust, desengager celui qui me doit, vsant de luy : que m'engager enuers celui, qui ne me doit rien. Cette condition ostee, & cet' autre, qu'ils ne vueillent de moy chose negotieuse & soucieuse (car i'ay denoncé à tout soing guerre capitale) ie suis commodement facile & prest au besoing de chacun. Mais i'ay encore plus fuy à receuoir, que ie n'ay cherché à donner : aussi est il bien plus aysé selon Aristote. Ma fortune m'a peu permis de bien faire à autrui : & ce peu qu'elle m'en a permis, elle l'a assez maigrement logé. Si elle m'eust fait naistre pour tenir quelque rang entre les hommes, i'eusse esté ambitieux de me faire aymer : non de me faire craindre ou admirer. L'exprimeray-ie plus insolamment? i'eusse autant regardé, au plaie, qu'au prouffiter. Cyrus tres-sagement, & par la bouche d'un tres bon capitaine, & meilleur philosophe encores, estime sa bonté & ses biens faits, loing au delà de sa vaillance, & belliqueuses conquestes. Et le premier Scipion, par tout où il se veut faire

valoir, poise sa debonnaireté & humanité, au dessus de sa hardiesse & de ses victoires : & a tousiours en la bouche ce glorieux mot, Qu'il a laissé aux ennemis, autant à l'aymer, qu'aux amys. Je veux donc dire, que s'il faut ainsi debuoir quelque chose, ce doit estre à plus legitime tiltre, que celui dequoy ie parle, auquel la loy de cette miserable guerre m'engage : & non d'un si gros debte, comme celui de ma totale conseruation : il m'accable. Je me suis couché mille fois chez moy, imaginant qu'on me trahiroit & affomeroit cette nuit là : composant avec la Fortune, que ce fust sans effroy & sans langueur. Et me suis escrié apres mon patenostre,

Impius hæc tam culta noualia miles habebit?

Quel remede ? c'est le lieu de ma naissance, & de la plus part de mes ancestres : ils y ont mis leur affection & leur nom. Nous nous durcissions à tout ce que nous accoustumons. Et à vne miserable condition, comme est la nostre, ç'a esté un tresfauorable present de Nature, que l'accoustumance, qui endort nostre sentiment à la souffrance de plusieurs maux. Les guerres ciuiles ont cela de pire que les autres guerres, de nous mettre chacun en echauguette en sa propre maison.

*Quàm miserum, porta vitam muroque tueri,
Vixque suæ tutum viribus esse domus!*

C'est grande extremité, d'estre pressé iusques dans son mefnage, & repos domestique. Le lieu où ie me tiens, est tousiours le premier & le dernier, à la batterie de nos troubles : & où la paix n'a iamais son visage entier,

Tum quoque cum pax est, trepidant formidine belli.

*quoties pacem fortuna laceffit,
Hâc iter est bellis, melius fortuna dediffes
Orbe sub Eoo sedem, gelidâque sub Arcto,
Errantésque domos.*

Le tire par fois, le moyen de me fermir contre ces confiderations, de la nonchalance & lascheté. Elles nous menent aussi aucunement à la resolution. Il m'aduiant souuent, d'imaginer avec quelque plaisir, les dangers mortels, & les attendre. Je me plonge la teste baiffée, stupidement dans la mort, sans la confiderer & recognoistre, comme dans vne profondeur muette & obscure, qui m'engloutit d'un saut, & m'estouffe en vn instant, d'un puissant sommeil, plein d'insipidité & indolence. Et en ces morts courtes & violentes, la consequence que i'en preuoy, me donne plus de consolation, que l'effait de crainte. Ils disent, comme la vie n'est pas la meilleure, pour estre longue, que la mort est la meilleure, pour n'estre pas longue. Je ne m'estrange pas tant de l'estre mort, comme i'entre en confidence avec le mourir. Je m'enveloppe & me tapis en cet orage, qui me doit auengler & rauir de furie, d'une charge prompte & insensible. Encore s'il aduenoit, comme disent aucuns iardiniers, que les roses & violettes naissent plus odoriferantes pres des aulx & des oignons, d'autant qu'ils succent & tirent à eux, ce qu'il y a de mauuaise odeur en la terre : aussi que ces depraüées natures, humassent tout le venin de mon air & du climat, & m'en rendissent d'autant meilleur & plus pur, par leur voyfinage : que ie ne perdiffe pas tout. Cela n'est pas : mais de cecy il en peut estre quelque chose, que la bonté est plus belle & plus

attraiante quand elle est rare, & que la contrariété & diuersité, roidit & resserre en foy le bien faire : & l'enflamme par la ialousie de l'opposition, & par la gloire. Les voleurs de leur grace, ne m'en veulent pas particulièrement. Ne fay-ie pas moy à eux. Il m'en faudroit à trop de gents. Pareilles consciences logent sous diuerses sortes de robes. Pareille cruauté, desloyauté, volerie. Et d'autant pire, qu'elle est plus lasche, plus feure, & plus obscure, sous l'ombre des loix. Je hay moins l'iniure professe que trahitresse ; guerriere que pacifique & iuridique. Nostre sieur est suruenü en vn corps, qu'elle n'a de guere empiré. Le feu y estoit, la flamme s'y est prinse. Le bruit est plus grand : le mal, de peu. Je respons ordinairement, à ceux qui me demandent raison de mes voyages : Que ie sçay bien ce que ie fuis, mais non pas ce que ie cherche. Si on me dit, que parmy les estrangers il y peut auoir aussi peu de santé, & que leurs mœurs ne sont pas mieux nettes que les nostres : ie respons premierement, qu'il est mal-aylé :

Tam multæ scelerum facies.

Secondement, que c'est tousiours gain, de changer vn mauuais estat à vn estat incertain. Et que les maux d'autrui ne nous doiuent pas poindre comme les nostres. Je ne veux pas oublier cecy, que ie ne me mutine iamais tant contre la France, que ie ne regarde Paris de bonœil. Elle a mon cœur des mon enfance. Et m'en est aduenü comme des choses excellentes : plus i'ay veu depuis d'autres villes belles, plus la beauté de cette cy, peut, & gaigne sur mon affection. Je l'ayme par elle mesme, & plus en son estre seul, que rechargée de pompe estrangere. Je

l'ayme tendrement, iusques à ses verrues & à ses taches. Je ne suis François, que par cette grande cité : grande en peuples, grande en felicité de son affiette : mais sur tout grande, & incomparable en variété, & diuersité de commoditez : la gloire de la France, & l'un des plus nobles ornemens du monde. Dieu en chasse loing nos diuisions : entiere & vnüe, ie la trouue deffendue de toute autre violence. Je l'aduise, que de tous les partis, le pire sera celui qui la mettra en discorde. Et ne crains pour elle, qu'elle mesme. Et crains pour elle, autant certes, que pour autre piece de cet estat. Tant qu'elle durera, ie n'auray faute de retraicte, où rendre mes abboys : suffisante à me faire perdre le regret de tout' autre retraicte. Non par ce que Socrates l'a dict, mais par ce qu'en verité c'est mon humeur, & à l'auanture non sans quelque excez, i'estime tous les hommes mes compatriotes : & embrasse vn Polonois comme vn François ; postposant cette liaison nationale, à l'vniuerselle & commune. Je ne suis guere feru de la douceur d'un air naturel. Les cognoissances toutes neufues, & toutes miennes, me semblent bien valoir ces autres communes & fortuites cognoissances du voisinage. Les amitez pures de nostre acquest, emportent ordinairement, celles auxquelles la communication du climat, ou du sang, nous ioignent. Nature nous a mis au monde libres & desliez, nous nous emprisonnons en certains destroits : comme les Roys de Perse qui s'obligeoient de ne boire iamais autre eau, que celle du fleuve de Choaspez, renoncoyent par sottise, à leur droict d'usage en toutes les autres eaux : & assechoient pour leur regard, tout le reste du monde. Ce que Socrates fait sur sa fin, d'estimer vne sentence d'exil pire, qu'une sentence de

mort contre soy : ie ne seray, à mon aduis, iamais ny si cassé, ny si estroittement habitué en mon pais, que ie le feisse. Ces vies celestes, ont assez d'images, que i'embrasse par estimation plus que par affection. Et en ont aussi, de si esleuees, & extraordinaires, que par estimation mesme ie ne les puis embrasser, d'autant que ie ne les puis concevoir. Cette humeur fut bien tendre à vn homme, qui iugeoit le monde fa ville. Il est vray, qu'il dedaignoit les peregrinations, & n'auoit gueres mis le pied hors le territoire d'Attique. Quoy, qu'il plaignoit l'argent de ses amis à desengager sa vie : & qu'il refusa de sortir de prison par l'entremise d'autrui, pour ne desobeir aux loix en vn temps, qu'elles estoient d'ailleurs si fort corrompues? Ces exemples sont de la premiere espece, pour moy. De la seconde, sont d'autres, que ie pourroy trouuer en ce mesme personnage. Plusieurs de ces rares exemples surpassent la force de mon action : mais aucuns surpassent encore la force de mon iugement. Outre ces raisons, le voyager me semble vn exercice profitable. L'ame y a vne continuelle exercitation, à remarquer des choses inconnues & nouuelles. Et ie ne sçache point meilleure escole, comme i'ay dict souuent, à façonner la vie, que de luy proposer incessamment la diuersité de tant d'autres vies, fantasies, & vsances : & luy faire gouter vne si perpetuelle varieté de formes de nostre nature. Le corps n'y est ny oisif ny trauaillé : & cette moderee agitation le met en haleine. Je me tien à cheual sans demonter, tout choliqueux que ie suis, & sans m'y ennuyer, huit & dix heures,

vires ultra fortémque senectæ.

Nulle saison m'est ennemye, que le chaut aspre d'un

soleil poignant. Car les ombrelles, dequoy depuis les anciens Romains l'Italie se sert, chargent plus les bras, qu'ils ne deschargent la teste. Je voudroy sçauoir quelle industrie c'estoit aux Perfes, si anciennement, & en la naissance de la luxure, de se faire du vent frais, & des ombrages à leur poste, comme dict Xenophon. L'ayme les pluyes & les crotes comme les cannes. La mutation d'air & de climat ne me touche point. Tout ciel m'est vn. Je ne suis battu que des alterations internes, que ie produicts en moy, & celles là m'arriuent moins en voyageant. Je suis mal-aisé à esbranler : mais estant auoyé, ie vay tant qu'on veut. L'estriue autant aux petites entreprises, qu'aux grandes : & à m'equiper pour faire vne iournée, & visiter vn voisin, que pour vn iuste voyage. L'ay appris à faire mes iournees à l'Espagnole, d'une traite : grandes & raisonnables iournees. Et aux extremes chaleurs, les passe de nuit, du soleil couchant iusques au leuant. L'autre façon de repaistre en chemin, en tumulte & haste, pour la disnee, nommément aux cours iours, est incommode. Mes cheuaux en valent mieux. Iamais cheual ne m'a failly, qui a sceu faire avec moy la premiere iournee. Je les abreue par tout : & regarde seulement qu'ils ayent assez de chemin de reste, pour battre leur eau. La paresse à me leuer, donne loisir à ceux qui me suyuent, de dîner à leur aise, auant partir. Pour moy, ie ne mange iamais trop tard : l'appetit me vient en mangeant, & point autrement : ie n'ay point de faim qu'à table. Aucuns se plaignent dequoy ie me suis agréé à continuer cet exercice, marié, & vieil. Ils ont tort. Il est mieux temps d'abandonner sa maison, quand on l'a mise en train de continuer sans nous : quand on y a laissé de l'ordre

qui ne demente point sa forme paffee. C'est bien plus d'imprudence, de s'esloingner, laissant en sa maison vne garde moins fidele, & qui ait moins de soing de pourvoir à vostre besoing. La plus vtile & honnorable science & occupation à vne mere de famille, c'est la science du mesnage. l'en vois quel-qu'une auare; de mesnagere, fort peu. C'est sa maistresse qualite, & qu'on doit chercher, auant toute autre : comme le seul douaire qui sert à ruyner ou sauuer nos maisons. Qu'on ne m'en parle pas; selon que l'experience m'en a appris, ie requiers d'une femme mariee, au dessus de toute autre vertu, la vertu œconomique. Je l'en mets au propre, luy laissant par mon absence tout le gouuernement en main. Je vois avec despit en plusieurs mesnages, monsieur reuenir maussade & tout marmiteux du tracas des affaires, enuiron midy, que madame est encore apres à se coiffer & attiffer, en son cabinet. C'est à faire aux Roynes : encores ne sçay-ie. Il est ridicule & iniuste, que l'oyssuete de nos femmes, soit entretenue de nostre fueur & traual. Il n'adiendra, que ie puisse, à personne, d'auoir l'usage de ses biens plus liquide que moy, plus quiete & plus quitte. Si le mary fournit de matiere, Nature mesme veut qu'elles fournissent de forme. Quant aux deuoirs de l'amitie maritale, qu'on pense estre interessez par cette absence : ie ne le crois pas. Au rebours, c'est vne intelligence, qui se refroidit volontiers par vne trop continuelle assistance, & que l'assiduite blesse. Toute femme estrangere nous semble honneste femme. Et chacun sent par experience, que la continuation de se voir, ne peut représenter le plaisir que lon sent à se desprendre, & reprendre à secouffes. Ces interruptions me remplissent d'une amour recente enuers

les miens, & meredonnent l'vſage de ma maiſon plus doux : la viciffitude eſchaufe mon appetit, vers l'un, puis vers l'autre party. Je ſçay que l'amitié a les bras affez longs, pour ſe tenir & ſe ioindre, d'un coin de monde à l'autre : & ſpecialement cette cy, où il y a vne continuelle communication d'offices, qui en reueillent l'obligation & la ſouuenance. Les Stoiciens diſent bien, qu'il y a ſi grande colligance & relation entre les ſages, que celui qui diſne en France, repaiſt ſon compagnon en Ægypte; & qui eſtend ſeulement ſon doigt, où que ce ſoit, tous les ſages qui ſont ſur la terre habitable, en ſentent ayde. La iouyſſance, & la poſſeſſion, appartiennent principalement à l'imagination. Elle embraffe plus chaudement & plus continuellement ce qu'elle va querir, que ce que nous touchons. Comptez voz amusements journaliers; vous trouuerez que vous eſtes lors plus abſent de voſtre amy, quand il vous eſt preſent. Son aſſiſtance relaſche voſtre attention, & donne liberté à voſtre penſée, de ſ'abſenter à toute heure, pour toute occaſion. De Rome en hors, ie tiens & regente ma maiſon, & les commoditez que i'y ay laiſſé : ie voy croiſtre mes murailles, mes arbres, & mes rentes, & deſcroiſtre à deux doigts pres, comme quand i'y ſuis,

Ante oculos errat domus, errat forma locorum.

Si nous ne iouyſſons que ce que nous touchons, adieu noz eſcus quand ils ſont en noz coffres, & noz enfans s'ils ſont à la chaſſe. Nous les voulons plus pres. Au iardin eſt-ce loing? A vne demy iournee? Quoy, à dix lieuës eſt-ce loing, ou pres? Si c'eſt pres : quoy onze, douze, treze? & ainſi pas à pas. Vray-

ment celle qui sçaura prescrire à son mary, le quantiesme pas finit le pres, & le quantiesme pas donne commencement au loing, ie suis d'aduis qu'elle l'arreste entre-deux.

excludat iurgia finis.

Vtor permisso, caudæque pilos vt equinæ

Paulatim vello : & demo vnum, demo etiam vnum

Dum cadat elusus ratione ruentis acerui.

Et qu'elles appellent hardiment la philosophie à leur secours. A qui quelqu'un pourroit reprocher, puis qu'elle ne voit ny l'un ny l'autre bout de la iointure, entre le trop & le peu, le long & le court, le leger & le poissant, le pres & le loing : puis qu'elle n'en recognoist le commencement ny la fin, qu'elle iuge bien incertainement du milieu. *Rerum natura nullam nobis dedit cognitionem finium.* Sont-elles pas encore femmes & amies des trespassez ; qui ne sont pas au bout de cettuy-cy, mais en l'autre monde ? Nous embrassons & ceux qui ont esté, & ceux qui ne sont point encore, non que les absens. Nous n'auons pas fait marché, en nous mariant, de nous tenir continuellement accouez, l'un à l'autre, comme ie ne sçay quels petits animaux que nous voyons, ou comme les enforcelez de Karenty, d'une maniere chiennine. Et ne doit vne femme auoir les yeux si gourmandement fichez sur le deuant de son mary, qu'elle n'en puisse veoir le derriere, où besoing est. Mais ce mot de ce peintre si excellent, de leurs humeurs, feroit-il point de mise en ce lieu, pour représenter la cause de leurs plaintes ?

Vxor, si cesses, aut te amare cogitat,

*Aut tete amari, aut potare, aut animo obsequi,
Et tibi bene esse soli, cum sibi sit malè.*

Ou bien feroit-ce pas, que de foy l'opposition & contradiction les entretient & nourrit : & qu'elles s'accommodent assez, pourueu qu'elles vous incommo- dent? En la vraye amitié, de laquelle ie suis expert, ie me donne à mon amy, plus que ie ne le tire à moy. Ie n'ayme pas seulement mieux, luy faire bien, que s'il m'en faisoit : mais encore. qu'il s'en face, qu'à moy : il m'en fait lors le plus, quand il s'en fait. Et si l'absence luy est ou plaisante ou vtile, elle m'est bien plus douce que sa presence : & ce n'est pas proprement absence, quand il y a moyen de s'entr'aduerter. I'ay tiré autrefois vñage de nostre esloingnement & commodité. Nous remplissions mieux, & estandions, la possession de la vie, en nous separant : il viuoit, il iouyffoit, il voyoit pour moy, & moy pour luy, autant plainement que s'il y eust esté : l'une partie demouroit oisive, quand nous estions ensemble : nous nous confondions. La separation du lieu rendoit la conionction de noz volontez plus riche. Cette faim insatiable de la presence corporelle, accuse vn peu la foiblesse en la iouissance des ames. Quant à la vieillesse, qu'on m'allegue; au rebours : c'est à la ieunesse à s'asservir aux opinions communes, & se contraindre pour autrui. Elle peut fournir à tous les deux, au peuple & à foy : nous n'auons que trop à faire, à nous seuls. A mesure que les commoditez naturelles nous faillent, soustenons nous par les artificielles. C'est iniustice, d'excuser la ieunesse de suyure ses plaisirs, & deffendre à la vieillesse d'en chercher. Jeune, ie couurois mes passions eniuees, de prudence : vieil, ie demesle les tristes, de débauche. Si prohibent les loix Platoniques, de

peregriner auant quarante ans, ou cinquante : pour rendre la peregrination plus vtile & instructiue. Je consentiroy plus volontiers, à cet autre second article, des mesmes loix, qui l'interdit, apres soixante. Mais en tel aage, vous ne reuiendrez iamais d'un si long chemin. Que m'en chaut-il ? ie ne l'entreprends, ny pour en reuenir, ny pour le parfaire. L'entreprends seulement de me branler, pendant que le branle me plaist, & me proumeine pour me promener. Ceux qui courent vn benefice, ou vn lieure, ne courent pas. Ceux là courent, qui courent aux barres, & pour exercer leur course. Mon dessein est diuifible par tout, il n'est pas fondé en grandes esperances : chasque iournee en fait le bout. Et le voyage de ma vie se conduit de mesme. J'ay veu pourtant assez de lieux esloingnez, où i'eusse desiré qu'on m'eust arresté. Pourquoi non, si Chrysippus, Cleanthes, Diogenes, Zenon, Antipater, tant d'hommes sages, de la secte plus renfroignée, abandonnerent bien leur pays, sans aucune occasion de s'en plaindre : & seulement pour la iouissance d'un autre air ? Certes le plus grand desplaisir de mes peregrinations, c'est que ie n'y puisse apporter cette resolution, d'establiir ma demeure où ie me plairoy. Et qu'il me faille tousiours proposer de reuenir, pour m'accommoder aux humeurs communes. Si ie craingnois de mourir en autre lieu, que celui de ma naissance : si ie pensois mourir moins à mon aise, esloigné des miens : à peine fortiroy-je hors de France, ie ne fortiroy pas sans effroy hors de ma parroisse. Je sens la mort qui me pince continuellement la gorge, ou les reins. Mais ie suis autrement fait : elle m'est vne par tout. Si toutesfois i'auois à choisir : ce seroit, ce croy-je, plustost à cheual, que dans vn liçt : hors

de ma maison, & loing des miens. Il y a plus de creuecœur que de consolation, à prendre congé de ses amis. L'oublie volontiers ce deuoir de nostre entregent. Car des offices de l'amitié, celui-là est le seul desplaisant : & oublierois ainsi volontiers à dire ce grand & eternal adieu. S'il se tire quelque commodité de cette assistance, il s'en tire cent incommoditez. L'ay veu plusieurs mourans bien piteusement, assiegez de tout ce train : cette presse les estouffe. C'est contre le deuoir, & est tefmoignage de peu d'affection, & de peu de soing, de vous laisser mourir en repos. L'un tourmente vos yeux, l'autre vos oreilles, l'autre la bouche : il n'y a sens, ny membre, qu'on ne vous fracasse. Le cœur vous serre de pitié, d'ouïr les plaintes des amis ; & de despit à l'aduanture, d'ouïr d'autres plaintes, feintes & masquées. Qui a tousiours eu le goust tendre, affoibly, il l'a encore plus. Il luy faut en vne si grande necessité, vne main douce, & accommodée à son sentiment, pour le grater iustement où il luy cuit. Ou qu'on ne le grate point du tout. Si nous auons besoing de sage femme, à nous mettre au monde : nous auons bien besoing d'un homme encore plus sage, à nous en sortir. Tel, & amy, le faudroit-il acheter bien cherement, pour le seruice d'une telle occasion. Je ne suis point arriué à cette vigueur desdaigneuse, qui se fortifie en foy-mesme, que rien n'aide, ny ne trouble ; ie suis d'un point plus bas. Je cherche à coniller, & à me desfrober de ce passage : non par crainte, mais par art. Ce n'est pas mon aduis, de faire en ceste action, preuue ou montre de ma constance. Pour qui ? Lors cessera tout le droict & l'intereit, que j'ay à la reputation. Je me contente d'une mort recueillie en foy, quiete, & soli-

taire, toute mienne, conuenable à ma vie retirée & priuée. Au rebours de la superstition Romaine, où on estimoit malheureux, celui qui mouroit sans parler : & qui n'auoit ses plus proches à luy clorre les yeux. I'ay assez affaire à me consoler, sans auoir à consoler autrui ; assez de pensées en la teste, sans que les circonstances m'en apportent de nouuelles : & assez de matiere à m'entretenir, sans l'emprunter. Cette partie n'est pas du rolle de la societé : c'est l'acte à vn seul personnage. Viuons & rions entre les nostres, allons mourir & rechigner entre les inconnuz. On trouue en payant, qui vous tourne la teste, & qui vous frotte les pieds : qui ne vous presse qu'autant que vous voulez, vous presentant vn visage indifferent, vous laissant vous gouuerner, & plaindre à vostre mode. Je me deffais tous les iours par discours, de cette humeur puerile & inhumaine, qui fait que nous desirons d'esmouoir par nos maux, la compassion & le dueil en nos amis. Nous faisons valoir nos inconueniens outre leur mesure, pour attirer leurs larmes. Et la fermeté que nous louons en chacun, à soustenir sa mauuaise fortune, nous l'accusons & reprochons à nos proches, quand c'est en la nostre. Nous ne nous contentons pas qu'ils se ressentent de nos maux, si encores ils ne s'en affligent. Il faut estendre la ioye, mais retrancher autant qu'on peut la tristesse. Qui se fait plaindre sans raison, est homme pour n'estre pas plaint, quand la raison y fera. C'est pour n'estre iamais plaint, que se plaindre tousiours, faisant si souuent le piteux, qu'on ne soit pitoyable à personne. Qui se fait mort viuant, est subiect d'estre tenu pour vif mourant. I'en ay veu prendre la cheure, de ce qu'on leur trouuoit le visage frais, & le pouls posé : contrain-

dre leur ris, par ce qu'il trahissoit leur guairison : & haïr la santé, de ce qu'elle n'estoit pas regrettable. Qui bien plus est, ce n'estoyent pas femmes. Je represente mes maladies, pour le plus, telles qu'elles sont, & euite les paroles de mauuais prognostique, & les exclamations composées. Sinon l'allegresse, aumoins la contenance rassise des assistans, est propre, pres d'un sage malade. Pour se voir en un estat contraire, il n'entre point en querelle avec la santé. Il luy plaist de la contempler en autrui, forte & entiere; & en iouyr au moins par compagnie. Pour se sentir fondre contre-bas, il ne reiecte pas du tout les pensées de la vie, ny ne fuit les entretiens communs. Je veux estudier la maladie quand ie suis sain : quand elle y est, elle fait son impression assez réele, sans que mon imagination l'aide. Nous nous preparons auant la main, aux voyages que nous entreprenons, & y sommes resolu : l'heure qu'il nous faut monter à cheual, nous la donnons à l'assistance, & en sa faueur, l'estendons. Je sens ce profit inespéré de la publication de mes mœurs, qu'elle me sert aucunement de regle. Il me vient par fois quelque consideration de ne trahir l'histoire de ma vie. Cette publique declaration, m'oblige de me tenir en ma route; & à ne desmentir l'image de mes conditions : communément moins desfigurées & contredites, que ne porte la malignité, & maladie des iugemens d'aujourd'huy. L'uniformité & simpleesse de mes mœurs, produit bien un visage d'aisée interpretation, mais parce que la façon en est un peu nouuelle, & hors d'usage, elle donne trop beau ieu à la mesdisance. Si est-il vray, qu'à qui me veut loyalement iniurier, il me semble fournir bien suffisamment, où mordre, en mes imperfections adoucies, & cogneuës : & de-

quoy s'y faouler, sans s'escarmoucher au vent. Si pour en preoccuper moy-mesme l'accufation, & la descouuerte, il luy semble que ie luy esdente sa morsure, c'est raison qu'il prenne son droict, vers l'amplification & extention. L'offence a ses droicts outre la iustice. Et que les vices dequoy ie luy montre des racines chez moy, il les grossisse en arbres. Qu'il y employe non seulement ceux qui me possèdent, mais ceux aussi qui ne font que me menasser. Iniurieux vices, & en qualité, & en nombre. Qu'il me batte par là. L'embrasseroy volontiers l'exemple du philosophe Dion. Antigonus le vouloit piquer sur le subiet de son origine. Il luy coupa broche : Je suis, dit-il, fils d'un serf, boucher, stigmatizé, & d'une putain, que mon pere espousa par la bassesse de sa fortune. Tous deux furent punis pour quelque mesfait. Un orateur m'achetta enfant, me trouuant beau & aduenant : & m'a laissé mourant tous ses biens; lesquels ayant transporté en cette ville d'Athenes, ie me suis addonné à la philosophie. Que les historiens ne s'empeschent à chercher nouuelles de moy : ie leur en diray ce qui en est. La confession genereuse & libre, enerue le reproche, & defarme l'iniure. Tant y a que tout conté, il me semble qu'aussi souuent on me loüe, qu'on me desprise outre la raison. Comme il me semble aussi que dès mon enfance, en rang & degré d'honneur, on m'a donné lieu, plustost au dessus, qu'au dessous de ce qui m'appartient. Ie me trouueroy mieux en pais, auquel ces ordres fussent ou reglez ou mesprizez. Entre les masses depuis que l'altercation de la prerogatiue au marcher ou à se seoir, passe trois replices, elle est inuile. Ie ne crain point de ceder ou proceder iniquement, pour fuir à une si importune contestation. Et

iamais homme n'a eu enuie de ma preffiance, à qui ie ne l'aye quittée. Outre ce profit, que ie tire d'escire de moy, i'en ay esperé cet autre, que s'il aduenoit que mes humeurs pleussent, & accordassent à quelque honneste homme, auant mon trespas, il rechercheroit de nous ioindre. Ie luy ay donné beaucoup de pais gagné : car tout ce qu'une longue connoissance & familiarité, luy pourroit auoir acquis en plusieurs années, il l'a veu en trois iours dans ce registre, & plus seurement & exactement. Plaisante fantasie : plusieurs choses, que ie ne voudroy dire au particulier, ie les dis au public. Et sur mes plus secretes sciences ou pensées, renuoye à vne boutique de libraire, mes amis plus feaux :

Excutienda damus præcordia.

Si à si bonnes enseignes, i'eusse sceu quelqu'un qui m'eust esté propre, certes ie l'eusse esté trouuer bien loing. Car la douceur d'une sortable & agreable compagnie, ne se peut assez acheter à mon gré. Eh qu'est-ce qu'un amy ! Combien est vraye cette ancienne sentence, que l'usage en est plus necessaire, & plus doux, que des elemens de l'eau & du feu ! Pour reuenir à mon conte. Il n'y a donc pas beaucoup de mal de mourir loing, & à part. Si estimons nous à deuoir de nous retirer pour des actions naturelles, moins disgratiées que cette-cy, & moins hideuses. Mais encore ceux qui en viennent là, de trainer languissans vn long espace de vie, ne deueroient à l'aduanture souhaiter, d'empescher de leur misere vne grande famille. Pourtant les Indoïs en certaine prouince, estimoient iuste de tuer celuy, qui feroit tombé en telle necessité. En vne autre de leurs

prouvinces, ils l'abandonnoient seul à se sauuer, comme il pourroit. A qui ne se rendent-ils en fin ennuyeux & insupportables? les offices communs n'en vont point iusques là. Vous apprenez la cruauté par force, à vos meilleurs amis : durcissant & femme & enfans, par long vsage, à ne sentir & plaindre plus vos maux. Les souspirs de ma cholique, n'apportent plus d'esmoy à personne. Et quand nous tirerions quelque plaisir de leur conuersation (ce qui n'aduient pas tousiours, pour la disparité des conditions, qui produict aisément mespris ou enuie, envers qui que ce soit) n'est-ce pas trop, d'en abuser tout vn aage? Plus ie les verrois se contraindre de bon cœur pour moy, plus ie plaindrois leur peine. Nous auons loy de nous appuyer, non pas de nous coucher si lourdement sur autrui : & nous estayer en leur ruyne. Comme celuy qui faisoit esgorger des petits enfans, pour se seruir de leur sang, à guarir vne sienne maladie. Ou cet autre, à qui on fournissoit des ieunes tendrons, à couuer la nuit ses vieux membres : & meller la douceur de leur haleine, à la sienne aigre & poissante. La decrepitude est qualité solitaire. Ie suis sociable iusques à l'excez. Si me semble-il raisonnable, que meshuy ie soustraye de la veuë du monde, mon importunité, & la couue moy seul. Que ie m'appile & me recueille en ma coque, comme les tortuës : i'apprenne à veoir les hommes, sans m'y tenir. Ie leur ferois outrage en vn pas si pendant. Il est temps de tourner le dos à la compagnie. Mais en ces voyages vous serez arresté miserablement en vn caignart, où tout vous manquera. La plus-part des choses necessaires, ie les porte quant & moy. Et puis, nous ne sçaurions euitter la Fortune, si elle entreprend de nous courre fus. Il ne me faut

rien d'extraordinaire, quand ie suis malade. Ce que Nature ne peut en moy, ie ne veux pas qu'un bolus le face. Tout au commencement de mes fièvres, & des maladies qui m'atterrrent; entier encores, & voisin de la santé, ie me reconcilie à Dieu, par les derniers offices Chrestiens. Et m'en trouue plus libre, & deschargé; me semblant en auoir d'autant meilleure raison de la maladie. De notaire & de conseil, il m'en faut moins que de medecins. Ce que ie n'auray estably de mes affaires tout sain, qu'on ne s'attende point que ie le face malade. Ce que ie veux faire pour le seruice de la mort, est tousiours fait. Ie n'oserois le dislayer d'un seul iour. Et s'il n'y a rien de fait, c'est à dire, ou que le doute m'en aura retardé le choix : car par fois, c'est bien choisir de ne choisir pas : ou que tout à fait, ie n'auray rien voulu faire. I'escris mon liure à peu d'hommes, & à peu d'années. Si ç'eust esté vne matiere de durée, il l'eust fallu commettre à un langage plus ferme. Selon la variation continuelle, qui a fuiuy le nostre iusques à cette heure, qui peut esperer que sa forme presente soit en vsage, d'icy à cinquante ans? Il escoule tous les iours de nos mains : & depuis que ie vis, s'est alteré de moitié. Nous disons, qu'il est à cette heure parfait. Autant en dict du sien, chascue fiecle. Ie n'ay garde de l'en tenir là tant qu'il fuira, & s'ira difformant comme il fait. C'est aux bons & vtils escrits, de le clouer à eux, & ira son credit, selon la fortune de nostre estat. Pourtant ne crains-je point d'y inserer plusieurs articles prieux, qui confument leur vsage entre les hommes qui vivent aujourd'huy : & qui touchent la particuliere science d'aucuns, qui y verront plus auant, que de la commune intelligence. Ie ne veux pas, apres tout,

comme ie vois fouuent agiter la memoire des trespassez, qu'on aille debattant : Il iugeoit, il viuoit ainfin : il vouloit cecy : s'il eust parlé sur sa fin il eust dict, il eust donné; ie le cognoissois mieux que tout autre. Or autant que la bien-seance me le permet, ie fais icy sentir mes inclinations & affections. Mais plus librement, & plus volontiers, le fais-ie de bouche, à quiconque desire en estre informé. Tant y a, qu'en ces memoires, si on y regarde, on trouuera que j'ay tout dit, ou tout designé. Ce que ie ne puis exprimer, ie le montre au doigt.

*Verum animo satis hæc vestigia parua sagaci,
Sunt, per quæ possis cognoscere cætera tute.*

Ie ne laisse rien à desirer, & deuiner de moy. Si on doit s'en entretenir, ie veux que ce soit veritablement & iustement. Ie reuiendrois volontiers de l'autre monde, pour démentir celui, qui me formeroit autre que ie n'estois, fust-ce pour m'honorer. Des vivans mesme, ie sens qu'on parle tousiours autrement qu'ils ne font. Et si à toute force, ie n'eusse maintenu vn amy que j'ay perdu, on me l'eust deschiré en mille contraires visages. Pour acheuer de dire mes foibles humeurs : L'aduouë, qu'en voyageant, ie n'arriue guere en logis, où il ne me passe par la fantasie, si i'y pourray estre, & malade, & mourant à mon aise. Ie veux estre logé en lieu, qui me soit bien particulier, sans bruiet, non mauffade, ou fumeux, ou estouffé. Ie cherche à flatter la mort, par ces friuoles circonstances. Ou pour mieux dire, à me descharger de tout autre empeschement : afin que ie n'aye qu'à m'attendre à elle, qui me poîsera volontiers assez, sans autre recharge. Ie veux qu'elle ait

sa part à l'aïfance & commodité de ma vie. C'en est vn grand lopin, & d'importance, & espere meshuy qu'il ne dementira pas le passé. La mort a des formes plus aisées les vnes que les autres, & prend diuerfes qualitez selon la fantasie de chacun. Entre les naturelles, celle qui vient d'affoiblissement & apesantissement, me semble molle & douce. Entre les violentes, i' imagine plus mal-aisément vn precipice, qu'vne ruïne qui m'accable : & vn coup trenchant d'vne espée, qu'vne harquebuse : & eusse plustost beu le breuuage de Socrates, que de me fraper, comme Caton. Et quoy que ce soit vn, si sent mon imagination difference, comme de la mort à la vie, à me ietter dans vne fournaise ardente, ou dans le canal d'vne platte riuiera. Tant fortement nostre crainte regarde plus au moyen qu'à l'effect. Ce n'est qu'vn instant ; mais il est de tel poix, que ie donneroy volontiers plusieurs iours de ma vie, pour le passer à ma mode. Puisque la fantasie d'vn chacun trouue du plus & du moins, en son aigreur : puis-que chacun a quelque choix entre les formes de mourir, essayons vn peu plus auant d'en trouuer laquelle vne deschargée de tout desplaisir. Pourroit on pas la rendre encore voluptueuse, comme les couraueurs d'Antonius & de Cleopatra ? Je laisse à part les efforts que la philosophie, & la religion produisent, aspres & exemplaires. Mais entre les hommes de peu, il s'en est trouué, comme vn Petronius, & vn Tigellinus à Rome, engagez à se donner la mort, qui l'ont comme endormie par la mollesse de leurs apprests. Ils l'ont faite couler & glisser parmy la lacheté de leurs passetemps accoustumez. Entre des garces & bons compagnons ; nul propos de consolation, nulle mention de testament, nulle affectation

ambitieufe de conſtance, nul diſcours de leur condition future : parmy les ieux, les feſtins, faceries, entretiens communs & populaires, & la muſique, & des vers amoureux. Ne ſçaurions nous imiter cette reſolution en plus honneſte contenance ? Puis qu'il y a des morts bonnes aux fols, bonnes aux ſages : trouuons-en qui ſoient bonnes à ceux d'entre deux. Mon imagination m'en preſente quelque viſage facile, &, puis qu'il faut mourir, deſirable. Les tyrans Romains penſoient donner la vie au criminel, à qui ils donnoient le choix de ſa mort. Mais Theophrasſe philoſophe ſi delicat, ſi modeſte, ſi ſage, a-il pas eſté forcé par la raiſon, d'oſer dire ce vers latinifié par Ciceron :

Vitam regit fortuna, non ſapientia.

La fortune aide à la facilité du marché de ma vie : l'ayant logée en tel poinct, qu'elle ne faiſt meſhuy ny beſoing aux miens, ny empeschement. C'eſt vne condition que i'euffe acceptée en toutes les faiſons de mon aage : mais en cette occaſion, de trouſſer mes bribes, & de plier bagage, ie prens plus particulièrement plaifir à ne leur apporter ny plaifir ny deplaifir, en mourant. Elle a, d'une artiſte compenſation, faiſt, que ceux qui peuuent pretendre quelque materiel fruit de ma mort, en reçoient d'ailleurs, coniointement, vne materielle perte. La mort s'appesantit ſouuent en nous, de ce qu'elle poiſe aux autres : & nous intereſſe de leur intereſt, quaſi autant que du noſtre : & plus & tout par fois. En cette commodité de logis que ie cherche, ie n'y meſſe pas la pompe & l'amplitude : ie la hay pluſtoſt : mais certaine propriété ſimple, qui ſe rencontre plus ſou-

uent aux lieux où il y a moins d'art, & que Nature honore de quelque grace toute sienne, *Non amplius, sed munditer conuiuium. Plus salis quàm sumptus*. Et puis, c'est à faire à ceux que les affaires entraînent en plain hyuer, par les Grifons, d'estre surpris en chemin en cette extremité. Moy qui le plus souuent voyage pour mon plaisir, ne me guide pas si mal. S'il faict laid à droicte, ie prens à gauche : si ie me trouue mal propre à monter à cheual, ie m'arreste. Et faisant ainfi, ie ne vois à la verité rien, qui ne soit aussi plaissant & commode que ma maison. Il est vray que ie trouue la superfluité tousiours superflüe : & remarque de l'empeschement en la delicateste mesme & en l'abondance. Ay-ie laissé quelque chose à voir derriere moy, i'y retourne : c'est tousiours mon chemin. Je ne trace aucune ligne certaine, ny droicte ny courbe. Ne trouue-je point où ie vay, ce qu'on m'auoit dict ? comme il aduient souuent que les iugemens d'autrui ne s'accordent pas aux miens, & les ay trouuez le plus souuent faux : ie ne plains pas ma peine : i'ay appris que ce qu'on disoit n'y est point. I'ay la complexion du corps libre, & le goust commun, autant qu'homme du monde. La diuersité des façons d'une nation à autre, ne me touche que par le plaisir de la variété. Chaque vsage a sa raison. Soyent des affietes d'estain, de bois, de terre : bouilly ou rosty ; beurre, ou huyle, de noix ou d'oliue, chaut ou froit, tout m'est vn. Et si vn, que vieillissant, i'accuse cette genereuse faculté : & auroy besoin que la delicateste & le choix, arrestast l'indiscretion de mon appetit, & par fois soulageast mon estomach. Quand i'ay esté ailleurs qu'en France : & que, pour me faire courtoisie, on m'a demandé, si ie vouloy estre serui à la Françoisie, ie m'en suis

moqué, & me suis tousiours ietté aux tables les plus espees d'estrangers. J'ay honte de voir nos hommes, enyurez de cette sorte d'humeur, de s'effaroucher des formes contraires aux leurs. Il leur semble estre hors de leur element, quand ils sont hors de leur village. Où qu'ils aillent, ils se tiennent à leurs façons, & abominent les estrangeres. Retrouvent ils vn compatriote en Hongrie, ils festoient cette auanture : les voyla à se r'alier ; & à se recoudre ensemble ; à condamner tant de mœurs barbares qu'ils voyent. Pourquoi non barbares, puis qu'elles ne sont Françoises ? Encore sont ce les plus habilles, qui les ont recognuës, pour en mesdire. La plupart ne prennent l'aller que pour le venir. Ils voyagent couverts & resserrez, d'une prudence taciturne & incommunicable, se defendans de la contagion d'un air incogneu. Ce que ie dis de ceux là, me ramentoit en chose semblable, ce que j'ay par fois apperceu en aucuns de nos ieunes courtisans. Ils ne tiennent qu'aux hommes de leur sorte : nous regardent comme gens de l'autre monde, avec desdain, ou pitié. Ostez leur les entretiens des mysteres de la cour, ils sont hors de leur gibier. Aussi neufs pour nous & malhabiles, comme nous sommes à eux. On dict bien vray, qu'un honneste homme, c'est un homme meslé. Au rebours, ie peregrine tressaoul de nos façons : non pour chercher des Gascons en Sicile, j'en ay assez laissé au logis : ie cherche des Grecs plustost, & des Persans : j'accointe ceux-la, ie les confidere : c'est là où ie me presse, & où ie m'employe. Et qui plus est, il me semble, que ie n'ay rencontré guere de manieres, qui ne vaillent les nostres. Je couche de peu : car à peine ay-ie perdu mes giroüettes de veüë. Au de-

meurant, la plus-part des compagnies fortuites que vous rencontrez en chemin, ont plus d'incommodité que de plaisir : ie ne m'y attache point, moins asteure, que la vieilleffe me particularise & sequestre aucunement, des formes communes. Vous souffrez pour autrui, ou autrui pour vous. L'un & l'autre inconuenient est poissant, mais le dernier me semble encore plus rude. C'est vne rare fortune, mais de soulagement inestimable, d'auoir vn honneste homme, d'entendement ferme, & de mœurs conformes aux vostres, qui aime à vous suiure. I'en ay eu faute extreme, en tous mes voyages. Mais vne telle compagnie, il la faut auoir choisie & acquise dès le logis. Nul plaisir n'a faueur pour moy sans communication. Il ne me vient pas seulement vne gaillarde pensée en l'ame, qu'il ne me fasche de l'auoir produite seul, & n'ayant à qui l'offrir. *Si cum hac exceptione detur sapientia, vt illam inclusam teneam, nec enuntiem, reijciam.* L'autre l'auoit monté d'un ton au dessus. *Si contigerit ea vita sapienti, vt omnium rerum affluentibus copijs, quamuis omnia, quæ cognitione digna sunt, summo otio secum ipse confideret, & contempletur, tamen si solitudo tanta fit, vt hominem videre non possit, excedat à vita.* L'opinion d'Archytas m'agrée, qu'il feroit desplaissant au ciel mesme, & à se promener dans ces grands & diuins corps celestes, sans l'assistance d'un compaignon. Mais il vaut mieux encore estre seul, qu'en compagnie ennuyeuse & inepte. Aristippus s'aymoit à viure estranger par tout,

*Me si fata meis paterentur ducere vitam
Auspicijs,*

ie choisirois à la passer le cul sur la selle :

*visere gestiens,
Qua parte debacchentur ignes,
Qua nebula pluuijque rores.*

Auez-vous pas des passe-temps plus aisez ? dequoy auez-vous faite ? Vostre maison est-elle pas en bel air & sain, suffisamment fournie, & capable plus que suffisamment ? La majesté Royale y a peu plus d'une fois en sa pompe. Vostre famille n'en laisse-elle pas en reglement, plus au dessoubs d'elle, qu'elle n'en a au dessus, en eminence ? Y a il quelque pensée locale, qui vous vlcere, extraordinaire, indigestible ?

Quæ te nunc coquat & vexet sub pectore fixa.

Où cuidez-vous pouuoir estre sans empeschement & sans destourbier ? *Nunquam simpliciter fortuna indulget.* Voyez donc, qu'il n'y a que vous qui vous empeschez : & vous vous suiurez par tout, & vous plaindrez par tout. Car il n'y a satisfaction ça bas, que pour les ames ou brutales ou diuines. Qui n'a du contentement à une si iuste occasion, où pense-il le trouuer ? A combien de milliers d'hommes, arreste une telle condition que la vostre, le but de leurs fouhais ? Reformez vous seulement : car en cela vous pouuez tout : là où vous n'avez droit que de patience, enuers la fortune. *Nulla placida quies est, nisi quam ratio composuit.* Je voy la raison de cet aduertissement, & la voy tresbien. Mais on auroit plustost fait, & plus pertinemment, de me dire en un mot : Soyez sage. Cette resolution, est outre la sagesse : c'est son ouurage, & sa production. Ainsi fait le medecin, qui va criaillant apres un pauvre malade languissant, qu'il se resiouysse : il luy conseileroit un peu moins ineptement, s'il luy disoit : Soyez sain.

Pour moy, ie ne suis qu'homme de la commune forte. C'est vn precepte salutaire, certain, & d'aïsee intelligence : Contentez vous du vostre : c'est à dire, de la raison : l'execution pourtant, n'en est non plus aux plus sages, qu'en moy. C'est vne parole populaire, mais elle a vne terrible estendue. Que ne comprend elle ? Toutes choses tombent en discretion & modification. Je sçay bien qu'à le prendre à la lettre, ce plaisir de voyager, porte tesmoignage d'inquietude & d'irresolution. Aussi sont ce nos maistresses qualitez, & prædominantes. Ouy ; ie le confesse : ie ne vois rien seulement en songe, & par souhait, où ie me puisse tenir. La seule varieté me paye, & la possession de la diuersité : au moins si quelque chose me paye. A voyager, cela mesme me nourrit, que ie me puis arrester sans interest : & que i'ay où m'en diuertir commodément. I'ayme la vie priuee, par ce que c'est par mon choix que ie l'ayme, non par disconuenance à la vie publique : qui est à l'auanture, autant selon ma complexion. I'en fers plus gayement mon Prince, par ce que c'est par libre election de mon iugement, & de ma raison, sans obligation particuliere. Et que ie n'y suis pas reiecté, ny contrainct, pour estre irreceuable à tout autre party, & mal voulu. Ainsi du reste. Je hay les morceaux que la necessité me taille. Toute commodité me tiendrait à la gorge, de laquelle seule i'aurois à despendre :

Alter remus aquas, alter mihi radat arenas.

Vne seule corde ne m'arreste iamais assez. Il y a de la vanité, dites vous, en cet amusement. Mais où non ? Et ces beaux preceptes, sont vanité, & vanité

toute la sagesse. *Dominus nouit cogitationes sapientium, quoniam vanæ sunt.* Ces exquisés subtilitez, ne sont propres qu'au presche. Ce sont discours qui nous veulent enuoyer tous bastez en l'autre monde. La vie est vn mouuement materiel & corporel : action imparfaicte de sa propre essence, & defreglée. Je m'employe à la seruir selon elle.

Quisque suos patimur manes.

Sic est faciendum, vt contra naturam vniuersam nihil contendamus : ea tamen conseruata, propriam sequamur. A quoy faire, ces pointes esleuées de la philosophie, sur lesquelles, aucun estre humain ne se peut rasseoir : & ces regles qui excèdent nostre vsage & nostre force ? Je voy souuent qu'on nous propose des images de vie, lesquelles, ny le proposant, ny les auditeurs, n'ont aucune esperance de suiure, ny qui plus est, enuie. De ce mesme papier où il vient d'escrire l'arrest de condamnation contre vn adultere, le iuge en defrobe vn lopin, pour en faire vn poulet à la femme de son compagnon. Celle à qui vous viendrez de vous frotter illicitement, criera plus asprement, tantost, en vostre presence mesme, à l'encontre d'une pareille faute de sa compaignie, que ne feroit Porcie. Et tel condamne les hommes à mourir, pour des crimes, qu'il n'estime point fautes. J'ay veu en ma ieunesse, vn galant homme, presenter d'une main au peuple des vers excellens & en beauté & en desbordement ; & de l'autre main en mesme instant, la plus quereleuse reformation theologienne, dequoy le monde se soit desieuné il y a long temps. Les hommes vont ainfin. On laisse les loix, & preceptes suiure leur voye, nous en tenons vne autre.

Non par defreglement de mœurs seulement, mais par opinion souuent, & par iugement contraire. Sentez lire vn discours de philosophie : l'inuention, l'eloquence, la pertinence, frappe incontinent vostre esprit, & vous esmeut. Il n'y a rien qui chatouille ou poigne vostre conscience : ce n'est pas à elle qu'on parle. Est-il pas vray ? Si disoit Ariston, que ny vne estuue ny vne leçon, n'est d'aucun fruit si elle ne nettoye & ne decrasse. On peut s'arrester à l'escorce : mais c'est apres qu'on en a retiré la mouelle. Comme apres auoir aualé le bon vin d'une belle coupe, nous en confiderons les graueures & l'ouurage. En toutes les chambrées de la philosophie ancienne, cecy se trouuera, qu'un mesme ouurier, y publie des regles de temperance, & publie ensemble des escrits d'amour & desbauche. Et Xenophon, au giron de Clinias, escriuit contre la vertu Aristippique. Ce n'est pas qu'il y ait vne conuersion miraculeuse, qui les agite à ondées. Mais c'est que Solon se represente tantost soy-mesme, tantost en forme de legiflateur : tantost il parle pour la presse, tantost pour soy. Et prend pour soy les regles libres & naturelles, s'asseurant d'une santé ferme & entiere.

Curentur dubij medicis maioribus agri.

Antifthenes permet au sage d'aimer, & faire à sa mode ce, qu'il trouue estre opportun, sans s'attendre aux loix : d'autant qu'il a meilleur aduis qu'elles, & plus de cognoissance de la vertu. Son disciple Diogenes, disoit, opposer aux perturbations, la raison : à fortune, la confidence : aux loix, nature. Pour les estomachs tendres, il faut des ordonnances

contraintes & artificielles. Les bons estomachs se seruent simplement, des prescriptions de leur naturel appetit. Ainsi font nos medecins, qui mangent le melon & boient le vin fraiz, ce pendant qu'ils tiennent leur patient obligé au sirop & à la panade. Je ne sçay quels liures, disoit la courtisane Lays, quelle sapience, quelle philosophie, mais ces gens-là, battent aussi souuent à ma porte, qu'aucuns autres. D'autant que nostre licence nous porte tousiours au delà de ce qui nous est loisible, & permis, on a estressy souuent outre la raison vniuerselle, les preceptes & loix de nostre vie.

*Nemo satis credit tantum delinquere, quantum
Permittas.*

Il feroit à desirer, qu'il y eust plus de proportion du commandement à l'obeissance. Et semble la visée iniuste, à laquelle on ne peut atteindre. Il n'est si homme de bien, qu'il mette à l'examen des loix toutes ses actions & pensées, qui ne soit pendable dix fois en sa vie. Voire tel, qu'il feroit tref-grand dommage, & tref-iniuste de punir & de perdre.

*Olle quid ad te,
De cute quid faciat ille vel illa sua?*

Et tel pourroit n'offencer point les loix, qui n'en meriteroit point la louange d'homme de vertu : & que la philosophie feroit tref-iustement foiter. Tant cette relation est trouble & inegale. Nous n'auons garde d'estre gens de bien selon Dieu : nous ne le sçaurions estre selon nous. L'humaine sagesse, n'arriua iamais aux deuoirs qu'elle s'estoit elle

mesme prescript. Et si elle y estoit arriuee, elle s'en prescriroit d'autres au delà, où elle aspirast tousiours & pretendist. Tant nostre estat est ennemy de consistance. L'homme s'ordonne à soy mesme, d'estre necessairement en faute. Il n'est guere fin, de tailler son obligation, à la raison d'un autre estre, que le sien. A qui prescript-il ce, qu'il s'attend que personne ne face? Luy est-il iniuste de ne faire point ce qu'il luy est impossible de faire? Les loix qui nous condamnent, à ne pouuoir pas, nous condamnent de ce que nous ne pouuons pas. Au pis aller, cette difforme liberté, de se presenter à deux endroits, & les actions d'une façon, les discours de l'autre; soit loisible à ceux, qui disent les choses. Mais elle ne le peut estre à ceux, qui se disent eux mesmes, comme ie fais. Il faut que l'aille de la plume comme des pieds. La vie commune, doit auoir conference aux autres vies. La vertu de Caton estoit vigoureuse, outre la raison de son siecle: & à un homme qui se mesloit de gouverner les autres, destiné au seruice commun; il se pourroit dire, que c'estoit une iustice, sinon iniuste, au moins vaine & hors de saison. Mes mœurs mesmes, qui ne desconuiennent de celles, qui courent, à peine de la largeur d'un poulcé, me rendent pourtant aucunement farouche à mon aage, & inaffociable. Ie ne sçay pas, si ie me trouue desgouté sans raison, du monde, que ie hante; mais ie sçay bien, que ce feroit sans raison, si ie me plaingnoy, qu'il fust desgouté de moy, puis que ie le suis de luy. La vertu assignee aux affaires du monde, est une vertu à plusieurs plis, encoigneures, & couddes, pour s'appliquer & ioindre à l'humaine foiblesse: meslee & artificielle; non droite, nette, constante, ny pure-

ment innocente. Les annales reprochent iufqu'à cette heure à quelqu'un de nos Roys, de s'estre trop simplement laiffé aller aux consciencieufes perfuafions de fon confesseur. Les affaires d'estat ont des preceptes plus hardis.

*exeat aula,
Qui vult esse pius.*

J'ay autresfois essayé d'employer au service des maniemens publiques, les opinions & regles de viure, ainsi rudes, neufues, impolies ou impollues, comme ie les ay nées chez moy, ou rapportees de mon institution, & desquelles ie me fers, sinon si commodement au moins seurement en particulier : vne vertu scholastique & nouice : ie les y ay trouuees ineptes & dangereufes. Celuy qui va en la presse, il faut qu'il gauchisse, qu'il ferre ses couddes, qu'il recule, ou qu'il auance, voire qu'il quitte le droit chemin, selon ce qu'il rencontre. Qu'il viue non tant selon foy, que selon autrui : non selon ce qu'il se propose, mais selon ce qu'on luy propose : selon le temps, selon les hommes, selon les affaires. Platon dit, que qui eschappe, brayes nettes, du maniemement du monde, c'est par miracle, qu'il en eschappe. Et dit aussi, que quand il ordonne son philosophe chef d'une police, il n'entend pas le dire d'une police corrompue, comme celle d'Athenes : & encore bien moins, comme la nostre, enuers lesquelles la sagesse mesme perdroit son Latin. Et vne bonne herbe, transplantee, en solage fort diuers à sa condition, se conforme bien plustost à iceluy, qu'elle ne le reforme à foy. Je sens que si j'auois à me dresser tout à fait à telles occupations, il m'y faudroit beaucoup de changement & de rabillage. Quand ie

pourrois cela sur moy, & pourquoy ne le pourrois ie, avec le temps & le soing? ie ne le voudrois pas. De ce peu que ie me suis essayé en cette vacation, ie m'en suis d'autant degousté. Je me sens fumer en l'ame par fois, aucunes tentations vers l'ambition : mais ie me bande & obstine au contraire :

At tu Catulled obſtinatus obdura.

On ne m'y appelle gueres, & ie m'y conuie aussi peu. La liberté & l'oyſiueté, qui sont mes maistresses qualitez, sont qualitez, diametralement contraires à ce mestier là. Nous ne ſçauons pas distinguer les facultez des hommes. Elles ont des diuisions, & bornes, mal-ayſees à choisir & delicates. De conclurre par la ſuffiſance d'une vie particuliere, quelque ſuffiſance à l'vſage public, c'eſt mal conclud. Tel ſe conduict bien, qui ne conduict pas bien les autres : & faiſt des Effais, qui ne ſçauroient faire des effets. Tel dresse bien vn ſiege, qui dresserait mal vne bataille : & discourtoit bien en priué, qui harangueroit mal ou vn peuple ou vn Prince. Voire à l'auanture, est-ce pluſtoſt teſmoignage à celuy qui peut l'vn, de ne pouuoir point l'autre, qu'autrement. Je trouue que les esprits hauts, ne sont de guere moins aptes aux choses basses, que les bas esprits aux hautes. Estoit-il à croire, que Socrates eust appresté aux Atheniens matiere de rire à ses despens, pour n'auoir onques ſçeu computer les ſuffrages de ſa tribu, & en faire rapport au conseil? Certes la veneration, en quoy i'ay les perfections de ce personnage, merite, que ſa fortune fournisse à l'excuse de mes principales imperfections, vn ſi magnifique exemple. Nostre ſuffiſance est detaillee à menues

pieces. La mienne n'a point de latitude, & si est chetive en nombre. Saturninus, à ceux qui luy auoient deferé tout commandement : Compaignons, fit-il, vous auez perdu vn bon capitaine, pour en faire vn mauuais general d'armee. Qui se vante, en vn temps malade, comme cestuy-cy, d'employer au seruice du monde, vne vertu naifue & sincere : ou il ne la cognoist pas, les opinions se corrompans avec les mœurs (de vray, oyez la leur peindre, oyez la pluspart se glorifier de leurs deportemens, & former leurs regles ; au lieu de peindre la vertu, ils peignent l'iniustice toute pure & le vice : & la presentent ainsi fauce à l'institution des Princes) ou s'il la cognoist, il se vante à tort : & quoy qu'il die, fait mille choses, dequoy sa conscience l'accuse. Je croirois volontiers Seneca de l'experience qu'il en fit en pareille occasion, pourueu qu'il m'en voulust parler à cœur ouuert. La plus honorable marque de bonté, en vne telle necessité, c'est recognoistre librement sa faute, & celle d'autrui : appuyer & retarder de sa puissance, l'inclination vers le mal : suyure enuis cette pente, mieux esperer & mieux desirer. I'apperçois en ces desmembremens de la France, & diuisions, où nous sommes tombez, chacun se trauailler à deffendre sa cause : mais iusques aux meilleurs, avec desguisement & mensonge. Qui en escriroit rondement, en escriroit temerairement & vitieusement. Le plus iuste party, si est-ce encore le membre d'un corps vermoulu & vereux. Mais d'un tel corps, le membre moins malade s'appelle sain : & à bon droit, d'autant que nos qualitez n'ont tiltre qu'en la comparaison. L'innocence ciuile, se mesure selon les lieux & saisons. I'aymeroie bien à voir en Xenophon, vne telle loüange d'Agésilas. Estant prié par vn Prince voi-

fin, avec lequel il auoit autresfois esté en guerre, de le laisser passer en ses terres, il l'octroya : luy donnant passage à trauers le Peloponnese : & non seulement ne l'emprisonna ou empoisonna, le tenant à sa mercy : mais l'accueillit courtoisement, fuyuant l'obligation de sa promesse, sans luy faire offence. A ces humeurs là, ce ne seroit rien dire. Ailleurs & en autre temps, il se fera conte de la franchise, & magnanimité d'une telle action. Ces babouyns capettes s'en fussent moquez. Si peu retire l'innocence Spartaine à la Françoisë. Nous ne laissons pas d'auoir des hommes vertueux : mais c'est selon nous. Qui a ses mœurs establies en reglement au dessus de son siecle : ou qu'il torde, & émousse ses regles : ou, ce que ie luy conseille plustost, qu'il se retire à quartier, & ne se melle point de nous. Qu'y gaigneroit-il ?

*Egregium sanctumque virum si cerno, bimembri
Hoc monstrum puero, & miranti iam sub aratro
Piscibus inuentis & fætæ comparo mulæ.*

On peut regretter les meilleurs temps : mais non pas fuyr aux presens : on peut desirer autres magistrats, mais il faut ce nonobstant, obeyr à ceux icy. Et à l'aduanture y a il plus de recommandation, d'obeyr aux mauuais, qu'aux bons. Autant que l'image des loix receuës, & anciennes de cette monarchie, reluyra en quelque coin, m'y voila planté. Si elles viennent par malheur, à se contredire, & empescher entr'elles, & produire deux parts, de choix douteux, & difficile : mon election sera volontiers, d'eschapper, & me desrober à cette tempeste. Nature m'y pourra prester ce pendant la main : ou les hazards de la guerre. Entre Cæsar & Pompeius,

ie me fusse franchement déclaré. Mais entre ces trois voleurs, qui vindrent depuis, ou il eust fallu se cacher, ou suyure le vent. Ce que i'estime loisible, quand la raison ne guide plus.

Quò diuersus abis?

Cette farcisseure, est vn peu hors de mon theme. Je m'esgare : mais plustost par licence, que par mesgarde. Mes fantasies se suyuent : mais par fois c'est de loing : & se regardent, mais d'une veuë oblique. J'ay passé les yeux sur tel dialogue de Platon : mi-party d'une fantastique bigarrure : le deuant à l'amour, tout le bas à la rhetorique. Ils ne craignent point ces nuances : & ont une merueilleuse grace à se laisser ainsi rouller au vent : ou à le sembler. Les noms de mes chapitres n'en embrassent pas tousiours la matiere : souuent ils la denotent seulement, par quelque marque : comme ces autres l'Andrie, l'Eunuque ; ou ceux cy, Sylla, Cicero, Torquatus. J'ayme l'alleure poëtique, à fauts & à gambades. C'est vn art, comme dit Platon, leger, volage, demoniacle. Il est des ouurages en Plutarque, où il oublie son theme, où le propos de son argument ne se trouue que par incident, tout estouffé en matiere estrangere. Voyez ses alleures au Dæmon de Socrates. O Dieu, que ces gaillardes escapades, que cette variation a de beauté : & plus lors, que plus elle retire au nonchalant & fortuit ! C'est l'indiligent lecteur, qui perd son subiect ; non pas moy. Il s'en trouuera tousiours en vn coing quelque mot, qui ne laisse pas d'estre bastant, quoy qu'il soit ferré. Je vois au change, indiscrettement & tumultuairement : mon stile, & mon esprit, vont vagabondant de mesmes.

Il faut auoir vn peu de folie, qui ne veut auoir plus de sottise : disent, & les preceptes de nos maistres, & encores plus leurs exemples. Mille poëtes trainent & languissent à la prosaïque, mais la meilleure prose ancienne, & ie la feme ceans indifferemment pour vers, reluit par tout, de la vigueur & hardiesse poëtique, & represente quelque air de sa fureur. Il luy faut certes quitter la maistrise, & preeminence en la parlerie. Le poëte, dit Platon, assis sur le trepiéd des Muses, verse de furie, tout ce qui luy vient en la bouche : comme la gargouille d'une fontaine, sans le ruminer & poiser : & luy eschappe des choses, de diuerse couleur, de contraire substance, & d'un cours rompu. Et la vieille theologie est toute poësie, disent les sçauants, & la premiere philosophie. C'est l'originel langage des Dieux. I'entends que la matiere se distingue soy-mesmes. Elle montre assez où elle se change, où elle conclud, où elle commence, où elle se reprend : sans l'entrelasser de parolles, de liaison, & de cousture, introduictes pour le seruice des oreilles foibles, ou nonchallantes : & sans me gloser moy-mesme. Qui est celuy, qui n'ayme mieux n'estre pas leu, que de l'estre en dormant ou en fuyant ? *Nihil est tam vile, quod in transitu profit.* Si prendre des liures, estoit les apprendre : & si les veoir, estoit les regarder : & les parcourir, les saisir, i'auroy tort de me faire du tout si ignorant que ie dy. Puisque ie ne puis arrester l'attention du lecteur par le poix : *manco male*, s'il aduient que ie l'arreste par mon embrouilleure. Voire mais, il se repentira par apres, de s'y estre amusé. C'est mon : mais il s'y fera tousiours amusé. Et puis il est des humeurs comme cela, à qui l'intelligence porte desdain : qui m'en estime-

ront mieux de qu'ils ne sçauront ce que ie dis : ils conclurront la profondeur de mon sens, par l'obscurité. Laquelle à parler en bon escient, ie hay bien fort : & l'euterois, si ie me sçauois euter. Aristote se vante en quelque lieu, de l'affecter. Vitieuse affectation. Par ce que la coupure si frequente des chapitres, dequoy i'vsoy au commencement, m'a semblé rompre l'attention, auant qu'elle soit née, & la diffoudre : dedaignant s'y coucher pour si peu, & se recueillir : ie me suis mis à les faire plus longs : qui requierent de la proposition & du loisir assigné. En telle occupation, à qui on ne veut donner vne seule heure, on ne veut rien donner. Et ne fait on rien pour celuy, pour qui on ne fait, qu'autre chose faisant. Ioint, qu'à l'aduenture ay-ie quelque obligation particuliere, à ne dire qu'à demy, à dire confusement, à dire discordamment. Ie veux donq mal à cette raison trouble-feste. Et ces proieçts extrauagants qui trauaillent la vie, & ces opinions si fines, si elles ont de la verité ; ie la trouue trop chere & trop incommode. Au rebours : ie m'employe à faire valoir la vanité mesme, & l'asnerie, si elle m'apporte du plaisir. Et me laisse aller apres mes inclinations naturelles sans les contreroller de si pres. I'ay vëu ailleurs des maisons ruynées, & des statues, & du ciel & de la terre : ce sont tousiours des hommes. Tout cela est vray : & si pourtant ne sçauroy reuoir si souuent le tombeau de cette ville, si grande, & si puissante, que ie ne l'admire & reuere. Le soing des morts nous est en recommandation. Or i'ay esté nourry des mon enfance, avec ceux icy. I'ay eu cognoissance des affaires de Rome, long temps auant que ie l'aye eüe de ceux de ma maison. Ie sçauois le Capitole & fon

plant, auant que ie sceusse le Louure : & le Tibre auant la Seine. I'ay eu plus en teste, les conditions & fortunes de Lucullus, Metellus, & Scipion, que ie n'ay d'aucuns hommes des nostres. Ils sont trespassez. Si est bien mon pere : aussi entierement qu'eux : & s'est esloigné de moy, & de la vie, autant en dixhuit ans, que ceux-là ont fait en seize cens : duquel pourtant ie ne laisse pas d'embrasser & practiquer la memoire, l'amitié & societé, d'une parfaite vnion & tres-viue. Voire, de mon humeur, ie me rends plus officieux enuers les trespassez. Ils ne s'aydent plus, ils en requierent ce me semble d'autant plus mon ayde. La gratitude est là, iustement en son lustre. Le bien-faict est moins richement assigné, où il y a retrogradation, & reflexion. Arcesilaus visitant Ctesibius malade, & le trouuant en pauvre estat, luy fourra tout bellement sous le cheuet du liçt, de l'argent qu'il luy donnoit. Et en le luy celant, luy donnoit en outre, quittance de luy en scauoir gré. Ceux qui ont merité de moy, de l'amitié & de la recognoissance, ne l'ont iamais perdue pour n'y estre plus : ie les ay mieux payez, & plus soigneusement, absens & ignorans. Ie parle plus affectueusement de mes amis, quand il n'y a plus de moyen qu'ils le sachent. Or i'ay attaqué cent querelles pour la deffence de Pompeius, & pour la cause de Brutus. Cette accointance dure encore entre nous. Les choses presentes mesmes, nous ne les tenons que par la fantasie. Me trouuant inutile à ce siecle, ie me reiecte à cet autre. Et en suis si embabouyné, que l'estat de cette vieille Rome, libre, iuste, & florissante, car ie n'en ayme, ny la naissance, ny la vieillesse, m'interesse & me passionne. Parquoy ie ne scauroy reuoir si souuent, l'assiette de leurs

ruës, & de leurs maisons, & ces ruynes profondes iufques aux Antipodes, que ie ne m'y amufe. Est-ce par nature, ou par erreur de fantaſie, que la veuë des places, que nous ſçauons auoir eſté hantées & habitées par perſonnes, deſquelles la memoire eſt en recommandation, nous emeut aucunement plus, qu'ouïr le recit de leurs faicts, ou lire leurs eſcrits ? *Tanta vis admonitionis ineſt in locis. Et id quidem in hac vrbe infinitum : quacumque enim ingredimur, in aliquam hiftoriam veſtigium ponimus.* Il me plaift de confiderer leur viſage, leur port, & leurs veſtemens. Ie remaſche ces grands noms entre les dents, & les fais retentir à mes oreilles. *Ego illos veneror, & tantis nominibus ſemper aſſurgo.* Des choſes qui ſont en quelque partie grandes & admirables, i'en admire les parties meſmes communes. Ie les viſſe volontiers deuifer, promener, & ſoupper. Ce ſeroit ingratitude, de meſpriſer les reliques, & images de tant d'honneſtes hommes, & ſi valeureux leſquels i'ay veu viure & mourir : & qui nous donnent tant de bonnes inſtructions par leur exemple, ſi nous les ſçauions ſuyre. Et puis cette meſme Rome que nous voyons, merite qu'on l'ayme. Confederée de ſi long temps, & par tant de tiltres, à noſtre couronne. Seule ville commune, & vniuerſelle. Le magiſtrat ſouuerain qui y commande, eſt recognu pareillement ailleurs : c'eſt la ville metropolitaine de toutes les nations Chreſtiennes. L'Eſpagnol & le François, chacun y eſt chez foy. Pour eſtre des Princes de cet eſtat, il ne faut qu'eſtre de Chreſtienté, où qu'elle ſoit. Il n'eſt lieu çà bas, que le ciel ayt embrasſé avec telle influence de faueur, & telle conſtance. Sa ruïne meſme eſt glorieuſe & enſſée.

Laudandis precioſior ruinis.

Encore retient elle au tombeau des marques & image d'empire. *Vt palam fit vno in loco gaudentis opus esse naturæ.* Quelqu'un se blâmeroit, & se mutinerait en soy-mesme, de se sentir chatouïller d'un si vain plaisir. Nos humeurs ne sont pas trop vaines, qui sont plaisantes. Quelles qu'elles foyent qui contentent constamment un homme capable de sens commun, ie ne sçaurois auoir le cœur de le pleindre. Ie dois beaucoup à la Fortune, dequoy iusques à cette heure, elle n'a rien fait contre moy d'outrageux au delà de ma portée. Seroit ce pas sa façon, de laisser en paix, ceux de qui elle n'est point importunée ?

*Quanto quisque sibi plura negauerit,
A Diis plura feret, nil cupientium,
Nudus castra peto, multa petentibus,
Desunt multa.*

Si elle continue, elle me r'enuoyera tref-content, & satisfait,

*nihil supra
Deos laceſſo.*

Mais gare le heurt. Il en est mille qui rompent au port. Ie me console aisément, de ce qui aduiendra icy, quand ie n'y feray plus. Les choses presentes m'embesongnent assez,

fortunæ cætera mando.

Aussi n'ay-ie point cette forte liaison, qu'on dit attacher les hommes à l'aduenir, par les enfans qui portent leur nom, & leur honneur. Et en dois desirer à l'auanture d'autant moins, s'ils sont si

desirables. Je ne tiens que trop au monde, & à cette vie par moy-mesme. Je me contente d'estre en prise de la Fortune, par les circonstances proprement necessaires à mon estre, sans luy alonger par ailleurs sa iurisdiction sur moy. Et n'ay iamais estimé qu'estre sans enfans, fust vn defect qui deust rendre la vie moins complete, & moins contente. La vacation sterile, a bien aussi ses commoditez. Les enfans sont du nombre des choses, qui n'ont pas fort dequoy estre desirées, notamment à cette heure, qu'il seroit si difficile de les rendre bons. *Bona iam nec nasci licet, ita corrupta sunt femina.* Et si ont iustement dequoy estre regrettées, à qui les perd, apres les auoir acquises. Celuy qui me laissa ma maison en charge, prognostiquoit que ie la deusse ruynier, regardant à mon humeur, si peu casaniere. Il se trompa; me voicy comme i'y entray : sinon vn peu mieux. Sans office pourtant & sans benefice. Au demeurant, si la Fortune ne m'a fait aucune offence violente, & extraordinaire, aussi n'a-elle pas de grace. Tout ce qu'il y a de ses dons chez nous, il y est auant moy, & au delà de cent ans. Je n'ay particulierement aucun bien essentiel, & solide, que ie doie à sa liberalité. Elle m'a fait quelques faueurs venteuses, honnoraires, & titulaires, sans substance. Et me les a aussi à la verité, non pas accordées, mais offertes. Dieu sçait, à moy : qui suis tout materiel, qui ne me paye que de la realité, encores bien massiue : & qui, si ie l'osois confesser, ne trouuerois l'auarice, guere moins excusable que l'ambition : ny la douleur, moins euitable que la honte : ny la santé, moins desirable que la doctrine : ou la richesse, que la noblesse. Parmi ses faueurs vaines, ie n'en ay point qui plaie

tant à cette niaïse humeur, qui s'en paist chez moy, qu'une bulle authentique de bourgeoisie Romaine : qui me fut octroyée dernièrement que i'y estois, pompeuse en seaux, & lettres dorées : & octroyée avec toute gracieuse liberalité. Et par ce qu'elles se donnent en diuers stile, plus ou moins fauorable : & qu'auant que i'en eusse veu, i'eusse esté bien aise, qu'on m'en eust montré vn formulaire : ie veux, pour satisfaire à quelqu'un, s'il s'en trouue malade de pareille curiosité à la mienne, la transcrire icy en sa forme.

Quod Horatius Maximus, Martius Cecius, Alexander Mutus, almæ vrbis conseruatores de Illustrissimo viro Michaële Montano equite sancti Michaëlis, & à Cubiculo Regis Christianissimi, Romana Ciuitate donando, ad Senatum retulerunt, S. P. Q. R. de ea re ita fieri censuit.



VM vetèri more & instituto cupidè illi semper studiosèque suscepti sint, qui virtute ac nobilitate præstantes, magno Reip. nostræ vsui atque ornamento fuissent, vel esse aliquando possent : Nos maiorum nostrorum exemplo atque auctoritate permoti, præclaram hanc Consuetudinem nobis imitandam ac seruandam fore censemus. Quamobrem cum Illustrissimus Michaël Montanus Eques sancti Michaëlis, & à Cubiculo Regis Christianissimi Romani nominis studiosissimus, & familiæ laude atque splendore & propriis virtutum meritis dignissimus sit, qui summo Senatus Populique Romani iudicio ac studio in Romanam Ciuitatem adsciscatur ; placere Senatui P. Q. R. Illustrissimum Michaëlem Montanum rebus omnibus ornatissimum, atque huic inclyto populo charissimum, ipsam posterisque in Romanam Ciuitatem adscribi, ornarique

omnibus & præmiis & honoribus, quibus illi fruuntur, qui Ciues Patritiiue Romani nati aut iure optimo facti sunt. In quo censere Senatum P. Q. R. se non tam illi Ius Ciuitatis largiri quàm debitum tribuere, neque magis beneficium dare quàm ab ipso accipere, qui hoc Ciuitatis munere accipiendo, singulari Ciuitatem ipsam ornamento atque honore affecerit. Quam quidem S. C. auctoritatem iidem Conseruatores per Senatus P. Q. R. scribas in acta referri atque in Capitolij curia seruari, priuilegiùmque huiusmodi fieri, solitoque vrbs sigillo communiri curarunt. Anno ab vrbe condita CXCCCCXXXI. post Christum natum M. D. LXXXI. III. Idus Martij.

Horatius Fuscus sacri S. P. Q. R. scriba.

Vincent. Martholus sacri S. P. Q. R. scriba.

N'estant bourgeois d'aucune ville, ie suis bien aise de l'estre de la plus noble qui fut & qui fera onques. Si les autres se regardoient attentiuement, comme ie fay, ils se trouueroient comme ie fay, pleins d'inanité & de fadaïse. De m'en deffaire, ie ne puis, sans me deffaire moy-mesmes. Nous en sommes tous confits, tant les vns que les autres. Mais ceux qui le sentent, en ont vn peu meilleur compte : encore ne sçay-ie. Cette opinion & vfance commune, de regarder ailleurs qu'à nous, a bien pourueu à nostre affaire. C'est vn obiect plein de mescontentement. Nous n'y voyons que misere & vanité. Pour ne nous desconforter, Nature a reietté bien à propos, l'action de nostre veuë, au dehors. Nous allons en auant à vau l'eau, mais de rebrousser vers nous, nostre course, c'est vn mouuement penible : la mer se brouille & s'empesche ainfi, quand elle est repoussée à foy. Regardez, dict chacun, les branles du ciel : regardez au public : à la querelle de cestuy-là : au pouls d'vn tel : au

testament de cet autre : somme regardez tousiours haut ou bas, ou à costé, ou deuant, ou derriere vous. C'estoit vn commandement paradoxe, que nous faisoit anciennement ce Dieu à Delphes : Regardez dans vous, recognoissez vous, tenez vous à vous. Vostre esprit, & vostre volonté, qui se consume ailleurs, ramenez la en soy : vous vous escoulez, vous vous respandez : appilez vous, soustenez vous : on vous trahit, on vous dissipe, on vous desrobe à vous. Voy tu pas, que ce monde tient toutes ses veuës contraintes au dedans, & ses yeux ouuerts à se contempler soy-mesme ? C'est tousiours vanité pour toy, dedans & dehors : mais elle est moins vanité, quand elle est moins estendue. Sauf toy, ô homme, disoit ce Dieu, chasque chose s'estudie la premiere, & a selon son besoin, des limites à ses traux & desirs. Il n'en est vne seule si vuide & necessiteuse que toy, qui embrasses l'univers. Tu es le scrutateur sans cognoissance : le magistrat sans iurisdiction : & apres tout, le badin de la farce.





De mesnager sa volonté.

CHAPITRE X.



v prix du commun des hommes, peu de choses me touchent : ou pour mieux dire, me tiennent. Car c'est raison qu'elles touchent, pourueu qu'elles ne nous possèdent. J'ay grand soin d'augmenter par estude, & par discours, ce priuilege d'insensibilité, qui est naturellement bien auancé en moy. L'espouse, & me passionne par consequent, de peu de choses. J'ay la veuë clere : mais ie l'attache à peu d'objectz : le sens delicat & mol : mais l'apprehension & l'application, ie l'ay dure & fourde. Ie m'engage difficilement. Autant que ie puis ie m'employe tout à moy. Et en ce subiect mesme, ie briderois pourtant & soustiendrois volontiers, mon affection, qu'elle ne s'y plonge trop entiere : puis que c'est vn subiect, que ie possède à la mercy d'autrui, & sur lequel la Fortune a plus de droict que ie n'ay. De maniere, que iusques à la santé, que i'estime tant, il me seroit besoing, de ne la pas desirer, & m'y addonner si furieusement, que i'en trouue les maladies importables. On se doit moderer, entre la haine de la douleur, & l'amour de

la volupté. Et ordonne Platon vne moyenne route de vie entre les deux. Mais aux affections qui me distraient de moy, & attachent ailleurs, à celles là certes m'oppose-je de toute ma force. Mon opinion est, qu'il se faut prester à autrui, & ne se donner qu'à soy-mesme. Si ma volonté se trouuoit aysée à s'hypothéquer & à s'appliquer, ie n'y durerois pas. Ie suis trop tendre, & par nature & par vsage,

fugax rerum, securaque in otia natus.

Les debats contestez & opiniaistrez, qui donneroient en fin aduantage à mon aduersaire; l'issue qui rendroit honteuse ma chaulde poursuite, me rongeroit à l'aduantage bien cruellement. Si ie mordoïs à mesme, comme font les autres; mon ame n'auroit iamais la force de porter les alarmes, & emotions, qui suyuent ceux qui embrassent tant. Elle seroit incontinent disloquée par cette agitation intestine. Si quelquefois on m'a poussé au maniement d'affaires estrangeres, i'ay promis de les prendre en main, non pas au poulmon & au foye; de m'en charger, non de les incorporer : de m'en soigner, ouy; de m'en passionner, nullement : i'y regarde, mais ie ne les couue point. I'ay assez affaire à disposer & ranger la presse domestique que i'ay dans mes entrailles, & dans mes veines, sans y loger, & me fouler d'une presse estrangere. Et suis assez interessé de mes affaires essentiels, propres, & naturels, sans en conuiuer d'autres forains. Ceux qui sçauent combien ils se doiuent, & de combien d'offices ils sont obligez à eux, trouuent que Nature leur a donné cette commission plaine assez, & nullement oyisive. Tu as bien largement affaire chez toy, ne t'esloigne

pas. Les hommes se donnent à louage. Leurs facultez ne sont pas pour eux; elles sont pour ceux, à qui ils s'asservissent; leurs locataires sont chez eux, ce ne sont pas eux. Cette humeur commune ne me plaist pas. Il faut mesnager la liberté de nostre ame, & ne l'hypotequer qu'aux occasions iustes. Lesquelles sont en bien petit nombre, si nous iugeons sainement. Voyez les gens appris à se laisser emporter & saisir, ils le sont par tout. Aux petites choses comme aux grandes; à ce qui ne les touche point, comme à ce qui les touche. Ils s'ingerent indifferemment où il y a de la besongne; & sont sans vie, quand ils sont sans agitation tumultuaire. *In negotiis sunt, negotij causa*. Ils ne cherchent la besongne que pour embesongnement. Ce n'est pas, qu'ils vueillent aller, tant, comme c'est, qu'ils ne se peuvent tenir. Ne plus ne moins, qu'une pierre esbranlée en sa cheute, qui ne s'arreste iusqu'à tant qu'elle se couche. L'occupation est à certaine maniere de gents, marque de suffisance & de dignité. Leur esprit cherche son repos au bransle, comme les enfans au berceau. Ils se peuvent dire autant serviables à leurs amis, comme importuns à eux mesmes. Personne ne distribue son argent à autrui, chacun y distribue son temps & sa vie. Il n'est rien dequoy nous soyons si prodigues, que de ces choses là, desquelles seules l'avarice nous seroit vtile & louable. Je prens une complexion toute diuerse. Je me tiens sur moy. Et communément desire mollement ce que ie desire, & desire peu: m'occupe & embesongne de mesme, rarement & tranquillement. Tout ce qu'ils veulent & conduisent, ils le font de toute leur volonté & vehemence. Il y a tant de mauvais pas, que pour le plus seur, il faut un peu legerement & superficiellement couler

ce monde : & le gliffer, non pas l'enfoncer. La volupté mesme, est douloureuse en sa profondeur.

*incedis per ignes,
Subpostos cineri doloso.*

Messieurs de Bordeaux m'esleurent Maire de leur ville, estant esloigné de France; & encore plus esloigné d'un tel pensément. Je m'en excusay. Mais on m'apprint que j'auois tort; le commandement du Roy s'y interposant aussi. C'est vne charge, qui doit sembler d'autant plus belle, qu'elle n'a, ny loyer ny gain, autre que l'honneur de son execution. Elle dure deux ans; mais elle peut estre continuée par seconde eslection. Ce qui aduient trefrarement. Elle le fut à moy; & ne l'auoit esté que deux fois auparavant : quelques années y auoit, à Monsieur de Lanfac; & fraichement à Monsieur de Biron Marechal de France. En la place duquel ie succeday; & laissay la mienne, à Monsieur de Matignon aussi Marechal de France. Glorieux de si noble assistance.

utrumque bonus pacis bellicæ minister.

La Fortune voulut part à ma promotion, par cette particuliere circonstance qu'elle y mit du sien. Non vaine du tout. Car Alexandre desdaigna les Ambassadeurs Corinthiens qui luy offroyent la bourgeoisie de leur ville; mais quand ils vindrent à luy deduire, comme Bacchus & Hercules estoient aussi en ce registre, il les en remercia gracieusement: A mon arriuée, ie me deschiffray fidelement, & consciencieusement, tout tel que ie me sens estre : sans memoire, sans vigilance, sans experience, & sans vigueur : sans

hayne aussi, sans ambition, sans avarice, & sans violence : à ce qu'ils fussent informez & instruits de ce qu'ils auoyent à attendre de mon seruice. Et par ce que la cognoissance de feu mon pere les auoit seule incitez à cela, & l'honneur de sa memoire : ie leur adioustay bien clairement, que ie serois tres-marry que chose quelconque fist autant d'impression en ma volonté, comme auoyent faict autrefois en la sienne, leurs affaires, & leur ville, pendant qu'il l'auoit en gouuernement, en ce lieu mesme auquel ils m'auoyent appellé. Il me souuenoit, de l'auoir veu vieil, en mon enfance, l'ame cruellement agitée de cette tracasserie publique; oubliant le doux air de sa maison, où la foiblesse des ans l'auoit attaché long temps auant; & son mefnage, & sa santé; & mesprisant certes sa vie, qu'il y cuida perdre, engagé pour eux, à des longs & penibles voyages. Il estoit tel; & luy parloit cette humeur d'une grande bonté de nature. Il ne fut iamais ame plus charitable & populaire. Ce train, que ie louë en autrui, ie n'ayme point à le suiure. Et ne suis pas sans excuse. Il auoit ouy dire, qu'il se falloit oublier pour le prochain; que le particulier ne venoit en aucune consideration au prix du general. La plus part des regles & preceptes du monde prennent ce train, de nous pouffer hors de nous, & chasser en la place, à l'usage de la société publique. Ils ont pensé faire vn bel effect, de nous destourner & distraire de nous; presuppofans que nous n'y tinssions que trop, & d'une attache trop naturelle; & n'ont espargné rien à dire pour cette fin. Car il n'est pas nouveau aux sages, de prescher les choses comme elles seruent, non comme elles sont. La verité a ses empeschemens, incommoditez & incompatibilitez avec nous. Il nous faut souuent

tromper, afin que nous ne nous trompions. Et filler nostre veuë, eslourdir nostre entendement, pour les redresser & amender. *Imperiti enim iudicant, & qui frequenter in hoc ipsum fallendi sunt, ne errent.* Quand ils nous ordonnent, d'aymer auant nous, trois, quatre, & cinquante degrez de choses; ils representent l'art des archers, qui pour arriuer au poinct, vont prenant leur visée grande espace au dessus de la bute. Pour dresser vn bois courbe, on le recourbe au rebours. L'estime qu'au temple de Pallas, comme nous voyons en toutes autres religions, il y auoit des mysteres apparens, pour estre montrez au peuple; & d'autres mysteres plus secrets, & plus haults, pour estre montrés seulement à ceux qui en estoient profez. Il est vray-semblable qu'en ceux-cy, se trouue le vray poinct de l'amitié que chacun se doit. Non vne amitié faulce, qui nous fait embrasser la gloire, la science, la richesse, & telles choses, d'une affection principale & immodérée, comme membres de nostre estre; ny vne amitié molle & indiscrete; en laquelle il aduient ce qui se voit au lierre, qu'il corrompt & ruyne la paroy qu'il accole. Mais vne amitié salutaire & réglée; esgalement vtile & plaisante. Qui en sçait les deuoirs, & les exerce, il est vrayement du cabinet des Muses; il a atteint le sommet de la sagesse humaine, & de nostre bon heur. Cettuy-cy, sçachant exactement ce qu'il se doit, trouue dans son rolle, qu'il doit appliquer à foy, l'usage des autres hommes, & du monde; & pour ce faire, contribuer à la société publique les deuoirs & offices qui le touchent. Qui ne vit aucunement à autrui, ne vit guere à foy. *Qui sibi amicus est, scito hunc amicum omnibus esse.* La principale charge que nous ayons, c'est à chacun sa conduite. Et est ce pourquoy

nous sommes icy. Comme qui oublieroit de bien & saintement viure; & penseroit estre quitte de son deuoir, en y acheminant & dresseant les autres; ce serait vn sot. Tout de mesme, qui abandonne en son propre, le sainement & gayement viure, pour en seruir autrui, prent à mon gré vn mauuais & def-naturé party. Je ne veux pas, qu'on refuse aux charges qu'on prend, l'attention, les pas, les parolles, & la fueur, & le sang au besoing :

*non ipse pro charis amicis
Aut patria timidus perire.*

Mais c'est par emprunt & accidentalement; l'esprit se tenant tousiours en repos & en santé : non pas sans action, mais sans vexation, sans passion. L'agir simplement, luy couste si peu, qu'en dormant mesme il agit. Mais il luy faut donner le branle, avec discre-tion. Car le corps reçoit les charges qu'on luy met sus, iustement selon qu'elles sont : l'esprit les estend & les appesantit souuent à ses despens, leur donnant la mesure que bon luy semble. On fait pareilles choses avec diuers efforts, & differente contention de volonté. L'un va bien sans l'autre. Car combien de gens se hazardent tous les iours aux guerres, de-quoy il ne leur chault : & se pressent aux dangers des batailles, desquelles la perte, ne leur troublera pas le voisin sommeil ? Tel en sa maison, hors de ce danger, qu'il n'oseroit auoir regardé, est plus pas-sionné de l'issue de cette guerre, & en a l'ame plus trauaillée, que n'a le soldat qui y employe son sang & sa vie. J'ay peu me mesler des charges publiques, sans me despartir de moy, de la largeur d'une ongle, & me donner à autrui sans m'oster à moy. Cette

afpreté & violence de defirs, empesche plus, qu'elle ne fert à la conduite de ce qu'on entreprend. Nous remplis d'impatience enuers les euenemens, ou contraires, ou tardifs : & d'aigreur & de soupçon enuers ceux, avec qui nous negotions. Nous ne conduisons iamais bien la chose de laquelle nous sommes possédez & conduicts.

malè cuncta ministrat

Impetus.

Celuy qui n'y employe que son iugement, & son adresse, il y procede plus gayement : il feint, il ploye, il differe tout à son aise, selon le besoing des occasions : il faut d'atteinte, sans tourment, & sans affliction, prest & entier pour vne nouuelle entreprise : il marche tousiours la bride à la main. En celuy qui est enyuré de cette intention violente & tyrannique, on voit par necessité beaucoup d'imprudence & d'iniustice. L'impetuosité de son desir l'emporte. Ce sont mouuemens temeraires, &, si Fortune n'y preste beaucoup, de peu de fruit. La philosophie veut qu'au chastiment des offences receuës, nous en distrayons la cholere : non afin que la vengeance en soit moindre, ains au rebours, afin qu'elle en soit d'autant mieux assenee & plus poissante. A quoy il luy semble que cette impetuosité porte empeschement. Non seulement la cholere trouble : mais de foy, elle lasse aussi les bras de ceux qui chastient. Ce feu estourdit & consume leur force. Comme en la precipitation, *festinatio tarda est*. La hastiueté se donne elle mesme la iambe, s'entraue & s'arreste. *Ipsa se velocitas implicat*. Pour exemple. Selon ce que i'en vois par vsage ordinaire, l'auarice n'a point

de plus grand deffourbier que foy-mefme. Plus elle eft tendue & vigoureuse, moins elle en eft fertile. Communement elle attrape plus promptement les richesses, mafquée d'un image de liberalité. Vn Gentilhomme tres-homme de bien, & mon amy, cuyda brouiller la fanté de fa teſte, par vne trop paſſionnée attention & affection aux affaires d'un Prince, ſon maiftre. Lequel maiftre, s'eſt ainſi peinct foy-mefmes à moy : Qu'il voit le poix des accidens, comme vn autre : mais qu'à ceux qui n'ont point de remede, il ſe reſoult ſoudain à la ſouffrance : aux autres, apres y auoir ordonné les prouiſions neceſſaires, ce qu'il peut faire promptement par la viuacité de ſon eſprit, il attend en repos ce qui ſ'en peut enſuiure. De vray, ie l'ay veu à meſme, maintenant vne grande nonchalance & liberté d'actions & de viſage, au trauers de bien grands affaires & bien eſpineux. Ie le trouue plus grand & plus capable, en vne mauuaife, qu'en vne bonne fortune. Ses pertes luy ſont plus glorieuſes, que ſes victoires, & ſon deuil que ſon triomphe. Conſiderez, qu'aux actions meſmes qui ſont vaines & friuoles : au ieu des eſchecs, de la paulme, & ſemblables, cet engagement aſpre & ardent d'un deſir impetueux, iette incontinent l'eſprit & les membres, à l'indiscretion, & au deſordre. On s'eſblouit, on s'embarreſſe foy meſme. Celuy qui ſe porte plus moderément enuers le gain, & la perte, il eſt touſiours chez foy. Moins il ſe pique & paſſionne au ieu, il le conduit d'autant plus auantageuſement & ſeuirement. Nous empeschons au demeurant, la priſe & la ferre de l'ame, à luy donner tant de choſes à faiſir. Les vnes, il les luy faut ſeulement preſenter, les autres attacher, les autres incorporer. Elle peut voir & ſentir toutes choſes,

mais elle ne se doit paistre que de foy. Et doit estre instruite, de ce qui la touche proprement, & qui proprement est de son auoir, & de sa substance. Les loix de Nature nous apprennent ce que iustement, il nous faut. Apres que les sages nous ont dit, que selon elle personne n'est indigent, & que chacun l'est selon l'opinion, ils distinguent ainsi subtilement, les desirs qui viennent d'elle, de ceux qui viennent du desreglement de nostre fantasie. Ceux desquels on voit le bout, sont siens, ceux qui fuyent deuant nous, & desquels nous ne pouuons ioindre la fin, sont nostres. La pauureté des biens, est aisée à guerir; la pauureté de l'ame, impossible.

*Nam si, quod satis est homini, id satis esse potestet,
Hoc faterat : nunc, quum hoc non est, qui credimus porro,
Diuitias vllas animum mi explere potesse?*

Socrates voyant porter en pompe par sa ville, grande quantité de richesse, ioyaux & meubles de prix : Combien de choses, dit-il, ie ne desire point ! Metrodorus viuoit du poix de douze onces par iour, Epicurus à moins : Metroclez dormoit en hyuer avec les moutons, en esté aux cloistres des Eglises. *Sufficit ad id natura, quod poscit.* Cleanthes viuoit de ses mains, & se vanloit, que Cleanthes, s'il vouloit, nourrirait encore vn autre Cleanthes. Si ce que Nature exactement, & originelement nous demande, pour la conseruation de nostre estre, est trop peu (comme de vray combien ce l'est, & combien à bon comte nostre vie se peut maintenir, il ne se doit exprimer mieux que par cette consideration : Que c'est si peu, qu'il eschappe la prise & le choc de la Fortune, par sa petitesse) dispensons nous de quelque chose

plus outre; appellons encore nature, l'usage & condition de chacun de nous; taxons nous, traitons nous à cette mesure; estendons noz appartenances & noz comtes iusques là. Car iusques là, il me semble bien, que nous auons quelque excuse. L'accoustumance est vne seconde nature, & non moins puissante. Ce qui manque à ma coustume ie tiens qu'il me manque. Et i'aymerois presque esgalement qu'on m'ostast la vie, que si on me l'essimoit & retranchoit bien loing de l'estat auquel ie l'ay vescu si long temps. Ie ne suis plus en termes d'un grand changement, ny de me ietter à un nouveau train & inusité; non pas mesme vers l'augmentation: il n'est plus temps de deuenir autre. Et comme ie plaindrois quelque grande aduerture, qui me tombast à cette heure entre mains, qu'elle ne seroit venuë en temps que i'en peusse iouyr,

Quo mihi fortuna, si non conceditur vti?

Ie me plaindroy de mesme, de quelque acquest interne. Il vault quasi mieux iamais, que si tard, deuenir honneste homme. Et bien entendu à viure, lors qu'on n'a plus de vie. Moy, qui m'en vay, resigneroy facilement à quelqu'un, qui vinst, ce que i'apprens de prudence, pour le commerce du monde. Moustarde apres dîner. Ie n'ay que faire du bien, duquel ie ne puis rien faire. A quoy la science, à qui n'a plus de teste? C'est iniure & deffaueur de Fortune, de nous offrir des presents, qui nous remplissent d'un iuste despit de nous auoir failly en leur saison. Ne me guidez plus: ie ne puis plus aller. De tant de membres, qu'à la suffisance, la patience nous suffit. Donnez la capacité d'un excellent dessus, au chancre qui a les poulmons pourris! Et d'elo-

quence à l'eremite relegué aux deserts d'Arabie. Il ne faut point d'art, à la cheute. La fin se trouue de foy, au bout de chaque besongne. Mon monde est failly, ma forme expirée. Je suis tout du passé. Et suis tenu de l'autorizer & d'y conformer mon issue. Je veux dire cecy par maniere d'exemple. Que l'eclipsement nouveau des dix iours du Pape, m'ont prins si bas, que ie ne m'en puis bonnement accoustrer. Je suis des années, ausquelles nous comtions autrement. Vn si ancien & long vsage, me vendique & rappelle à foy. Je suis contraint d'estre vn peu heretique par là. Incapable de nouuelleté, mesme correctiue. Mon imagination en despit de mes dents se iette tousiours dix iours plus auant, ou plus arriere : & grommelle à mes oreilles. Cette regle touche ceux, qui ont à estre. Si la fanté mesme, si succrée vient à me retrouver par boutades, c'est pour me donner regret plustost que possession de foy. Je n'ay plus où la retirer. Le temps me laisse. Sans luy rien ne se possède. O que ie seroy peu d'estat de ces grandes dignitez electiues, que ie voy au monde, qui ne se donnent qu'aux hommes prests à partir : ausquelles on ne regarde pas tant, combien deuëment on les exercera, que combien peu longuement on les exercera : dés l'entrée on vise à l'issue. Somme : me voicy apres d'acheuer cet homme, non d'en refaire vn autre. Par long vsage, cette forme m'est passée en substance, & fortune en nature. Je dis donc, que chacun d'entre nous foibles, est excusable d'estimer sien, ce qui est compris fousbs cette mesure. Mais aussi au delà de ces limites, ce n'est plus que confusion. C'est la plus large estandue que nous puissions octroyer à noz droicts. Plus nous amplifions nostre besoing & pos-

session, d'autant plus nous engageons nous aux coups de la Fortune, & des aduerfitez. La carriere de noz defirs doit estre circonscripte, & restraincte, à vn court limite, des commoditez les plus proches & contigues. Et doit en outre, leur courfe, se manier, non en ligne droicte, qui face bout ailleurs, mais en rond, duquel les deux pointes se tiennent & terminent en nous, par vn brief contour. Les actions qui se conduisent fans cette reflexion, s'entendent voisine reflexion & essentielle, comme sont celles des auaricieux, des ambitieux, & tant d'autres, qui courent de pointe, desquels la courfe les emporte tousiours deuant eux, ce sont actions erronnées & maladiues. La plus part de noz vacations sont farcesques. *Mundus vniuersus exercet histrioniam*. Il faut iouer deuement nostre rolle, mais comme rolle d'un personnage emprunté. Du masque & de l'apparence, il n'en faut pas faire vne essence réelle, ny de l'estranger le propre. Nous ne sçauons pas distinguer la peau de la chemise. C'est assés de s'enfariner le visage, sans s'enfariner la poitrine. L'en vois qui se transforment & se transsubstantient en autant de nouvelles figures, & de nouveaux estres, qu'ils entreprennent de charges : & qui se prelatent iusques au foye & aux intestins : & entraînent leur office iusques en leur garde-robe. Je ne puis leur apprendre à distinguer les bonnetades, qui les regardent, de celles qui regardent leur commission, ou leur fuite, ou leur mule. *Tantum se fortunæ permittunt, etiam vt naturam dediscant*. Ils enflent & grossissent leur ame, & leur discours naturel, selon la haulteur de leur siege magistral. Le Maire & Montaigne, ont tousiours esté deux, d'une separation bien claire. Pour estre aduocat ou financier, il n'en faut pas mesconnoistre la fourbe, qu'il

y a en telles vacations. Vn honneste homme n'est pas comtable du vice ou sottise de son mestier ; & ne doit pourtant en refuser l'exercice. C'est l'usage de son pays, & il y a du profit. Il faut viure du monde, & s'en preualoir, tel qu'on le trouue. Mais le iugement d'un Empereur, doit estre au dessus de son empire ; & le voir & considerer, comme accident estranger. Et luy doit sçauoir iouyr de foy à part ; & se communiquer comme Iacques & Pierre : au moins à soy-mesmes. Je ne sçay pas m'engager si profondement, & si entier. Quand ma volonté me donne à vn party, ce n'est pas d'une si violente obligation, que mon entendement s'en infecte. Aux presens brouillis de cet estat, mon interest ne m'a fait mesconnoistre, ny les qualitez louables en noz aduersaires, ny celles qui sont reprochables en ceux que j'ay fuiuy. Ils adorent tout ce qui est de leur costé : moy ie n'excuse pas seulement la plus part des choses, qui sont du mien. Vn bon ouurage, ne perd pas ses graces, pour plaider contre moy. Hors le nœud du debat, ie me suis maintenu en equanimité, & pure indifference. *Neque extra necessitates belli, præcipuum odium gero.* Dequoy ie me gratifie, d'autant que ie voy communément faillir au contraire. Ceux qui allongent leur cholere, & leur haine au delà des affaires, comme fait la plus part, montrent qu'elle leur part d'ailleurs, & de cause particuliere. Tout ainsi comme, à qui estant guaruy de son vlcere, la fiebure demeure encore, montre qu'elle auoit vn autre principe plus caché. C'est qu'ils n'en ont point à la cause, en commun : & entant qu'elle blesse l'interest de tous, & de l'estat. Mais luy en veulent, seulement en ce, qu'elle leur masche en priué. Voylà pourquoy, ils s'en picquent de passion particuliere,

& au delà de la iustice, & de la raison publique. *Non tam omnia vniuersi, quàm ea, quæ ad quemque pertinent, singuli carpebant.* Je veux que l'aduantage soit pour nous : mais ie ne forcene point, s'il ne l'est. Je me prens fermement au plus sain des partis. Mais ie n'affecte pas qu'on me remarque spécialement, ennemy des autres, & outre la raison generale. L'accuse merueilleusement cette vicieuse forme d'opiner : Il est de la Ligue : car il admire la grace de Monsieur de Guyse. L'actiueté du Roy de Nauarre l'estonne : il est Huguenot. Il trouue cecy à dire aux mœurs du Roy : il est seditieux en son cœur. Et ne conceday pas au magistrat mesme, qu'il eust raison, de condamner vn liure, pour auoir logé entre les meilleurs poëtes de ce siecle, vn heretique. N'oserions nous dire d'un voleur, qu'il a belle greue ? Faut-il, si elle est putain, qu'elle soit aussi punaise ? Aux siecles plus sages, reuoqua-on le superbe tiltre de Capitolinus, qu'on auoit auparauant donné à Marcus Manlius, comme conseruateur de la religion & liberté publique ? Estouffa-on la memoire de sa liberalité, & de ses faicts d'armes, & recompenses militaires ottroyées à sa vertu, par ce qu'il affecta depuis la Royauté, au preiudice des loix de son pays ? S'ils ont prins en haine vn aduocat, l'endemain il leur deuient ineloquent. J'ay touché ailleurs le zele, qui poulsa des gens de bien à semblables fautes. Pour moy, ie sçay bien dire : Il faict meschamment cela, & vertueusement cecy. De mesmes, aux prognostiques ou euenements sinistres des affaires, ils veulent, que chacun en son party soit aueugle ou hebeté : que nostre persuation & iugement, serue non à la verité, mais au proiect de nostre desir. Je faudroy plustost vers l'autre extremité : tant ie

crains, que mon desir me suborne. Ioint, que ie me deffie vn peu tendrement, des choses que ie souhaite. I'ay veu de mon temps, merueilles en l'indiscrette & prodigieuse facilité des peuples, à se laisser mener & manier la creance & l'esperance, où il a pleu & seruy à leurs chefs : par dessus cent mescomtes, les vns sur les autres : par dessus les fantasmes, & les songes. Ie ne m'estonne plus de ceux, que les singeries d'Apollonius & de Mahumed embuflerent. Leur sens & entendement, est entierement estouffé en leur passion. Leur discretion n'a plus d'autre choix, que ce qui leur rit, & qui conforte leur cause. I'auoy remarqué souverainement cela, au premier de noz partis fiebureux. Cet autre, qui est nay depuis, en l'imitant, le surmonte. Par où ie m'aduise, que c'est vne qualité inseparable des erreurs populaires. Apres la premiere qui part, les opinions s'entrepoussent, suiuant le vent, comme les flots. On n'est pas du corps, si on s'en peut desdire : si on ne vague le train commun. Mais certes on fait tort aux partis iustes, quand on les veut secourir de fourbes. I'y ay tousiours contredit. Ce moyen ne porte qu'enuers les testes malades. Enuers les saines, il y a des voyes plus seures, & non seulement plus honnestes, à maintenir les courages, & excuser les accidents contraires. Le ciel n'a point veu vn si poissant desaccord, que celuy de Cæsar, & de Pompeius ; ny ne verra pour l'aduenir. Toutesfois il me semble recognoistre en ces belles ames, vne grande moderation de l'vn enuers l'autre. C'estoit vne ialousie d'honneur & de commandement, qui ne les emporta pas à hayne furieuse & indiscrette ; sans malignité & sans detraction. En leurs plus aigres exploits, ie descouure quelque demeurant de respect, & de bien-

vueillance. Et iuge ainſi; que ſ'il leur euſt eſté poſſible, chacun d'eux euſt deſiré de faire ſon affaire ſans la ruyne de ſon compagnon, pluſtoſt qu'avec ſa ruyne. Combien autrement il en va de Marius, & de Sylla : prenez y garde. Il ne faut pas ſe precipiter ſi eſperduement apres noz affectionſ, & intereſtz. Comme eſtant ieune, ie m'oppoſois au progrez de l'amour, que ie ſentoſ trop auancer ſur moy; & m'eſtudiois qu'il ne me fuſt ſi agreable, qu'il vinſt à me forcer en fin, & captiuer du tout à ſa mercy. L'en vſe de meſme à toutes autres occaſions, où ma volonté ſe prend avec trop d'appetit. Ie me panche à l'oppoſite de ſon inclination, comme ie la voy ſe plonger, & enyurer de ſon vin. Ie fuiſ à nourrir ſon plaifir ſi auant, que ie ne l'en puiſſe plus r'auoir, ſans perte ſanglante. Les ames qui par ſtupidité ne voyent les choſes qu'à demy, iouiſſent de cet heur, que les nuifibles les bleſſent moins. C'eſt vne laderrie ſpirituelle, qui a quelque air de ſanté; & telle ſanté, que la philoſophie ne meſpriſe pas du tout. Mais pourtant, ce n'eſt pas raiſon de la nommer ſageſſe; ce que nous faiſons ſouuent. Et de cette maniere ſe moqua quelqu'un anciennement de Diogenes, qui alloit embrailant en plein hyuer tout nud, vne image de neige pour l'eſſay de ſa patience. Celuy-là le rencontrant en cette deſmarche : As tu grand froid à cette heure, luy dit-il? Du tout point, reſpond Diogenes. Or fuiuit l'autre : Que penſes-tu donc faire de difficile, & d'exemplaire à te tenir là? Pour meſurer la conſtance, il faut neceſſairement ſçauoir la ſouffrance. Mais les ames qui auront à voir les euenemens contraires, & les iniures de la Fortune, en leur profondeur & aſpreté, qui auront à les poiſer & gouſter, ſelon leur aigreur naturelle,

& leur charge, qu'elles emploient leur art, à se garder d'en enfler les causes, & en destournent les aduenues. Que fit le Roy Cotys ? il paya liberalement la belle & riche vaisselle qu'on lui auoit présentée : mais parce qu'elle estoit singulierement fragile, il la cassa incontinent luy-mesme ; pour s'oster de bonne heure vne si aisée matiere de courroux contre ses seruiteurs. Pareillement, i'ay volontiers euité de n'auoir mes affaires confus : & n'ay cherché, que mes biens fussent contigus à mes proches : & ceux à qui i'ay à me ioindre d'une estroite amitié : d'où naissent ordinairement matieres d'alienation & dissociation. I'aymois autresfois les ieux hazardeux des cartes & detz ; ie m'en suis deffait, il y a long temps ; pour cela seulement, que quelque bonne mine que ie fisse en ma perte, ie ne laissois pas d'en auoir au dedans de la picqueure. Vn homme d'honneur, qui doit sentir yn desmenti, & vne offence iusques au cœur, qui n'est pour prendre vne mauuaise excuse en payement & consolation, qu'il euit le progrez des altercations contentieuses. Je suis les complexions tristes, & les hommes hargneux, comme les empestez. Et aux propos que ie ne puis traicter sans interest, & sans emotion, ie ne m'y mesle, si le deuoir ne m'y force. *Melius non incipient, quàm desinent.* La plus seure façon est donc, se preparer auant les occasions. Je sçay bien, qu'aucuns sages ont pris autre voye ; & n'ont pas crainct de se harper & engager iusques au vif, à plusieurs obiects. Ces gens là s'asseurent de leur force, sous laquelle ils se mettent à couuert en toute sorte de succez ennemis, faisant lucter les maux, par la vigueur de la patience :

*velut rupes vastum quæ prodit in æquor,
Obuia ventorum furiis, expositæq; ponto,
Vim cunctam atque minas perfert cælique marisque,
Ipfa immota manens.*

N'attaquons pas ces exemples; nous n'y arriuerions point. Ils s'obstinent à voir resoluement, & sans se troubler, la ruyne de leur pays, qui possedoit & commandoit toute leur volonté. Pour noz ames communes, il y a trop d'effort, & trop de rudesse à cela. Caton en abandonna la plus noble vie, qui fut onques. A nous autres petis, il faut fuyr l'orage de plus loing : il faut pouruoir au sentiment, non à la patience; & escheuer aux coups que nous ne sçaurions parer. Zenon voyant approcher Chremonidez ieune homme qu'il aymoît, pour se seoir au pres de luy : se leua soudain. Et Cleanthes, luy en demandant la raison : l'entendz, dit-il, que les medecins ordonnent le repos principalement, & deffendent l'emotion à toutes tumeurs. Socrates ne dit point : Ne vous rendez pas aux attraiëts de la beauté; soustenez la, efforcez vous au contraire. Fuyez la, fait-il, courez hors de sa veuë & de son rencontre, comme d'une poison puissante qui s'eslance & frappe de loing. Et son bon disciple feignant ou recitant; mais, à mon aduis, recitant plustost que feignant, les rares perfectiones de ce grand Cyrus, le fait deffiant de ses forces à porter les attraiëts de la diuine beauté de cette illustre Panthée sa captiue, & en commettant la visite & garde à vn autre, qui eust moins de liberté que luy. Et le Sainct Esprit de mesme, *ne nos inducas in tentationem*. Nous ne prions pas que nostre raison ne soit combatue & surmontée par la concupiscence, mais qu'elle

n'en soit pas seulement effayée : que nous ne soyons conduits en estat où nous ayons seulement à souffrir les approches, sollicitations, & tentations du peché : & supplions nostre Seigneur de maintenir nostre conscience tranquille, plainement & parfaitement deliurée du commerce du mal. Ceux qui disent auoir raison de leur passion vindicative, ou de quelqu'autre espece de passion penible : disent souuent vray : comme les choses sont, mais non pas comme elles furent. Ils parlent à nous, lors que les causes de leur erreur sont nourries & auancées par eux mesmes. Mais reculez plus arriere, r'appellez ces causes à leur principe : là, vous les prendrez sans vert. Veulent ils que leur faute soit moindre, pour estre plus vieille : & que d'un iniuste commencement la suite soit iuste ? Qui desirera du bien à son pais comme moy, sans s'en vlcérer ou maigrir, il fera desplaisant, mais non pas transi, de le voir menassant, ou sa ruine, ou vne durée non moins ruineuse. Pauvre vaisseau, que les flots, les vents, & le pilote, tiraissent à si contraires desseins !

*in tam diuersa, magister,
Ventus & vnda trahunt.*

Qui ne bee point apres la faueur des Princes, comme apres chose dequoy il ne se sçauroit passer ; ne se picque pas beaucoup de la froideur de leur recueil, & de leur visage, ny de l'inconstance de leur volonté. Qui ne couue point ses enfans, ou ses honneurs, d'une propension esclaué, ne laisse pas de viure commodément apres leur perte. Qui fait bien principalement pour sa propre satisfaction, ne s'altere guere pour voir les hommes iuger de ses actions

contre son merite. Vn quart d'once de patience, prouoit à tels inconueniens. Je me trouue bien de cette recepte; me racheptant des commencemens, au meilleur compte que ie puis. Et me sens auoir eschappé par son moyen beaucoup de trauail & de difficultez. Auec bien peu d'effort, i'arreste ce premier branle de mes esmotions. Et abandonne le subiect, qui me commence à poiser, & auant qu'il m'emporte. Qui n'arreste le partir, n'a garde d'arrester la course. Qui ne sçait leur fermer la porte, ne les chassera pas entrées. Qui ne peut venir à bout du commencement, ne viendra pas à bout de la fin. Ny n'en soustiendra la cheute, qui n'en a peu soustenir l'esbranlement. *Etenim ipsæ se impellunt, vbi semel à ratione discessum est : ipsæque sibi imbecillitas indulget, in altumque prouehitur imprudens : nec reperit locum consistendi.* Je sens à temps, les petits vents qui me viennent taster & bruire au dedans, auant-coureurs de la tempeste :

*ceu flamina prima
Cum deprensa fremunt syluis, & cæca volutant
Murmura, venturos nautis prodentia ventos.*

A combien de fois me suis-ie fait vne bien euidente iniustice, pour fuyr le hazard de la receuoir encore pire des iuges, apres vn siecle d'ennuys, & d'ordes & viles pratiques, plus ennemies de mon naturel, que n'est la gehenne & le feu? *Conuenit à litibus quantum licet, & nescio an paulo plus etiam quam licet, abhorrentem esse. Est enim non modò liberale, paululum nonnunquam de suo iure decedere, sed interdum etiam fructuosum.* Si nous estions bien sages, nous nous deurions resiouir & venter, ainsi que i'ouy vn iour bien naïuement, vn enfant de

grande maison, faire feste à chacun, dequoy sa mere venoit de perdre son procès : comme sa toux, sa fiebure, ou autre chose d'importune garde. Les faueurs mesmes, que la Fortune pouuoit m'auoir donné, parentez, & accointances, enuers ceux, qui ont souueraine autorité en ces choses là : i'ay beaucoup faict selon ma conscience, de fuyr instamment de les employer au preiudice d'autrui, & de ne monter par dessus leur droicte valeur, mes droicts. En fin i'ay tant fait par mes iournées, à la bonne heure le puisse-ie dire, que me voicy encore vierge de procès, qui n'ont pas laissé de se conuier plusieurs fois à mon seruice, par bien iuste tiltre, s'il m'eust pleu d'y entendre. Et vierge de querelles. I'ay sans offence de poix, passieue ou actiue, escoulé tantost vne longue vie : & sans auoir ouy pis que mon nom. Rare grace du ciel. Noz plus grandes agitations, ont des ressorts & causes ridicules. Combien encourut de ruyne nostre dernier Duc de Bourgongne, pour la querelle d'une charretée de peaux de mouton ! Et l'engraueure d'un cachet, fust-ce pas la premiere & maistresse cause, du plus horrible croullement, que cette machine aye onques souffert ? Car Pompeius & Cæsar, ce ne sont que les reiectons & la suite, des deux autres. Et i'ay veu de mon temps, les plus sages testes de ce royaume, assemblées avec grande ceremonie, & publique despence, pour des traictez & accords, desquels la vraye decision, despendoit ce pendant en toute souueraineté, des deuils du cabinet des dames, & inclination de quelque femmelette. Les poëtes ont bien entendu cela, qui ont mis, pour vne pomme, la Grece & l'Asie à feu & à sang. Regardez pourquoy celui-là s'en va courre fortune de son honneur & de

sa vie, à tout son espée & son poignart; qu'il vous die d'où vient la source de ce debat, il ne le peut faire sans rougir; tant l'occasion en est vaine, & friuole. A l'enfourner, il n'y va que d'un peu d'aïsement, mais depuis que vous estes embarqué, toutes les cordes tirent. Il y fait besoïgn de grandes prouïsons, bien plus difficiles & importantes. De combien est il plus aisé, de n'y entrer pas que d'en sortir? Or il faut proceder au rebours du roseau, qui produict vne longue tige & droicte, de la premiere venue; mais apres, comme s'il s'estoit allanguy & mis hors d'haleine, il vient à faire des nœuds frequens & espais, comme des pauses; qui montrent qu'il n'a plus cette premiere vigueur & confiance. Il faut plustost commencer bellement & froidement; & garder son haleine & ses vigoureux essans, au fort & perfection de la besongne. Nous guidons les affaires en leurs commencemens, & les tenons à nostre mercy: mais par apres, quand ils sont esbranlez, ce sont eux qui nous guident & emportent, & auons à les suyure. Pourtant n'est-ce pas à dire, que ce conseil m'aye deschargé de toute difficulté; & que ie n'aye eu affaire souuent à gourmer & brider mes passions. Elles ne se gouuernent pas tousiours selon la mesure des occasions: & ont leurs entrées mesmes, souuent apres & violentes. Tant y a, qu'il s'en tire vne belle espargne, & du fruit. Sauf pour ceux, qui au bien faire, ne se contentent de nul fruit, si la reputation en est à dire. Car à la verité, un tel effect, n'est en compte qu'à chacun en soy. Vous en estes plus content; mais non plus estimé: vous estant reformé, auant que d'estre en danse, & que la matiere fust en veüe. Toutesfois aussi, non en cecy seulement, mais en tous

autres deuoirs de la vie, la route de ceux qui vivent à l'honneur, est bien diuerse à celle que tiennent ceux qui se proposent l'ordre & la raison. l'en trouue, qui se mettent inconsiderément & furieusement en lice, & s'alentissent en la course. Comme Plutarque dit, que ceux qui par le vice de la mauuaise honte, sont mols & faciles, à accorder quoy qu'on leur demande, sont faciles apres à faillir de parole, & à se desdire. Pareillement qui entre legerement en querelle, est subiect d'en sortir aussi legerement. Cette mesme difficulté, qui me garde de l'entamer, m'inciteroit d'y tenir ferme, quand ie ferois esbranlé & eschauffé. C'est vne mauuaise façon. Depuis qu'on y est, il faut aller ou creuer. Entreprenex froidement, disoit Bias, mais pourfuiuez ardamment. De faute de prudence, on retombe en faute de cœur; qui est encore moins supportable. La plus part des accords de noz querelles du iourd'huy, sont honteux & menteurs. Nous ne cherchons qu'à sauuer les apparences, & trahissons cependant, & desaduouons noz vrayes intentions. Nous plastrons le fait. Nous sçauons comment nous l'auons dict, & en quel sens, & les assistans le sçauent, & noz amis à qui nous auons voulu faire sentir nostre aduantage. C'est aux despens de nostre franchise, & de l'honneur de nostre courage, que nous desaduouons nostre pensée, & cherchons des conillieres en la fauceté, pour nous accorder. Nous nous desmentons nous mesmes, pour sauuer vn desmentir que nous auons donné à vn autre. Il ne faut pas regarder si vostre action ou vostre parole, peut auoir autre interpretation, c'est vostre vraye & sincere interpretation, qu'il faut mes-huy maintenir; quoy qu'il vous couste. On

parle à vostre vertu, & à vostre conscience : ce ne sont parties à mettre en masque. Laissons ces vils moyens, & ces expediens, à la chicane du palais. Les excuses & reparations, que ie voy faire tous les iours, pour purger l'indiscretion, me semblent plus laides que l'indiscretion mesme. Il vaudroit mieux l'offencer encore vn coup, que de s'offencer soy mesme, en faisant telle amende à son aduersaire. Vous l'auiez braué esmeu de cholere, & vous l'allez rappaiser & flatter en vostre froid & meilleur sens : ainsi vous vous soubsmettez plus, que vous ne vous estiez aduancé. Ie ne trouue aucun dire si vicieux à vn Gentil-homme, comme le desdire me semble luy estre honteux : quand c'est vn desdire, qu'on luy arrache par autorité. D'autant que l'opiniastreté, luy est plus excusable, que la pusillanimité. Les passions, me sont autant aisées à euter, comme elles me sont difficiles à moderer. *Excinduntur facilius animo, quàm temperantur.* Qui ne peut atteindre à cette noble impassibilité Stoique, qu'il se sauue au giron de cette mienne stupidité populaire. Ce que ceux-là faisoient par vertu, ie me duits à le faire par complexion. La moyenne region loge les tempestes ; les deux extremes, des hommes philosophes, & des hommes ruraux, concurrent en tranquillité & en bon heur ;

*Felix qui potuit rerum cognoscere causas,
Atque metus omnes & inexorabile fatum
Subiecit pedibus, strepitumque Acherontis auari.
Fortunatus & ille, Deos qui nouit agrestes,
Pandaque, Sylvanumque senem, Nymphasque sorores.*

De toutes choses les naissances sont foibles & ten-

dres. Pourtant faut-il auoir les yeux ouuerts aux commencements. Car comme lors en sa petitesse, on n'en descouure pas le danger, quand il est accreu, on n'en descouure plus le remede. L'eusse rencontré vn million de trauerfes, tous les iours, plus mal aisées à digerer, au cours de l'ambition, qu'il ne m'a esté mal-ayfé d'arrester l'inclination naturelle qui m'y portoit.

*iure perhorruï,
Latè conspicuum tollere verticem.*

Toutes actions publiques sont subiectes à incertaines, & diuerfes interpretations : car trop de testes en iugent. Aucuns disent, de cette mienne occupation de ville (& ie suis content d'en parler vn mot : non qu'elle le vaille, mais pour seruir de montre de mes mœurs en telles choses) que ie m'y suis porté en homme qui s'esmeut trop laschement, & d'une affection languissante : & ils ne sont pas du tout esloignez d'apparence. L'effaye à tenir mon ame & mes pensées en repos. *Cùm semper natura, tum etiam ætate iam quietus.* Et si elles se desbauchent par fois, à quelque impression rude & penetrante, c'est à la verité sans mon conseil. De cette langueur naturelle, on ne doit pourtant tirer aucune preuue d'impuissance : car faute de soing, & faute de sens, ce sont deux choses : & moins de mes-cognoissance & d'ingratitude enuers ce peuple, qui employa tous les plus extremes moyens qu'il eust en ses mains, à me gratifier : & auant m'auoir cogneu, & apres. Et fit bien plus pour moy, en me redonnant ma charge, qu'en me la donnant premierement. Je luy veux tout le bien qui se peut. Et certes si l'occasion y eust esté,

il n'est rien que i'eusse espargné pour son seruice. Je me suis esbranlé pour luy, comme ie fais pour moy. C'est vn bon peuple, guerrier & genereux : capable pourtant d'obeyffance & discipline, & de seruir à quelque bon vſage, s'il y est bien guidé. Ils disent aussi, cette mienne vacation s'estre passée sans marque & sans trace. Il est bon. On accuse ma cessation, en vn temps, où quasi tout le monde estoit conuaincu de trop faire. I'ay vn agir trepignant où la volonté me charrie. Mais cette pointe est ennemye de perseuerance. Qui se voudra seruir de moy, selon moy, qu'il me donne des affaires où il face besoing de vigueur, & de liberté : qui ayent vne conduite droicte, & courte : & encores hazardeuse : i'y pourray quelque chose. S'il la faut longue, subtile, laborieuse, artificielle, & tortue, il fera mieux de s'adresser à quelqu'autre. Toutes charges importantes ne sont pas difficiles. L'estois préparé à m'embesongner plus rudement vn peu, s'il en eust esté grand besoing. Car il est en mon pouoir, de faire quelque chose plus que ie ne fais, & que ie n'ayme à faire. Je ne laissay que ie sçache, aucun mouuement, que le deuoir requist en bon escient de moy. I'ay facilement oublié ceux, que l'ambition mesle au deuoir, & couure de son tiltre. Ce sont ceux, qui le plus souuent remplissent les yeux & les oreilles, & contentent les hommes. Non pas la chose, mais l'apparence les paye. S'ils n'oyent du bruiet, il leur semble qu'on dorme. Mes humeurs sont contradictoires aux humeurs bruyantes. I'arresterois bien vn trouble, sans me troubler, & chastierois vn desordre sans alteration. Ay-ie besoing de cholere, & d'inflammation ? ie l'emprunte, & m'en masque. Mes mœurs sont mouffes, plustost

fades, qu'aspres. Je n'accuse pas vn magistrat qui dorme, pourueu que ceux qui sont sous sa main, dorment quand & luy. Les loix dorment de mesme. Pour moy, ie louë vne vie glissante, sombre & muette. *Neque submissam & abiectam, neque se efferentem.* Ma fortune le veut ainsi. Je suis nay d'une famille, qui a coulé sans esclat, & sans tumulte : & de longue memoire, particulièrement ambitieuse de preud'homme. Nos hommes sont si formez à l'agitation & ostentation, que la bonté, la moderation, l'equabilité, la constance, & telles qualitez quietes & obscures, ne se sentent plus. Les corps raboteux se sentent, les polis se manient imperceptiblement. La maladie se sent, la santé, peu ou point : ny les choses qui nous oignent, au prix de celles qui nous poignent. C'est agir pour sa reputation, & proffit particulier, non pour le bien, de remettre à faire en la place, ce qu'on peut faire en la chambre du conseil : & en plain midy, ce qu'on eust fait la nuit precedente : & d'estre ialoux de faire soy-mesme, ce que son compaignon fait aussi bien. Ainsi faisoient aucuns chirurgiens de Grece, les operations de leur art, sur des eschaffaux à la veüe des passans, pour en acquerir plus de pratique, & de chalandise. Ils iugent, que les bons reglemens ne se peuuent entendre, qu'au son de la trompette. L'ambition n'est pas vn vice de petis compaignons, & de tels efforts que les nostres. On disoit à Alexandre : Vostre pere vous lairra vne grande domination, aysée, & pacifique : ce garçon estoit enuieux des victoires de son pere, & de la iustice de son gouvernement. Il n'eust pas voulu iouyr l'empire du monde, mollement & paisiblement. Alcibiades en Platon, ayme mieux mourir, ieune, beau, riche, noble,

ſçauant, tout cela par excellence, que de ſ'arreſter en l'eſtat de cette condition. Cette maladie eſt à l'auanture excuſable, en vne ame ſi forte & ſi plaine. Quand ces ametes naines, & chetiues, s'en vont embabouynant : & penſent eſpandre leur nom, pour auoir iugé à droict vn affaire, ou continué l'ordre des gardes d'une porte de ville : ils en montrent d'autant plus le cul, qu'ils eſperent en hauſſer la teſte. Ce menu bien faire, n'a ne corps ne vie. Il va ſ'eſuanouyſſant en la premiere bouche : & ne ſe promeine que d'un carrefour de ruë à l'autre. Entretenez en hardiment voſtre fils & voſtre valet. Comme cet ancien, qui n'ayant autre auditeur de ſes loüanges, & conſent de ſa valeur, ſe brauoit avec ſa chambriere, en ſ'eſcriant : O Perrete, le galant & ſuffiſant homme de maiſtre que tu as ! Entretenez vous en vous-meſme, au pis aller. Comme vn conſeiller de ma cognoiſſance, ayant deſgorgé vne batelée de paragraphes, d'une extreme contention, & pareille ineptie : ſ'eſtant retiré de la chambre du conſeil, au piſſoir du palais : fut ouy marmotant entre les dents tout conſcientieufement : *Non nobis, Domine, non nobis, ſed nomini tuo da gloriam.* Qui ne peut d'ailleurs, ſi ſe paye de ſa bourſe. La renommée ne ſe prostitue pas à ſi vil comte. Les actions rares & exemplaires, à qui elle eſt deuë ne ſouffriroient pas la compagnie de cette foule innombrable de petites actions iournalieres. Le marbre eſleuera vos titres tant qu'il vous plaira, pour auoir fait repetaſſer vn pan de mur, ou deſcroter vn ruiſſeau public : mais non pas les hommes, qui ont du ſens. Le bruit ne ſuit pas route bonté, ſi la difficulté & eſtrangeré n'y eſt ioincte. Voyre ny la ſimple eſtimation, n'eſt deuë à toute action, qui n'ait de la vertu,

selon les Stoïciens. Et ne veulent, qu'on sçache seulement gré, à celui qui par temperance, s'abstient d'une vieille chassieuse. Ceux qui ont cognu les admirables qualitez de Scipion l'Africain, refusent la gloire, que Panætius luy attribue d'auoir esté abstinent de dons : comme gloire non tant sienne comme de son siecle. Nous auons les voluptez confortables à nostre fortune : n'vsurpons pas celles de la grandeur. Les nostres sont plus naturelles. Et d'autant plus solides & seures, qu'elles sont plus basses. Puis que ce n'est par conscience, au moins par ambition refusons l'ambition. Desdaignons cette faim de renommée & d'honneur, basse & belistresse, qui nous le fait coquiner de toute sorte de gens : *Quæ est ista laus quæ possit à macello peti?* par moyens abiects, & à quelque vil prix que ce soit. C'est deshonneur d'estre ainfin honoré. Apprenons à n'estre non plus aides, que nous sommes capables de gloire. De s'enfler de toute action vtile & innocente, c'est à faire à gens à qui elle est extraordinaire & rare. Ils la veulent mettre, pour le prix qu'elle leur couste. A mesure, qu'un bon effect est plus esclatant : ie rabats de sa bonté, le soupçon en quoy i'entre, qu'il soit produit, plus pour estre esclatant, que pour estre bon. Estalé, il est à demy vendu. Ces actions là, ont bien plus de grace, qui eschappent de la main de l'ouurier, nonchalamment & sans bruiet : & que quelque honneste homme, choisit apres, & releue de l'ombre, pour les pousser en lumiere : à cause d'elles mesmes. *Mihi quidem laudabilia videntur omnia, quæ sine venditione, & sine populo teste sunt* : dit le plus glorieux homme du monde. Ie n'auois qu'à conseruer & durer, qui sont effects sourds & insensibles. L'innouation est de grand lustre.

Mais elle est interdite en ce temps, où nous sommes pressés, & n'avons à nous défendre que des nouvelles. L'abstinence de faire, est souvent aussi genreuse, que le faire : mais elle est moins au jour. Et ce peu, que je vau, est quasi tout de cette espece. En somme les occasions en cette charge ont suivi ma complexion : dequoy ie leur sçay tresbon gré. Est-il quelqu'un qui desire estre malade, pour voir son medecin en besongne ? Et faudroit-il pas fouêter le medecin, qui nous desireroit la peste, pour mettre son art en pratique ? Je n'ay point eu cett'humeur inique & assez commune, de desirer que le trouble & maladie des affaires de cette cité, rehaussast & honnorast mon gouvernement. J'ay pressé de bon cœur, l'espaule à leur aysance & facilité. Qui ne me voudra sçavoir gré de l'ordre, de la douce & muette tranquillité, qui a accompagné ma conduite : au moins ne peut-il me prier de la part qui m'en appartient, par le titre de ma bonne fortune. Et ie suis ainsi fait : que j'ayme autant estre heureux que sage : & deuoir mes succez, purement à la grace de Dieu, qu'à l'entremise de mon operation. J'auois assez disertement publié au monde mon insuffisance, en tels maniemens publics. J'ay encore pis, que l'insuffisance : c'est qu'elle ne me desplaist guere : & que ie ne cherche guere à la guarir, veu le train de vie que j'ay desseigné. Je ne me suis en cette entremise, non plus satisfait à moy-mesme. Mais à peu pres, j'en suis arriué à ce que ie m'en estois promis : & si ay de beaucoup surmonté, ce que j'en auois promis à ceux, à qui j'auois à faire. Car ie promets volontiers un peu moins de ce que ie puis, & de ce que j'espere tenir. Je m'assure, n'y auoir laissé ny offence ny haine. D'y laisser re-

gret & desir de moy : ie sçay à tout le moins bien
cela, que ie ne l'ay pas fort affecté :

méne huic confidere monstro,
Méne salis placidi vultum, fluctúsque quietos
Ignorare?





Des boyteux.

CHAPITRE XI.



L y a deux ou trois ans, qu'on accourfit l'an de dix iours en France. Combien de changemens doiuent fuyure cette reformation ! Ce fut proprement remuer le ciel & la terre à la fois. Ce neantmoins, il n'est rien qui bouge de sa place. Mes voisins trouuent l'heure de leurs semences, de leur recolte, l'opportunité de leurs negoces, les iours nuisibles & propices, au mesme point iustement, où il les auoyent assignez de tout temps. Ny l'erreur ne se sentoit en nostre vsage, ny l'amendement ne s'y sent. Tant il y a d'incertitude par tout : tant nostre apperceuance est grossiere, obscure & obtuse. On dit, que ce reglement se pouuoit conduire d'une façon moins incommode : soustraiaint à l'exemple d'Auguste, pour quelques années, le iour du bissexte : qui ainsi comme ainsin, est vn iour d'empeschement & de trouble : iusques à ce qu'on fust arriué à satisfaire exactement ce debte. Ce que mesme on n'a pas fait, par cette correction : & demeurons encores en arrerages de quelques iours. Et si par mesme moyen, on pouuoit

prouuoir à l'aduenir, ordonnant qu'après la reuolution de tel ou nombre d'années, ce iour extraordinaire seroit tousiours eclipsé : si que nostre mesconte ne pourroit d'ores-enauant excéder vingt & quatre heures. Nous n'auons autre comte du temps, que les ans. Il y a tant de siecles que le monde s'en sert : & si c'est vne mesure que nous n'auons encore acheué d'arrester. Et telle, que nous doubtons tous les iours, quelle forme les autres nations luy ont diuersement donné : & quel en estoit l'vsage. Quoy ce que disent aucuns, que les cieux se compriment vers nous en vieillissant, & nous iettent en incertitude des heures mesme & des iours ? Et des moys, ce que dit Plutarque : qu'encore de son temps l'astrologie n'auoit sçeu borner le mouuement de la lune ? Nous voyla bien accommodez, pour tenir registre des choses passées. Je refuaffois presentement, comme ie fais souuent, sur ce, combien l'humaine raison est vn instrument libre & vague. Je vois ordinairement, que les hommes, aux faicts qu'on leur propose, s'amusent plus volontiers à en chercher la raison, qu'à en chercher la verité. Ils passent par dessus les presuppositions, mais ils examinent curieusement les consequences. Ils laissent les choses, & courent aux causes. Plaisans causeurs. La cognoissance des causes touche seulement celuy, qui a la conduite des choses : non à nous, qui n'en auons que la souffrance. Et qui en auons l'vsage parfaitement plein & accompli, selon nostre besoing, sans en penetrer l'origine & l'essence. Ny le vin n'en est plus plaisant à celuy qui en sçait les facultez premieres. Au contraire : & le corps & l'ame, interrompent & alterent le droit qu'ils ont de l'vsage du monde, & de foy-mesmes, y meslant l'opinion de science. Les effectz

nous touchent, mais les moyens, nullement. Le determiner & le distribuer, appartient à la maistrise, & à la regence : comme à la subiection & apprentissage, l'accepter. Reprenons nostre coustume. Ils commencent ordinairement ainsi : Comment est-ce que cela se fait ? mais, se fait-il ? faudroit il dire. Nostre discours est capable d'estoffer cent autres mondes, & d'en trouuer les principes & la texture. Il ne luy faut ny matiere ny baze. Laissez le courre : il bastit aussi bien sur le vuide que sur le plain, & de l'inanité que de matiere,

dare pondus idonea fumo.

Le trouue quasi par tout, qu'il faudroit dire : Il n'en est rien. Et employerois souuent cette responce : mais ie n'ose : car ils crient, que c'est vne deffaiete produicte de foiblesse d'esprit & d'ignorance. Et me faut ordinairement basteler par compaignie, à traicter des subiects, & contes friuoles, que ie mescrois entièrement. Ioinct qu'à la verité, il est vn peu rude & quereleux, de nier tout sec, vne proposition de faict. Et peu de gens faillent : notamment aux choses malaysées à persuader, d'affirmer qu'ils l'ont veu : ou d'alleguer des tesmoins, desquels l'autorité arreste nostre contradiction. Suyuant cet vsage, nous sçauons les fondemens, & les moyens, de mille choses qui ne furent onques. Et s'escarmouche le monde, en mille questions, desquelles, & le pour & le contre, est faux. *Ita finitima sunt falsa veris, vt in præcipitem locum non debeat se sapiens committere.* La verité & le mensonge ont leurs visages conformes, le port, le goust, & les alleures pareilles : nous les regardons de mesme œil. Le trouue que

nous ne sommes pas seulement lasches à nous defendre de la piperie : mais que nous cherchons, & conuions à nous y enferrer. Nous aymons à nous embrouiller en la vanité, comme conforme à nostre estre. L'ay veu la naissance de plusieurs miracles de mon temps. Encore qu'ils s'estouffent en naissant, nous ne laissons pas de preuoir le train qu'ils eussent pris, s'ils eussent vescu leur aage. Car il n'est que de trouuer le bout du fil, on en desuide tant qu'on veut. Et y a plus loing, de rien, à la plus petite chose du monde, qu'il n'y a de celle là, iusques à la plus grande. Or les premiers qui sont abreueuez de ce commencement d'estrangeté, venans à semer leur histoire, sentent par les oppositions qu'on leur fait, où loge la difficulté de la persuasion, & vont calestrant cet endroict de quelque piece fauce. Outre ce que, *insita hominibus libidine alendi de industria rumores*, nous faisons naturellement conscience, de rendre ce qu'on nous a presté, sans quelque vsure, & accession de nostre creu. L'erreur particuliere, fait premierement l'erreur publique : & à son tour apres, l'erreur publique fait l'erreur particuliere. Ainsi va tout ce bastiment, s'estoffant & formant, de main en main : de maniere que le plus eslongné tesmoin, en est mieux instruiet que le plus voisin : & le dernier informé, mieux persuadé que le premier. C'est vn progresz naturel. Car quiconque croit quelque chose, estime que c'est ouurage de charité, de la persuader à vn autre. Et pour ce faire, ne craint point d'adiouster de son inuention, autant qu'il voit estre necessaire en son compte, pour suppleer à la resistance & au deffaut qu'il pense estre en la conception d'autrui. Moy-mesme, qui fais singuliere conscience de mentir : & qui ne me soucie

guere de donner creance & autorité à ce que ie dis, m'appercey toutesfois, aux propos que i'ay en main, qu'estant eschauffé ou par la resistance d'un autre, ou par la propre chaleur de ma narration, ie grossis & enfle mon subiect, par voix, mouemens, vigueur & force de parolles : & encore par extention & amplification : non sans interest de la verité nayfue. Mais ie le fais en condition pourtant, qu'au premier qui me rameine, & qui me demande la verité nuë & crüe : ie quitte soudain mon effort, & la luy donne, sans exaggeration, sans emphase, & remplissage. La parole viue & bruyante, comme est la mienne ordinaire, s'emporte volontiers à l'hyperbole. Il n'est rien à quoy communement les hommes foyent plus tendus, qu'à donner voye à leurs opinions. Où le moyen ordinaire nous faut, nous y adioustons, le commandement, la force, le fer, & le feu. Il y a du mal'heur, d'en estre là, que la meilleure touche de la verité, ce soit la multitude des croyans, en vne presse où les fols surpassent de tant, les sages, en nombre. *Quasi verò quidquam sit tam valdè, quàm nil sapere vulgare. Sanitatis patrociniū est, insanientium turba.* C'est chose difficile de resouldre son iugement contre les opinions communes. La premiere persuasion prinse du subiect mesme, saisit les simples : de là elle s'espend aux habiles, sous l'autorité du nombre & ancienneté des tesmoignages. Pour moy, de ce que ie n'en croirois pas vn, ie n'en croirois pas cent vns. Et ne iuge pas les opinions, par les ans. Il y a peu de temps, que l'un de nos Princes, en qui la goute auoit perdu vn beau naturel, & vne allegre composition : se laissa si fort persuader, au rapport qu'on faisoit des merueilleuses operations d'un prestre, qui par la

voye des parolles & des gestes, guerissoit toutes maladies : qu'il fit vn long voyage pour l'aller trouuer : & par la force de son apprehension, persuada, & endormit ses iambes pour quelques heures, si qu'il en tira du seruice, qu'elles auoyent desapris luy faire, il y auoit long temps. Si la Fortune eust laissé emmonceler cinq ou six telles aduantures, elles estoient capables de mettre ce miracle en nature. On trouua depuis, tant de simpleesse, & si peu d'art, en l'architecte de tels ouurages, qu'on le iugea indigne d'aucun chastiment. Comme si feroit on, de la plus part de telles choses, qui les recognoistroit en leur giste. *Miramur ex interuallo fallentia*. Nostre veuë represente ainfi souuent de loing, des images estranges, qui s'esuanouyssent en s'approchant. *Nunquam ad liquidum fama perducitur*. C'est merueille, de combien vains commencemens, & frivoles causes, naissent ordinairement si fameuses impressions. Cela mesmes en empesche l'information. Car pendant qu'on cherche des causes, & des fins fortes, & poisanres, & dignes d'un si grand nom, on perd les vrayes. Elles eschappent de nostre veuë par leur petiteesse. Et à la verité, il est requis vn bien prudent, attentif, & subtil inquisiteur, en telles recherches : indifferent, & non preoccupé. Iusques à cette heure, tous ces miracles & euenemens estranges, se cachent deuant moy. Je n'ay veu monstre & miracle au monde, plus expres, que moy-mesme. On s'appriuoise à toute estrangeté par l'vsage & le temps : mais plus ie me hante & me cognois, plus ma difformité m'estonne : moins ie m'entens en moy. Le principal droit d'auancer & produire tels accidens, est reserué à la Fortune. Passant auant hier dans vn village, à deux lieues de

ma maison, ie trouuay la place encore toute chaude, d'un miracle qui venoit d'y faillir : par lequel le voisinage auoit esté amuse plusieurs mois, & commençoient les prouinces voisines, de s'en esmouuoir, & y accourir à grosses troupes, de toutes qualitez. Vn ieune homme du lieu, s'estoit ioué à contrefaire vne nuit en sa maison, la voix d'un esprit, sans penser à autre finesse, qu'à iouir d'un badinage present : cela luy ayant vn peu mieux succédé qu'il n'esperoit, pour estendre sa farce à plus de ressorts, il y affocia vne fille de village, du tout stupide, & niaise : & furent trois en fin, de mesme aage & pareille suffisance : & de presches domestiques en firent des presches publics, se cachans sous l'autel de l'Eglise, ne parlans que de nuit, & deffendans d'y apporter aucune lumiere. De paroles, qui tendoient à la conuersion du monde, & menace du iour du iugement (car ce sont subiects sous l'autorité & reuerence desquels, l'imposture se tapit plus aisément) ils vindrent à quelques visions & mouuements, si niais, & si ridicules : qu'à peine y a-il rien si grossier au ieu des petits enfans. Si toutes-fois la Fortune y eust voulu prester vn peu de faueur, qui sçait, iusques où se fust accru ce batrelage ? Ces pauvres diables sont à cette heure en prison ; & porteront volontiers la peine de la sottise commune : & ne sçay si quelque iuge se vengera sur eux, de la sienne. On voit clair en cette-cy, qui est descouuerte : mais en plusieurs choses de pareille qualité, surpassant nostre cognoissance : ie suis d'adujs, que nous soustenions nostre iugement, aussi bien à reierter, qu'à recevoir. Il s'engendre beaucoup d'abus au monde : ou pour dire plus hardiment, tous les abus du monde s'engendrent, de ce, qu'on

nous apprend à craindre de faire profession de nostre ignorance ; & sommes tenus d'accepter, tout ce que nous ne pouuons refuter. Nous parlons de toutes choses par preceptes & resolution. Le stile à Rome portoit, que cela mesme, qu'un tesmoin deposoit, pour l'auoir veu de ses yeux, & ce qu'un iuge ordonnoit de sa plus certaine science, estoit conceu en cette forme de parler : Il me semble. On me faict haïr les choses vray-semblables, quand on me les plante pour infaillibles. J'aime ces mots, qui amollissent & moderent la temerité de nos propositions : à l'auanture, aucunement, quelque, on dit, ie pense, & semblables. Et si i'eusse eu à dresser des enfans, ie leur eusse tant mis en la bouche, cette façon de respondre : enquestente, non resolutiue : Qu'est-ce à dire ? ie ne l'entens pas ; il pourroit estre : est-il vray ? qu'ils eussent plustost gardé la forme d'apprentis à soixante ans, que de représenter les docteurs à dix ans : comme ils font. Qui veut guerir de l'ignorance, il faut la confesser. Iris est fille de Thaumantis. L'admiration est fondement de toute philosophie : l'inquisition, le progresz : l'ignorance, le bout. Voire dea, il y a quelque ignorance forte & genereuse, qui ne doit rien en honneur & en courage à la science. Ignorance pour laquelle concevoir, il n'y a pas moins de science, qu'à concevoir la science. Je vy en mon enfance, vn procez que Corras conseiller de Thoulouze fit imprimer, d'un accident estrange ; de deux hommes, qui se presentoient l'un pour l'autre : il me souuient, & ne me souuient aussi d'autre chose, qu'il me sembla auoir rendu l'imposture de celui qu'il iugea coupable, si merueilleuse & excedant de si loing nostre cognoissance, & la sienne, qui estoit iuge, que ie

trouuay beaucoup de hardieſſe en l'arreſt qui l'auoit condamné à eſtre pendu. Receuons quelque forme d'arreſt qui die : La Cour n'y entend rien ; plus librement & ingenuément, que ne firent les Areopagites : leſquels ſe trouuans preſſez d'une cauſe, qu'ils ne pouuoient deſuelopper, ordonnerent que les parties en viendroient à cent ans. Les forcieres de mon voiſinage, courent hazard de leur vie, ſur l'aduiſ de chaſque nouuel auteur, qui vient donner corps à leurs ſonges. Pour accommoder les exemples que la diuine parole nous offre de telles choſes ; tres-certains & irrefragables exemples ; & les attacher à nos euenemens modernes : puisſque nous n'en voyons, ny les cauſes, ny les moyens : il y faut autre engin que le noſtre. Il appartient à l'auanture, à ce ſeul tref-puiſſant teſmoignage, de nous dire : Certuy-cy en eſt, & celle-là : & non cet autre. Dieu en doit eſtre creu : c'eſt vrayement bien raiſon. Mais non pourtant vn d'entre nous, qui s'eſtonne de ſa propre narration (& neceſſairement il s'en eſtonne, s'il n'eſt hors du ſens) ſoit qu'il l'employe au faiſt d'autrui : ſoit qu'il l'employe contre ſoy-meſme. Je ſuis lourd, & me tiens vn peu au maſſif, & au vray-ſemblable : euitant les reproches anciens. *Maioſem fidem homines adhibent ijs quæ non intelligunt. Cupidine humani ingenij libentius obſcura creduntur.* Je vois bien qu'on ſe courrouce : & me deſſend-on d'en doubter, ſur peine d'iniures execrables. Nouvelle façon de perſuader. Pour Dieu mercy. Ma creance ne ſe manie pas à coups de poing. Qu'ils gourmandent ceux qui accuſent de fauacité leur opinion : ie ne l'accuſe que de difficulté & de hardieſſe. Et condamne l'affirmation oppoſite, egallement avec eux : ſinon ſi imperieufement. Qui eſtablit

son discours par brauerie & commandement, montre que la raison y est foible. Pour vne altercation verbale & scholastique, qu'ils ayent autant d'apparence que leurs contradicteurs. *Videantur sanè, non affirmantur modò.* Mais en la consequence effectuelle qu'ils en tirent, ceux-cy ont bien de l'auantage. A tuer les gens : il faut vne clairté lumineuse & nette. Et est nostre vie trop réelle & essentielle, pour garantir ces accidens, supernaturels & fantastiques. Quant aux drogues & poisons, ie les mets hors de mon conte : ce sont homicides, & de la pire espeece. Toutesfois en cela mesme, on dit qu'il ne faut pas tousiours s'arrester à la propre confession de ces gens icy. Car on leur a veu par fois s'accuser d'auoir tué des personnes, qu'on trouuoit saines & viuantes. En ces autres accusations extrauagantes, ie dirois volontiers; que c'est bien assez; qu'un homme, quelque recommandation qu'il aye, soit creu de ce qui est humain. De ce qui est hors de sa conception, & d'un effect supernaturel : il en doit estre creu, lors seulement, qu'une approbation supernaturelle l'a autorisé. Ce priuilege qu'il a pleu à Dieu, donner à aucuns de nos tesmoignages, ne doit pas estre auily, & communiqué legerement. J'ay les oreilles battuës de mille tels contes. Trois le virent vn tel iour, en leuant : trois le virent lendemain, en occident : à telle heure, tel lieu, ainsi vestu : certes ie ne m'en croirois pas moy-mesme. Combien trouué-ie plus naturel, & plus vray-semblable, que deux hommes mentent : que ie ne fay qu'un homme en douze heures, passe, quant & les vents, d'orient en occident? Combien plus naturel, que nostre entendement soit emporté de sa place, par la volubilité de notre esprit detra-

qué; que cela, qu'un de nous soit enuolé sur un balay, au long du tuiau de sa cheminée, en chair & en os, par un esprit étranger ? Ne cherchons pas des illusions du dehors, & incogneuës : nous qui sommes perpétuellement agitez d'illusions domestiques & nostres. Il me semble qu'on est pardonnable, de mescroire une merueille, autant au moins qu'on peut en destourner & elider la verification, par voye non merueilleuse. Et suis l'aduis de S. Augustin : qu'il vaut mieux pancher vers le doute, que vers l'assurance, és choses de difficile preuve, & dangereuse creance. Il y a quelques années, que ie passay par les terres d'un Prince souverain : lequel en ma faueur, & pour rabattre mon incredulité, me fit cette grace, de me faire voir en sa presence, en lieu particulier, dix ou douze prisonniers de ce genre ; & une vieille entre autres, vrayment bien forcier en laideur & deformité, tres-fameuse de longue main en cette profession. Je vis & preuues, & libres confessions, & ie ne scay quelle marque insensible sur cette miserable vieille : & m'enquis, & parlay tout mon saoul, y apportant la plus saine attention que ie peusse : & ne suis pas homme qui me laisse guere garroter le iugement par preoccupation. En fin & en conscience, ie leur eusse plustost ordonné de l'elébore que de la ciguë. *Captisq̃ue res magis mentibus, quàm consoleratis similis visa.* La iustice a ses propres corrections pour telles maladies. Quant aux oppositions & arguments, que des honnestes hommes m'ont fait, & là, & souuent ailleurs : ie n'en ay point senty, qui m'attachent : & qui ne souffrent solution tousiours plus vray-semblable, que leurs conclusions. Bien est vray que les preuues & raisons qui se fondent sur l'experience & sur le

faict : celles-là, ie ne les desnoué point; aussi n'ont elles point de bout : ie les tranche souuent, comme Alexandre son nœud. Apres tout c'est mettre ses coniectures à bien haut prix, que d'en faire cuire vn homme tout vif. On recite par diuers exemples (& Prestantius de son pere) qu'assoupy & endormy bien plus lourdement, que d'un parfaict sommeil : il fantasia estre iument, & seruir de sommier à des soldats : &, ce qu'il fantasioit, il l'estoit. Si les forciers songent ainsi materiellement : si les songes par fois se peuuent ainsin incorporer en effects : encore ne croy-ie pas, que nostre volonté en fust tenuë à la iustice. Ce que ie dis, comme celuy qui n'est pas iuge ny conseiller des Roys ; ny s'en estime de bien loing digne : ains homme du commun : nay & voüé à l'obeïssance de la raison publique, & en ses faicts, & en ses dicts. Qui mettroit mes resueries en conte, au preiudice de la plus chetieue loy de son village, ou opinion, ou coustume, il se feroit grand tort, & encores autant à moy. Car en ce que ie dy, ie ne pleuuis autre certitude, sinon que c'est ce, que lors i'en auoy en la pensée. Pensée tumultuaire & vacillante. C'est par maniere de deuïs, que ie parle de tout, & de rien par maniere d'aduis. *Nec me pudet, vt istos, fateri nescire, quod nesciam*. Ie ne serois pas si hardy à parler, s'il m'appartenoit d'en estre creu. Et fut, ce que ie respondis à vn grand, qui se plaignoit de l'aspreté & contention de mes enhortemens. Vous sentant bandé & préparé d'une part, ie vous propose l'autre, de tout le soing que ie puis : pour esclarcir vostre iugement, non pour l'obliger. Dieu tient vos courages, & vous fournira de choix. Ie ne suis pas si presomptueux, de desirer seulement, que mes opinions donnassent pente, à chose de telle

importance. Ma fortune, ne les a pas dressées à si puissantes & si esleuées conclusions. Certes, i'ay non seulement des complexions en grand nombre : mais aussi des opinions assez, desquelles ie dégouterois volontiers mon fils, si i'en auois. Quoy? si les plus vrayes ne sont pas tousiours les plus commodes à l'homme; tant il est de sauuage composition. A propos, ou hors de propos, il n'importe. On dit en Italie en commun prouerbe, que celuy-là ne cognoist pas Venus en sa parfaicte douceur, qui n'a couché avec la boiteuse. La fortune, ou quelque particulier accident, ont mis il y a long temps ce mot en la bouche du peuple; & se dict des malles comme des femelles. Car la Royne des Amazones, respondit au Scythe qui la conuioit à l'amour, ἀριστα χαλὸς διφραί, le boiteux le fait le mieux. En cette republique feminine, pour fuir la domination des malles, elles les stropioient dès l'enfance, bras, iambes, & autres membres qui leur donnoient auantage sur elles, & se seruoient d'eux, à ce seulement, à quoy nous nous seruons d'elles par deçà. I'eusse dit, que le mouuement detraqué de la boiteuse, apportast quelque nouveau plaisir à la besoigne, & quelque pointe de douceur, à ceux qui l'essayent : mais ie viens d'apprendre, que mesme la philosophie ancienne en a decidé. Elle dict, que les iambes & cuisses des boiteuses, ne receuans à cause de leur imperfection, l'aliment qui leur est deu, il en aduient que les parties genitales, qui sont au dessus, sont plus plaines, plus nourries, & vigoureuses. Ou bien que ce defect empeschant l'exercice, ceux qui en sont entachez, dissipent moins leurs forces, & en viennent plus entiers aux jeux de Venus. Qui est aussi la raison, pourquoy les Grecs descrioient les tisserandes,

d'estre plus chaudes, que les autres femmes : à cause du mestier sedentaire qu'elles font, sans grand exercice du corps. Dequoy ne pouuons nous raisonner à ce prix-là ? De celles icy, ie pourrois aussi dire ; que ce tremoussement que leur ouurage leur donne ainfin assises, les esueille & follicite : comme fait les dames, le croulement & tremblement de leurs coches. Ces exemples, seruent-ils pas à ce que ie disois au commencement : Que nos raisons anticipent souuent l'effect, & ont l'estenduë de leur iurisdiction si infinie, qu'elles iugent & s'exercent en l'inanité mesme, & au non estre ? Outre la flexibilité de nostre inuention, à forger des raisons à toutes sortes de songes ; nostre imagination se trouue pareillement facile, à receuoir des impressions de la fauceté, par bien friuoles apparences. Car par la seule autorité de l'vsage ancien, & publique de ce mot : ie me suis autresfois fait accroire, auoir reçu plus de plaisir d'une femme, de ce qu'elle n'estoit pas droicte, & mis cela au compte de ses graces. Torquato Tasso, en la comparaïson qu'il fait de la France à l'Italie ; dit auoir remarqué cela, que nous auons les iambes plus greslées, que les Gentils-hommes Italiens ; & en attribue la cause, à ce que nous sommes continuellement à cheual. Qui est celle-mesmes de laquelle Suetone tire vne toute contraire conclusion. Car il dit au rebours, que Germanicus auoit grossi les siennes, par continuation de ce mesme exercice. Il n'est rien si souple & erratique, que nostre entendement. C'est le foulier de Theramenez, bon à tous pieds. Et il est double & diuers, & les matieres doubles, & diuerses. Donne moy vne dragme d'argent, disoit vn philosophe Cynique à Antigonus. Ce n'est pas present de Roy, respondit-il. Donne moy

donc vn talent. Ce n'est pas present pour Cynique.

*Sen plures calor ille vias, & cæca relaxat
Spiramenta, nouas veniat qua succus in herbas :
Sen durat magis, & venas astringit hiantes,
Ne tenues pluuia, rapidius potentia solis
Acrior, aut Boreæ penetrabile frigus adurat.*

Ogni medaglia ha il suo riuerfo. Voila pourquoy Clitomachus disoit anciennement, que Carneades auoit surmonté les labeurs d'Hercules; pour auoir arraché des hommes le consentement : c'est à dire, l'opinion, & la temerité de iuger. Cette fantasia de Carneades, si vigoureuse, naquit à mon aduis anciennement, de l'impudence de ceux qui font profession de sçauoir, & de leur outre-cuidance desmesurée. On mit *Æsope* en vente, avec deux autres esclaves : l'acheteur s'enquit du premier ce qu'il sçauoit faire, celuy-la pour se faire valoir, respondit monts & merueilles, qu'il sçauoit & cecy & cela : le deuxiesme en respondit de soy autant ou plus : quand ce fut à *Æsope*, & qu'on luy eust aussi demandé ce qu'il sçauoit faire : Rien, dit-il, car ceux cy ont tout preoccupé : ils sçauent tout. Ainsin est-il aduenü en l'escole de la philosophie. La fierté, de ceux qui attribuoient à l'esprit humain la capacité de toutes choses, causa en d'autres, par despit & par emulation, cette opinion, qu'il n'est capable d'aucune chose. Les vns tiennent en l'ignorance, cette mesme extrémité, que les autres tiennent en la science. Afin qu'on ne puisse nier, que l'homme ne soit immodéré par tout : & qu'il n'a point d'arrest, que celuy de la necessité, & impuissance d'aller outre.



De la Phyfonomie.

CHAPITRE XII.



QVASI toutes les opinions que nous auons, font prinſes par authorité & à credit. Il n'y a point de mal. Nous ne ſçaurions pirement choiſir, que par nous, en vn ſiecle ſi foible. Cette image des diſcours de Socrates, que ſes amis nous ont laiſſée, nous ne l'approuuons, que pour la reuerence de l'approbation publique. Ce n'eſt pas par noſtre cognoiſſance : ils ne ſont pas ſelon noſtre vſage. S'il naiſſoit à cette heure, quelque choſe de pareil, il eſt peu d'hommes qui le priſaſſent. Nous n'apperceuons les grâces que pointues, bouffies, & enflées d'artifice. Celles qui coulent ſous la naiſſueté, & la ſimplicité, eſchappent aiſément à vne veuë groſſiere comme eſt la noſtre. Elles ont vne beauté delicate & cachée : il faut la veuë nette & bien purgée, pour deſcouvrir cette ſecrète lumiere. Eſt pas, la naiſſueté, ſelon nous, germaine à la ſottife, & qualité de reproche ? Socrates faiſt mouuoir ſon ame, d'un mouuement naturel & commun. Ainſi diſt vn païſan, ainſi diſt vne femme. Il n'a iamais en la bouche, que cochers, menuiſiers,

fauetiers & maisons. Ce sont inductions & similitudes, tirées des plus vulgaires & cogneuës actions des hommes : chacun l'entend. Sous vne si vile forme, nous n'eussions iamais choisi la noblesse & splendeur de ses conceptions admirables : nous qui estimons plates & basses, toutes celles que la doctrine ne releue ; qui n'apperceuons la richesse qu'en montre & en pompe. Nostre monde n'est formé qu'à l'ostentation. Les hommes ne s'enflent que de vent : & se manient à bonds, comme les balons. Cettuy-cy ne se propose point des vaines fantaisies. Sa fin fut, nous fournir de choses & de preceptes, qui reellement & plus ioinctement seruent à la vie :

*Seruare modum, finémque tenere,
Naturámque sequi.*

Il fut aussi tousiours vn & pareil. Et se monta, non par boutades, mais par complexion, au dernier poinct de vigueur. Ou pour mieux dire : il ne monta rien, mais rauala plustost & ramena à son poinct, originel & naturel, & luy soubmit la vigueur, les aspretez & les difficultez. Car en Caton, on void bien à clair, que c'est vne alleure tenduë bien loing au deffus des communes. Aux braues exploits de sa vie, & en sa mort, on le sent tousiours monté sur ses grands cheuaux. Cettuy-cy ralle à terre : & d'un pas mol & ordinaire, traite les plus vtiles discours, & se conduict & à la mort & aux plus espineuses traueses, qui se puissent presenter au train de la vie humaine. Il est bien aduenu, que le plus digne homme d'estre cogneu, & d'estre présenté au monde pour exemple, ce soit celuy duquel nous ayons plus

certaine cognoissance. Il a esté esclairé par les plus clair-voyans hommes, qui furent onques. Les tefmoins que nous auons de luy, sont admirables en fidelité & en suffisance. C'est grand cas, d'auoir peu donner tel ordre, aux pures imaginations d'un enfant, que sans les alterer ou estirer, il en ait produit les plus beaux effects de nostre ame. Il ne la represente ny elleuée ni riche : il ne la represente que faine : mais certes d'une bien allegre & nette fanté. Par ces vulgaires ressorts & naturels : par ces fantasies ordinaires & communes : sans s'esmouuoir & sans se piquer, il dressa non seulement les plus réglées, mais les plus hautes & vigoureuses creances, actions & mœurs, qui furent onques. C'est luy, qui ramena du ciel, où elle perdoit son temps, la sagesse humaine, pour la rendre à l'homme : où est sa plus iuste & plus laborieuse besoigne. Voyez-le plaider deuant ses iuges : voyez par quelles raisons, il esueille son courage aux hazards de la guerre, quels argumens fortifient sa patience, contre la calomnie, la tyrannie, la mort, & contre la teste de sa femme : il n'y a rien d'emprunté de l'art, & des sciences. Les plus simples y recognoissent leurs moyens & leur force : il n'est possible d'aller plus arriere & plus bas. Il a fait grand faueur à l'humaine nature, de montrer combien elle peut d'elle mesme. Nous sommes chacun plus riche, que nous ne pensons : mais on nous dresse à l'emprunt, & à la queste : on nous duit à nous seruir plus de l'autrui, que du nostre. En aucune chose l'homme ne sçait s'arrester au point de son besoing. De volupté, de richesse, de puissance, il en embrasse plus qu'il n'en peut estreindre. Son auidité est incapable de moderation. Je trouue qu'en curiosité de sçauoir, il en est de

meſme : il ſe taille de la beſoigne bien plus qu'il n'en peut faire, & bien plus qu'il n'en a affaire. Eſtendant l'vtilité du ſçauoir, autant qu'eſt ſa matiere. *Vt omnium rerum, ſic literarum quoque intemperantia laboramus.* Et Tacitus a raiſon, de louer la mere d'Agricola, d'auoir bridé en ſon fils, vn appetit trop bouillant de ſcience. C'eſt vn bien, à le regarder d'yeux fermes, qui a, comme les autres biens des hommes, beaucoup de vanité, & foibleſſe propre & naturelle : & d'un cher couſt. L'acquiſition en eſt bien plus hazardeuſe, que de toute autre viande ou boiſſon. Car ailleurs, ce que nous auons achetté, nous l'emportons au logis, en quelque vaiſſeau, & là nous auons loy d'en examiner la valeur : combien, & à quelle heure, nous en prendrons. Mais les ſciences, nous ne les pouuons d'arriuee mettre en autre vaiſſeau, qu'en noſtre ame : nous les auallons en les achettans, & ſortons du marché ou infeſts deſia, ou amendez. Il y en a, qui ne font que nous empéſcher & charger, au lieu de nourrir : & telles encore, qui ſous tiltre de nous guarir, nous empoifonnent. J'ay pris plaſir de voir en quelque lieu, des hommes par deuotion, faire vœu d'ignorance, comme de chaſteté, de pauureté, de pœnitence. C'eſt auſſi chaſtrer nos appetits deſordonnez, d'eſmouſſer cette cupidité qui nous eſpoinçonne à l'eſtude des liures : & prier l'ame de cette complaiſance voluptueuſe, qui nous chatouille par l'opinion de ſcience. Et eſt richement accomplir le vœu de pauureté, d'y ioindre encore celle de l'eſprit. Il ne nous faut guere de doctrine, pour viure à noſtre aiſe. Et Socrates nous apprend qu'elle eſt en nous, & la maniere de l'y trouuer, & de s'en ayder. Toute cette noſtre ſuffiſance, qui eſt au delà

de la naturelle, est à peu pres vaine & superflue. C'est beaucoup si elle ne nous charge & trouble plus qu'elle ne nous sert. *Paucis opus est litteris ad mentem bonam*. Ce sont des excez fieureux de nostre esprit : instrument brouillon & inquiete. Recueillez vous, vous trouuerez en vous, les argumens de la Nature, contre la mort, vrais, & les plus propres à vous seruir à la necessité. Ce sont ceux qui font mourir vn payſan & des peuples entiers, aussi constamment qu'un philosophe. Fuisse ie mort moins allegrement auant qu'auoir veu les Tufculanes ? L'estime que non. Et quand ie me trouue au propre, ie sens, que ma langue s'est enrichie, mon courage de peu. Il est comme Nature me le forgea. Et se targue pour le confliet, non que d'une marche naturelle & commune. Les liures m'ont serui non tant d'instruction que d'exercitation. Quoy, si la science, essayant de nous armer de nouuelles deffences, contre les inconueniens naturels, nous a plus imprimé en la fantasie, leur grandeur & leur poix, qu'elle n'a ses raisons & subtilitez, à nous en courir ? Ce sont voirement subtilitez : par où elle nous esueille souuent bien vainement. Les auteurs mesmes plus ferrez & plus sages, voyez autour d'un bon argument, combien ils en sement d'autres legers, &, qui y regarde de pres, incorporels. Ce ne sont qu'arguties verbales, qui nous trompent. Mais d'autant que ce peut estre vilement, ie ne les veux pas autrement esplucher. Il y en a ceans assez de cette condition, en diuers lieux : ou par emprunt, ou par imitation. Si se faut il prendre vn peu garde, de n'appeller pas force, ce qui n'est que gentillesse : & ce, qui n'est qu'aigu, solide : ou bon, ce qui n'est que beau : *quæ magis gustata quàm potata delectant*. Tout ce qui

plaist, ne paist pas, *vbi non ingenij sed animi negotium agitur*. A veoir les efforts que Seneque se donne pour se preparer contre la mort, à le voir fuer d'ahan, pour se roidir & pour s'asseurer, & se debattre si long temps en cette perche, l'eusse esbranlé sa reputation, s'il ne l'eust en mourant, treufaillement maintenuë. Son agitation si ardante, si frequente, montre qu'il estoit chaud & impetueux luy mesme. *Magnus animus remissius loquitur, & securius. Non est alius ingenio, alius animo color.* Il le faut conuaincre à ses despens. Et montre aucunement qu'il estoit pressé de son aduerfaire. La façon de Plutarque, d'autant qu'elle est plus desdaigneuse, & plus desendue, elle est selon moy, d'autant plus virile & persuasive. Je croirois aysément, que son ame auoit les mouemens plus assurez, & plus reglez. L'un plus aigu, nous pique & nous eslance en surfaut : touche plus l'esprit. L'autre plus solide, nous informe, établit & conforte constamment : touche plus l'entendement. Celuy là rait nostre iugement : cestuy-ci le gaigne. J'ay veu pareillement d'autres escrits, encores plus reuez, qui en la peinture du combat qu'ils soustiennent contre les aiguillons de la chair, les representent si cuisants, si puissants & inuincibles, que nous mesmes, qui sommes de la voirie du peuple, auons autant à admirer l'estrangeté & vigueur incognuë de leur rentation, que leur resistance. A quoy faire nous allons nous gendarmant par ces efforts de la science ? Regardons à terre, les pauvres gens que nous y voyons esendus, la teste panchante apres leur besongné : qui ne sçauent ny Aristote ny Caton, ny exemple ny precepte. De ceux-là, tire Nature tous les iours, des effects de constance & de patience,

plus purs & plus roides, que ne sont ceux que nous estudions si curieusement en l'escole. Combien en vois ie ordinairement, qui mescognoissent la pauvreté : combien qui desirent la mort, ou qui la passent sans alarme & sans affliction ? Celui là qui fouit mon iardin, il a ce matin enterré son pere ou son fils. Les noms mesme, dequoy ils appellent les maladies, en addoucissent & amollissent l'aspreté. La phthisie, c'est la toux pour eux : la dysenterie, deuoyement d'estomach : vn pleurefis, c'est vn morfondement : & selon qu'ils les nomment doucement, ils les supportent aussi. Elles sont bien grieveues, quand elles rompent leur trauail ordinaire : ils ne s'allitent que pour mourir. *Simplex illa & aperta virtus in obscuram & solertem scientiam versa est.* L'escriuois cecy enuiron le temps, qu'une forte charge de nos troubles, se croupit plusieurs mois, de tout son poix, droit sur moy. J'auois d'une part, les ennemis à ma porte : d'autre part, les piccoreurs, pires ennemis, *non armis sed vitiis, certatur.* Et essayois toute sorte d'iniures militaires, à la fois :

*Hofis adest dextra læuæque à parte timendus,
Vicinæque malo terret vtrumque latus.*

Monstrueuse guerre. Les autres agissent au dehors, ceste-cy encore contre soy : se ronge & se desfait, par son propre venin. Elle est de nature si maligne & ruineuse, qu'elle se ruine quand & quand le reste : & se deschire & despece de rage. Nous la voyons plus souuent, se dissoudre par elle mesme, que par disette d'aucune chose necessaire, ou par la force ennemie. Toute discipline la fuit. Elle vient guerir

sedition, & en est pleine. Veut chastier la desobissance, & en montre l'exemple : & employee à la fenne des loix, fait sa part de rebellion à l'encontre des siennes propres. Où en sommes nous? estre medecine porte infection.

Nostre mal s'empoisonne

Du secours qu'on luy donne.

exuperat magis aegrescitque medendo.

*Omnia fanda nefanda malo permista furore,
Iustificam nobis mentem auertére Deorum.*

ces maladies populaires, on peut distinguer sur commencement, les sains des malades : mais quand ils viennent à durer, comme la nostre, tout le corps n sent, & la teste & les talons : aucune partie est exempte de corruption. Car il n'est air, qui se me si goulument : qui s'espande & penetre, nme fait la licence. Nos armées ne se lient tiennent plus que par simant estranger : des Français on ne sçait plus faire vn corps d'armée, constant réglé. Quelle honte? Il n'y a qu'autant de discipline, que nous en font voir des soldats empruntez. Tant à nous, nous nous conduisons à discretion, non pas du chef; chacun selon la sienne : il a plus aise au dedans qu'au dehors. C'est au commandement de fuire, courtizer, & plier : à luy seul obeir : tout le reste est libre & dissolu. Il me plaist voir, combien il y a de lascheté & de pusillanité en l'ambition : par combien d'abjection & de viltude, il luy faut arriuer à son but. Mais cecy : deplaist-il de voir, des natures debonnaies, capables de iustice, se corrompre tous les iours, maniement & commandement de cette confusion.

La longue souffrance, engendre la coustume; la coustume, le consentement & l'imitation. Nous auions assez d'ames mal nées, sans gaster les bonnes & genereuses. Si que, si nous continuons, il restera mal-ayseement à qui fier la santé de cet eltat, au cas que Fortune nous la redonne.

*Hunc saltem euerso iuuenem succurrere seclo,
Ne prohibete.*

Qu'est deuenue cet ancien precepte : Que les soldats ont plus à craindre leur chef, que l'ennemy? Et ce merueilleux exemple : Qu'un pommier s'estant trouué enfermé dans le pourpris du camp de l'armée Romaine, elle fut veüe l'endemain en desloger, laissant au possesseur, le comte entier de ses pommes, meures & delicieuses? L'aymeroy bien, que nostre ieunesse, au lieu du temps qu'elle employe, à des peregrinations moins viles, & apprentissages moins honorables, elle le mist, moitié à veoir de la guerre sur mer, sous quelque bon capitaine commandeur de Rhodes : moitié à recognoistre la discipline des armées Turquesques. Car elle a beaucoup de differences, & d'auantages sur la nostre. Cecy en est : que nos soldats deuiennent plus licentieux aux expeditions : là, plus retenus & craintifs. Car les offenses ou larrecins sur le menu peuple, qui se punissent de bastonades en la paix, sont capitales en la guerre. Pour un œuf prins sans payer, ce sont de conte prefix, cinquante coups de baston. Pour toute autre chose, tant legere soit elle, non necessaire à la nourriture, on les empale, ou decapite sans deport. Je me suis estonné, en l'histoire de Selim, le plus cruel conquerant qui fut onques, veoir, que lors qu'il subiugua

l'Égypte, les beaux iardins d'autour de la ville de Damas, tous ouuers, & en terre de conqueſte, ſon armee campant ſur le lieu meſmes, furent laiſſés vierges des mains des ſoldats, parce qu'ils n'auoient pas eu le ſigne de piller. Mais eſt-il quelque mal en vne police, qui vaille eſtre combatu par vne drogue ſi mortelle ? Non pas, diſoit Fauonius, l'vſurpation de la poſſeſſion tyrannique d'vne republique. Platon de meſme ne conſent pas qu'on face violence au repos de ſon païs, pour le guerir : & n'accepte pas l'amendement qui trouble & hazarde tout, & qui couſte le ſang & ruine des citoyens. Eſtabliffant l'office d'un homme de bien, en ce cas, de laiſſer tout là : ſeulement prier Dieu qu'il y porte ſa main extraordinaire. Et ſemble ſçauoir mauuais gré à Dion ſon grand amy, d'y auoir vn peu autrement procedé. L'eſtois Platonicien de ce coſté là, avant que ie ſçeuffe qu'il y euſt de Platon au monde. Et ſi ce perſonnage, doit purement eſtre refusé de noſtre conſorce : (luy, qui par la ſincerité de ſa conſcience, merita enuers la faueur diuine, de penetrer ſi auant en la Chreſtienne lumiere, au trauers des tenebres publiques, du monde de ſon temps,) ie ne penſe pas, qu'il nous ſie bien, de nous laiſſer inſtruire à vn payen. Combien c'eſt d'impieté, de n'atendre de Dieu, nul ſecours ſimplement ſien, & ſans noſtre cooperation. Ie doubte ſouuent, ſi entre tant de gens, qui ſe meſſent de telle beſoigne, nul s'eſt rencontré, d'entendement ſi imbecille, à qui on aye en bon eſcient perſuadé, qu'il alloit vers la reformation, par la derniere des difformations : qu'il tiroit vers ſon ſalut, par les plus expreſſes cauſes que nous ayons de trefcertaine damnation : que renuerſant la police, le magiſtrat, & les loix, en la tutelle deſquelles Dieu l'a colloqué : rempliffant de

haines parricides, les courages fraternels : appellant à son ayde, les diables & les furies : il puisse apporter secours à la sacrosaincte douceur & iustice, de la loy diuine. L'ambition, l'auarice, la cruauté, la vengeance, n'ont point assez de propre & naturelle impetuosité : amorçons-les & les attifons, par le glorieux titre de iustice & deuotion. Il ne se peut imaginer vn pire estat des choses, qu'ou la meschanceté vient à estre legitime : & prendre avec le congé du magistrat, le manteau de la vertu : *Nihil in speciem fallacius, quàm praua religio, vbi deorum numen prætenditur sceleribus*. L'extreme espece d'iniustice, selon Platon, c'est que, ce qui est iniuste, soit tenu pour iuste. Le peuple y souffrit bien largement lors, non les dommages prefens seulement,

vndique totis

Vsque adeo turbatur agris,

mais les futurs aussi. Les viuans y eurent à patir, si eurent ceux qui n'estoient encore nays. On le pillà, & moy par conséquent, iusques à l'esperance : luy rauissant tout ce qu'il auoit à s'apprester à viure pour longues annees,

Quæ nequeunt secum ferre aut abducere, perdunt,

Et cremat insontes turba scelestæ casæ :

Muris nulla fides, squallent populatibus agri.

Outre cette secousse, i'en souffris d'autres. L'encourus les inconueniens, que la moderation apporte en telles maladies. Je fus pelaudé à toutes mains. Au Gibelin i'estois Guelphe, au Guelphe Gibelin. Quelqu'un de mes poetes dict bien cela, mais ie ne sçay où c'est. La situation de ma maison, & l'accointance des hommes de mon voisinage, me presentent d'un

visage : ma vie & mes actions d'un autre. Il ne s'en faisoit point des accusations formées : car il n'y auoit où mordre. Je ne desempare iamais les loix : & qui m'eust recherché, m'en eust deu de reste. C'estoient suspicions muettes, qui couroient sous main, auxquelles il n'y a iamais faute d'apparence, en un mélange si confus, non plus que d'espris ou enuieux ou ineptes. L'ayde ordinairement aux presomptions iniurieuses, que la Fortune seme contre moy : par vne façon, que j'ay dès tousiours, de fuyr à me iustifier, excuser & interpreter : estimant que c'est mettre ma conscience en compromis, de playder pour elle. *Perspicuitas enim, argumentatione eleuatur.* Et comme, si chacun voyoit en moy, aussi cler que ie fay : au lieu de me tirer arriere de l'accusation, ie m'y auance; & la renchery plustost, par vne confession ironique & moqueuse : si ie ne m'en tais tout à plat, comme de chose indigne de responce. Mais ceux qui le prennent pour vne trop hautaine confiance, ne m'en veulent gueres moins de mal, que ceux, qui le prennent pour foiblesse d'une cause indefensible. Nommeement les grands, enuers lesquels faute de sommission, est l'extreme faute. Rudes à toute iustice, qui se cognoist, qui se sent : non demise, humble & suppliant. J'ay souuent heurté à ce pillier. Tant y a que de ce qui m'aduient lors, un ambitieux s'en fust pendu : si eust fait un auaricieux. Je n'ay soing quelconque d'acquiescer.

*Sit mihi quod nunc est etiam minus, ut mihi viuum
Quod superest aui, si quid superesse volent dij.*

Mais les pertes qui me viennent par l'iniure d'autrui, soit larrecin, soit violence, me pignent, enuiron comme un homme malade & gehenné d'auarice.

L'offence a sans mesure plus d'aigreur, que n'a la perte. Mille diuerſes ſortes de maux accoururent à moy à la file. Ie les euſſe plus gaillardement ſoufferts, à la foule. Ie penſay deſia, entre mes amis, à qui ie pourrois commettre vne vieilleſſe neceſſiteuſe & diſgratiee. Apres auoir rodé les yeux par tout, ie me trouuay en pourpoint. Pour ſe laiſſer tomber à plomb, & de ſi haut, il faut que ce ſoit entre les bras d'une affection ſolide, vigoureuſe & fortunee. Elles ſont rares, ſ'il y en a. En fin ie cogneus que le plus ſeur, eſtoit de me fier à moy-meſme de moy, & de ma neceſſité. Et ſ'il m'aduenoit d'eſtre froidement en la grace de la Fortune, que ie me recommandaſſe de plus fort à la mienne : m'attachaſſe, regardaſſe de plus pres à moy. En toutes choſes les hommes ſe iettent aux appuis eſtrangers, pour eſpargner les propres : ſeuils certains & ſeuils puisſans, qui ſçait ſ'en armer. Chacun court ailleurs, & à l'aduenir, d'autant que nul n'eſt arriué à foy. Et me reſolus, que c'eſtoient vtiles inconueniens : d'autant premierelement qu'il faut aduertir à coups de foyt, les mauuais diſciples, quand la raiſon n'y peut aſſez, comme par le feu & violence des coins, nous ramenons vn bois tortu à ſa droicteur. Ie me preſche, il y a ſi long temps, de me tenir à moy, & ſeparer des choſes eſtrangeres : toutesfois, ie tourne encores touſiours les yeux à coſté. L'inclination, vn mot fauorable d'un grand, vn bon viſage, me tente. Dieu ſçait ſ'il en eſt cherté en ce temps, & quel ſens il porte. I'oyſ encore ſans rider le front, les ſubornemens qu'on me fait, pour me tirer en place marchande : & m'en deſſens ſi mollement, qu'il ſemble, que ie ſouffriſſe plus volontiers d'en eſtre vaincu. Or à vn eſprit ſi indocile, il faut

des bastonnades : & faut rebattre & reserrer, à bons coups de mail, ce vaisseau qui se desprend, se descouft, qui s'eschappe & desrobe de soy. Secondement, que cet accident me seruoit d'exercitation, pour me preparer à pis : si moy, qui & par le benefice de la Fortune, & par la condition de mes mœurs, esperois estre des derniers, venois à estre des premiers attrappé de cette tempeste. M'instruisant de bonne heure, à contraindre ma vie, & la rengier pour vn nouuel estat. La vraye liberté c'est pouvoir toute chose sur soy. *Potentissimus est qui se habet in potestate.* En vn temps ordinaire & tranquille, on se prepare à des accidens moderez & communs : mais en cette confusion, où nous sommes depuis trente ans, tout homme François, soit en particulier, soit en general, se voit à chaque heure, sur le point de l'entier renuersement de sa fortune. D'autant faut-il tenir son courage fourny de prouisions plus fortes & vigoureuses. Sçachons gré au fort, de nous auoir fait viure en vn siecle, non mol, languissant, ny oisif. Tel qui ne l'eust esté par autre moyen, se rendra fameux par son malheur. Comme ie ne ly guere és histoires, ces confusions, des autres estats, sans regret de ne les auoir peu mieux considerer present. Ainsi fait ma curiosité, que ie m'aggee aucunement, de veoir de mes yeux, ce notable spectacle de nostre mort publique, ses symptomes & sa forme. Et puis que ie ne la sçauois retarder, suis content d'estre destiné à y assister, & m'en instruire. Si cherchons nous euidentement de recognoistre en ombre mesme, & en la fable des Theatres, la montre des ieux tragiques de l'humaine fortune. Ce n'est pas sans compassion de ce que nous oyons : mais nous nous plaçons d'esueiller nostre desplaisir,

par la rareté de ces pitoyables euenemens. Rien ne chatouille, qui ne pince. Et les bons historiens, fuyent comme vne eaue dormante, & mer morte, des narrations calmes : pour regagner les seditions, les guerres, où ils sçauent que nous les appellons. Je doute si ie puis assez honnestement aduouër, à combien vil prix du repos & tranquillité de ma vie, ie l'ay plus de moitié passée en la ruine de mon pays. Je me donne vn peu trop bon marché de patience, és accidens qui ne me saisissent au propre : & pour me plaindre à moy, regarde non tant ce qu'on m'oste, que ce qui me reste de sauue, & dedans & dehors. Il y a de la consolation, à escheuer tantost l'vn, tantost l'autre, des maux qui nous guignent de fuite, & assenent ailleurs, autour de nous. Aussi, qu'en matiere d'interests publiques, à mesure, que mon affection est plus vniuersellement espandue, elle en est plus foible. Ioinct qu'il est vray à demy, *Tantum ex publicis malis sentimus, quantum ad priuatas res pertinet*. Et que la santé, d'où nous partîmes. estoit telle, qu'elle soulage elle mesme le regret, que nous en deurions auoir. C'estoit santé, mais non qu'à la comparaïson de la maladie, qui l'a fuyue. Nous ne sommes cheus de guerres haut. La corruption & le brigandage, qui est en dignité & en office, me semble le moins supportable. On nous volle moins iniurieusement dans vn bois, qu'en lieu de seureté. C'estoit vne iointure vniuerselle de membres gastez en particulier à l'enuy les vns des autres : & la plus part, d'vlcères enuieillis, qui ne receuoient plus, ny ne demandoient guerison. Cecroulement donq m'anima certes plus, qu'il ne m'atterra, à l'aide de ma conscience, qui se portoit non paisiblement seulement, mais fierement ; & ne trouuois en quoy me plaindre

de moy. Aussi, comme Dieu n'enuoye iamais non plus les maux, que les biens tous purs aux hommes, ma santé tint bon ce temps-là, outre son ordinaire. Et ainsi que sans elle ie ne puis rien, il est peu de choses, que ie ne puisse avec elle. Elle me donna moyen d'esueiller toutes mes prouisions, & de porter la main au deuant de la playe, qui eust passé volontiers plus outre. Et esprouuay en ma patience, que i'auois quelque tenue contre la Fortune : & qu'à me faire perdre mes arçons, il falloit vn grand heurt. Je ne le dis pas, pour l'irriter à me faire vne charge plus vigoureuse. Je suis son seruiteur : ie luy tends les mains. Pour Dieu qu'elle se contente. Si ie sens ses assaux ? si fais. Comme ceux que la tristesse accable & possède, se laissent pourtant par interualles tastonner à quelque plaisir, & leur eschappe vn soufrire : ie puis aussi assez sur moy, pour rendre mon estat ordinaire, paisible, & deschargé d'ennuyeuse imagination : mais ie me laisse pourtant à boutades, surprendre des morsures de ces malplaisantes pensées, qui me batent, pendant que ie m'arme pour les chasser, ou pour les luiéter. Voicy vn autre rengement de mal, qui m'arriua à la suite du reste. Et dehors & dedans ma maison, ie fus accueilly d'une peste, vehemente au prix de toute autre. Car comme les corps sains sont subiects à plus griesues maladies, d'autant qu'ils ne peuuent estre forcez que par celles-là : aussi mon air tressalubre, où d'aucune memoire, la contagion, bien que voisine, n'auoit sceu prendre pied, venant à s'empoisonner, produisit des effects estranges.

*Missa senum & iuuenum densantur funera, nullum
Sæua caput Proserpina fugit.*

l'euz à souffrir cette plaisante condition, que la veue de ma maison m'estoit effroyable. Tout ce qui y estoit, estoit sans garde, & à l'abandon de qui en auoit enuie. Moy qui suis si hospitalier, fus en une pénible questte de retraicte, pour ma famille. Vne famille esgaree, faisant peur à ses amis, & à soy-mesme, & horreur où qu'elle cherchast à se placer : ayant à changer de demeure, soudain qu'un de la troupe commençoit à se douloir du bout du doigt. Toutes maladies sont alors prises pour peste : on ne se donne pas le loysir de les recognoistre. Et c'est le bon : que selon les regles de l'art, à tout danger qu'on approche, il faut estre quarante iours en transe de ce mal : l'imagination vous exerçant cependant à sa mode, & enflourant vostre santé mesme. Tout cela m'eust beaucoup moins touché, si ie n'eusse eu à me ressentir de la peine d'autrui, & seruir six mois miserablement, de guide à cette carauane. Car ie porte en moy mes preseruatifs, qui sont, resolution & souffrance. L'apprehension ne me presse guere : laquelle on craint particulièrement en ce mal. Et si estant seul, ie l'eusse voulu prendre, c'eust esté vne fuitte, bien plus gaillarde & plus esloignee. C'est vne mort, qui ne me semble des pires. Elle est communément courte, d'estourdissement, sans douleur, consolee par la condition publique : sans ceremonie, sans dueil, sans presse. Mais quant au monde des enuirons, la centiesme partie des ames ne se peult sauuer.

*videas desertaque regna
Pastorum, & longè saltus latèque vacantes.*

En ce lieu, mon meilleur reuenu est manuel. Ce

que cent hommes trauailloient pour moy, chauma pour long temps. Or lors, quel exemple de resolution ne vismes nous, en la simplicité de tout ce peuple ? Generalement, chacun renonçoit au soing de la vie. Les raisins demeurerent suspendus aux vignes, le bien principal du pays : tous indifferement se preparans & attendans la mort, à ce soir, ou au lendemain : d'un visage & d'une voix si peu effroyee, qu'il sembloit qu'ils eussent compromis à cette necessité, & que ce fust vne condamnation vniuerselle & ineuitable. Elle est tousiours telle. Mais à combien peu, tient la resolution au mourir ? La distance & difference de quelques heures : la seule consideration de la compagnie, nous en rend l'apprehension diuerse. Voyez ceux-cy : pour ce qu'ils meurent en mesme mois : enfans, ieunes, vieillards, ils ne s'estonnent plus, ils ne se pleurent plus. L'en vis qui craignoient de demeurer derriere, comme en vne horrible solitude. Et n'y cogneu communément, autre soing que des sepultures : il leur faschoit de voir les corps espars emmy les champs, à la mercy des bestes : qui y peuplerent incontinent. Comment les fantasies humaines se descouppent ! Les Neorites, nation qu'Alexandre subiugua, iettent les corps des morts au plus profond de leurs bois, pour y estre mangez. Seule sepulture estimee entr'eux heureuse. Tel sain faisoit desia sa fosse : d'autres s'y couchoient encore viuans. Et vn maneuure des miens, avec ses mains, & ses pieds, attira sur soy la terre en mourant. Estoit ce pas s'abrier pour s'endormir plus à son aise ? D'une entreprise en hauteur aucunement pareille à celle des soldats Romains, qu'on trouua apres la iournee de Cannes, la teste plongee dans des trous, qu'ils auoient faicts & comblez de leurs mains, en s'y suf-

foquant. Somme toute vne nation fut incontinent par vsage, logee en vne marche, qui ne cede en roideur à aucune resolution estudee & consultee. La plus part des instructions. de la science, à nous encourager, ont plus de montre que de force, & plus d'ornement que de fruit. Nous auons abandonné Nature, & luy voulons apprendre sa leçon : elle, qui nous menoit si heureusement & si seurement. Et ce pendant, les traces de son instruction, & ce peu qui par le benefice de l'ignorance, reste de son image, empreint en la vie de cette tourbe rustique d'hommes impollis : la science est contrainte, de l'aller tous les iours empruntant, pour en faire patron à ses disciples, de constance, d'innocence, & de tranquillité. Il fait beau voir, que ceux-cy plains de tant de belle cognoissance, ayent à imiter cette sotte simplicité : & à l'imiter, aux premieres actions de la vertu. Et que nostre sapience, apprenne des bestes mesmes, les plus vtils enseignemens, aux plus grandes & necessaires parties de nostre vie. Comme il nous faut viure & mourir, mesnager nos biens, aymer & esleuer nos enfans, entretenir iustice. Singulier tesmoignage de l'humaine maladie : & que cette raison qui se manie à nostre poste, trouuant tousiours quelque diuersité & nouuelleté, ne laisse chez nous aucune trace apparente de la Nature. Et en ont fait les hommes, comme les parfumeurs de l'huile : ils l'ont sophistiquée de tant d'argumentations, & de discours appelez du dehors, qu'elle en est deuenue variable, & particuliere à chacun : & a perdu son propre visage, constant, & vniuersel. Et nous faut en chercher tesmoignage des bestes, non subiect à faueur, corruption, ny à diuersité d'opinions. Car il est bien vray, qu'elles mesmes ne vont

pas tousiours exactement dans la route de Nature, mais ce qu'elles en desuoyent, c'est si peu, que vous en apperceuez tousiours l'orniere. Tout ainsi que les cheuaux qu'on meine en main, font bien des bonds, & des escapades, mais c'est à la longueur de leurs longues : & suyuent neantmoins tousiours les pas de celuy qui les guide : & comme l'oiseau prend son vol, mais sous la bride de sa filiere. *Exilia, tormenta, bella, morbos, naufragia meditare, vt nullo fis malo tyro.* A quoy nous sert cette curiosité, de preoccuper tous les inconueniens de l'humaine nature, & nous preparer avec tant de peine à l'encontre de ceux mesme, qui n'ont à l'auanture point à nous toucher ? (*Parem passis tristitiam facit, pati posse.* Non seulement le coup, mais le vent & le pet nous frappe). Ou comme les plus fieureux, car certes c'est fieure, aller dès à cette heure vous faire donner le fouët, par ce qu'il peut aduenir, que Fortune vous le fera souffrir vn iour : & prendre vostre robe fourree dès la S. Iean, pour ce que vous en aurez besoing à Noel ? Iettez vous en l'experience de tous les maux qui vous peuuent arriuer, nommement des plus extremes : esprouuez vous là, disent-ils, asseurez vous là. Au rebours ; le plus facile & plus naturel, seroit en descharger mesme sa pensée. Ils ne viendront pas assez tost, leur vray estre ne nous dure pas assez, il faut que nostre esprit les estende & les allonge, & qu'auant la main il les incorpore en soy, & s'en entretienne, comme s'ils ne poisoient pas raisonnablement à nos sens. Ils poiseront assez, quand ils y seront (dit vn des maistres, non de quelque tendre secte, mais de la plus dure) cependant fauorise toy : croy ce que tu aimes le mieux : que te sert il d'aller recueillant

& preuenant ta male fortune : & de perdre le present, par la crainte du futur : & estre dès cette heure miserable, par ce que tu le dois estre avec le temps. Ce sont ses mots. La science nous fait volontiers vn bon office, de nous instruire bien exactement des dimensions des maux,

Curis acuens mortalia corda.

Ce seroit dommage, si partie de leur grandeur échappoit à nostre sentiment & connoissance. Il est certain, qu'à la plus part, la preparation à la mort, a donné plus de torment, que n'a fait la souffrance. Il fut iadis veritablement dict, & par vn bien iudicieux auteur, *Minus afficit sensus fatigatio, quàm cogitatio*. Le sentiment de la mort presente, nous anime par fois de foy mesme, d'une prompte resolution, de ne plus euer chose du tout ineuitable. Plusieurs gladiateurs se sont veus au temps passé, apres auoir couardement combattu, aualler courageusement la mort; offrans leur gosier au fer de l'ennemy, & le conuians. La veue esloignée de la mort aduenir, a besoing d'une fermeté lente, & difficile par consequent à fournir. Si vous ne sçavez pas mourir, ne vous chaille, Nature vous en informera sur le champ, plainement & suffisamment; elle fera exactement cette besongne pour vous, n'en empeschez vostre soing.

*Incertam frustra mortales funeris horam
Queritis, & qua sit mors aditura via :*

*Pena minor certam subito perferre ruinam,
Quod timeas, grauius sustinuisse diu.*

Nous troublons la vie par le soing de la mort, & la

mort par le soing de la vie. L'une nous ennuye, l'autre nous effraye. Ce n'est pas contre la mort, que nous nous preparons, c'est chose trop momentanee. Vn quart d'heure de passion sans consequence, sans nuifance, ne merite pas des preceptes particuliers. A dire vray, nous nous preparons contre les preparations de la mort. La philosophie nous ordonne, d'auoir la mort tousiours deuant les yeux, de la preuoir & confiderer auant le temps : & nous donne apres, les regles & les precautions, pour prouoir à ce, que cette preuoyance, & cette penfee ne nous bleffe. Ainsi font les medecins qui nous iettent aux maladies, afin qu'ils ayent où employer leurs drogues & leur art. Si nous n'auons sçeu viure, c'est iniustice de nous apprendre à mourir, & difformer la fin de son total. Si nous auons sçeu viure, constamment & tranquillement, nous sçaurons mourir de mesme. Ils s'en venteront tant qu'il leur plaira. *Tota philosophorum vita commentatio mortis est.* Mais il m'est aduis, que c'est bien le bout, non pource que le but de la vie. C'est sa fin, son extremité, non pource que son obiect. Elle doit estre elle mesme à foy, sa vifée, son dessein. Son droit estude est se regler, se conduire, se souffrir. Au nombre de plusieurs autres offices, que comprend le general & principal chapitre de sçauoir viure, est cet article de sçauoir mourir. Et des plus legers, si nostre crainte ne luy donnoit poids. A les iuger par l'utilité, & par la verité naifue, les leçons de la simplicité, ne cedent gueres à celles que nous presche la doctrine au contraire. Les hommes font diuers en sentiment & en force : il les faut mener à leur bien, selon eux : & par routes diuerses. *Quò me cumque rapit tempestas, deferor hospes.* Je ne vy iamais payfan de mes

voisins, entrer en cogitation de quelle contenance, & assurance, il passeroit cette heure dernière. Nature luy apprend à ne songer à la mort, que quand il se meurt. Et lors il y a meilleure grace qu'Aristote : lequel la mort presse doublement, & par elle, & par vne si longue premeditation. Pourtant fut-ce l'opinion de Cæsar, que la moins premeditee mort, estoit la plus heureuse, & plus deschargee. *Plus dolet, quàm necesse est, qui antiè dolet, quàm necesse est.* L'aigreur de cette imagination, naist de nostre curiosité. Nous nous empeschons tousiours ainssi : voulans deuancer & regenter les prescriptions naturelles. Ce n'est qu'aux docteurs, d'en disner plus mal, tous sains, & se renfroigner de l'image de la mort. Le commun, n'a besoing ny de remede ny de consolation, qu'au hurt, & au coup. Et n'en considere qu'autant iustement qu'il en souffre. Est-ce pas ce que nous difons, que la stupidité, & faute d'aprehension, du vulgaire, luy donne cette patience aux maux presens, & cette profonde nonchalance des sinistres accidens futurs? Que leur ame pour estre plus crasse, & obtuse, est moins penetrable & agitable? Pour Dieu s'il est ainssi, tenons d'ores en auant escole de bestise. C'est l'extreme fruit, que les sciences nous promettent, auquel ceste-cy conduict si doucement ses disciples. Nous n'aurons pas faute de bons regens, interpretes de la simplicité naturelle. Socrates en fera l'vn. Car de ce qu'il m'en souuiet, il parle enuiron en ce sens, aux iuges qui deliberent de sa vie : l'ay peur, messieurs, si ie vous prie de ne me faire mourir, que ie m'enferme en la delation de mes accusateurs ; qui est : Que ie fais plus l'entendu que les autres : comme ayant quelque cognoissance plus cachee, des choses qui sont au dessus & au

deffous de nous. Je ſçay que ie n'ay ni frequenté, ny recogneu la mort, ni n'ay veu perſonne qui ait effayé ſes qualitez, pour m'en inſtruire. Ceux qui la craignent preſuppoſent la cognoiſtre : quant à moy, ie ne ſçay ny quelle elle eſt, ny quel il faiſt en l'autre monde. A l'auanture eſt la mort choſe indifferente, à l'auanture deſirable. Il eſt à croire pourtant, ſi c'eſt vne tranſmigration d'une place à autre, qu'il y a de l'amendement, d'aller viure avec tant de grands perſonnages treſpaſſez : & d'eſtre exempt d'auoir plus affaire à iuges iniques & corrompus. Si c'eſt vn aneantiſſement de noſtre eſtre, c'eſt encore amendement d'entrer en vne longue & paiſible nuit. Nous ne ſentons rien de plus doux en la vie, qu'un repos & ſommeil tranquille, & profond ſans ſonges. Les choſes que ie ſçay eſtre mauuaiſes, comme d'offencer ſon prochain, & deſobeir au ſuperieur, ſoit Dieu, ſoit homme, ie les euite ſoigneuſement : celles deſquelles ie ne ſçay, ſi elles ſont bonnes ou mauuaiſes, ie ne les ſçauois craindre. Si ie m'en vay mourir, & vous laiſſe en vie : les Dieux ſeuls voyent, à qui, de vous ou de moy, il en ira mieux. Parquoy pour mon regard, vous en ordonnerez, comme il vous plaira. Mais ſelon ma façon de conſeiller les choſes iuſtes & vtiles, ie dy bien, que pour voſtre conſcience vous ferez mieux de m'eſlargir, ſi vous ne voyez plus auant que moy en ma cauſe. Et iugeant ſelon mes actions paſſees, & publiques, & priuees, ſelon mes intentions, & ſelon le profit, que tirent tous les iours de ma conuerſation tant de nos citoyens, ieunes & vieux, & le fruit, que ie vous fay à tous, vous ne pouuez duëment vous deſcharger enuers mon merite, qu'en ordonnant, que ie ſois nourry, attendu ma pauureté, au Prytane, aux deſpens publiques :

ce que souuent ie vous ay veu à moindre raison, octroyer à d'autres. Ne prenez pas à obstination ou desdaing, que, suyuant la coustume, ie n'aille vous suppliant & esmouuant à commiseration. I'ay des amis & des parents, n'estant, comme di&t Homere, engendré ny de bois, ny de pierre non plus que les autres : capables de se presenter, avec des larmes, & le dueil : & ay trois enfans esplorez, dequoy vous tirer à pitié. Mais ie feroiy honte à nostre ville, en l'aage que ie suis, & en telle reputation de sagesse, que m'en voyci en preuention, de m'aller desmettre à si lasches contenance. Que diroit-on des autres Atheniens? I'ay tousiours admonnesté ceux qui m'ont ouy parler, de ne racheter leur vie, par vne action deshonneste. Et aux guerres de mon pays à Amphipolis, à Potidee, à Delie, & autres où ie me suis trouué, i'ay montré par effect, combien i'estoy loing de garantir ma feureté par ma honte. D'auantage i'interesserois vostre deuoir, & vous conuierois à choses laydes : car ce n'est pas à mes prieres de vous persuader : c'est aux raisons pures & solides de la iustice. Vous auez iuré aux Dieux d'ainsi vous maintenir. Il sembleroit, que ie vous voufisse soupçonner & recriminer, de ne croire pas, qu'il y en aye. Et moy mesme tesmoigneroy contre moy, de ne croire point en eux, comme ie doy : me deffiant de leur conduicte, & ne remettant purement en leurs mains mon affaire. Ie m'y fie du tout : & tiens pour certain, qu'ils feront en cecy, selon qu'il sera plus propre à vous & à moy. Les gens de bien ny viuans, ny morts, n'ont aucunement à se craindre des Dieux. Voyla pas vn playdoyé puerile, d'une hauteur inimaginable, & employé en quelle necessité? Vrayement ce fut raison, qu'il le preferast à celuy, que ce grand

orateur Lyfias, auoit mis par eſcrit pour luy : excellemment façonné au ſtile iudiciaire : mais indigne d'un ſi noble criminel. Euſt on ouï de la bouche de Socrates vne voix ſuppliante ? Cette ſuperbe vertu, euſt elle calé, au plus fort de ſa montre ? Et ſa riche & puiffante nature, euſt elle commis à l'art ſa deſenſe : & en ſon plus haut eſſay, renoncé à la verité & naïueté, ornemens de ſon parler, pour ſe parer du fard, des figures, & feintes, d'une oraïſon apprinte ? Il feit treſſagement, & ſelon luy, de ne corrompre vne teneur de vie incorruptible, & vne ſi ſaincte image de l'humaine forme, pour allonger d'un an ſa decrepitude : & trahir l'immortelle memoire de cette fin glorieuſe. Il deuoit ſa vie, non pas à ſoy, mais à l'exemple du monde. Seroit ce pas dommage publique, qu'il l'eueſt acheuee d'une oſtuee & obſcure façon ? Certes vne ſi nonchallante & molle conſideration de ſa mort, meritoit que la poſterité la conſideraſt d'autant plus pour luy. Ce qu'elle fit. Et il n'y a rien en la iuſtice ſi iuſte, que ce que la Fortune ordonna pour ſa recommandation. Car les Atheniens eurent en telle abomination ceux, qui en auoient eſté cauſe, qu'on les fuyoit comme perſonnes excommuniées. On tenoit pollé tout ce, à quoy ils auoient touché : perſonne à l'eſtuee ne lauait avec eux, perſonne ne les ſaluait ni accointoit : ſi qu'en fin ne pouuant plus porter cette haine publique, ils ſe pendirent eux meſmes. Si quelqu'un eſtime, que parmy tant d'autres exemples que j'auois à choiſir pour le ſeruite de mon propos, és dits de Socrates, j'aye mal trié ceſtuy-cy : & qu'il iuge, ce diſcours eſtre eſleué au deſſus des opinions communes : ie l'ay fait à eſciant : car ie iuge autrement. Et tiens que c'eſt un diſcours, en rang, & en naïfueré bien plus

arriere, & plus bas, que les opinions communes. Il represente en vne hardieffe inartificielle & securité enfantine la pure & premiere impressiion & ignorance de nature. Car il est croyable, que nous auons naturellement crainte de la douleur ; mais non de la mort, à cause d'elle. C'est vne partie de nostre estre, non moins essentielle que le viure. A quoy faire, nous en auroit Nature engendré la haine & l'horreur, veu qu'elle luy tient rang de tres-grande vtilité, pour nourrir la succession & vicissitude de ses ouurages ? Et qu'en cette republique vniuerselle, elle sert plus de naissance & d'augmentation, que de perte ou ruyne :

*sic rerum summa nouatur :
mille animas vna necata dedit.*

La deffaillance d'une vie, est le passage à mille autres vies. Nature a empreint aux bestes, le soing d'elles & de leur conseruation. Elles vont iusques-là, de craindre leur empirement : de se heurter & blesser : que nous les encheuestrions & battions, accidents subiects à leur sens & experience. Mais que nous les tuions, elles ne le peuuent craindre, ny n'ont la faculté d'imaginer & conclurre la mort. Si dit-on encore. qu'on les void, non seulement la souffrir gayement : la plus-part des cheuàux hannissent en mourant, les cygnes la chantent : mais de plus, la rechercher à leur besoing ; comme portent plusieurs exemples des elephans. Outre ce, la façon d'argumenter, de laquelle se sert icy Socrates, est-elle pas admirable esgallement, en simplicité & en vehemence ? Vrayment il est bien plus aisé, de parler comme Aristote, & viure comme Cæsar, qu'il n'est aisé de parler & viure comme Socrates. Là, loge l'extreme

degré de perfection & de difficulté : l'art n'y peut joindre. Or nos facultez ne sont pas ainsi dressées. Nous ne les essayons, ny ne les cognoissons : nous nous inuestissons de celles d'autrui, & laissons chômer les nostres. Comme quelqu'un pourroit dire de moy : que j'ay seulement fait icy un amas de fleurs estrangeres, n'y ayant fourny du mien, que le filet à les lier. Certes j'ay donné à l'opinion publique, que ces parements empruntez m'accompaignent : mais ie n'entends pas qu'ils me courent, & qu'ils me cachent : c'est le rebours de mon dessein. Qui ne veut faire montre que du mien & de ce qui est mien par nature. Et si ie m'en fusse creu, à tout hazard, j'eusse parlé tout fin seul. Je m'en charge de plus fort, tous les iours, outre ma proposition & ma forme premiere, sur la fantasie du siecle : & par oisiveté. S'il me messied à moy, comme ie le croy, n'importe : il peut estre utile à quelque autre. Tel allegue Platon & Homere, qui ne les vid onques : & moy, ay prins des lieux assez, ailleurs qu'en leur source. Sans peine & sans suffisance, ayant mille volumes de liures, autour de moy, en ce lieu où j'escriis, j'emprunteray presentement s'il me plaist, d'une douzaine de tels rauaudeurs, gens que ie ne fueillette guere, dequoy esmailler le traité de la Physionomie. Il ne faut que l'epitre liminaire d'un Allemand pour me farcir d'allegations : & nous allons quester par là une friande gloire, à piper le sot monde. Ces pastissages de lieux communs, dequoy tant de gens mesnagent leur estude, ne seruent guere qu'à subiects communs : & seruent à nous montrer, non à nous conduire : ridicule fruit de la science, que Socrates exagite si plaisamment contre Euthydemus. J'ay veu faire des liures de choses, ny iamais estudiée ny

entenduës : l'auteur commettant à diuers de ses amis sçauants, la recherche de cette-cy, & de cette autre matiere, à le bastir : se contentant pour sa part, d'en auoir proietté le dessein, & lié par son industrie, ce fagot de prouisions incogneuës : au moins est sien l'ancre, & le papier. Cela, c'est acheter, ou emprunter vn liure, non pas le faire. C'est apprendre aux hommes, non qu'on sçait faire vn liure, mais, ce dequoy ils pouuoient estre en doute, qu'on ne le sçait pas faire. Vn president se ventoit où i'estois, d'auoir amoncelé deux cens tant de lieux estrangers, en vn sien arrest presidential. En le prefchant, il effaçoit la gloire qu'on luy en donnoit. Puffillanime & absurde venterie à mon gré, pour vn tel subiect & telle personne. Je fais le contraire : & parmy tant d'emprunts, suis bien aise d'en pouuoir desrober quelqu'un : le desguisant & difformant à nouueau seruice. Au hazard, que ie laisse dire, que c'est par faute d'auoir entendu son naturel vsage, ie luy donne quelque particuliere adresse de ma main, à ce qu'il en soit d'autant moins purement estranger. Ceux-cy mettent leurs larrecins en parade & en conte. Aussi ont-ils plus de credit aux loix que moy. Nous autres naturalistes, estimons, qu'il y aye grande & incomparable preference, de l'honneur de l'inuention, à l'honneur de l'allegation. Si i'eusse voulu parler par science, i'eusse parlé plustost. I'eusse escrit du temps plus voisin de mes estudes, que i'auois plus d'esprit & de memoire. Et me fusse plus fié à la vigueur de cet aage là, qu'à cettuy-cy, si i'eusse voulu faire mestier d'escire. Et quoy, si cette faueur gratieuse, que la Fortune m'a n'aguere offerte par l'entremise de cet ouurage, m'eust peu rencontrer en telle faison au lieu de celle-cy; où

elle est également desirable à posséder, & prête à perdre? Deux de mes cognoissans, grands hommes en cette faculté, ont perdu par moitié, à mon aduis, d'auroir refusé de se mettre au iour, à quarante ans, pour attendre les soixante. La maturité a ses deffaux, comme la verdeur, & pires. Et autant est la vieillesse incommode à cette nature de besongne, qu'à toute autre. Quiconque met sa decrepitude sous la presse, fait folie, s'il espere en espreindre des humeurs, qui ne sentent le disgratié, le refuseur & l'assoupy. Nostre esprit se constipe & s'espeffit en vieillissant. Je dis pompeusement & opulemment l'ignorance, & dis la science maigrement & piteusement. Accessoirement cette-cy, & accidentalement : celle-là expressément, & principalement. Et ne traicte à point nommé de rien, que du rien : ny d'aucune science, que de celle de l'inscience. J'ay choisi le temps, où ma vie, que j'ay à peindre, ie l'ay toute deuant moy : ce qui en reste, tient plus de la mort. Et de ma mort seulement, si ie la rencontrois babillarde, comme font d'autres, donrois-je encores volontiers aduis au peuple, en deslogeant. Socrates a esté vn exemplaire parfait en toutes grandes qualitez. J'ay despit, qu'il eust rencontré vn corps si disgratié, comme ils disent, & si disconuenable à la beauté de son ame. Luy si amoureux & si affolé de la beauté. Nature luy fit iniustice. Il n'est rien plus vray-semblable, que la conformité & relation du corps à l'esprit. *Ipsi animi, magni refert, quali in corpore locati sint : multa enim è corpore existunt, quæ acuant mentem : multa, quæ obtundant.* Certuy-cy parle d'une laideur desaturée, & difformité de membres : mais nous appellons laideur aussi, une mesauenance au premier regard, qui loge

principalement au visage : & nous desgoute par le teint, vne tache, vne rude contenance, par quelque cause souuent inexplicable, en des membres pourtant bien ordonnez & entiers. La laideur, qui reuestoit vne ame tres-belle en la Boittie, estoit de ce predicament. Cette laideur superficielle, qui est toutesfois la plus imperieuse, est de moindre preiudice à l'estat de l'esprit : & a peu de certitude en l'opinion des hommes. L'autre, qui d'un plus propre nom, s'appelle difformité plus substantielle, porte plus volontiers coup iusques au dedans. Non pas tout foulier de cuir bien lissé, mais tout foulier bien formé, montre l'interieure forme du pied. Comme Socrates disoit de la sienne, qu'elle en accusoit iustement, autant en son ame, s'il ne l'eust corrigée par institution. Mais en le disant, ie tiens qu'il se mocquoit, suiuant son vsage : & iamais ame si excellente, ne se fit elle-mesme. Ie ne puis dire assez souuent, combien i'estime la beauté, qualité puissante & aduantageuse. Il l'appelloit, vne courte tyrannie : & Platon, le priuilege de nature. Nous n'en auons point qui la surpasse en credit. Elle tient le premier rang au commerce des hommes. Elle se presente au deuant : seduit & preoccupe nostre iugement, avec grande autorité & merueilleuse impression. Phryne perdoit sa cause, entre les mains d'un excellent aduocat, si, ouurant sa robbe, elle n'eust corrompu ses iuges, par l'esclat de sa beauté. Et ie trouue, que Cyrus, Alexandre, Cæsar, ces trois maistres du monde, ne l'ont pas oubliée à faire leurs grands affaires. Non a pas le premier Scipion. Vn mesme mot embrasse en Grec le bel & le bon. Et le S. Esprit appelle souuent bons, ceux qu'il veut dire beaux. Ie maintiendroy volontiers le rang des biens, selon

que portoit la chanſon, que Platon dit auoir eſté triuiale, prinſe de quelque ancien poëte : La ſanté, la beauté, la ri cheſſe. Ariſtote dit, appartenir aux beaux, le droit de commander : & quand il en eſt, de qui la beauté approche celle des images des Dieux, que la veneration leur eſt pareillement deuë. A celuy qui luy demandoit, pourquoy plus long temps, & plus ſouuent, on hantoit les beaux : Cette demande, feit-il, n'appartient à eſtre faiçte, que par vn aueugle. La plus-part & les plus grands philoſophes, payerent leur eſcholage, & acquirent la ſageſſe, par l'entremiſe & faueur de leur beauté. Non ſeulement aux hommes qui me ſeruent, mais aux beſtes auſſi, ie la conſidere à deux doigts pres de la bonté. Si me ſemble-il, que ce traiçt & façon de viſage, & ces lineaments, par leſquels on argumente aucunes complexions internes, & nos fortunes à venir, eſt choſe qui ne loge pas bien directement & ſimplement, ſoubs le chapitre de beauté & de laideur. Non plus que toute bonne odeur, & ſerenité d'air, n'en promet pas la ſanté : ny toute eſpeſſeur & puanteur, l'infeçtion, en temps peſtilent. Ceux qui accuſent les dames, de contre-dire leur beauté par leurs mœurs, ne rencontrent pas touſiours. Car en vne face qui ne ſera pas trop bien compoſée, il peut loger quelque air de probité & de fiance. Comme au rebours, i'ay leu par fois entre deux beaux yeux, des menaſſes d'une nature maligne & dangereuſe. Il y a des phyſionomies fauorables : & en vne preſſe d'ennemis victorieux, vous choiſirez incontinent parmy des hommes incogneus, l'un pluſtoſt que l'autre, à qui vous rendre & fier voſtre vie : & non proprement par la conſideration de la beauté. C'eſt vne foible garantie que la mine, toutesſois elle a

quelque consideration. Et si i'auois à les foyter, ce seroit plus rudement, les meschans qui dementent & trahissent les promesses que Nature leur auoit plantées au front. Je punirois plus aigrement la malice, en vne apparence debonnaire. Il semble qu'il y ait aucuns visages heureux, d'autres malencontreux. Et crois, qu'il y a quelque art, à distinguer les visages debonnaires des niais, les seueres des rudes, les malicieux des chagrins, les desdaineux des melancholiques, & telles autres qualitez voisines. Il y a des beautez, non fieres seulement, mais aigres : il y en a d'autres douces, & encores au delà, fades. D'en prognostiquer les auantures futures, ce sont matieres que ie laisse indecises. I'ay pris, comme i'ay dict ailleurs, bien simplement & cruëment, pour mon regard, ce precepte ancien : Que nous ne sçaurions faillir à suiure Nature : que le souuerain precepte, c'est de se conformer à elle. Je n'ay pas corrigé comme Socrates, par la force de la raison, mes complexions naturelles : & n'ay aucunement troublé par art, mon inclination. Je me laisse aller, comme ie suis venu. Je ne combats rien. Mes deux maistresses pieces viennent de leur grace en paix & bon accord : mais le lait de ma nourrice a esté, Dieu mercy, mediocrement sain & temperé. Diray-ie cecy en passant : que ie voy tenir en plus de prix qu'elle ne vaut, qui est seule quasi en vſage entre nous, certaine image de preud'homme scholastique, serue des preceptes, contraincte sous l'esperance & la crainte ? Je l'aime telle que loix & religions, non facent, mais parfacent, & autorisent : qui se sent de quoy se soustenir sans aide : née en nous de ses propres racines, par la semence de la raison vniuerselle, empreinte en tout homme non

defnaturé. Cette raifon, qui redrefle Socrates de fon vicieux ply, le rend obeiffant aux hommes & aux Dieux, qui commandent en fa ville : courageux en la mort, non parce que fon ame eft immortelle, mais parce qu'il eft mortel. Ruineufe inftruction à toute police, & bien plus dommageable qu'ingenieufe & fubtile, qui perfuade aux peuples, la religieufe creance fuffire feule, & fans les mœurs, à contenter la diuine iuftice. L'vſage nous faiſt veoir, vne diſtinction enorme, entre la deuotion & la conſcience. L'ay vne apparence fauorable, & en forme & en interpretation.

Quid dixi habere me? Imò habui Chreme :

Heu tantùm attriti corporis offa vides.

Et qui faiſt vne contraire montre à celle de Socrates. Il m'eſt ſouuent aduenü, que ſur le ſimple credit de ma preſence, & de mon air, des perſonnes qui n'auoient aucune cognoiſſance de moy, s'y ſont grandement fiées, ſoit pour leurs propres affaires, ſoit pour les miennes. Et en ay tiré és païs eſtrangers des faueurs ſingulieres & rares. Mais ces deux experiences, valent à l'auanture, que ie les recite particulièrement. Vn quidam delibera de ſurprendre ma maiſon & moy. Son art fut, d'arriuer ſeul à ma porte, & d'en preſſer vn peu inſtamment l'entrée. Ie le cognoiſſois de nom, & auois occaſion de me fier de luy, comme de mon voiſin & aucunement mon allié. Ie luy fis ouurir comme ie fais à chacun. Le voicy tout effroyé, ſon cheual hors d'haleine, fort haraſſé. Il m'entretint de cette fable : Qu'il venoit d'eſtre rencontré à vne demie lieuë de là, par vn ſien ennemy, lequel ie cognoiſſois auſſi, & auois ouy

parler de leur querelle : que cet ennemy luy auoit merueilleusement chauffé les esperons : & qu'ayant esté surpris en desfarroy & plus foible en nombre, il s'estoit ietté à ma porte à fauueté. Qu'il estoit en grand peine de ses gens, lesquels il disoit tenir pour morts ou prins. L'essayay tout naïfvement de le conforter, asseurer, & refreschir. Tantoist apres, voila quatre ou cinq de ses foldats, qui se presentent en mesme contenance, & effroy, pour entrer : & puis d'autres, & d'autres encores apres, bien equippez, & bien armez : iusques à vingt cinq ou trante, feignants auoir leur ennemy aux talons. Ce mystere commençoit à taster mon soupçon. Je n'ignorois pas en quel siecle ie viuois, combien ma maison pouuoit estre enuiée, & auois plusieurs exemples d'autres de ma cognoissance, à qui il estoit mes-aduenue de mesme. Tant y a, que trouuant qu'il n'y auoit point d'acquest d'auoir commencé à faire plaisir, si ie n'acheuois, & ne pouuant me deffaire sans tout rompre; ie me laissay aller au party le plus naturel & le plus simple, comme ie fais tousiours : commendant qu'ils entraissent. Aussi à la verité, ie suis peu deffiant & soupçonneux de ma nature. Je panche volontiers vers l'excuse, & l'interpretation plus douce. Je prens les hommes selon le commun ordre, & ne croy pas ces inclinations peruerfes & desnaturées, si ie n'y suis forcé par grand tesmoignage; non plus que les monstres & miracles. Et suis homme en outre, qui me commets volontiers à la Fortune, & me laisse aller à corps perdu, entre ses bras. Dequoy iusques à cette heure i'ay eu plus d'occasion de me louer, que de me plaindre. Et l'ay trouuée & plus auisée, & plus amie de mes affaires, que ie ne suis. Il y a quelques actions en ma vie, desquelles on

peut iustement nommer la conduite difficile; ou, qui voudra, prudente. De celles-là mesmes, posez, que la tierce partie soit du mien, certes les deux tierces sont richement à elle. Nous faillons, ce me semble, en ce que nous ne nous fions pas assez au ciel de nous. Et pretendons plus de nostre conduite, qu'il ne nous appartient. Pourtant fouruoyent si souuent nos desseins. Il est enuieux de l'estenduë, que nous attribuons aux droicts de l'humaine prudence, au preiudice des siens. Et nous les racourcit d'autant plus, que nous les amplifions. Ceux-cy se tindrent à cheual, en ma cour : le chef avec moy dans ma sale, qui n'auoit voulu qu'on establast son cheual, disant auoir à se retirer incontinent qu'il auroit eu nouuelles de ses hommes. Il se veid maistre de son entreprinse : & n'y restoit sur ce point, que l'exécution. Souuent depuis il a dict, car il ne craignoit pas de faire ce conte, que mon visage, & ma franchise, luy auoient arraché la trahison des poings. Il remonte à cheual, ses gens ayants continuellement les yeux sur luy, pour voir quel signe il leur donneroit : bien estonnez de le voir sortir & abandonner son aduantage. Vne autre fois, me fiant à ie ne sçay quelle treue, qui venoit d'estre publiée en nos armées, ie m'acheminay à vn voyage, par pais estrangelement chatoüilleux. Ie ne fus pas si tost esuenté, que voila trois ou quatre caualcades de diuers lieux pour m'attraper. L'une me ioignit à la troisieme iournée : où ie fus chargé par quinze ou vingt Gentils-hommes masquez, suiuis d'une ondée d'argoulets. Me voila pris & rendu, retiré dans l'espais d'une forest voisine, desmonté, deualisé, mes cofres fouillez, ma boite prise, cheuaux & esquipage dispersé à nouueaux maistres. Nous fumes long temps

à contester dans ce halier, sur le fait de ma rançon : qu'ils me tailloient si haute, qu'il paroïssoit bien que ie ne leur estois guere cogneu. Ils entrerent en grande contestation de ma vie. De vray, il y auoit plusieurs circonstances, qui me menassoyent du danger où i'en estois.

Tunc animis opus, Ænea, tunc pectore firmo.

Ie me maintins tousiours sur le tiltre de ma trefue, à leur quitter seulement le gain qu'ils auoient fait de ma despouille, qui n'estoit pas à mespriser, sans promesse d'autre rançon. Apres deux ou trois heures, que nous eufmes esté là, & qu'ils m'eurent fait monter sur vn cheual, qui n'auoit garde de leur eschapper, & commis ma conduicte particuliere à quinze ou vingt harquebusiers, & dispersé mes gens à d'autres, ayant ordonné qu'on nous menast prisonniers, diuerses routes, & moy desia acheminé à deux ou trois harquebufades de là,

Iam prece Pollucis iam Castoris implorata :

voicy vne soudaine & tres-inopinée mutation qui leur print. Ie vis reuenir à moy le chef, avec paroles plus douces : se mettant en peine de rechercher en la troupe mes hardes escartées, & me les faisant rendre, selon qu'il s'en pouuoit recouurer, iusques à ma boite. Le meilleur present qu'ils me firent, ce fut en fin ma liberté : le reste ne me touchoit gueres en ce temps-là. La vraye cause d'vn changement si nouueau, & de ce rauissement, sans aucune impulsion apparente, & d'vn repentir si miraculeux, en tel temps, en vne entreprinse pourpensée & delibe-

rée, & deuenue iuste par l'vſage, (car d'arriué ie leur confeſſay ouuertement le party duquel i'eſtois, & le chemin que ie tenois) certes ie ne ſçay pas bien encores quelle elle eſt. Le plus apparent qui ſe demaſqua, & me fit cognoiſtre ſon nom, me rediſt lors pluſieurs fois, que ie deuoy cette deliurance à mon viſage, liberté, & fermeté de mes parolles, qui me rendoient indigne d'vne telle meſ-aduenture, me demanda aſſurance d'vne pareille. Il eſt poſſible, que la bonté diuine ſe voulut ſeruir de ce vain instrument pour ma conſeruation. Elle me deſſendit encore lendemain d'autres pires embuſches, deſquelles ceux-cy meſme m'auoient aduerty. Le dernier eſt encore en pieds, pour en faire le conté : le premier fut tué il n'y a pas long temps. Si mon viſage ne reſpondoit pour moy, ſi on ne liſoit en mes yeux, & en ma voix, la ſimplicité de mon intention, ie n'euffe pas duré ſans querelle, & ſans offence, ſi long temps : avec cette indiſcrette liberté, de dire à tort & à droict, ce qui me vient en fantaſie, & iuger temerairement des choſes. Cette façon peut paroître avec raiſon inciuite, & mal accommodée à noſtre vſage : mais outrageuſe & malicieuſe, ie n'ay veu perſonne qui l'en ait iugée : ny qui ſe ſoit piqué de ma liberté, s'il l'a receuë de ma bouche. Les paroles redites, ont comme autre ſon, autre ſens. Auſſi ne hay-ie perſonne. Et ſuis ſi laſche à offencer, que pour le ſeruice de la raiſon meſme, ie ne le puis faire. Et lors que l'occafion m'a conuié aux condamnations criminelles, j'ay pluſtoſt manqué à la iuſtice. *Vt magis peccari nolim, quàm ſatis animi, ad vindicanda peccata habeam.* On reprochoit, dit-on, à Ariſtote, d'auoir eſté trop miſericordieux enuers vn meſchant homme : j'ay eſté de

tesfois il s'est trouué des hommes, & notamment vn en Delphes, qui recognoissoit des marques de difference entre les œufs, si qu'il n'en prenoit iamais l'un pour l'autre. Et y^e ayant plusieurs poules, fçauoit iuger de laquelle estoit l'œuf. La dissimilitude s'ingere d'elle-mesme en nos ouurages, nul art peut arriuer à la similitude. Ny Perrozet ny autre, ne peut si soigneusement polir & blanchir l'enuers de ses cartes, qu'aucuns ioueurs ne les distinguent, à les voir seulement couler par les mains d'un autre. La ressemblance ne fait pas tant, vn, comme la difference fait, autre. Nature s'est obligée à ne rien faire autre, qui ne fust dissemblable. Pourtant, l'opinion de celui-là ne me plaist guere, qui pensoit par la multitude des loix, brider l'autorité des iuges, en leur taillant leurs morceaux. Il ne sentoit point, qu'il y a autant de liberté & d'estenduë à l'interpretation des loix, qu'à leur façon. Et ceux-là se moquent, qui pensent appetisser nos debats, & les arrester, en nous r'appellant à l'expressé parole de la Bible. D'autant que nostre esprit ne trouue pas le champ moins spacieux, à contre-roller le sens d'autrui, qu'à représenter le sien : & comme s'il y auoit moins d'animosité & d'afpreté à gloser qu'à inuenter. Nous voyons, combien il se trompoit. Car nous auons en France, plus de loix que tout le reste du monde ensemble ; & plus qu'il n'en faudroit à regler tous les mondes d'Epicurus : *Vt olim flagitijs, sic nunc legibus laboramus* : & si auons tant laissé à opiner & decider à nos iuges, qu'il ne fut iamais liberté si puissante & si licencieuse. Qu'ont gagné nos legislateurs à choisir cent mille especes & faits particuliers, & y attacher cent mille loix ? Ce nombre n'a aucune

proportion, avec l'infinie diuersité des actions humaines. La multiplication de nos inuentions, n'arriuera pas à la variation des exemples. Adiouftez y en cent fois autant : il n'aduiendra pas pourtant, que des euenemens à venir, il s'en trouue aucun, qui en tout ce grand nombre de milliers d'euenemens choisis & enregistrez, en rencontre vn, auquel il se puisse ioindre & apparier, si exactement, qu'il n'y reste quelque circonstance & diuersité, qui requiere diuerse consideration de iugement. Il y a peu de relation de nos actions, qui sont en perpetuelle mutation, avec les loix fixes & immobiles. Les plus desirables, ce sont les plus rares, plus simples, & generales. Et encore crois-ie, qu'il vaudroit mieux n'en auoir point du tout, que de les auoir en tel nombre que nous auons. Nature les donne tousiours plus heureuses, que ne sont celles que nous nous donnons. Tesmoing la peinture de l'aage doré des poëtes : & l'estat où nous voyons viure les nations, qui n'en ont point d'autres. En voila, qui pour tous iuges, employent en leurs causes, le premier passant, qui voyage le long de leurs montaignes. Et ces autres, eslisent le iour du marché, quelqu'un d'entr'eux, qui sur le champ decide tous leurs proces. Quel danger y auroit-il, que les plus sages voidassent ainsi les nostres, selon les occurrences, & à l'œil ; sans obligation d'exemple, & de consequence ? A chaque pied son foulier. Le Roy Ferdinand, enuoyant des colonies aux Indes, prouueut sagement qu'on n'y menast aucuns escholiers de la iurispudence : de crainte, que les proces ne peuplassent en ce nouueau monde. Comme estant science de sa nature, generatrice d'altercation & diuision, iugeant avec Platon, que c'est vne mau-

uaife prouision de païs, que iurifconsultes, & medecins. Pourquoy est-ce, que nostre langage commun, si aisé à tout autre vsage, deuient obscur & non intelligible, en contract & testament : & que celuy qui s'exprime si clairement, quoy qu'il die & escriue, ne trouue en cela, aucune maniere de se declarer, qui ne tombe en doute & contradiction ? Si ce n'est, que les Princes de cet art s'appliquans d'une peculiere attention, à trier des mots solemnes, & former des clausules artistes, ont tant poisé chascun syllabe, espluché si primement chascun espee de cousture, que les voila enfraquez & embrouillez en l'infinité des figures, & si menuës paricions : qu'elles ne peuuent plus tomber sous aucun reglement & prescription, ny aucune certaine intelligence. *Confusum est quidquid vsque in puluerem sectum est.* Qui a veu des enfans, essayans de renger à certain nombre, une masse d'argent vif : plus ils le pressent & pestriuent, & s'estudient à le contraindre à leur loy, plus ils irritent la liberté de ce genereux metal : il fuit à leur art, & se va menuisant & esparpillant, au delà de tout conte. C'est de mesme ; car en subdiuisant ces subtilitez, on apprend aux hommes d'accroistre les doubtes : on nous met en train, d'estendre & diuersifier les difficultez : on les allonge, on les disperse. En semant les questions & les retailant, on fait fructifier & foisonner le monde, en incertitude & en querelle. Comme la terre se rend fertile, plus elle est esmiée & profondement remuée. *Difficultatem facit doctrina.* Nous doutions sur Vlpian, & redoutions encore sur Bartolus & Baldus. Il falloit effacer la trace de cette diuersité innombrable d'opinions : non point s'en parer, & en entester la posterité. Je ne sçay qu'en dire : mais il se sent

par experience, que tant d'interpretations dissipent la verité, & la rompent. Aristote a escrit pour estre entendu; s'il ne l'a peu, moins le fera vn moins habille: & vn tiers, que celuy qui traite sa propre imagination. Nous ouurons la matiere, & l'espan-dons en la detrempant. D'un subiect nous en fai-sons mille: & retombons en multipliant & sub-
diuisant, à l'infinité des atomes d'Epicurus. Iamais deux hommes ne iugerent pareillement de mesme chose. Et est impossible de voir deux opinions semblables exactement: non seulement en diuers hommes, mais en mesme homme, à diuerfes heures. Ordinairement ie trouue à doubter, en ce que le commentaire n'a daigné toucher. Je bronche plus volontiers en pais plat: comme certains cheuaux, que ie cognois, qui choppent plus souuent en che-
min vny. Qui ne diroit que les gloses augmentent les doubtes & l'ignorance, puis qu'il ne se voit aucun liure, soit humain, soit diuin, sur qui le monde s'embefongne, duquel l'interpretation face tarir la difficulté? Le centiesme commentaire, le renuoye à son suiuant, plus espineux, & plus sca-
breux, que le premier ne l'auoit trouué. Quand est-il conuenu entre nous, ce liure en a assez, il n'y a meshuy plus que dire? Cecy se voit mieux en la chicane. On donne autorité de loy à infinis do-
cteurs, infinis arrests, & à autant d'interpretations. Trouuons nous pourtant quelque fin au besoin d'interpreter? s'y voit-il quelque progresz & aduan-
cement vers la tranquillité? nous faut-il moins d'aduocats & de iuges, que lors que cette masse de droict, estoit encore en sa premiere enfance? Au contraire, nous obscurcissions & enseuelissons l'in-
telligence. Nous ne la descouurons plus, qu'à la

mercy de tant de clostures & barrieres. Les hommes mescognoissent la maladie naturelle de leur esprit. Il ne fait que fureter & quester ; & va sans cesse, tournoyant, bastissant, & s'empesrant, en sa besongne : comme nos vers à foye, & s'y estouffe.

Mus in pice. Il pense remarquer de loing, ie ne sçay quelle apparence de clarté & verité imaginaire : mais pendant qu'il y court, tant de difficultez luy trauerent la voye, d'empeschemens & de nouuelles questes, qu'elles l'esgarent & l'enyurent. Non guere autrement, qu'il aduint aux chiens d'Esope, lesquels descourans quelque apparence de corps mort flotter en mer, & ne le pouuans approcher, entreprindrent de boire cette eau, d'asseicher le passage, & s'y estoufferent. A quoy se rencontre, ce qu'un Crates disoit des escrits de Heraclitus, qu'ils auoient besoin d'un lecteur bon nageur, afin que la profondeur & pois de sa doctrine, ne l'engloutist & suffoquast. Ce n'est rien que foiblesse particuliere, qui nous fait contenter de ce que d'autres, ou que nous-mesmes auons trouué en cette chasse de cognoissance : vn plus habile ne s'en contentera pas. Il y a tousiours place pour vn suiuant, ouy & pour nous mesmes, & route par ailleurs. Il n'y a point de fin en nos inquisitions. Nostre fin est en l'autre monde. C'est signe de racourcissement d'esprit, quand il se contente : ou signe de lasseté. Nul esprit genereux, ne s'arreste en soy. Il pretend tousiours, & va outre ses forces. Il a des ellans au delà de ses effects. S'il ne s'auance, & ne se presse, & ne s'accule, & ne se choque & tourneure, il n'est vif qu'à demy. Ses poursuites sont sans terme, & sans forme. Son aliment, c'est admiration, chasse, ambiguité. Ce que declaroit assez Apollo, parlant tou-

fiours à nous doublement, obscurément & obliquement : ne nous repaissant pas, mais nous amusant & embesongnant. C'est vn mouuement irregulier, perpetuel, sans patron & sans but. Ses inuentions s'eschauffent, se suiuent, & s'entreproduisent l'une l'autre.

*Ainsi voit-on en vn ruisseau coulant,
Sans fin l'une eau, apres l'autre roulant,
Et tout de rang, d'un eternal conduit;
L'une suit l'autre, & l'une l'autre fuit.
Par cette-cy, celle-là est pousée,
Et cette-cy, par l'autre est deuancée :
Toufiours l'eau va dans l'eau, & toufiours est ce
Mefme ruisseau, & toufiours eau diuerse.*

Il y a plus affaire à interpreter les interpretations, qu'à interpreter les choses : & plus de liures sur les liures, que sur autre subiect. Nous ne faisons que nous entreglofer. Tout fourmille de commentaires : d'auteurs, il en est grand cherté. Le principal & plus fameux sçauoir de nos siecles, est-ce pas sçauoir entendre les sçauants ? Est-ce pas la fin commune & derniere de tous estudes ? Nos opinions s'entent les vnes sur les autres. La premiere sert de tige à la seconde : la seconde à la tierce. Nous eschellons ainsi de degré en degré. Et aduiuent de là, que le plus haut monté, a souuent plus d'honneur, que de merite. Car il n'est monté que d'un grain, sur les espauls du penultime. Combien souuent, & fortement à l'auanture, ay-ie estendu mon liure à parler de soy ? Sottement, quand ce ne seroit que pour cette raison : Qu'il me deuoit souuenir, de ce que ie dy des autres, qui en font de mesmes. Que ces œillades si frequentes à leurs ouurages, tesmoignent que le

cœur leur frissonne de son amour, & les rudoyements mesmes, desdaigneux, dequoy ils le battent, que ce ne sont que mignardises, & affeteries, d'une faueur maternelle. Suiuant Aristote, à qui, & se priser & se mespriser, naissent souuent de pareil air d'arrogance. Car mon excuse : Que ie doÿ auoir en cela plus de liberté que les autres, d'autant qu'à poinct nommé, i'escry de moy, & de mes escrits, comme de mes autres actions : que mon theme se renuerse en soy : ie ne sçay, si chacun la prendra. L'ay veu en Allemagne, que Luther a laissé autant de diuisions & d'altercations, sur le doubte de ses opinions, & plus, qu'il n'en esmeut sur les escritures saintes. Nostre contestation est verbale. Je demande que c'est que nature, volupté, cercle, & substitution. La question est de parolles, & se paye de mesme. Vne pierre c'est vn corps : mais qui presseroit, Et corps qu'est-ce? substance : & substance quoy? ainsi de suite : acculeroit en fin le respondant au bout de son Calepin. On eschange vn mot pour vn autre mot, & souuent plus incogneu. Je sçay mieux que c'est qu'homme, que ie ne sçay que c'est animal, ou mortel, ou raisonnable. Pour satisfaire à vn doute, ils m'en donnent trois. C'est la teste d'Hydra. Socrates demandoit à Memnon, que c'estoit que vertu : Il y a, dist Memnon, vertu d'homme & de femme, de magistrat & d'homme priué, d'enfant & de vieillart. Voicy qui va bien, s'escria Socrates : nous estions en cherche d'une vertu, tu nous en apporte vn exaim. Nous communiquons vne question, on nous en redonne vne ruchée. Comme nul euenement & nulle forme, ressemble entierement à vne autre, aussi ne differe l'une de l'autre entierement. Ingenieux mélange de Nature.

Si nos faces n'estoient semblables, on ne sçauroit discerner l'homme de la beste : si elles n'estoient diffeubles, on ne sçauroit discerner l'homme de l'homme. Toutes choses se tiennent par quelque similitude. Tout exemple cloche. Et la relation qui se tire de l'experience, est tousiours defaillante & imparfaicte. On ioint toutesfois les comparaisons par quelque bout. Ainsi seruent les loix ; & s'affortissent ainsin, à chacun de nos affaires, par quelque interpretation destournée, contrainte & biaise. Puisque les loix ethiques, qui regardent le-devoir particulier de chacun en foy, sont si difficiles à dresser ; comme nous voyons qu'elles sont : ce n'est pas merueille, si celles qui gouernent tant de particuliers, le sont d'auantage. Considérez la forme de cette iustice qui nous regit ; c'est vn vray tesmoignage de l'humaine imbecillité : tant il y a de contradiction & d'erreur. Ce que nous trouuons faueur & rigueur en la iustice : & y en trouuons tant, que ie ne sçay si l'entre-deux s'y trouue si souuent : ce sont parties maladiues, & membres iniustes, du corps mesmes & essence de la iustice. Des païsans, viennent de m'aduertir en haste, qu'ils ont laissé presentement en vne forest qui est à moy, vn homme meurtry de cent coups, qui respire encores, & qui leur a demandé de l'eau par pitié, & du secours pour le souleuer. Disent qu'ils n'ont osé l'approcher, & s'en sont fuis, de peur que les gens de la iustice ne les y attrapassent : & comme il se fait de ceux qu'on rencontre pres d'un homme tué, ils n'eussent à rendre conte de cet accident, à leur totale ruine : n'ayans ny suffisance, ny argent, pour defendre leur innocence. Que leur eussé-je dit ? Il est certain, que cet office d'humanité, les eust mis

en peine. Combien auons nous descouuert d'innocens auoir esté punis : ie dis sans la coulpe des iuges ; & combien en y a-il eu, que nous n'auons pas descouuert ? Cecy est aduenü de mon temps. Certains sont condamnez à la mort pour vn homicide ; l'arrest sinon prononcé, au moins conclud & arresté. Sur ce point, les iuges sont aduertis par les officiers d'une cour subalterne, voisine, qu'ils tiennent quelques prisonniers, lesquels aduoient disertement cet homicide, & apportent à tout ce faict, vne lumiere indubitable. On delibere, si pourtant on doit interrompre & differer l'execution de l'arrest donné contre les premiers. On considere la nouuelleté de l'exemple, & sa consequence, pour accrocher les iugemens : Que la condamnation est iuridiquement passée ; les iuges priuez de repentance. Somme, ces pauures diables sont consacrez aux formules de la iustice. Philippus, ou quelque autre, prouueut à vn pareil inconuenient, en cette maniere. Il auoit condamné en grosses amendes, vn homme enuers vn autre, par vn iugement resolu. La verité se descouurant quelque temps apres, il se trouua qu'il auoit iniquement iugé. D'un costé estoit la raison de la cause : de l'autre costé la raison des formes iudiciaires. Il satisfit aucunement à toutes les deux, laissant en son estat la sentence, & recompensant de sa bourse, l'interest du condamné. Mais il auoit affaire à vn accident reparable ; les miens furent pendus irreparablement. Combien ay-ie veu de condamnations, plus crimineuses que le crime ? Tout cecy me faict souuenir de ces anciennes opinions : Qu'il est force de faire tort en detail, qui veut faire droit en gros ; & iniustice en petites choses, qui veut venir à chef de faire iustice es grandes : Que l'humaine iu-

iustice est formée au modèle de la medecine, selon
 laquelle, tout ce qui est vtile est aussi iuste & hon-
 neste. Et de ce que tiennent les Stoïciens, que
 Nature mesme procede contre iustice, en la plus-part
 de ses ourrages. Et de ce que tiennent les Cyre-
 naiques, qu'il n'y a rien iuste de soy : que les cou-
 stumes & loix forment la iustice. Et les Theodorien-
 s, qui trouuent iuste au sage le larcin, le sacrilege,
 toute sorte de paillardise, s'il cognoist qu'elle luy
 soit profitable. Il n'y a remede. l'en suis là, comme
 Alcibiades, que ie ne me représenteray iamais, que
 ie puisse, à homme qui decide de ma teste : où mon
 honneur, & ma vie, depende de l'industrie & soing
 de mon procureur, plus que de mon innocence. Je
 me hazarderois à vne telle iustice, qui me recogneust
 du bien fait, comme du mal fait : où i'eusse autant
 à esperer, qu'à craindre. L'indemnité n'est pas mon-
 noye suffisante, à vn homme qui fait mieux, que de
 ne faillir point. Nostre iustice ne nous presente que
 l'une de ses mains; & encore la gauche. Quiconque
 il soit, il en fort avecques pertes. En la Chine,
 duquel royaume la police & les arts, sans commerce
 & cognoissance des nostres, surpassent nos exemples,
 en plusieurs parties d'excellence : & duquel l'histoire
 m'apprend, combien le monde est plus ample & plus
 diuers, que ny les anciens, ny nous, ne penetrons :
 les officiers deputez par le Prince, pour visiter l'estat
 de ses prouinces, comme ils punissent ceux, qui
 maluersent en leur charge, ils remunerent aussi de
 pure liberalité, ceux qui s'y sont bien portez outre
 la commune sorte, & outre la necessité de leur
 deuoir : on s'y presente, non pour se garantir seule-
 ment, mais pour y acquerir : ~~ny simplement pour estre~~
 payé, mais pour y estre estrené. Nul iuge n'a encore,

Dieu mercy, parlé à moy comme iuge, pour quelque cause que ce soit, ou mienne, ou tierce, ou criminelle, ou ciuile. Nulle prison m'a receu, non pas seulement pour m'y promener. L'imagination m'en rend la veüe mesme du dehors, desplaisante. Je suis si affady apres la liberté, que qui me deffendroit l'accez de quelque coin des Indes, i'en viuerois aucunement plus mal à mon aise. Et tant que ie trouueray terre, ou air ouuert ailleurs, ie ne croupiray en lieu, où il me faille cacher. Mon Dieu, que mal pourroy-ie souffrir la condition, où ie vois tant de gens, clouez à vn quartier de ce royaume, priez de l'entrée des villes principales, & des courts, & de l'vsage des chemins publics, pour auoir querellé nos loix. Si celles que ie fers, me menassoient seulement le bout du doigt, ie m'en irois incontinent en trouuer d'autres, où que ce fust. Toute ma petite prudence, en ces guerres ciuiles où nous sommes, s'employe à ce, qu'elles n'interrompent ma liberté d'aller & venir. Or les loix se maintiennent en credit, non par ce qu'elles sont iustes, mais par ce qu'elles sont loix. C'est le fondement mystique de leur autorité : elles n'en ont point d'autre. Qui bien leur sert. Elles sont souuent faictes par des fots. Plus souuent par des gens, qui en haine d'equalité ont faute d'equité. Mais tousiours par des hommes, auteurs vains & irrefolus. Il n'est rien si lourdement, & largement fautier, que les loix : ny si ordinairement. Quiconque leur obeit par ce qu'elles sont iustes, ne leur obeyt pas iustement par où il doit. Les nostres Françoises, prestent aucunement la main, par leur desreglement & deformité, au desordre & corruption, qui se voit en leur dispensation, & execution. Le commandement est si trouble, & inconstant, qu'il

excuse aucunement, & la desobeissance, & le vice de l'interpretation, de l'administration, & de l'observation. Quel que soit donc le fruit que nous pouvons avoir de l'experience, à peine servira beaucoup à nostre institution, celle que nous tirons des exemples estrangers, si nous faisons si mal nostre profit, de celle, que nous avons de nous mesme, qui nous est plus familiere : & certes suffisante à nous instruire de ce qu'il nous faut. Je m'estudie plus qu'autre subiect. C'est ma metaphysique, c'est ma physique.

*Qua Deus hanc mundi temperet arte domum,
Qua venit exorians, qua deficit, vnde coactis
Cornibus in plenum mensura luna redit :
Vnde salo superant venti, quid flamine capiet
Eurus, & in nubes vnde perennis aqua :
Sit ventura dies mundi quæ subruat arces,
Quærit quos agitat mundi labor.*

En cette vniuersité, ie me laisse ignoramment & negligemment manier à la loy generale du monde. Je la sçauray assez, quand ie la sentiray. Ma science ne luy peut faire changer de routte. Elle ne se diuersifiera pas pour moy : c'est folie de l'esperer. Et plus grande folie, de s'en mettre en peine : puis qu'elle est necessairement semblable, publique, & commune. La bonté & capacité du gouverneur nous doit à pur & à plein descharger du soing de gouvernement. Les inquisitions & contemplations philosophiques, ne seruent que d'aliment à nostre curiosité. Les philosophes, avec grande raison, nous renuoient aux regles de Nature. Mais elles n'ont que faire de si sublime cognoissance. Ils les falsi-

fient, & nous presentent son visage peint, trop haut en couleur, & trop sophistiqué : d'où naissent tant de diuers pourtraits d'un subiect si vniforme. Comme elle nous aourny de pieds à marcher, aussi a elle de prudence à nous guider en la vie. Prudence non tant ingenieuse, robuste & pompeuse, comme celle de leur inuention : mais à l'aduenant, facile, quiete & salutaire. Et qui fait tresbien ce que l'autre dit : en celuy, qui a l'heur, de scauoir l'employer naïuement & ordonnément : c'est à dire naturellement. Le plus simplement se commettre à Nature, c'est s'y commettre le plus sagement. O que c'est vn doux & mol cheuet, & sain, que l'ignorance & l'incuriosité, à reposer vne teste bien faite. L'aymerois mieux m'entendre bien en moy, qu'en Ciceron. De l'experience que i'ay de moy, ie trouue assez dequoy me faire sage, si i'estoy bon eschohier. Qui remet en sa memoire l'excez de sa cholere passée, & iusques où cette sieure l'emporta, voit la laideur de cette passion, mieux que dans Aristote, & en conçoit vne haine plus iuste. Qui se fouuiet des maux qu'il a couru, de ceux qui l'ont menassé, des legeres occasions qui l'ont remué d'un estat à autre, se prepare par là, aux mutations futures, & à la recognoissance de sa condition. La vie de Cæsar n'a point plus d'exemple, que la nostre pour nous. Et emperiere, & populaire : c'est tousiours vne vie, que tous accidents humains regardent. Escoutons y seulement : nous nous disons, tout ce, dequoy nous auons principalement besoing. Qui se fouuiet de s'estre tant & tant de fois mesconté de son propre iugement : est-il pas vn sot, de n'en entrer pour iamais en desffiance ? Quand ie me trouue conuaincu par la raison d'autrui, d'une

opinion fauce; ie n'apprens pas tant, ce qu'il m'a dit de nouveau, & cette ignorance particuliere: ce feroit peu d'acquies: comme en general i'apprens ma debilité, & la trahison de mon entendement: d'où ie tire la reformation de toute la masse. En toutes mes autres erreurs, ie fais de mesme: & sens de cette regle grande vtilité à la vie. Je ne regarde pas l'espece & l'indiuidu, comme vne pierre où i'aye bronché. J'apprens à craindre mon alleure par tout, & m'attens à la regler. D'apprendre qu'on a dit ou fait vne sottise, ce n'est rien que cela. Il faut apprendre, qu'on n'est qu'un sot. Instruction bien plus ample, & importante. Les faux pas, que ma memoire m'a fait si souuent, lors mesme qu'elle s'affeure le plus de soy, ne se sont pas inutilement perduz. Elle a beau me iurer à cette heure & m'affeurer: ie secoue les oreilles: la premiere opposition qu'on fait à son tesmoignage, me met en suspens. Et n'oserois me fier d'elle, en chose de poix: ny la garentir sur le fait d'autrui. Et n'estoit, que ce que ie fay par faute de memoire, les autres le font encore plus souuent, par faute de foy, ie prendrois tousiours en chose de fait, la verité de la bouche d'un autre, plustost que de la mienne. Si chacun espioit de pres les effects & circonstances des passions qui le regentent, comme i'ay fait de celle à qui i'estois tombé en partage: il les verroit venir: & ralentiroit un peu leur impetuosité & leur course. Elles ne nous sautent pas tousiours au collet d'un prinfault, il y a de la menace & des degrez.

*Fluctus uti primò capit cùm albescere ponto,
Paulatim sese tollit mare, & alius vndas
Erigit, inde imò consurgit ad æthera fundo.*

Le iugement tient chez moy vn siege magiftral, au moins il s'en efforce foigneufement. Il laiffe mes appetis aller leur train : & la haine & l'amitié, voire & celle que ie me porte à moy mefme, fans s'en alterer & corrompre. S'il ne peut reformer les autres parties felon soy, au moins ne fe laiffe il pas difformer à elles : il fait fon ieu à part. L'aduerfiffement à chacun de fe cognoiftre, doit eſtre d'un important effect, puisque ce Dieu de ſcience & de lumiere le fit planter au front de ſon temple : comme comprenant tout ce qu'il auoit à nous conſeiller. Platon dict auſſi, que prudence n'eſt autre choſe, que l'exécution de cette ordonnance : & Sócrates, le verifie par le menu en Xenophon. Les difficultez & l'obſcurité, ne s'apperçoient en chacune ſcience, que par ceux qui y ont entrée. Car encore faut il quelque degré d'intelligence, à pouoir remarquer qu'on ignore : & faut pouſſer à vne porte, pour ſçauoir qu'elle nous eſt cloſe. D'où naift cette Platonique ſubtilité, que ny ceux qui ſçauent, n'ont à s'enquerir, d'autant qu'ils ſçauent : ny ceux qui ne ſçauent, d'autant que pour s'enquerir, il faut ſçauoir, dequoy on s'enquiert. Ainſin, en cette cy de ſe cognoiftre ſoy-meſme : ce que chacun ſe voit ſi reſolu & ſatisfait, ce que chacun y penſe eſtre ſuffiſamment entendu, ſignifie que chacun n'y entend rien du tout, comme Socrates apprend à Euthydeme. Moy, qui ne fais autre profeſſion, y trouue vne profondeur & variété ſi infinie, que mon apprentiſſage n'a autre fruit, que de me faire ſentir, combien il me reſte à apprendre. A ma foibleſſe ſi ſouuent recognuë, ie dois l'inclination que i'ay à la modeſtie : à l'obeiſſance des creances qui me ſont preſcrites : à vne conſtante froideur & moderation

d'opinions : & la haine de cette arrogance importune & quereleuse, se croyant & fiant toute à soy, ennemie capitale de discipline & de verité. Oyez les regenter. Les premieres sottises qu'ils mettent en auant, c'est au stile qu'on establit les religions & les loix. *Nihil est turpius quàm cognitioni & perceptioni, assertionem approbationemque præcurrere.* Aristarchus disoit, qu'anciennement, à peine se trouua-il sept sages au monde : & que de son temps à peine se trouuoit-il sept ignorans. Aurions nous pas plus de raison que luy, de le dire en nostre temps ? L'affirmation & l'opiniaistreté, sont signes exprez de bestise. Cestuy-ci aura donné du nez à terre, cent fois pour vn iour : le voyla sur ses ergots, aussi resolu & entier que deuant. Vous diriez qu'on luy a infus depuis, quelque nouuelle ame, & vigueur d'entendement. Et qu'il luy aduiet, comme à cet ancien fils de la terre, qui reprenoit nouuelle fermeté, & se renforçoit par sa cheute.

*cui cùm tetigere parentem,
Iam defecta vigent renouato robore membra.*

Ce testu indocile, pense-il pas reprendre vn nouuel esprit, pour reprendre vne nouuelle dispute ? C'est par mon experience, que i'accuse l'humaine ignorance. Qui est, à mon aduis, le plus seur party de l'escole du monde. Ceux qui ne la veulent conclure en eux, par vn si vain exemple que le mien, ou que le leur, qu'ils la recognoissent par Socrates, le maistre des maistres. Car le philosophe Antisthenes, à ses disciples, Allons, disoit-il, vous & moy ouyr Socrates. Là ie seray disciple avec vous. Et soutenant ce dogme, de sa secte Stoïque, que la vertu suffisoit à rendre vne vie plainement heureuse,

& n'ayant besoin de chose quelconque, sinon de la force de Socrates; adioustoit-il. Cette longue attention que i'employe à me considerer, me dresse à iuger aussi passablement des autres. Et est peu de choses, dequoy ie parle plus heureusement & excusablement. Il m'aduient souuent, de voir & distinguer plus exactement les conditions de mes amis, qu'ils ne font eux mesmes. I'en ay estonné quelqu'un, par la pertinence de ma description: & l'ay aduertey de soy. Pour m'estre dès mon enfance, dresse à mirer ma vie dans celle d'autrui, i'ay acquis vne complexion studieuse en cela. Et quand i'y pense, ie laisse eschaper autour de moy peu de choses qui y seruent: contenance, humeurs, discours. I'estudie tout: ce qu'il me faut fuir, ce qu'il me faut fuyure. Ainfin à mes amis, ie descouure par leurs productions, leurs inclinations internes. Non pour renger cette infinie varieté d'actions si diuerses & si descoupees, à certains genres & chapitres, & distribuer distinctement mes partages & diuisions, en classes & regions cogneuës,

*Sed neque quàm multæ species, & nomina quæ sint,
Est numerus.*

Les sçauans parlent, & denotent leurs fantasies, plus specifiquement, & par le menu. Moy, qui n'y voy qu'autant que l'usage m'en informe, sans regle, presente generalement les miennes, & à tastons. Comme en cecy: Ie prononce ma sentence par articles descousus: c'est chose qui ne se peut dire à la fois, & en bloc. La relation, & la conformité, ne se trouuent point en telles ames que les nostres, basses & communes. La sagesse est vn bastiment solide

& entier, dont chaque piece tient son rang & porte sa marque. *Sola sapientia in se tota conuersa est.* Ie laisse aux artistes, & ne sçay s'ils en viennent à bout, en chose si meslee, si menue & fortuite, de renger en bandes, cette infinie diuersité de visages; & arrester nostre inconstance, & la mettre par ordre. Non seulement ie trouue malaysé, d'attacher nos actions les vnes aux autres: mais chacune à part soy, ie trouue malaysé, de la designer proprement, par quelque qualité principale: tant elles sont doubles & bigarrees à diuers lustres. Ce qu'on remarque pour rare, au Roy de Macedoine, Perseus, que son esprit, ne s'attachant à aucune condition, alloit errant par tout genre de vie: & representant des mœurs, si efforees & vagabondes qu'il n'estoit cogneu ny de luy ny d'autre, quel homme ce fust, me semble à peu pres conuenir à tout le monde. Et par dessus tous, i'ay veu quelque autré de sa taille, à qui cette conclusion s'appliqueroit plus proprement encore, ce croy-ie. Nulle assiette moyenne: s'emportant tousiours de l'un à l'autre extreme, par occasions indiuinables: nulle espee de train, sans trauerse, & contrariété merueilleuse: nulle faculté simple: si que le plus vraysemblablement qu'on en pourra feindre vn iour, ce sera, qu'il affectoit, & estudioit de se rendre cogneu, par estre mesconnoissable. Il faiët besoin d'oreilles bien fortes, pour s'ouyr franchement iuger. Et par ce qu'il en est peu, qui le puissent souffrir sans morsure: ceux qui se hazardent de l'entreprendre enuers nous, nous montrent vn singulier effect d'amitié. Car c'est aimer sainement, d'entreprendre à blesser & offencer, pour profiter. Ie trouue rude de iuger celuy là, en qui les mauuaises qualitez surpassent les bonnes.

Platon ordonne trois parties, à qui veut examiner l'ame d'un autre, science, bienveillance, hardiesse. Quelquefois on me demandoit, à quoy i'eusse pensé estre bon, qui se fust aduisé de se seruir de moy, pendant que i'en auois l'aage :

*Dum melior vires sanguis dabat, æmula necdum
Temporibus geminis canebat sparsa senectus.*

A rien, fis-je. Et m'excuse volontiers de ne sçauoir faire chose, qui m'esclaire à autrui. Mais i'eusse dit ses veritez à mon maistre, & eusse controollé ses mœurs, s'il eust voulu. Non en gros, par leçons scholastiques, que ie ne sçay point, & n'en vois naistre aucune vraye reformation, en ceux qui les sçauent. Mais les obseruant pas à pas, à toute opportunité : & en iugeant à l'œil, piece à piece, simplement & naturellement. Luy faisant voir quel il est en l'opinion commune : m'opposant à ses flatteurs. Il n'y a nul de nous, qui ne valust moins que les Roys, s'il estoit ainsi continuellement corrompu, comme ils sont, de cette canaille de gens. Comment, si Alexandre, ce grand & Roy & philosophe, ne s'en peut deffendre ? l'eusse eu assez de fidelité, de iugement, & de liberté, pour cela. Ce seroit un office sans nom ; autrement il perdrait son effect & sa grace. Et est un roolle qui ne peut indifferemment appartenir à tous. Car la verité mesme, n'a pas ce priuilege, d'estre employée à toute heure, & en toute sorte : son vsage tout noble qu'il est, a ses circonscriptions, & limites. Il aduient souuent, comme le monde est, qu'on la lasche à l'oreille du Prince, non seulement sans fruiet, mais dommageablement, & encore iniustement. Et ne me fera lon

pas accroire, qu'une sainte remontrance, ne puisse estre appliquee vitieusement : & que l'interest de la substance, ne doive souvent ceder à l'interest de la forme. Je voudrois à ce mestier, un homme content de sa fortune,

Quod fit, esse velit, nihilque malit :

& nay de moyenne fortune. D'autant, que d'une part, il n'auroit point de crainte de toucher vivement & profondement le cœur du maistre, pour ne perdre par là, le cours de son auancement. Et d'autre part, pour estre d'une condition moyenne, il auroit plus aysée communication à toute sorte de gens. Je le voudroy à un homme seul : car respandre le privilege de cette liberté & priuauté à plusieurs, engendreroit une nuisible irreuerence. Ouy, & de celui là, ie requerrois sur tout la fidelité du silence. Un Roy n'est pas à croire, quand il se vante de sa constance, à attendre le rencontre de l'ennemy, pour sa gloire : si pour son profit & amendement, il ne peut souffrir la liberté des parolles d'un amy, qui n'ont autre effort, que de luy pincer l'ouye : le reste de leur effect estant en sa main. Or il n'est aucune condition d'hommes, qui ait si grand besoing, que ceux-là, de vrais & libres aduertissemens. Ils soustiennent une vie publique, & ont à agreer à l'opinion de tant de spectateurs, que comme on a accoustumé de leur taire tout ce qui les diuertit de leur route, ils se trouuent sans le sentir, engagez en la haine & detestation de leurs peuples, pour des occasions souvent, qu'ils eussent peu euer, à nul interest de leurs plaisirs mesme, qui les en eust aduisez & redressez à temps. Communement leurs

fauorits regardent à foy, plus qu'au maistre. Et il leur va de bon : d'autant qu'à la verité, la plus part des offices de la vraye amitié, sont enuers le souverain, en vn rude & perilleux effay. De maniere, qu'il y fait besoin, non seulement de beaucoup d'affection & de franchise, mais encore de courage. En fin, toute cette fricassée que ie barbouille ici, n'est qu'un registre des essais de ma vie : qui est pour l'interne santé exemplaire assez, à prendre l'instruction à contrepoil. Mais quant à la santé corporelle, personne ne peut fournir d'experience plus vile que moy : qui la presente pure, nullement corrompue & alteree par art, & par opinion. L'experience est proprement sur son fumier au subiect de la medecine, où la raison luy quitte toute la place. Tybere disoit, que quiconque auoit vescu vingt ans, se deuoit respondre des choses qui luy estoient nuisibles ou salutaires, & se sçauoir conduire sans medecine. Et le pouuoit auoir apprins de Socrates : lequel conseillant à ses disciples soigneusement, & comme vn tres principal estude, l'estude de leur santé, adioustoit, qu'il estoit malaisé, qu'un homme d'entendement, prenant garde à ses exercices à son boire & à son manger, ne discernast mieux que tout medecin, ce qui luy estoit bon ou mauuais. Si fait la medecine profession d'auoir tousiours l'experience, pour touche de son operation. Ainsi Platon auoit raison de dire, que pour estre vray medecin, il feroit necessaire que celui qui l'entreprendroit, eust passé par toutes les maladies, qu'il veut guerir, & par tous les accidens & circonstances dequoy il doit iuger. C'est raison qu'ils prennent la verole, s'ils la veulent sçauoir penser. Vrayement ie m'en fierois à celui là. Car les autres nous guident,

comme celuy qui peint les mers, les escueils & les ports, estant assis, sur sa table, & y faict promener le modele d'un nauiere en toute seurte. Iettez-le à l'effeict, il ne scait par où s'y prendre. Ils font telle description de nos maux, que faict vn trompette de ville, qui crie vn cheual ou vn chien perdu, tel poil, telle hauteur, telle oreille : mais presentez le luy, il ne le cognoit pas pourtant. Pour Dieu, que la medecine me face vn iour quelque bon & perceptible secours, voir comme ie crieray de bonne foy,

Tandem efficaci do manus scientiæ.

Les arts qui promettent de nous tenir le corps en santé, & l'ame en santé, nous promettent beaucoup : mais aussi n'en est-il point, qui tiennent moins ce qu'elles promettent. Et en nostre temps, ceux qui font profession de ces arts entre nous, en montrent moins les effects que tous autres hommes. On peut dire d'eux, pour le plus, qu'ils vendent les drogues medecinales : mais qu'ils soient medecins, cela ne peut on dire. J'ay assez vescu, pour mettre en compte l'usage, qui m'a conduit si loing. Pour qui en voudra goustier : i'en ay faict l'essay, son eschançon. En voyci quelques articles, comme la souuenance me les fournira. Je n'ay point de façon, qui ne soit allee variant selon les accidents. Mais i'enregistre celles, que i'ay plus souuent veu en train : qui ont eu plus de possession en moy iusqu'à cette heure. Ma forme de vie, est pareille en maladie comme en santé : mesme liët, mesmes heures, mesmes viandes me seruient, & mesme breuuage. Je n'y adiousté du tout rien, que la moderation du plus & du moins, selon ma force & appetit. Ma santé, c'est maintenir sans

destourbier mon estat accoustumé. Je voy que la maladie m'en desloge d'un costé : si ie crois les medecins, ils m'en destourneront de l'autre : & par fortune, & par art, me voyla hors de ma routte. Je ne crois rien plus certainement que cecy : que ie ne sçauroy estre offencé par l'usage des choses que i'ay si long temps accoustumees. C'est à la coustume de donner forme à nostre vie, telle qu'il luy plaist, elle peult tout en cela. C'est le breuuage de Circé, qui diuersifie nostre nature, comme bon luy semble. Combien de nations, & à trois pas de nous, estiment ridicule la craincte du ferein, qui nous blesse si apparemment : & nos bateliers & nos payfans s'en moquent. Vous faites malade vn Alleman, de le coucher sur vn matelas : comme vn Italien sur la plume, & vn François sans rideau & sans feu. L'estomach d'un Espagnol, ne dure pas à nostre forme de manger, ny le nostre à boire à la Souyffe. Vn Allemand me fait plaisir à Auguste, de combattre l'incommodité de nos foyers, par ce mesme argument, dequoy nous nous seruons ordinairement à condamner leurs poyles. Car à la verité, cette chaleur croupie, & puis la fenteur de cette matiere reschauffée, dequoy ils sont composez, enteste la plus part de ceux qui n'y sont experimentez : moy non. Mais au demeurant, estant cette chaleur egale, constante & vniuerselle, sans lueur, sans fumée, sans le vent que l'ouuerture de nos cheminées nous apporte, elle a bien par ailleurs, dequoy se comparer à la nostre. Que n'imitons nous l'architecture Romaine ? Car on dit, qu'anciennement, le feu ne se faisoit en leurs maisons que par le dehors, & au pied d'icelles : d'où s'inspiroit la chaleur à tout le logis, par les tuyaux practiquez dans l'espais du mur, lesquels

alloient embrassant les lieux qui en deuoient estre eschauffez. Ce que i'ay veu clairement signifié, ie ne sçay où, en Seneque. Cestuy-cy, m'oyant louer les commoditez, & beautez de sa ville : qui le merite certes : commença à me plaindre, dequoy i'auois à m'en eslongner. Et des premiers inconueniens qu'il m'allega, ce fut la poissanteur de teste, que m'apporteroient les cheminées ailleurs. Il auoit ouï faire cette plainte à quelqu'un, & nous l'attachoit, estant priué par l'usage de l'appercevoir chez luy. Toute chaleur qui vient du feu, m'affoiblit & m'appesantit. Si disoit Euenus, que le meilleur condiment de la vie, estoit le feu. Je prens plustost toute autre façon d'eschaper au froid. Nous craignons les vins au bas : en Portugal, cette fumée est en delices, & est le breuage des Princes. En somme, chascune nation a plusieurs coustumes & usances, qui sont non seulement incognues, mais farouches & miraculeuses à quelque autre nation. Que ferons nous à ce peuple, qui ne fait recepte que de tesmoignages imprimez, qui ne croit les hommes s'ils ne sont en liure, ny la verité, si elle n'est d'aage competant ? Nous mettons en dignité nos sottises, quand nous les mettons en moule. Il y a bien pour luy, autre poix, de dire ; ie l'ay leu : que si vous dictes : ie l'ay ouy dire. Mais moy, qui ne mescrois non plus la bouche, que la main des hommes : & qui sçay qu'on escript autant indiscrettement qu'on parle : & qui estime ce siecle, comme un autre passé, i'allegue aussi volontiers un mien amy, que Aulugelle, & que Macrobe : & ce que i'ay veu, que ce qu'ils ont escrit. Et comme ils tiennent de la vertu, qu'elle n'est pas plus grande, pour estre plus longue : i'estime de mesme de la verité, que pour estre plus vieille, elle

n'est pas plus sage. Je dis souuent que c'est pure sottise, qui nous fait courir apres les exemples estrangers & scholastiques. Leur fertilité est pareille à cette heure à celle du temps d'Homere & de Platon. Mais n'est-ce pas, que nous cherchons plus l'honneur de l'allegation, que la verité du discours? Comme si c'estoit plus d'emprunter, de la boutique de Vascofan, ou de Plantin, nos preuues, que de ce qui se voit en nostre village. Ou bien certes, que nous n'auons pas l'esprit, d'esplucher, & faire valloir, ce qui se passe deuant nous, & le iuger assez visuellement, pour le tirer en exemple. Car si nous disons, que l'autorité nous manque, pour donner foy à nostre tefmoignage, nous le disons hors de propos. D'autant qu'à mon aduis, des plus ordinaires choses, & plus communes, & cognuës, si nous sçauions trouuer leur iour, se peuuent former les plus grands miracles de nature, & les plus merueilleux exemples, notamment sur le subiect des actions humaines. Or sur mon subiect, laissant les exemples que ie sçay par les liures : & ce que dit Aristote d'Andron Argien, qu'il trauerçoit sans boire les arides sablons de la Lybie : vn Gentil-homme qui s'est acquité dignement de plusieurs charges, disoit où i'estois, qu'il estoit allé de Madril à Lilbonne, en plain esté, sans boire. Il se porte vigoureusement pour son aage, & n'a rien d'extraordinaire en l'vsage de sa vie, que cecy, d'estre deux ou trois mois, voire vn an, ce m'a-il dit, sans boire. Il sent de l'alteration, mais il la laisse passer : & tient, que c'est vn appetit qui s'alanguit aisément de soy-mesme : & boit plus par caprice, que pour le besoing, ou pour le plaisir. En voicy d'vn autre. Il n'y a pas long temps, que ie rencontray l'vn des plus sçauans hommes de France,

entre ceux de non mediocre fortune, estudiant au coin d'une sale, qu'on luy avoit rembarré de tapisserie : & autour de luy, vn tabut de ses valets, plain de licence. Il me dit, & Seneque quasi autant de foy, qu'il faisoit son profit de ce tintamarre : comme si battu de ce bruit, il se ramenast & reserrast plus en foy, pour la contemplation, & que cette tempeste de voix repercutast ses pensées au dedans. Estant escholier à Padoüe, il eut son estude si long temps logé à la batterie des coches, & du tumulte de la place, qu'il se forma non seulement au mespris, mais à l'usage du bruit, pour le service de ses estudes. Socrates respondit à Alcibiades, s'estonnant comme il pouvoit porter le continuel tintamarre de la teste de sa femme : Comme ceux, qui sont accoustumez à l'ordinaire bruit des rouës à puiser de l'eau. Je suis bien au contraire : j'ay l'esprit tendre & facile à prendre l'effort. Quand il est empesché à part foy, le moindre bourdonnement de mousche l'affaîne. Seneque en sa ieunesse, ayant mordu chaudement, à l'exemple de Sextius, de ne manger chose, qui eust prins mort, s'en passoit dans vn an, avec plaisir, comme il dit. Et s'en deporta seulement, pour n'estre soupçonné, d'emprunter cette regle d'aucunes religions nouvelles, qui la femoyent. Il print quand & quand des preceptes d'Attalus, de ne se coucher plus sur des loudiers, qui enfondrent : & employa iusqu'à la vieillesse ceux qui ne cedent point au corps. Ce que l'usage de son temps, luy faict compter à rudesse, le nostre, nous le faict tenir à mollesse. Regardez la difference du viure de mes valets à bras, à la mienne : les Scythes & les Indes n'ont rien plus esloigné de ma force, & de ma forme. Je scay, avoir retiré de l'aumosne, des enfans pour m'en servir, qui bien tost apres m'ont

quité & ma cuisine, & leur liurée : seulement, pour se rendre à leur première vie. Et en trouuay vn, amassant depuis, des moules, emmy la voirie, pour son dîner, que par priere, ny par menace, ie ne sceu distraire de la faueur & douceur, qu'il trouuoit en l'indigence. Les gueux ont leurs magnificences, & leurs voluptez, comme les riches : &, dit-on, leurs dignitez & ordres politiques. Ce sont effects de l'accoustumance. Elle nous peut diure, non seulement à telle forme qu'il luy plaist (pourtant, disent les sages, nous faut-il planter à la meilleure, qu'elle nous facilitera incontinent) mais aussi au changement & à la variation : qui est le plus noble, & le plus vile de ses apprentissages. La meilleure de mes complexions corporelles, c'est d'estre flexible & peu opiniastre. J'ay des inclinations plus propres & ordinaires, & plus agreables, que d'autres. Mais avec bien peu d'effort, ie m'en destourne, & me coule aisément à la façon contraire. Vn ieune homme, doit troubler ses regles, pour esueiller sa vigueur : la garder de moisir & s'apoltronir. Et n'est train de vie, si sot & si debile, que celui qui se conduit par ordonnance & discipline.

*Ad primum lapidem vestari cum placet, hora
Sumitur ex libro, si prurit frictus ocelli
Angulus, inspecta genesi collyria quarit.*

Il se reiettera souuent aux excez mesme, s'il m'en croit : autrement, la moindre desbauche le ruyne. Il se rend incommode & des-agreable en conuersation. La plus contraire qualité à vn honneste homme, c'est la delicatesse & obligation à certaine façon particulière. Et elle est particuliere, si elle n'est ployable,

& souple. Il y a de la honte, de laisser à faire par impuissance, ou de n'oser, ce qu'on voit faire à ses compagnons. Que telles gens gardent leur cuisine. Par tout ailleurs, il est indecent : mais à vn homme de guerre, il est vitieux & insupportable. Lequel, comme disoit Philopoemen, se doit accoustumer à toute diuersité, & inégalité de vie. Quoy que l'aye esté dressé autant qu'on a peu, à la liberté & à l'indifference, si est-ce que par nonchalance, m'estant en vieillissant, plus arresté sur certaines formes (mon aage est hors d'institution, & n'a desormais dequoy regarder ailleurs qu'à se maintenir) la coustume a delia sans y penser, imprimé si bien en moy son caractere, en certaines choses, que i'appelle excez de m'en despartir. Et sans m'effayer, ne puis, ny dormir sur iour, ny faire collation entre les repas, ny desieuner, ny m'aller coucher sans grand interualle, comme de trois heures, apres le soupper, ny faire des enfans, qu'auant le sommeil : ny les faire debout : ny porter ma fueur : ny m'abreuuer d'eau pure ou de vin pur : ny me tenir nud teste long temps : ny me faire tondre apres disner. Et me passerois autant mal-aisément de mes gans, que de ma chemise : & de me lauer à l'issuë de table, & à mon leuer : & de ciel & rideaux à mon liët, comme de choses bien necessaires. Je disnerois sans nape : mais à l'Alemande sans seruiette blanche, tref-incommodément. Je les souille plus qu'eux & les Italiens ne font : & m'ayde peu de cullier, & de fourchette. Je plains qu'on n'aye suyuy vn train, que i'ay veu commencer à l'exemple des Roys : Qu'on nous changeast de seruiette, selon les seruices, comme d'affiette. Nous tenons de ce laborieux foldat Marius, que vieillissant, il deuint delicat en son boire : & ne le prenoit qu'en vne sienne

couppe particuliere. Moy ie me laisse aller de mesme à certaine forme de verres, & ne boy pas volontiers en verre commun. Non plus que d'une main commune. Tout metal m'y desplaist au prix d'une matiere claire & transparente. Que mes yeux y tastent aussi selon leur capacité. Je dois plusieurs telles mollesses à l'usage. Nature m'a aussi d'autre part apporté les siennes : comme de ne soustenir plus deux plains repas en un iour, sans surcharger mon estomach : ny l'abstinence pure de l'un des repas : sans me remplir de vents, assécher ma bouche, estonner mon appetit. De m'offenser d'un long ferein. Car depuis quelques années, aux couruées de la guerre, quand toute la nuit y court, comme il aduient communément, apres cinq ou six heures, l'estomach me commence à troubler, avec vehemente douleur de teste : & n'arriue point au iour, sans vomir. Comme les autres s'en vont desseuer, ie m'en vay dormir : & au partir de là, aussi gay qu'au parauant. L'auois tousiours appris, que le ferein ne s'espandoit qu'à la naissance de la nuit : mais hantant ces années passées familièrement, & long temps, un seigneur imbu de cette creance, que le ferein est plus aspre & dangereux sur l'inclination du soleil, une heure ou deux auant son coucher : lequel il euite songneusement, & mesprise celui de la nuit : il a cuidé m'imprimer, non tant son discours, que son sentiment. Quoy, que le doute mesme, & l'inquisition frappe nostre imagination, & nous change ? Ceux qui cedent tout à coup à ces pentes, attirent l'entiere ruine sur eux. Et plains plusieurs Gentils-hommes, qui par la fortite de leurs medecins, se sont mis en chartre tous ieunes & entiers. Encores vaudroit-il mieux souffrir un reume, que de perdre pour iamais, par desac-

coustumance, le commerce de la vie commune, en action de si grand vsage. Fâcheuse science : qui nous descric les plus douces heures du iour. Estendons nostre possession iusques aux derniers moyens. Le plus souuent on s'y durcit, en s'opiniastrant, & corrige lon sa complexion : comme fit Cæsar le haut mal, à force de le mespriser & corrompre. On se doit adonner aux meilleures regles, mais non pas s'y afferuir : si ce n'est à celles, s'il y en a quelqu'une, auxquelles l'obligation & seruitude soit vtile. Et les Roys & les philosophes sientent, & les dames aussi. Les vies publiques se doiuent à la ceremonie : la mienne obscure & priuée, iouit de toute dispençe naturelle. Soldat & Gascon, sont qualitez aussi, vn peu subiettes à l'indiscretion. Parquoy, ie diray cecy de cette action : qu'il est besoing de la renuoyer à certaines heures, prescriptes & nocturnes, & s'y forcer par coustume, & assubiectir, comme i'ay fait. Mais non s'affuier, comme i'ay fait en vieillissant, au soing de particuliere commodité de lieu, & de siege, pour ce seruice : & le rendre empeschant par longueur & mollesse. Toutesfois aux plus sales offices, est-il pas aucunement excusable, de requerir plus de soing & de netteté ? *Naturâ homo mundum & elegans animal est.* De toutes les actions naturelles, c'est celle, que ie souffre plus mal volontiers m'estre interrompue. I'ay veu beaucoup de gens de guerre, incommodez du desfreiglement de leur ventre. Tandis que le mien & moy, ne nous faillions iamais au poinct de nostre assignation : qui est au fault du liêt, si quelque violente occupation, ou maladie ne nous trouble. Ie ne iuge donc point, comme ie disois, où les malades se puissent mettre mieux en seurte, qu'en se tenant coy, dans le train de vie, où ils se sont esleuez & nourris.

Le changement, quel qu'il soit, estonne & blesse. Allez croire que les chastaignes nuisent à vn Perigourdin, ou à vn Lucquois : & le laiët & le fromage aux gens de la montaigne. On leur va ordonnant, vne non seulement nouuelle, mais contraire forme de vie. Mutation qu'vn sain ne pourroit souffrir. Ordonnez de l'eau à vn Breton de soixante dix ans : enfermez dans vne estuue vn homme de marine : defendez le promener à vn laquay Basque : ils les priuent de mouuement, & en fin d'air & de lumiere.

an viuere tanti est?

Cogimur à suetis animum suspendere rebus,

Atque vt viuamus, viuere desinimus :

Hos superesse reor quibus & spirabilis aër,

Et lux qua regimur, redditur ipsa grauis.

S'ils ne font autre bien, ils font aumoins cecy, qu'ils preparent de bonne heure les patiens à la mort, leur sapant peu à peu & retranchant l'vsage de la vie. Et sain & malade, ie me suis volontiers laissé aller aux appetits qui me preffoient. Ie donne grande authorité à mes desirs & propensions. Ie n'ayme point à guarir le mal par le mal. Ie hay les remedes qui importunent plus que la maladie. D'estre subiect à la colique, & subiect à m'abstenir du plaisir de manger des huitres, ce sont deux maux pour vn. Le mal nous pinse d'vn costé, la regle de l'autre. Puis-qu'on est au hazard de se mesconter, hazardons nous plustost à la suite du plaisir. Le monde faiët au rebours, & ne pense rien vtile, qui ne soit penible. La facilité luy est suspecte. Mon appetit en plusieurs choses, s'est assez heureusement accommodé par soy-mesme, & rangé à la santé de mon estomach. L'acri-

monie & la pointe des fauces m'agrèerent estant ieune : mon estomach s'en ennuyant depuis, le goust l'a incontinent suyuy. Le vin nuit aux malades : c'est la premiere chose, dequoy ma bouche se desgoust, & d'un degoust inuincible. Quoy que ie reçoive desagreablement, me nuyt ; & rien ne me nuyt, que ie face avec faim, & allegresse. Je n'ay iamais receu nuysance d'action, qui m'eust esté bien plaisante. Et si ay fait ceder à mon plaisir, bien largement, toute conclusion medicinale. Et me suis ieune,

*Quem circumcursans huc atque huc sæpe Cupido
Fulgebat crocina splendidus in tunica,*

presté autant licentieusement & inconsiderément, qu'autre, au desir qui me tenoit saisi :

Et militai non sine gloria.

Plus toutesfois en continuation & en durée, qu'en faillie.

Sex me vix memini sustinuisse vices.

Il y a du malheur certes, & du miracle, à confesser, en quelle foiblesse d'ans, ie me rencontray premierement en sa subiection. Ce fut bien rencontre : car ce fut long temps auant l'age de choix & de connoissance. Il ne me souvient point de moy de si loing. Et peut on marier ma fortune à celle de Quartilla, qui n'auoit point memoire de son filage.

*Inde tragus celerésque pili, mirandæque matri
Barba mea.*

Les medecins ployent ordinairement avec vüité, leurs regles, à la violence des enuies aspres, qui furuiennent aux malades. Ce grand desir ne se peut imaginer, si estranger & vicieux, que Nature ne s'y applique. Et puis, combien est-ce de contenter la fantasie ? A mon opinion cette piece là importe de tout : aumoins, au delà de toute autre. Les plus griefs & ordinaires maux, sont ceux que la fantasie nous charge. Ce mot Espagnol me plaist à plusieurs visages : *Defienda me Dios de my*. Je plains estant malade, déquoy ie n'ay quelque desir qui me donne ce contentement de l'affouir : à peine m'en destourneroit la medecine. Autant en fay-ie sain. Ie ne voy guere plus qu'esperer & vouloir. C'est pitié d'estre alanguy & affoibly, iusques au souhaier. L'art de medecine, n'est pas si resölue, que nous soyons sans autorité, quoy que nous facions. Elle change selon les climats, & selon les Lunes : selon Fernel & selon l'Escale. Si vostre medecin ne trouue bon, que vous dormez, que vous vsez de vin, ou de telle viande : ne vous chaille : ie vous en trouueray vn autre qui ne fera pas de son aduis. La diuersité des arguments & opinions medicinales, embrasse toute sorte de formes. Ie vis vn miserable malade, creuer & se pasmer d'alteration, pour se guarir : & estre moqué depuis par vn autre medecin : condamnant ce conseil comme nuisible. Auoit-il pas bien employé sa peine ? Il est mort freschement de la pierre, vn homme de ce mestier, qui s'estoit seruy d'extreme abstinence à combattre son mal : ses compagnons disent, qu'au rebours, ce ieufne l'auoit asseché, & luy auoit cuit le sable dans les rongnons. I'ay apperceu qu'aux bleffseures, & aux maladies, le parler m'esmeut & me nuit, autant que desordre que ie face. La voix me

couste, & me lasse : car ie l'ay haute & efforcée. Si que, quand ie suis venu à entretenir l'oreille des grands, d'affaires de poix, ie les ay mis souuent en soing de moderer ma voix. Ce compte merite de me diuertir. Quelqu'un, en certaine eschole Grecque, parloit haut comme moy : le maistre des ceremonies luy manda qu'il parlast plus bas : Qu'il m'enuoye, fit-il, le ton auquel il veut que ie parle. L'autre luy repliqua, qu'il prinist son ton des oreilles de celuy à qui il parloit. C'estoit bien dit, pourueu qu'il s'entende : Parlez selon ce que vous auez affaire à vostre auditeur. Car si c'est à dire, fussie vous qu'il vous oye : ou, reglez vous par luy : ie ne trouue pas que ce fust raison. Le ton & mouuement de la voix, a quelque expression, & signification de mon sens : c'est à moy à le conduire, pour me représenter. Il y a voix pour instruire, voix pour flater, ou pour tancer. Je veux que ma voix non seulement arriue à luy, mais à l'auanture qu'elle le frappe, & qu'elle le perse. Quand ie mastine mon laquay, d'un ton aigre & poignant : il seroit bon qu'il vinst à me dire : Mon maistre parlez plus doux, ie vous oy bien. *Est quædam vox ad auditum accommodata, non magnitudine, sed proprietate.* La parole est moitié à celuy qui parle, moitié à celuy qui l'escoute. Cestuy-cy se doit preparer à la recevoir, selon le branle qu'elle prend. Comme entre ceux qui ioient à la paume, celuy qui soustient, se desmarche & s'appreste, selon qu'il voit remuer celuy qui luy iette le coup, & selon la forme du coup. L'experience m'a encores appris cecy, que nous nous perdons d'impatience. Les maux ont leur vie, & leurs bornes, leurs maladies & leur santé. La constitution des maladies, est formée au patron de la constitution des animaux. Elles ont leur fortune

limitée dès leur naissance : & leurs iours. Qui essaye de les abbreger imperieusement, par force, au trauers de leur course, il les allonge & multiplie : & les harfelle, au lieu de les appaiser. Je suis de l'aduis de Crantor, qu'il ne faut ny obstinément s'opposer aux maux, & à l'estourdi : ny leur succomber de mollesse : mais qu'il leur faut ceder naturellement, selon leur condition & la nostre. On doit donner passage aux maladies : & ie trouue qu'elles arrestent moins chez moy, qui les laisse faire. Et en ay perdu de celles qu'on estime plus opiniaftres & tenaces, de leur propre decadence : sans ayde & sans art, & contre ses regles. Laissons faire vn peu à Nature : elle entend mieux ses affaires que nous. Mais vn tel en mourut. Si ferez vous : sinon de ce mal là, d'vn autre. Et combien n'ont pas laissé d'en mourir, ayants trois medecins à leur cul ? L'exemple est vn miroiër vague, vniuersel & à tout sens. Si c'est vne medecine voluptueuse, acceptez la ; c'est tousiours autant de bien present. Je ne m'arrestera ny au nom ny à la couleur, si elle est delicieuse & appetissante. Le plaisir est des principales especes du profit. J'ay laissé enueillir & mourir en moy, de mort naturelle, des rheumes ; defluxions goutteuses ; relaxation ; battement de cœur ; micraines ; & autres accidens, que j'ay perdu, quand ie m'estois à demy formé à les nourrir. On les coniure mieux par courtoisie, que par brauerie. Il faut souffrir doucement les loix de nostre condition. Nous sommes pour vieillir, pour affoiblir, pour estre malades, en despit de toute medecine. C'est la premiere leçon, que les Mexicains font à leurs enfans ; quand au partir du ventre des meres, ils les vont saluant, ainfin : Enfant, tu es venu au monde pour endurer : endure, souffre, & tais toy. C'est in-

iustice de se douloir qu'il soit aduenü à quelqu'un, ce qui peut aduenir à chacun. *Indignare si quid in te iniquè propriè constitutum est.* Voyez vn vieillard, qui demande à Dieu qu'il luy maintienne sa santé entiere & vigoureuse ; c'est à dire qu'il le remette en ieu- nesse.

Stulte quid hæc frustra votis puerilibus optas?

N'est-ce pas folie ? Sa condition ne le porte pas. La goutte, la grauelle, l'indigestion, sont symptomes des longues années ; comme des longs voyages, la chaleur, les pluyes, & les vents. Platon ne croit pas, qu'Æsculape se mist en peine, de prouuoir par regimes, à faire durer la vie, en vn corps gâté & imbecille : inutile à son pays, inutile à sa vacation : & à produire des enfans sains & robustes : & ne trouue pas ce soing conuenable à la iustice & prudence diuine, qui doit conduire toutes choses à l'utilité. Mon bon homme, c'est fait : on ne vous sçauroit redresser : on vous plastrera pour le plus, & estançonnera vn peu, & allongera-lon de quelque heure vostre misere.

*Non secus instantem cupiens fulcire ruinam,
Diuersis contrà nititur obicibus,
Donec certa dies omni compage soluta,
Ipsum cum rebus subruat auxilium.*

Il faut apprendre à souffrir, ce qu'on ne peut euer. Nostre vie est composée, comme l'harmonie du monde, de choses contraires, aussi de diuers tons, doux & aigres, aigus & plats, mols & graues. Le musicien qui n'en aymeroit que les vns, que voudroit il dire ? Il faut qu'il s'en sçache seruir en com-

mun, & les mesler. Et nous aussi, les biens & les maux, qui sont consubstantiels à nostre vie. Nostre estre ne peut sans ce meslange; & y est l'une bande non moins necessaire que l'autre. D'essayer à regimber contre la necessité naturelle, c'est representer la folie de Ctesiphon, qui entreprenoit de faire à coups de pied avec sa mule. Je consulte peu, des alterations, que ie sens. Car ces gens icy sont auantageux, quand ils vous tiennent à leur misericorde. Ils vous gourmandent les oreilles, de leurs prognostiques; & me surprenant autre fois affoibly du mal, m'ont inieusement traité de leurs dogmes, & troigne magistrale: me menassant tantost de grandes douleurs, tantost de mort prochaine. Je n'en estois abbatu, ny deslogé de ma place, mais i'en estois heurté & poussé. Si mon iugement n'en est ny changé, ny troublé: au moins il en estoit empesché. C'est tousiours agitation & combat. Or ie traite mon imagination le plus doucement que ie puis; & la deschargerois si ie pouuois, de toute peine & contestation. Il la faut secourir, & flatter, & piper qui peut. Mon esprit est propre à cet office. Il n'a point faute d'apparences par tout. S'il persuadoit, comme il presche, il me secourroit heureusement. Vous en plaist-il vn exemple? Il dict, que c'est pour mon mieux, que i'ay la grauele. Que les bastimens de mon aage, ont naturellement à souffrir quelque gouttiere. Il est temps qu'ils commencent à se lascher & desmentir. C'est vne commune necessité. Et n'eust on pas fait pour moy, vn nouveau miracle. Je paye par là, le loyer deu à la vieillesse; & ne scaurois en auoir meilleur comte. Que la compagnie me doit consoler; estant tombé en l'accident le plus ordinaire des hommes de mon temps. I'en vois par tout d'affligez de mesme

nature de mal. Et m'en est la société honorable, d'autant qu'il se prend plus volontiers aux grands : son essence a de la noblesse & de la dignité. Que des hommes qui en sont frappez, il en est peu de quittez à meilleure raison : & si, il leur couste la peine d'un facheux regime, & la prise ennuyeuse, & quotidienne, des drogues medecinales. Là où, ie le doy purement à ma bonne fortune. Car quelques bouillons communs de l'eringium, & herbe du Turc, que deux ou trois fois j'ay aualé, en faueur des dames, qui plus gracieusement que mon mal n'est aigre, m'en offroyent la moitié du leur, m'ont semblé également faciles à prendre, & inutiles en operation. Ils ont à payer mille vœux à Æsculape, & autant d'escus à leur medecin, de la profluion de sable aisée & abondante, que ie reçois souuent par le benefice de Nature. La decence même de ma contenance en compagnie, n'en est pas troublée : & porte mon eau dix heures, & aussi long temps qu'un sain. La crainte de ce mal, dit-il, t'effrayoit autresfois, quand il t'estoit inconnu. Les cris & le desespoir, de ceux qui l'aigrissent par leur impatience, t'en engendroient l'horreur. C'est un mal, qui te bat les membres, par lesquels tu as le plus failly. Tu es homme de conscience :

Quæ venit indignè pœna, dolenda venit.

Regarde ce chastiment ; il est bien doux au prix d'autres, & d'une faueur paternelle. Regarde sa tardifueté : il n'incommode & occupe, que la saison de ta vie, qui ainsi comme ainfin est mes-huy perdue & sterile ; ayant fait place à la licence & plaisirs de ta jeunesse, comme par composition. La crainte & pitié, que le peuple a de ce mal, te sert de matiere

de gloire. Qualité, de laquelle si tu as le iugement purgé, & en as guery ton discours, tes amis pour- tant en recognoissent encore quelque teinture en ta complexion. Il y a plaisir à ouyr dire de soy: Voyla bien de la force: voila bien de la patience. On te voit fuer d'ahan, pallir, rougir, trembler, vomir iusques au sang, souffrir des contractions & con- uulsions estranges, degoutter par fois de grosses lar- mes des yeux, rendre les vrines espees, noires, & effroyables, ou les auoir arrestées par quelque pierre espineuse & herissée qui te poinct, & escorche cruel- lement le col de la verge, entretenant cependant les assistans, d'une contenance commune; bouffonnant à pauses avec tes gens: tenant ta partie en vn discours tendu: excusant de parolle ta douleur, & rabbatant de ta souffrance. Te souuient-il de ces gens du temps passé, qui recherchoyent les maux avec si grand faim, pour tenir leur vertu en haleine, & en exercice? mets le cas que Nature te porte, & te pousse à cette glorieuse escole, en laquelle tu ne fusses iamais entré de ton gré. Si tu me dis, que c'est vn mal dan- gereux & mortel: quels autres ne le font? Car c'est vne pipperie medecinale, d'en excepter aucuns; qu'ils disent n'aller point de droict fil à la mort. Qu'im- porte, s'ils y vont par accident; & s'ils glissent, & gau- chissent aisément, vers la voye qui nous y meine? Mais tu ne meurs pas de ce que tu es malade: tu meurs de ce que tu es viuant. La mort te tue bien, sans le secours de la maladie. Et à d'aucuns, les maladies ont esloigné la mort: qui ont plus vescu, de ce qu'il leur sembloit s'en aller mourants. Ioint qu'il est, comme des playes, aussi des maladies mede- cinales & salutaires. La colique est souuent non moins viuace que vous. Il se voit des hommes, auf-

quels elle a continué depuis leur enfance iusques à leur extreme vieillesse ; & s'ils ne luy eussent failly de compagnie, elle estoit pour les assister plus outre. Vous la tuez plus souuent qu'elle ne vous tue. Et quand elle te presenteroit l'image de la mort voisine, feroit-ce pas vn bon office, à vn homme de tel aage, de le ramener aux cogitations de sa fin ? Et qui pis est, tu n'as plus pour quoy guerir. Ainsi comme ainfin, au premier iour la commune necessité t'appelle. Considere combien artificielement & doucement, elle te desgoust de la vie, & desprend du monde : non te forçant, d'une subiection tyrannique, comme tant d'autres maux, que tu vois aux vieillards, qui les tiennent continuellement entrauez, & sans relâche de foiblesses & douleurs : mais par aduertissemens, & instructions reprises à interualles ; entremeslant des longues pauses de repos, comme pour te donner moyen de mediter & repeter sa leçon à ton aise. Pour te donner moyen de iuger sainement, & prendre party en homme de cœur, elle te presente l'estat de ta condition entiere, & en bien & en mal ; & en mesme iour, vne vie tres-alegre tantost, tantost insupportable. Si tu n'accoles la mort, au moins tu luy touches en paume, vne fois le mois. Par où tu as de plus à esperer, qu'elle t'attrappera vn iour sans menace. Et qu'estant si souuent conduit iusques au port : te fiant d'estre encore aux termes accoustumez, on t'aura & ta fiance, passé l'eau vn matin, inopinément. On n'a point à se plaindre des maladies, qui partagent loyalement le temps avec la santé. Je suis obligé à la Fortune, dequoi elle m'affaut si souuent de mesme forte d'armes. Elle m'y façonne, & m'y dresse par v'sage, m'y durcit & habitue : ie sçay à peu pres mes-huy, en quoy i'en dois estre quitte. A faute de me-

moire naturelle, i'en forge de papier. Et comme quelque nouveau symptome suruiet à mon mal, ie l'escriis : d'où il aduiet, qu'à cette heure, estant quasi passé par toute sorte d'exemples : si quelque estonnement me menace : feuilletant ces petits breuets descoufus, comme des feuilles Sybillines, ie ne faux plus de trouuer où me consoler, de quelque prognostique fauorable; en mon experience passée. Me sert aussi l'accoustumance, à mieux esperer pour l'aduenir. Car la conduite de ce vuidange, ayant continué si long temps; il est à croire, que Nature ne changera point ce train, & n'en aduiendra autre pire accident, que celui que ie sens. En outre; la condition de cette maladie n'est point mal aduenante à ma complexion prompte & soudaine. Quand elle m'affault mollement, elle me fait peur, car c'est pour long temps. Mais naturellement, elle a des excez vigoureux & gailarts. Elle me secouë à outrance, pour vn iour ou deux. Mes reins ont duré vn aage, sans alteration; il y en a tantost vn autre, qu'ils ont changé d'estat. Les maux ont leur periode comme les biens : à l'aduanture est cet accident à sa fin. L'aage affoiblit la chaleur de mon estomach; sa digestion en estant moins parfaite, il renuoye cette matiere crüe à mes reins. Pourquoi ne pourra estre à certaine reuolution, affoiblie pareillement la chaleur de mes reins; si qu'ils ne puissent plus petrifier mon flegme; & Nature s'acheminer à prendre quelque autre voye de purgation ? Les ans m'ont euidentement fait tarir aucuns rheumes. Pourquoi non ces excremens, qui fournissent de matiere à la graue ? Mais est-il rien doux, au prix de cette soudaine mutation; quand d'une douleur extreme, ie viens par le vuidange de ma pierre, à recouurer, comme d'un esclair, la belle lu-

miere de la santé: si libre, & si pleine: comme il aduient en noz soudaines & plus aspres coliques? Y a il rien en cette douleur soufferte, qu'on puisse contrepoiser au plaisir d'un si prompt amendement? De combien la santé me semble plus belle apres la maladie, si voisine & si contigue, que ie les puis reconnoistre en presence l'une de l'autre, en leur plus hault appareil: où elles se mettent à l'enuy, comme pour se faire teste & contrecarre! Tout ainsi que les Stoiciens disent, que les vices sont vilement introduits, pour donner prix & faire espaule à la vertu: nous pouuons dire, avec meilleure raison, & coniecture moins hardie, que Nature nous a presté la douleur, pour l'honneur & seruice de la volupté & indolence. Lors que Socrates apres qu'on l'eust deschargé de ses fers, sentit la friandise de cette demangeaison, que leur pesanteur auoit causé en ses iambes: il se resiouit, à considerer l'estroite alliance de la douleur à la volupté: comme elles sont associées d'une liaison necessaire: si qu'à tours, elles se suyuent, & entr'engendrent: & s'escricioit au bon Esope, qu'il deust auoir pris, de cette consideration, vn corps propre à vne belle fable. Le pis que ie voye aux autres maladies, c'est qu'elles ne sont pas si griefues en leur effect, comme elles sont en leur yssue. On est vn an à se rauoir, tousiours plein de foiblesse, & de crainte. Il y a tant de hazard, & tant de degrez, à se reconduire à sauueté, que ce n'est iamais fait. Auant qu'on vous aye deffublé d'un couurechef, & puis d'une calote, auant qu'on vous aye rendu l'usage de l'air, & du vin, & de vostre femme, & des melons, c'est grand cas si vous n'estes recheu en quelque nouvelle misere. Cette-cy a ce priuilege, qu'elle s'emporte tout net. Là où les autres laissent

toufiours quelque impreffion, & alteration, qui rend le corps fufceptible de nouveau mal, & fe preftent la main les vns aux autres. Ceux là font excufables, qui fe contentent de leur poffeffion fur nous, fans l'eftendre, & fans introduire leur fequele. Mais courtois & gratieux font ceux, de qui le paffage nous apporte quelque vtile confequence. Depuis ma colique, ie me trouue defchargé d'autres accidens: plus ce me femble que ie n'eftois auparavant, & n'ay point eu de fiebure depuis. L'argumente, que les vomiffemens extremes & frequents que ie fouffre, me purgent: & d'autre cofté, mes degouftemens, & les ieufnes efranges, que ie paffe, digerent mes humeurs peccantes: & Nature vuide en ces pierres, ce qu'elle a de fuperflu & nuyfible. Qu'on ne me die point, que c'eft vne medecine trop cher vendue. Car quoy tant de puans breuuages, cauterres, incifions, fuées, fedons, dietes, & tant de formes de guarir, qui nous apportent fouuent la mort, pour ne pouuoir fouftenir leur violence, & importunité? Par ainfi, quand ie fuis atteint, ie le prens à medecine: quand ie fuis exempt, ie le prens à conftante & entiere deliurance. Voicy encore vne faueur de mon mal, particuliere. C'eft qu'à peu pres, il fait fon ieu à part, & me laiffe faire le mien; où il ne tient qu'à faute de courage. En fa plus grande efmotion, ie l'ay tenu dix heures à cheual. Souffrez feulelement, vous n'avez que faire d'autre regime. Iouez, difnez, courez, faites cecy, & faites encore cela, fi vous pouuez; vofre defbauche y feruira plus, qu'elle n'y nuira. Dites en autant à vn verolé, à vn goutteux, à vn hernieux. Les autres maladies, ont des obligations plus vniuerfelles; gehennent bien autrement noz aétions; troublent tout noftre ordre, & engagent à leur confideration, tout

l'estat de la vie. Cette-cy ne fait que pinser la peau; elle vous laisse l'entendement, & la volonté en vostre disposition, & la langue, & les pieds, & les mains. Elle vous esueille plustost qu'elle ne vous assoupit. L'ame est frappée de l'ardeur d'une fiebure, & atterrée d'une epilepsie, & disloquée par une aspre migraine, & en fin estonnée par toutes les maladies qui blessent la masse, & les plus nobles parties. Icy, on ne l'attaque point. S'il luy va mal, à sa coulpe. Elle se trahit elle mesme, s'abandonne, & se desmonte. Il n'y a que les fols qui se laissent persuader, que ce corps dur & massif, qui se cuyt en noz rognons, se puisse dissoudre par breuvages. Parquoy depuis qu'il est ebranlé, il n'est que de luy donner passage, aussi bien le prendra-il. Je remarque encore cette particuliere commodité, que c'est un mal, auquel nous auons peu à deuiner. Nous sommes dispensés du trouble, auquel les autres maux nous iettent, par l'incertitude de leurs causes, & conditions, & progresz. Trouble infiniment penible. Nous n'auons que faire de consultations & interpretations doctorales: les sens nous montrent que c'est, & où c'est. Par tels argumens, & forts & foibles, comme Cicero le mal de sa vieillesse, i'essaye d'endormir & amuser mon imagination, & graiffer ses playes. Si elles s'empirent demain, demain nous y pouruoyrons d'autres eschappatoires. Qu'il soit vray. Voicy depuis de nouveau, que les plus legers mouuements espreignent le pur sang de mes reins. Quoy pour cela? ie ne laisse de me mouuoir comme deuant, & picquer apres mes chiens, d'une iuuenile ardeur, & insolente. Et trouue que i'ay grand raison, d'un si important accident: qui ne me couste qu'une sourde poissanteur, & alteration en cette partie. C'est quelque grosse pierre,

qui foule & consume la substance de mes roignons : & ma vie, que ie vuide peu à peu : non sans quelque naturelle douceur, comme vn excrement hormais superflu & empeschant. Or sens-ie quelque chose qui croulle; ne vous attendez pas que i'aïlle m'amusant à recognoistre mon poux, & mes vrines, pour y prendre quelque preuoyance ennuyeuse. Je feray assez à temps à sentir le mal, sans l'allonger par le mal de la peur. Qui craint de souffrir, il souffre desia de ce qu'il craint. Ioint que la dubitation & ignorance de ceux, qui se meslent d'expliquer les ressorts de Nature, & ses internes progresz : & tant de faux prognostiques de leur art : nous doit faire cognoistre, qu'ell'a ses moyens infiniment incognuz. Il y a grande incertitude, varieté & obscurité, de ce qu'elle nous promet ou menace. Sauf la vieillesse, qui est vn signe indubitable de l'approche de la mort : de tous les autres accidents, ie voy peu de signes de l'aduenir, surquoy nous ayons à fonder nostre diuination. Je ne me iuge que par vray sentiment, non par discours. A quoy faire ? puisque ie n'y veux apporter que l'attente & la patience. Voulez vous sçauoir combien ie gaigne à cela ? Regardez ceux qui font autrement, & qui dependent de tant de diuerses persuasions & conseils : combien souuent l'imagination les presse sans le corps. L'ay maintesfois prins plaisir estant en seurté, & deliure de ces accidens dangereux, de les communiquer aux medecins, comme naissans lors en moy. Je souffrois l'arrest de leurs horribles conclusions, bien à monaise ; & en demeureis de tant plus obligé à Dieu de sa grace, & mieux instruiet de la vanité de cet art. Il n'est rien qu'on doïue tant recommander à la ieunesse, que l'actiueté & la vigilance. Nostre vie, n'est que mou-

uement. Je m'esbranle difficilement, & suis tardif par tout : à me leuer, à me coucher, & à mes repas. C'est matin pour moy que sept heures : & où ie gouuerne, ie ne disne, ny auant onze, ny ne soupe, qu'apres six heures. I'ay autrefois attribué la cause des fiebures, & maladies où ie suis tombé, à la pesanteur & assoupissement, que le long sommeil m'auoit apporté. Et me suis tousiours repenty de me rendormir le matin. Platon veut plus de mal à l'excès du dormir, qu'à l'excès du boire. I'ayme à coucher dur, & seul ; voire sans femme, à la royalle : vn peu bien couuert. On ne bassine iamais mon liét ; mais depuis la vieillesse, on me donne quand i'en ay besoing, des draps, à eschauffer les pieds & l'estomach. On trouuoit à redire au grand Scipion, d'estre dormant, non à mon aduis pour autre raison, sinon qu'il faschoit aux hommes, qu'en luy seul, il n'y eust aucune chose à redire. Si i'ay quelque curiosité en mon traitement, c'est plustost au coucher qu'à autre chose ; mais ie cede & m'accommode en general, autant que tout autre, à la necessité. Le dormir a occupé vne grande partie de ma vie : & le continué encores en cet aage, huit ou neuf heures, d'une haleine. Je me retire avec vtilité, de cette propension paresseuse : & en vaulx euidentement mieux. Je sens vn peu le coup de la mutation : mais c'est fait en trois iours. Et n'en voy gueres, qui viue à moins, quand il est besoin : & qui s'exerce plus constamment, ny à qui les coruées poissent moins. Mon corps est capable d'une agitation ferme ; mais non pas vehemente & soudaine. Je suis meshuy, les exercices violents, & qui me meinent à la sueur : mes membres se lassent auant qu'ils s'eschauffent. Je me tiens debout, tout le long d'un iour, & ne m'ennuye point à me promener.

Mais sur le paué, depuis mon premier aage, ie n'ay aymé d'aller qu'à cheual. A pied, ie me crotte iusques aux fesses : & les petites gens, sont subiects par ces ruës, à estre chocquez & coudoyez à faute d'apparence. Et ay aymé à me reposer, soit couché, soit assis, les iambes autant ou plus haultes que le siege. Il n'est occupation plaifante comme la militaire : occupation & noble en execution (car la plus forte, genereuse, & superbe de toutes les vertus, est la vaillance) & noble en sa cause. Il n'est point d'vtilité, ny plus iuste, ny plus vniuerselle, que la protection du repos, & grandeur de son pays. La compagnie de tant d'hommes vous plaist, nobles, ieunes, actifs : la veüe ordinaire de tant de spectacles tragiques : la liberté de cette conuersation, sans art, & vne façon de vie, masle & sans ceremonie : la variété de mille actions diuerses : cette courageuse harmonie de la musique guerriere, qui vous entretient & eschauffe, & les oreilles, & l'ame : l'honneur de cet exercice : son aspreté mesme & sa difficulté, que Platon estime si peu, qu'en sa republique il en fait part aux femmes & aux enfans. Vous vous conuiez aux rolles, & hazards particuliers, selon que vous iugez de leur esclat, & de leur importance : soldat volontaire : & voyez quand la vie mesme y est excusablement employée,

pulchrūque mori succurrit in armis.

De craindre les hazards communs, qui regardent vne si grande presse ; de n'oser ce que tant de sortes d'ames osent, & tout vn peuple, c'est à faire à vn cœur mol, & bas outre mesure. La compagnie assure iusques aux enfans. Si d'autres vous surpassent en

science, en grace, en force, en fortune ; vous auez des causes tierces, à qui vous en prendre ; mais de leur ceder en fermeté d'ame, vous n'aez à vous en prendre qu'à vous. La mort est plus abieſte, plus languissante, & penible dans vn liſt, qu'en vn combat : les fiebures & les caterrhes, autant douloureux & mortels, qu'une harquebuzade. Qui seroit faict, à porter valeureusement, les accidents de la vie commune, n'auroit point à grossir son courage, pour se rendre gendarme. *Viuer, mi Lucilli, militare est.* Il ne me souuient point de m'estre iamais veu galleux. Si est la gratterie, des gratifications de Nature les plus douces, & autant à main. Mais ell'a la penitence trop importunément voisine. Je l'exerce plus aux oreilles, que j'ay au dedans pruanes, par secouffes. Je suis nay de tous les sens, entiers quasi à la perfection. Mon estomach est commodément bon, comme est ma teste : & le plus souuent, se maintiennent au trauers de mes fiebures, & aussi mon haleine. J'ay outrepasſé l'aage auquel des nations, non sans occasion, auoient prescript vne si iuste fin à la vie, qu'elles ne permettoient point qu'on l'excedast. Si ay-ie encore des remises : quoy qu'inconstantes & courtes, si nettes, qu'il y a peu à dire de la santé & indolence de ma ieunesse. Je ne parle pas de la vigueur & allegresse : ce n'est pas raison qu'elle me suyue hors ses limites :

*Non hoc amplius est liminis, aut aquæ
Cælestis, patiens latus.*

Mon visage & mes yeux me descouurent incontinent. Tous mes changemens commencent par là : & vn peu plus aigres, qu'ils ne sont en effect. Je fais

souuent pitié à mes amis, auant que i'en sente la cause. Mon miroüer ne m'estonne pas : car en la ieunesse mesme, il m'est aduenü plus d'une fois, de chauffer ainſin vn teinct, & vn port trouble, & de mauuais prognostique, sans grand accident : en maniere que les medecins, qui ne trouuoient au dedans cause qui respondist à cette alteration externe, l'attribuoient à l'esprit, & à quelque passion secrete, qui me rongeast au dedans. Ils se trompoient. Si le corps se gouuernoit autant selon moy, que fait l'ame, nous marcherions vn peu plus à nostre aise. Je l'auois lors, non seulement exempte de trouble; mais encore pleine de satisfaction, & de feste : comme elle est le plus ordinairement : moytié de sa complexion, moytié de son dessein :

Nec vitiant artus ægræ contagia mentis.

Je tiens, que cette sienne temperature, a releué maintesfois le corps de ses cheutes. Il est souuent abbatu; que si elle n'est eniouée, elle est au moins en estat tranquille & reposé. J'euz la fiebure quarte, quatre ou cinq mois, qui m'auoit tout desuisagé : l'esprit alla tousiours non paisiblement, mais plaifamment. Si la douleur est hors de moy, l'affoiblissement & langueur ne m'attristent guere. Je vois plusieurs defaillances corporelles, qui font horreur seulement à nommer, que ie craindrois moins que mille passions, & agitations d'esprit que ie vois en vsage. Je prens party de ne plus courre, c'est assez que ie me traine; ny ne me plains de la decadance naturelle qui me tient,

Quis tumidum guttur miratur in Alpibus?

Non plus, que ie ne regrette, que ma durée ne soit aussi longue & entiere que celle d'un cheſne. Je n'ay point à me plaindre de mon imagination : i'ay eu peu de penſées en ma vie qui m'ayent ſeulement interrompu le cours de mon ſommeil, ſi elles n'ont eſté du deſir, qui m'eſueillaſt ſans m'affliger. Je ſonge peu ſouuent ; & lors c'eſt des choſes fantaſtiques & des chimeres, produictes communément de penſées plaiſantes : plutoſt ridicules que triftes. Et tiens qu'il eſt vray, que les ſonges ſont loyaux interpretes de noz inclinations ; mais il y a de l'art à les aſſortir & entendre.

*Res quæ in vitâ vſurpant homines, cogitant, curant, vident,
Quæque agunt vigilantes, agitantque, ea ſicut in ſomno accidunt,
Minus mirandum eſt.*

Platon dit dauantage, que c'eſt l'office de la prudence d'en tirer des inſtructions diuinatrices pour l'aduenir. Je ne voy rien à cela, ſinon les merueilleuſes experiences, que Socrates, Xenophon, Ariſtote en recitent, perſonnages d'autorité irreprochable. Les hiſtoires diſent, que les Atlantes ne ſongent iamais : qui ne mangent auſſi rien, qui aye prins mort. Ce que i'adiouſte, d'autant que c'eſt à l'aduenture l'occaſion, pourquoy ils ne ſongent point. Car Pythagoras ordonnoit certaine preparation de nourriture, pour faire les ſonges à propos. Les miens ſont tendres : & ne m'apportent aucune agitation de corps, ny expreſſion de voix. J'ay veu pluſieurs de mon temps, en eſtre merueilleuſement agitez. Theon le philoſophe, ſe promenoit en ſongeant : & le valet de Pericles ſur les tuilles meſmes & faiſte de la maiſon. Je ne choiſis guere à table ; & me prens à la pre-

miere chose & plus voisine : & me remue mal volontiers d'un goust à un autre. La presse des plats, & des seruices me desplaist, autant qu'autre presse. Je me contente aisément de peu de mets ; & hay l'opinion de Fauorinus, qu'en un festin, il faut qu'on vous desrobe la viande où vous prenez appetit, & qu'on vous en substitue tousiours vne nouuelle : & que c'est un miserable soupper, si on n'a saoullé les assistans de crouppions de diuers oyseaux ; & que le seul bequefigue merite qu'on le mange entier. L'vie familiarierement de viandes sallées ; si ayme-ie mieulx le pain sans sel. Et mon boulanger chez moy, n'en sert pas d'autre pour ma table, contre l'usage du pays. On a eu en mon enfance principalement à corriger, le refus, que ie faisois des choses que communément on ayme le mieulx, en cet aage ; succres, confitures, pieces de four. Mon gouuerneur combatit cette hayne de viandes delicates, comme vne espece de delicatesses. Aussi n'est elle autre chose, que difficulté de goust, où qu'il s'applique. Qui oste à un enfant, certaine particuliere & obteinée affection au pain bis, & au lard, ou à l'ail, il luy oste la friandise. Il en est, qui font les laborieux, & les patiens pour regretter le bœuf, & le iambon, parmy les perdris. Ils ont bon temps : c'est la delicatesses des delicats ; c'est le goust d'une molle fortune, qui s'affadit aux choses ordinaires & accoustumées, *Per quæ luxuria diuitiarum tædio ludit*. Laisser à faire bonne chere de ce qu'un autre la fait ; auoir un soing curieux de son traictement ; c'est l'essence de ce vice ;

Si modica canare times olus omne patella.

Il y a bien vrayement cette difference, qu'il vaut

mieux obliger son desir, aux choses plus aisées à recouurer; mais c'est tousiours vice de s'obliger. L'appellois autresfois, delicat vn mien parent, qui auoit desapris en noz galeres, à se seruir de noz lits, & se despouiller pour se coucher. Si i'auois des enfans massés, ie leur desirasse volontiers ma fortune. Le bon pere que Dieu me donna (qui n'a de moy que la recognoissance de sa bonté, mais certes bien gailarde) m'enuoya dès le berceau, nourrir à vn pauvre village des siens, & m'y tint autant que ie fus en nourrisse, & encores au delà : me dressant à la plus basse & commune façon de viure : *Magna pars libertatis est bene moratus venter*. Ne prenez iamais, & donnez encores moins à vos femmes, la charge de leur nourriture : laissez les former à la fortune, souz des loix populaires & naturelles : laissez à la coustume, de les dresser à la frugalité & à l'austerité; qu'ils ayent plustot à descendre de l'aspreté, qu'à monter vers elle. Son humeur visoit encores à vne autre fin. De me rallier avec le peuple, & cette condition d'hommes, qui a besoin de nostre ayde : & estimoit que ie fusse tenu de regarder plustost, vers celuy qui me tend les bras, que vers celuy, qui me tourne le dos. Et fut cette raison, pourquoy aussi il me donna à tenir sur les fons, à des personnes de la plus abieſte fortune, pour m'y obliger & attacher. Son dessein n'a pas du tout mal succédé. Ie m'adonne volontiers aux petits; soit pour ce qu'il y a plus de gloire : soit par naturelle compassion, qui peut insinuer en moy. Le party que ie condamneray en noz guerres, ie le condamneray plus asprement, fleurissant & prospere. Il fera pour me concilier aucunement à soy quand ie le verray miserable & accablé. Combien volontiers ie considere la belle humeur

de Chelonis, fille & femme de Roys de Sparte ! Pendant que Cleombrotus son mary, aux desordres de sa ville, eut auantage sur Leonidas son pere, elle fit la bonne fille : se r'allie avec son pere, en son exil, en sa misere, s'opposant au victorieux. La chance vint elle à tourner ? la voila changée de vouloir avec la fortune, se rangeant courageusement à son mary : lequel elle suiuit par tout, où sa ruine le porta : n'ayant ce me semble autre choix, que de se ietter au party, où elle faisoit le plus de besoin, & où elle se monstroient plus pitoyable. Je me laisse plus naturellement aller apres l'exemple de Flaminius, qui se prestoit à ceux qui auoyent besoin de luy, plus qu'à ceux qui luy pouuoient bien-faire : que ie ne fais à celuy de Pyrrhus, propre à s'abaisser sous les grands, & à s'enorgueillir sur les petits. Les longues tables m'ennuyent, & me nuisent : car soit pour m'y estre accoustumé enfant, à faute de meilleure contenance, ie mange autant que i'y suis. Pourtant chez moy, quoy qu'elle soit des courtes, ie m'y mets volontiers vn peu apres les autres ; sur la forme d'Auguste : mais ie ne l'imite pas, en ce qu'il en sortoit aussi auant les autres. Au rebours, i'ayme à me reposer long temps apres, & en ouyr comter : pourueu que ie ne m'y melle point ; car ie me lasse & me blesse de parler, l'estomach plain : autant comme ie trouue l'exercice de crier, & contester, auant le repas, tresalubre & plaissant. Les anciens Grecs & Romains auoyent meilleure raison que nous, assignans à la nourriture, qui est vne action principale de la vie, si autre extraordinaire occupation ne les en diuertissoit, plusieurs heures, & la meilleure partie de la nuit : mangeans & beuuans moins hastiuement que nous, qui passons en poste toutes noz actions :

& estendans ce plaisir naturel, à plus de loisir & d'usage, y entrefemans diuers offices de conuersation, vtils & agreables. Ceux qui doiuent auoir soing de moy, pourroyent à bon marché me desrober ce qu'ils pensent m'estre nuisible : car en telles choses, ie ne desire iamais, ny ne trouue à dire, ce que ie ne vois pas : mais aussi de celles qui se presentent, ils perdent leur temps de m'en prescher l'abstinence. Si que quand ie veux ieusner, il me faut mettre à part des soupeurs ; & qu'on me presente iustement, autant qu'il est besoin pour vne reglée collation : car si ie me mets à table, j'oublie ma resolution. Quand j'ordonne qu'on change d'apprest à quelque viande ; mes gens scauent, que c'est à dire, que mon appetit est allanguy, & que ie n'y toucheray point. En toutes celles qui le peuuent souffrir, ie les ayme peu cuittes. Et les ayme fort mortifiées : & iusques à l'alteration de la senteur, en plusieurs. Il n'y a que la dureté qui generalmente me fasche (de toute autre qualité, ie suis aussi nonchalant & souffrant qu'homme que j'aye cogneu) si que contre l'humeur commune, entre les poissons mesme, il m'aduient d'en trouuer, & de trop frais, & de trop fermes. Ce n'est pas la faute de mes dents, que j'ay eu tousiours bonnes iusques à l'excellence ; & que l'age ne commence de menasser qu'à cette heure. J'ay apprins dès l'enfance, à les frotter de ma seruiette, & le matin, & à l'entrée & issuë de la table. Dieu fait grace à ceux à qui il soustrait la vie par le menu. C'est le seul benefice de la vieillesse. La derniere mort en sera d'autant moins plaine & nuisible : elle ne tuera plus qu'un demy, ou un quart d'homme. Voila une dent qui me vient de choir, sans douleur, sans effort : c'estoit le terme naturel de sa durée. Et cette partie de mon estre,

& plusieurs autres, sont desia mortes, autres demy mortes, des plus actiues, & qui tenoyent le premier rang pendant la vigueur de mon aage. C'est ainsi que ie fons, & eschappe à moy. Quelle bestise fera-ce à mon entendement, de sentir le sault de cette cheute, desia si auancée, comme si elle estoit entiere? Ie ne l'espere pas. A la verité, ie reçois vne principale consolation aux pensées de ma mort, qu'elle soit des iustes & naturelles : & que mes-huy ie ne puisse en cela, requerir ni esperer de la destinée, faueur qu'illegitime. Les hommes se font accroire, qu'ils ont eu autres-fois, comme la stature, la vie aussi plus grande. Mais ils se trompent : & Solon, qui est de ces vieux temps-là, en taille pourtant l'extreme durée à soixante & dix ans. Moy qui ay tant adoré & si uniuerellement cet ἀριστον μέτρον, du temps passé : & qui ay tant pris pour la plus parfaite, la moyenne mesure : pretendray-ie vne desmesurée & prodigieuse vieillesse? Tout ce qui vient au reuers du cours de nature, peut estre faicheux : mais ce, qui vient selon elle, doit estre tousiours plaissant. *Omnia, quæ secundum naturam fiunt, sunt habenda in bonis.* Par ainsi, dit Platon, la mort, que les playes ou maladies apportent, soit violente : mais celle, qui nous surprend, la vieillesse nous y conduisant, est de toutes la plus legere, & aucunement delicieuse. *Vitam adolescentibus, vis aufert, senibus maturitas.* La mort se melle & confond par tout à nostre vie : le declin prœoccupe son heure, & s'ingere au cours de nostre auancement mesme. I'ay des portraits de ma forme de vingt & cinq, & de trente cinq ans : ie les compare avec celuy d'asteure. Combien de fois, ce n'est plus moy : combien est mon image presente plus esloignée de celles là, que de celle de mon trespas. C'est

trop abusé de nature, de la tracasser si loing, qu'elle soit contrainte de nous quitter : & abandonner nostre conduite, nos yeux, nos dens, nos iambes, & le reste, à la mercy d'un secours estranger & mandié : & nous resigner entre les mains de l'art, las de nous suyure. Je ne suis excessivement desireux, ny de salades, ny de fruits : sauf les melons. Mon pere haïssoit toute sorte de sauces, ie les ayme toutes. Le trop manger m'empesche : mais par sa qualité, ie n'ay encore cognoissance bien certaine, qu'aucune viande me nuise : comme aussi ie ne remarque, ny lune plaine, ny basse, ny l'automne du printemps. Il y a des mouuemens en nous, inconstans & incognuz. Car des refors, pour exemple, ie les ay trouuez premierement commodes, depuis fascheux, à present de rechef commodes. En plusieurs choses, ie sens mon estomach & mon appetit aller ainsi diuersifiant. J'ay rechangé du blanc au claret, & puis du claret au blanc. Je suis friand de poisson, & fais mes iours gras des maigres : & mes festes des iours de ieufne. Je croy ce qu'aucuns disent, qu'il est de plus aisée digestion que la chair. Comme ie fais conscience de manger de la viande, le iour de poisson : aussi fait mon goust, de mesler le poisson à la chair. Cette diuersité me semble trop eslongnée. Dès ma ieunesse, ie desfrobois par fois quelque repas : ou à fin d'esguiser mon appetit au lendemain (car comme Epicurus ieufnoit & faisoit des repas maigres, pour accoustumer sa volupté à se passer de l'abondance : moy au rebours, pour dresser ma volupté, à faire mieux son profit, & se seruir plus alaiement, de l'abondance) ou ie ieufnois, pour conseruer ma vigueur au seruice de quelque action de corps ou d'esprit : car & l'un & l'autre, s'appareille cruelle-

ment en moy, par la repletion : (& sur tout, ie hay ce sot accouplage, d'une Deesse si faine & si alegre, avec ce petit Dieu indigest & roteur, tout bouffy de la fumée de sa liqueur) ou pour guarir mon estomach malade : ou pour estre sans compaignie propre. Car ie dy comme ce mesme Epicurus, qu'il ne faut pas tant regarder ce qu'on mange, qu'avec qui on mange. Et loué Chilon, de n'auoir voulu promettre de se trouuer au festin de Periander, auant que d'estre informé, qui estoient les autres conuiez. Il n'est point de si doux apprest pour moy, ny de sauce si appetissante, que celle qui se tire de la societé. Je croys qu'il est plus sain, de manger plus bellement & moins : & de manger plus souuent. Mais ie veux faire valoir l'appetit & la faim : ie n'aurois nul plaisir à trainer à la medecinale, trois ou quatre chetifs repas par iour, ainsi contrains. Qui m'asseurerait que le goust ouuert, que j'ay ce matin, ie le retrouuasse encore à souper ? Prenons, sur tout les vieillards : le premier temps opportun qui nous vient. Laissions aux faiseurs d'almanachs les esperances & les prognostiques. L'extreme fruit de ma santé, c'est la volupté : tenons nous à la premiere presente & cognüe. L'euite la constance en ces loix de ieunesse. Qui veut qu'une forme luy serue, fuye à la continuer : nous nous y durcisons, nos forces s'y endorment : six mois apres, vous y aurez si bien acoquiné vostre estomach, que vostre proffit, ce ne fera que d'auoir perdu la liberté d'en user autrement sans dommage. Je ne porte les iambes, & les cuisses, non plus couuertes en hyuer qu'en esté, vn bas de soye tout simple. Je me suis laissé aller pour le secours de mes reumes, à tenir la teste plus chaude, & le ventre, pour ma colique. Mes

maux s'y habituerent en peu de iours, & desdaignerent mes ordinaires prouisions. I'estois monté d'une coiffe à vn couurechef, & d'un bonnet à vn chapeau double. Les embourreures de mon pourpoint, ne me seruent plus que de galbe : ce n'est rien : si ie n'y adiousté vne peau de lieure ou de vautour : vne calote à ma teste. Suyez cette gradation, vous irez beau train. Je n'en feray rien. Et me dedirois volontiers du commencement que i'y ay donné, si i'osois. Tombez vous en quelque inconuenient nouveau? cette reformation ne vous sert plus : vous y estes accoustumé, cherchez en vne autre. Ainsi se ruinent ceux qui se laissent empestre à des regimes contraincts, & s'y astreignent superstitieusement : il leur en faut encore, & encore apres, d'autres au delà : ce n'est iamais fait. Pour nos occupations, & le plaisir : il est beaucoup plus commode, comme faisoient les anciens, de perdre le dîner, & remettre à faire bonne chere à l'heure de la retraite & du repos, sans rompre le iour : ainsi le faisois-je autresfois. Pour la santé, ie trouue depuis par experience au contraire, qu'il vaut mieux dîner, & que la digestion se fait mieux en veillant. Je ne suis guere subiect à estre alteré ny sain ny malade : i'ay bien volontiers lors la bouche seche, mais sans soif. Et communement, ie ne bois que du desir qui m'en vient en mangeant, & bien auant dans le repas. Je bois assez bien, pour vn homme de commune façon. En esté, & en vn repas appetissant, ie n'outrepasse point seulement les limites d'Auguste, qui ne beuuoit que trois fois precisement : mais pour n'offenser la regle de Democritus, qui deffendoit de s'arrester à quatre, comme à vn nombre mal fortuné, ie coule à vn besoing, iusques à cinq : trois

demyfetierys, enuiron. Car les petis verres sont les miens fauoris : & me plaist de les vuidier, ce que d'autres eurent comme chose mal seante. Je trempe mon vin plus souuent à moitié, par fois au tiers d'eau. Et quand ie suis en ma maison, d'un ancien vsage que son medecin ordonnoit à mon pere, & à soy, on mesle celuy qu'il me faut, des la sommellerie, deux ou trois heures auant qu'on serue. Ils disent, que Cranaus Roy des Atheniens fut inuenteur de cet vsage, de tremper le vin : vtilement ou non, i'en ay veu debattre. L'estime plus decent & plus sain, que les enfans n'en vsent qu'apres seize ou dix-huict ans. La forme de viure plus vsitée & commune, est la plus belle. Toute particularité, m'y semble à euitier : & haïrois autant vn Aleman qui mist de l'eau au vin, qu'un François qui le bueroit pur. L'vsage publicq donne loy à telles choses. Je crains vn air empesché, & fuys mortellement la fumée : (la premiere reparation où ie courus chez moy, ce fut aux cheminées, & aux retraicts, vice commun des vieux bastimens, & insupportable) & entre les difficultez de la guerre, comte ces espaisfes pouffieres, dans lesquelles on nous tient enterrez au chault, tout le long d'une iournée. I'ay la respiration libre & aysée : & se passent mes morfondemens le plus souuent sans offence du poulmon, & sans toux. L'aspreté de l'esté m'est plus ennemie que celle de l'hyuer : car outre l'incommodité de la chaleur, moins remediable que celle du froid, & outre le coup que les rayons du soleil donnent à la teste : mes yeux s'offencent de toute lueur esclatante : ie ne scaurois à cette heure disner assiz, vis à vis d'un feu ardent, & lumineux. Pour amortir la blancheur du papier, au temps que i'auois plus

accoustumé de lire, ie couchois sur mon liure, vne piece de verre, & m'en trouuois fort soulagé. L'ignore iusques à present, l'usage des lunettes : & vois aussi loing, que ie fis onques, & que tout autre. Il est vray, que sur le declin du iour, ie commence à sentir du trouble, & de la foiblesse à lire : dequoy l'exercice a tousiours trauaillé mes yeux : mais sur tout nocturne. Voyla vn pas en arriere : à toute peine sensible. Je reculeray d'un autre ; du second au tiers, du tiers au quart, si coïement qu'il me faudra estre aueugle formé, auant que ie sente la decadence & vieillesse de ma veuë. Tant les Parques destordent artificiellement nostre vie. Si suis-je en doute, que mon ouïe marchande à s'espaisir : & verrez que ie l'auray demy perdue, que ie m'en prendray encore à la voix de ceux qui parlent à moy. Il faut bien bander l'ame, pour luy faire sentir, comme elle s'escoule. Mon marcher est prompt & ferme : & ne sçay lequel des deux, ou l'esprit ou le corps, i'ay arresté plus mal-aisément, en mesme point. Le prescheur est bien de mes amys, qui oblige mon attention, tout vn sermon. Aux lieux de ceremonie, où chacun est si bandé en contenance, où i'ay veu les dames tenir leurs yeux mesmes si certains, ie ne suis iamais venu à bout, que quelque piece des miennes n'extrauague tousiours : encore que i'y fois assis, i'y suis peu rassis. Comme la chambriere du Philosophe Chrysippus, disoit de son maistre, qu'il n'estoit yure que par les iambes : car il auoit cette coustume de les remuer, en quelque assiette qu'il fust : & elle le disoit, lors que le vin esmouuant ses compaignons, luy n'en sentoit aucune alteration. On a peu dire aussi dès mon enfance, que i'auoy de la follie aux pieds, ou

de l'argent vif : tant i'y ay de remuement & d'inconſtance naturelle, en quelque lieu, que ie les place. C'eſt indecence, outre ce qu'il nuit à la ſanté, voire & au plaifir, de manger gouluement, comme ie fais. Ie mors fouuent ma langue, par fois mes doigts, de haſtiueté. Diogenes, rencontrant vn enfant qui mangeoit ainſin, en donna vn foufflet à ſon precepteur. Il y auoit des hommes à Rome, qui enſeignoient à maſcher, comme à marcher, de bonne grace. I'en pers le loifir de parler, qui eſt vn ſi doux aſſaiſonnement des tables, pourueu que ce ſoyent des propos de meſme, plaifans & courts. Il y a de la ialouſie & enuie entre nos plaifirs, ils ſe choquent & empeschent l'vn l'autre. Alcibiades, homme bien entendu à faire bonne chere, chaffoit la muſique meſme des tables, pour qu'elle ne troublaſt la douceur des deuils, par la raiſon, que Platon luy preſte, Que c'eſt vn vſage d'hommes populaires, d'appeller des ioüeurs d'inſtruments & des chantes aux feſtins, à faute de bons diſcours & agreables entretiens, dequoy les gens d'entendement ſçauent s'entrefeſtoyer. Varro demande cecy au conuiue : l'aſſemblée de perſonnes belles de preſence, & agreables de conuerſation, qui ne ſoyent ny muets ny bauarts : netteré & delicateſſe aux viures, & au lieu : & le temps ſerein. Ce n'eſt pas vne feſte peu artificielle, & peu voluptueuſe, qu'un bon traitement de table. Ny les grands chefs de guerre, ny les grands philoſophes, n'en ont deſdaigné l'vſage & la ſcience. Mon imagination en a donné trois en garde à ma memoire, que la fortune me rendit de ſouueraine douceur, en diuers temps de mon aage plus fleuriffant. Mon eſtat preſent m'en forcloſt. Car chacun pour ſoy y fournit de grace principale, & de

faueur, selon la bonne trampe de corps & d'ame, en quoy lors il se trouue. Moy qui ne manie que terre à terre, hay cette inhumaine sapience, qui nous veut rendre desdaigneux & ennemis de la culture du corps. L'estime pareille iniustice, de prendre à contre cœur les voluptez naturelles, que de les prendre trop à cœur. Xerxes estoit vn fat, qui enue-loppé en toutes les voluptez humaines, alloit proposer prix à qui luy en trouueroit d'autres. Mais non guere moins fat est celuy, qui retranche celles, que nature luy a trouuées. Il ne les faut ny suyure ny fuyr : il les faut receuoir. Je les reçois vn peu plus graffement & gratieusement, & me laisse plus volontiers aller vers la pente naturelle. Nous n'auons que faire d'exaggerer leur inanité : elle se fait assez sentir, & se produit assez. Mercy à nostre esprit maladif, rabat-ioye, qui nous desgoute d'elles, comme de foy-mesme. Il traite & foy, & tout ce qu'il reçoit, tantost auant, tantost arriere, selon son eitre infatiable, vagabond & versatile :

Sincerum est nisi vas, quodcunque infundis, acescit.

Moy, qui me vente d'embrasser si curieusement les commoditez de la vie, & si particulièrement : n'y trouue, quand i'y regarde ainsi finement, à peu pres que du vent. Mais quoy ? nous sommes par tout vent. Et le vent encore, plus sagement que nous s'ayme à bruire, à s'agiter : & se contente en ses propres offices : sans desirer la stabilité, la solidité, qualitez non siennes. Les plaisirs purs de l'imagination, ainsi que les desplaisirs, disent aucuns, sont les plus grands : comme l'exprimoit la balance de Critolaüs. Ce n'est pas merueille. Elle les compose à sa

poste, & se les taille en plein drap. I'en voy tous les iours, des exemples insignes, & à l'adventure desirables. Mais moy, d'une condition mixte, grossier, ne puis mordre si à fait, à ce seul objet, si simple : que ie ne me laisse tout lourdement aller aux plaisirs presents, de la loy humaine & generale. Intellectuellement sensibles, sensiblement intellectuels. Les philosophes Cyrenaiques veulent, que comme les douleurs, aussi les plaisirs corporels soyent plus puissants : & comme doubles, & comme plus iustes. Il en est, comme dit Aristote, qui d'une farouche stupidité, en font les desgoustez. I'en cognoy d'autres qui par ambition le font. Que ne renoncent ils encore au respirer ? que ne vivent-ils du leur, & ne refusent la lumiere, de ce qu'elle est gratuite : ne leur coutant ny inuention ny vigueur ? Que Mars, ou Pallas, ou Mercure, les substantent pour voir, au lieu de Venus, de Cerez, & de Bacchus. Chercheront ils pas la quadrature du cercle, iuchez sur leurs femmes ? Ie hay, qu'on nous ordonne d'auoir l'esprit aux nues, pendant que nous auons le corps à table. Ie ne veux pas que l'esprit s'y clouë, ny qu'il s'y veautre : mais ie veux qu'il s'y applique : qu'il s'y see, non qu'il s'y couche. Aristippus ne defendoit que le corps, comme si nous n'auions pas d'ame : Zenon n'embrassoit que l'ame, comme si nous n'auions pas de corps. Touts deux vicieusement. Pythagoras, disent-ils, a fuiuy vne philosophie toute en contemplation : Socrates, toute en mœurs & en action : Platon en a trouué le temperament entre les deux. Mais ils le disent, pour en conter. Et le vray temperament se trouue en Socrates ; & Platon est plus Socratique, que Pythagorique : & luy sied mieux. Quand ie dance, ie dance : quand ie dors,

ie dors. Voire, & quand ie me promeine solitairement en vn beau verger, si mes pensées se sont entretenues des occurrences estrangeres quelque partie du temps : quelque autre partie, ie les rameine à la promenade, au verger, à la douceur de cette solitude, & à moy. Nature a maternellement obserué cela, que les actions qu'elle nous a enioindres pour nostre besoing, nous fussent aussi voluptueuses. Et nous y conuie, non seulement par la raison : mais aussi par l'appetit : c'est iniustice de corrompre ses regles. Quand ie vois, & Cæsar, & Alexandre, au plus espaiz de sa grande besongne, iouir si plainement des plaisirs humains & corporels, ie ne dis pas que ce soit relascher son ame, ie dis que c'est la roidir : soufmettant par vigueur de courage, à l'usage de la vie ordinaire, ces violentes occupations & laborieuses pensées. Sages, s'ils eussent creu, que c'estoit là leur ordinaire vocation, cette-cy, l'extraordinaire. Nous sommes de grands fols. Il a passé sa vie en oisiveté, disons-nous : ie n'ay rien fait d'aujourd'huy. Quoy ? auez-vous pas vescu ? C'est non seulement la fondamentale, mais la plus illustre de vos occupations. Si on m'eust mis au propre des grands maneiements, i'eusse montré ce que ie scauoy faire. Auez vous sceu mediter & manier vostre vie ? vous auez fait la plus grande besoigne de toutes. Pour se montrer & exploicter, nature n'a que faire de fortune. Elle se montre egallement en tous estages : & derriere, comme sans rideau. Auez-vous sceu composer vos mœurs : vous auez bien plus fait que celuy qui a composé des liures. Auez-vous sceu prendre du repos : vous auez plus fait, que celuy qui a pris des Empires & des villes. Le glorieux chef-d'œuvre de l'homme, c'est viure à

propos. Toutes autres choses : regner, thesauriser, bastir, n'en font qu'appendicules & adminicules, pour le plus. Je prens plaisir de voir vn general d'armée au pied d'une breche qu'il veut tantost attaquer, se prestant tout entier & deliure, à son disner, au deuis, entre ses amis. Et Brutus, ayant le ciel & la terre conspirez à l'encontre de luy, & de la liberté Romaine, desrober à ses rondes, quelque heure de nuit, pour lire & breueter Polybe en toute securité. C'est aux petites ames enseuelies du poix des affaires, de ne s'en sçauoir purement desmesler : de ne les sçauoir & laisser & reprendre.

*O fortes peiorâque passi,
Mecum sâpe viri, nunc vino pellite curas,
Gras ingens iterabimus æquor.*

Soit par gossérie, soit à certes, que le vin theologal & Sorbonique est passé en prouerbe, & leurs festins : ie trouue que c'est raison, qu'ils en disnent d'autant plus commodément & plaifamment, qu'ils ont vtilement & serieusement employé la matinée à l'exercice de leur eschole. La conscience d'auoir bien dispensé les autres heures, est vn iuste & sauoureux condiment des tables. Ainsin ont vescu les sages. Et cette inimitable contention à la vertu, qui nous estonne en l'un & l'autre Caton, cette humeur seuerie iusques à l'importunité, s'est ainsi mollement submise, & pleuë aux loix de l'humaine condition, & de Venus & de Bacchus. Suiuant les preceptes de leur secte, qui demandent le sage parfait, autant expert & entendu à l'usage des voluptez qu'en tout autre deuoir de la vie. *Cui cor sapiat, ei & sapiat palatus.* Le relaschement & facilité, honore ce

semble à merueilles, & sied mieux à vne ame forte & genereuse. Epaminondas n'estimoit pas que de se mesler à la dance des garçons de la ville, de chanter, de sonner, & s'y embesongner avec attention, fust chose qui desfrogeast à l'honneur de ses glorieuses victoires, & à la parfaite reformation des mœurs qui estoit en luy. Et parmy tant d'admirables actions de Scipion l'ayeul, personnage digne de l'opinion d'une geniture celeste, il n'est rien qui luy donne plus de grace, que de le voir nonchalamment & puerilement baguenaudant à amasser & choisir des coquilles, & iouer à cornichon va deuant, le long de la marine avec Lælius. Et s'il faisoit mauuais temps, s'amusant & se chatouillant, à représenter par escript en comedies, les plus populaires & basses actions des hommes. Et la teste pleine de cette merueilleuse entreprinse d'Annibal & d'Afrique; visitant les escholes en Sicile, & se trouuant aux leçons de la philosophie, iusques à en auoir armé les dents de l'aueugle enuie de ses ennemis à Rome. Ny chose plus remarquable en Socrates, que ce que tout vieil, il trouue le temps de se faire instruire à baller, & iouer des instrumens : & le tient pour bien employé. Cettuy-cy, s'est veu en ecstase debout, vn iour entier & vne nuit, en presence de toute l'armée Grecque, surpris & rauy par quelque profonde pensée. Il s'est veu le premier parmy tant de vaillants hommes de l'armée, courir au secours d'Alcibiades, accablé des ennemis : le couvrir de son corps, & le descharger de la presse, à viue force d'armes. En la bataille Delienne, releuer & sauuer Xenophon, renuersé de son cheual. Et emmy tout le peuple d'Athenes, outré, comme luy, d'un si indigne spectacle, se presenter le premier à recourir Thera-

menes, que les trente tyrans faisoient mener à la mort par leurs satellites : & ne desista cette hardie entreprinse, qu'à la remontrance de Theramenes mesme : quoy qu'il ne fust suiuy que de deux, en tout. Il s'est veu, recherché par vne beauté, de laquelle il estoit espris, maintenir au besoing vne seuer abstinence. Il s'est veu continuellement marcher à la guerre, & fouler la glace les pieds nuds; porter mesme robbe en hyuer & en esté : surmonter tous ses compaignons en patience de trauail, ne manger point autrement en festin qu'en son ordinaire. Il s'est veu vingt. & sept ans, de pareil visage, porter la faim, la pauureté, l'indocilité de ses enfans, les griffes de sa femme. Et en fin la calomnie, la tyrannie, la prison, les fers, & le venin. Mais cet homme là estoit-il conuié de boire à luy par deuoir de ciuilité? c'estoit aussi celuy de l'armée, à qui en demeueroit l'aduantage. Et ne refusoit ny à iouer aux noisettes avec les enfans, ny à courir avec eux sur vn cheual de bois, & y auoit bonne grace : car toutes actions, dit la philosophie, sient egallement bien & honnoient egallement le sage. On a dequoy, & ne doit-on iamais se laisser de presenter l'image de ce personnage à tous patrons & formes de perfection. Il est fort peu d'exemples de vie, pleins & purs. Et fait-on tort à nostre instruction, de nous en proposer tous les iours, d'imbecilles & manques : à peine bons à vn seul ply : qui nous tirent arriere plustost : corrupteurs plustost que correcteurs. Le peuple se trompe : on va bien plus facilement par les bouts, où l'extremité sert de borne, d'arrest & de guide, que par la voye du milieu large & ouuerte, & selon l'art, que selon nature; mais bien moins noblement aussi, & moins recommandablement. La

grandeur de l'ame n'est pas tant, tirer à mont, & tirer auant, comme sçauoir se ranger & circonscrire. Elle tient pour grand, tout ce qui est assez. Et montre sa hauteur, à aimer mieux les choses moyennes, que les eminentes. Il n'est rien si beau & legitime, que de faire bien l'homme & deuëment. Ny science si arduë que de bien sçauoir viure cette vie. Et de nos maladies la plus sauuage, c'est mespriser nostre estre. Qui veut escarter son ame, le face hardiment s'il peut, lors que le corps se portera mal, pour la descharger de cette contagion. Ailleurs au contraire : qu'elle l'assiste & fauorise, & ne refuse point de participer à ses naturels plaisirs, & de s'y complaire coniugalement : y apportant, si elle est plus sage, la moderation, de peur que par indiscretion, ils ne se confondent avec le desplaisir. L'intemperance, est peste de la volupté : & la temperance n'est pas son fleau : c'est son assaisonnement. Eudoxus, qui en establissoit le souuerain bien, & ses compaignons, qui la monterent à si haut prix, la fauorerent en sa plus gracieuse douceur, par le moyen de la temperance, qui fut en eux singuliere & exemplaire. L'ordonne à mon ame, de regarder & la douleur, & la volupté, de veuë pareillement réglée : *eodem enim vitio est effusio animi in lætitia, quo in dolore contractio* : & pareillement ferme : mais gayement l'une, l'autre seuerement. Et selon ce qu'elle y peut apporter, autant soigneuse d'en esteindre l'une, que d'estendre l'autre. Le voir sainement les biens, tire apres soy le voir sainement les maux. Et la douleur a quelque chose de non euitable, en son tendre commencement : & la volupté quelque chose d'euitable en sa fin excessiue. Platon les accouple : & veut, que ce soit pareillement l'office de la fortitude combattre à l'en-

contre de la douleur, & à l'encontre des immodérées & charmeresses blandices de la volupté. Ce sont deux fontaines, ausquelles, qui puise, d'où, quand & combien il faut, soit cité, soit homme, soit beste, il est bien heureux. La première, il la faut prendre par médecine & par nécessité, plus escharnement : l'autre par soif, mais non iusques à l'yvresse. La douleur, la volupté, l'amour, la haine, sont les premières choses, que sent vn enfant : si la raison suruenant elles s'appliquent à elle : cela c'est vertu. J'ay vn dictionnaire tout à part moy : ie passe le temps, quand il est mauuais & incommode; quand il est bon, ie ne le veux pas passer, ie le retasse, ie m'y tiens. Il faut courir le mauuais, & se rassoir au bon. Cette fraze ordinaire de passe-temps, & de passer le temps, represente l'usage de ces prudentes gens, qui ne pensent point auoir meilleur conte de leur vie, que de la couler & eschaper : de la passer, gauchir, & autant qu'il est en eux, ignorer & fuir; comme chose de qualité ennuyeuse & desdaignable. Mais ie la cognois autre : & la trouue, & prifable & commode, voire en son dernier decours, où ie la tiens. Et nous l'a nature mise en main, garnie de telles circonstances & si fauorables, que nous n'auons à nous plaindre qu'à nous, si elle nous presse; & si elle nous eschappe inutilement. *Stulti vita ingrata est, trepida est, tota in futurum fertur.* Ie me compose pourtant à la perdre sans regret : mais comme perdable de sa condition, non comme moleste & importune. Aussi ne sied-il proprement bien, de ne se desplaire à mourir qu'à ceux, qui se plaisent à viure. Il y a du mesnage à la iouyr : ie la iouis au double des autres : car la mesure en la iouissance, depend du plus ou moins d'application, que nous y

prestons. Principalement à cette heure, que i'apperçoy la mienne si briefue en temps, ie la veux estendre en poix. Je veux arrester la promptitude de sa fuite par la promptitude de ma faisie : & par la vigueur de l'usage, compenser la hastiueté de son escoulement. A mesure que la possession du viure est plus courte, il me la faut rendre plus profonde, & plus pleine. Les autres sentent la douceur d'un contentement, & de la prospérité : ie la sens ainsi qu'eux : mais ce n'est pas en passant & glissant. Si la faut-il estudier, fauourer & ruminer, pour en rendre graces condignes à celuy qui nous l'ottroye. Ils iouyssent les autres plaisirs, comme ils font celuy du sommeil, sans les cognoistre. A celle-fin que le dormir mesme ne m'eschappast ainsi stupidement, i'ay autresfois trouué bon qu'on me le troublast, afin que ie l'entreuiffe. Je consulte d'un contentement avec moy ; ie ne l'escume pas, ie le sonde, & plie ma raison à le recueillir, deuenüe chagrine & desgoustée. Me trouué-ie en quelque assiette tranquille, y a il quelque volupté qui me chatouille, ie ne la laisse pas friponner aux sens ; i'y associe mon ame. Non pas pour s'y engager, mais pour s'y agreer ; non pas pour s'y perdre, mais pour s'y trouuer. Et l'employe de sa part, à se mirer dans ce prospere estat, à en poiser & estimer le bon-heur, & l'amplifier. Elle mesure combien c'est qu'elle doit à Dieu, d'estre en repos de sa conscience & d'autres passions intestines ; d'auoir le corps en sa disposition naturelle : iouissant ordonnément & competemment, des fonctions molles & flateuses, par lesquelles il luy plaist compenser de sa grace, les douleurs, dequoy sa iustice nous bat à son tour. Combien luy vaut d'estre logee en tel point, que où qu'elle iette sa veuë, le ciel est calme

autour d'elle : nul desir, nulle crainte ou doute, qui luy trouble l'air : aucune difficulté passée, presente, future, par dessus laquelle son imagination ne passe sans offence. Cette consideration prend grand lustre de la comparaison des conditions differentes. Ainsi, ie me propose en mille visages, ceux que la fortune, ou que leur propre erreur emporte & tempeste. Et encores ceux cy plus pres de moy, qui reçoivent si laschement, & incurieusement leur bonne fortune. Ce sont gens qui passent voirement leur temps; ils outrepassent le present, & ce qu'ils possèdent, pour servir à l'esperance, & pour des ombrages & vaines images, que la fantasie leur met au deuant,

*Morte obita quales fama est volitare figuras,
Aut quæ sopitos deludunt somnia sensus;*

lesquelles hastent & allongent leur fuite, à mesme qu'on les suit. Le fruit & but de leur poursuite, c'est poursuiure : comme Alexandre disoit que la fin de son traual, c'estoit traualier.

Nihil actum credens cum quid superesset agendum.

Pour moy donc, j'ayme la vie, & la cultiue, telle qu'il a pleu à Dieu nous l'oſtroyer. Je ne vay pas desirant, qu'elle eust à dire la necessité de boire & de manger. Et me sembleroit faillir non moins excusablement, de desirer qu'elle l'eust double. *Sapiens diuitiarum naturalium quæstitor acerrimus.* Ny que nous nous substantassions, mettans seulement en la bouche vn peu de cette drogue par laquelle Epimenides se priuoit d'appetit, & se maintenoit. Ny qu'on produisist stupidement des enfans, par les

doigts, ou par les talons, ains parlant en reuerence, que plustost encores, on les produisist voluptueusement, par les doigts, & par les talons. Ny que le corps fust sans desir & sans chatouillement. Ce sont plaintes ingrates & iniques. L'accepte de bon cœur & recognoissant, ce que nature a fait pour moy : & m'en agree & m'en loue. On fait tort à ce grand & tout puissant donneur, de refuser son don, l'annuller & desfigurer, tout bon, il a fait tout bon. *Omnia quæ secundum naturam sunt; æstimatione digna sunt.* Des opinions de la philosophie, l'embrace plus volontiers celles qui sont les plus solides : c'est à dire les plus humaines, & nostres. Mes discours sont conformément à mes mœurs, bas & humbles. Elle fait bien l'enfant à mon gré, quand elle se met sur ses ergots, pour nous prescher. Que c'est vne farouche alliance, de marier le diuin avec le terrestre, le raisonnable avec le defraisonnable, le seure à l'indulgent, l'honneste au def-honneste. Que la volupté, est qualité brutale, indigne que le sage la goust. Le seul plaisir, qu'il tire de la iouissance d'une belle ieune espouse, que c'est le plaisir de sa conscience, de faire vne action selon l'ordre. Comme de chauffer ses bottes pour vne vtile cheuauchee. N'eussent ses suyans, non plus de droit, & de nerfs, & de fuc, au despucelage de leurs femmes, qu'en a sa leçon. Ce n'est pas ce que dict Socrates, son precepteur & le nostre. Il prise, comme il doit, la volupté corporelle : mais il prefere celle de l'esprit, comme ayant plus de force, de constance, de facilité, de varieté, de dignité. Cette cy ne va nullement seule, selon luy ; il n'est pas si fantastique : mais seulement, premiere. Pour luy, la temperance est moderatrice, non aduerfaire des voluptez. Nature

est vn doux guide : mais non pas plus doux, que prudent & iuste. *Intrandum est in rerum naturam, & penitus quid ea postulet, peruidendum.* Le queste par tout sa piste : nous l'auons confondüe de traces artificielles. Et ce souuerain bien Academique, & Peripatetique, qui est viure selon icelle : deuient à cette cause difficile à borner & expliquer. Et celuy des Stoïciens, voisin à celuy-là, qui est, consentir à nature. Est-ce pas erreur, d'estimer aucunes actions moins dignes de ce qu'elles sont necessaires? Si ne m'osteront-ils pas de la teste, que ce ne soit vn tres-conuenable mariage, du plaisir avec la necessité, avec laquelle, dit vn ancien, les Dieux complottent tousiours. A quoy faire desmembrons nous en diuorce, vn bastiment tissü d'vne si ioincte & fraternelle correspondance? Au rebours, renouons le par mutuels offices : que l'esprit esueille & viuifie la pesanteur du corps, le corps arreste la legereté de l'esprit, & la fixe. *Qui velut summum bonum, laudat animæ naturam, & tanquam malum, naturam carnis accusat, profectò & animam carnaliter appetit, & carnem carnaliter fugit, quoniam id vanitate sentit humana, non veritate diuina.* Il n'y a piece indigne de nostre soing, en ce present que Dieu nous a fait : nous en deuons comte iusques à vn poil. Et n'est pas vne commission par acquit à l'homme, de conduire l'homme selon sa condition. Elle est expresse, naïfue & tres-principale : & nous l'a le Createur donnee serieusement & feuerement. L'autorité peut seule enuers les communs entendemens : & poise plus en langage peregrin. Reschargeons en ce lieu. *Stultitia proprium quis non dixerit, ignauè & contumaciter facere quæ facienda sunt : & aliò corpus impellere, aliò animum : distrahi que inter diuersissimos motus?* Or sus pour

voir, faites vous dire vn iour, les amusemens & imaginations, que celuy-là met en sa teste, & pour lesquelles il destourne sa pensée d'un bon repas, & plainct l'heure qu'il employe à se nourrir : vous trouuerez qu'il n'y a rien si fade, en tous les mets de vostre table, que ce bel entretien de son ame (le plus souuent il nous vaudroit mieux dormir tout à fait, que de veiller à ce, à quoy nous veillons) & trouuerez que son discours & intentions, ne valent pas vostre caprotade. Quand ce seroient les rauiffemens d'Archimedes mesme, que seroit-ce ? Je ne touche pas icy, & ne mesle point à cette marmaille d'hommes que nous sommes, & à cette vanité de desirs & cogitations, qui nous diuertissent, ces ames venerables, esleuees par ardeur de deuotion & religion, à vne constante & consciencieuse meditation des choses diuines, lesquelles preoccupans par l'effort d'une viue & vehemente esperance, l'usage de la nourriture eternelle, but final, & dernier arrest des Chrestiens desirs : seul plaisir constant, incorruptible : desdaignent de s'attendre à nos necessiteuses commoditez, fluides & ambiguës : & resignent facilement au corps, le soin & l'usage, de la pasture sensuelle & temporelle. C'est vn estude priuilegé. Entre nous, ce sont choses, que i'ay tousiours veuës de singulier accord : les opinions supercelestes, & les mœurs sousterraines. Esope ce grand homme vid son maistre qui pissoit en se promenant, Quoy donq, fit-il, nous faudra-il chier en courant ? Mesnageons le temps, encore nous en reste-il beaucoup d'oïsis, & mal employé. Nostre esprit n'a volontiers pas assez d'autres heures, à faire ses besongnes, sans se desaffocier du corps en ce peu d'espace qu'il luy faut pour sa necessité. Ils veulent se mettre hors

d'eux, & eschapper à l'homme. C'est folie : au lieu de se transformer en Anges, ils se transforment en bestes : au lieu de se hauffer, ils s'abbattent. Ces humeurs transcendentes m'effrayent, comme les lieux hautains & inaccessibles. Et rien ne m'est fascheux à digerer en la vie de Socrates, que ses ecstases & ses demoneries. Rien si humain en Platon, que ce pourquoy ils disent, qu'on l'appelle diuin. Et de nos sciences, celles-là me semblent plus terrestres & basses, qui sont les plus haut montees. Et ie ne trouue rien si humble & si mortel en la vie d'Alexandre, que ses fantasies autour de son immortalisation. Philotas le mordit plaisamment par sa responce. Il s'estoit coniouy avec luy par lettre, de l'oracle de Iupiter Hammon, qui l'auoit logé entre les Dieux. Pour ta consideration, i'en suis bien ayse : mais il y a dequoy plaindre les hommes, qui auront à viure avec vn homme, & luy obeyr, lequel outrepasse, & ne se contente de la mesure d'un homme. *Diis te minorem quod geris, imperas.* La gentille inscription, dequoy les Atheniens honnorerent la venue de Pompeius en leur ville, se conforme à mon sens :

*D'autant es tu Dieu, comme
Tu te recognois homme.*

C'est vne absoluë perfection, & comme diuine, de sçauoir iouyr loyalement de son estre. Nous cherchons d'autres conditions, pour n'entendre l'usage des nostres : & sortons hors de nous, pour ne sçauoir quel il y fait. Si auons nous beau monter sur des eschaffes, car sur des eschaffes encores faut-il marcher de nos iambes. Et au plus esleué throne du monde, si ne sommes nous assis, que sur nostre cul.

Les plus belles vies, sont à mon gré celles, qui se rangent au modèle commun & humain avec ordre : mais sans miracle, sans extravagance. Or la vieillesse a vn peu besoin d'estre traitée plus tendrement. Recommandons la à ce Dieu, protecteur de santé & de sagesse : mais gaye & sociale :

*Frui paratis & valido mihi
Latoe dones, & precor integra
Cum mente, nec turpem senectam
Degere, nec Cythara carentem.*





LETTRES
DE MONTAIGNE



AVERTISSEMENT



Les Lettres de Montaigne forment le complément naturel des Essais. Elles apportent au livre du philosophe périgourdin un appoint de grande valeur, car elles nous montrent non plus le moraliste dans la liberté de ses observations, mais l'homme dans ses actes au milieu de circonstances déterminées & pressantes. Enfin, quelque peu considérable que soit cette correspondance, elle embrasse une période assez étendue pour nous donner à juger de Montaigne aux moments notables de son existence.

En vue d'une reconstitution plus fidèle du texte, nous en avons fait une révision nouvelle sur les imprimés & sur les manuscrits originaux. De là le contraste

marqué dont tous les lecteurs reconnaîtront les indices entre la première & la seconde partie de la Correspondance de Montaigne. Les lettres antérieures à 1584 ont été tirées des éditions princeps de la traduction de la Religion naturelle de Raymond de Sebonde (1569) et des OEuvres de La Boétie (1572). Elles offrent la correction orthographique dont les maîtres imprimeurs du XVI^e siècle, presque seuls parmi leurs contemporains, s'étudiaient à donner l'exemple, tandis que les gens du monde & même les savants & les écrivains paraissaient y attacher peu d'importance. Sous ce dernier rapport, les lettres de Montaigne reproduites d'après les manuscrits qui nous restent présentent des négligences instructives. Ces incorrections ne sont pas d'ailleurs assez importantes pour obscurcir la pensée de l'auteur, qui au milieu de singularités d'aspect & de vices de forme demeure toujours claire & saisissable.

La vérification des textes manuscrits nous a amenés à rejeter des lettres de Montaigne, celles qui faisaient partie de la collection du marquis du Prat.

En compensation, nous sommes assez heureux pour substituer à des documents faux, des pièces authentiques. Ce sont deux lettres, des 21 janvier & 19 avril 1584, adressées au maréchal de Matignon. L'honneur de cette découverte ne nous revient pas. Il appartient à M. le baron de Boyer de Sainte-Suzanne, qui, sur notre demande, a bien voulu collationner sur les originaux du cartulaire de Monaco la correspondance déjà connue de Montaigne avec le maréchal de Matignon & faire de nouvelles

recherches en vue d'ajouter des lettres inédites aux autographes antérieurement publiés. Nous ne devons pas moins de reconnaissance à S. A. S. le prince de Monaco dont la bienveillance nous permet aujourd'hui de grossir l'œuvre de Montaigne; & tous les bibliophiles uniront leur gratitude à la nôtre.

Mais là ne s'arrêtent point nos obligations. A la suite d'une première lecture dont M. F. Worms s'était gracieusement chargé, sur les manuscrits conservés à Bordeaux, nous avons cru devoir en appeler pour quelques points douteux au contrôle de M. Reinhold Dezeimeris. Cette révision, que l'autorité scientifique de M. Dezeimeris rendait doublement précieuses, nous a été d'une haute utilité. Elle nous a confirmés dans la nécessité de modifier, pour le rendre plus exact, le texte donné par nos devanciers.



1



LETTRES
DE MONTAIGNE

A MONSEIGNEVR,
MONSEIGNEVR DE MONTAIGNE.



MONSEIGNEVR, fuyuant la charge
que vous me donnastes l'année
passée chez vous à Montaigne,
l'ay taillé & dressé de ma main
à Raimond Sebon, ce grand
Theologien & Philosophe Espai-
gnol, vn accoustrement à la Fran-
çoise, & l'ay deuestu, autant qu'il a esté en moy, de
ce port farrouche, & maintien Barbarefque, que

vous luy vîtes premierement : de maniere qu'à mon opinion, il a meshuy assez de façon & d'entre-gent, pour se presenter en toute bonne compaignie. Il pourra bien estre, que les personnes delicates & curieuses y remarqueront quelque traitt, & ply de Gascongne : mais ce leur sera d'autant plus de honte, d'auoir par leur nonchallance laissé prendre sur eulx cest aduantaige, à vn homme de tout point nouueau & aprenty en telle besongne. Or monseigneur, c'est raison que sous vostre nom il se pouffe en credit, & mette en lumiere, puis que il vous doit tout ce que il a d'amendement & reformation. Toutesfois ie voy bien que s'il vous plaist de conter avec luy, ce fera vous qui luy deurez beaucoup de reste : car en change de ses excellens & tres-religieux discours, de ses hautaines conceptions & comme diuines, il se trouuera que vous n'y aurez apporté de vostre part, que des mots & du langage : marchandise si vulgaire & si vile, que qui plus en a, n'en vaut, à l'auanture, que moins.

Monseigneur, ie supplie Dieu, qu'il vous doint treslongue & tresheureuse vie. De Paris ce 18. de Iuin. 1568.

Vostre treshumble & tresobeissant fils,

MICHEL DE MONTAIGNE.





A MONSIEVR 'MONSIEVR DE MESMES,

*Seigneur de Roissy & de Mal-afize,
Conseiller du Roy en son priué Conseil.*



ONSIEVR, c'est vne des plus notables folies que les hommes facent, d'employer la force de leur entendement à ruiner & choquer les opinions communes & receues, qui nous portent de la satisfaction & du contentement.

Car là où tout ce qui est sous le ciel, employe les moyens & les outils que nature luy a mis en main (comme de vray c'en est l'usage) pour l'agencement & commodité de son estre : ceulx icy pour sembler d'un esprit plus gaillard, & plus esueillé, qui ne reçoit & qui ne loge rien que mille fois touché & balancé au plus subtil de la raison, vont esbranlant leurs ames d'une affiete paisible & reposée, pour apres vne longue queste la remplir en somme de doute, d'inquietude, & de fieure. Ce n'est pas sans raison que l'enfance & la simplicité ont esté tant recommandées par la verité mesmes. De ma part i'ayme mieulx estre plus à mon aise, & moins habile : plus content, & moins entendu. Voila pourquoy Monsieur, quoy que des fines gens se mocquent du soing que nous auons de ce qui se

passera icy apres nous, comme nostre ame logec ailleurs, n'ayant plus à se resentir des choses de ça bas : i'estime toutefois que ce soit vne grande consolation à la foiblesse & briueté de ceste vie, de croire qu'elle se puisse fermir & allonger par la reputation & par la renommee : & embrasse tres-volontiers vne si plaisante & fauorable opinion engendree originellement en nous, sans m'enquerir curieusement ny comment ny pourquoi. De maniere que ayant aymé plus que toute autre chose feu Monsieur de la Boetie, le plus grand homme à mon aduis, de nostre siecle, ie penserois lourdement faillir à mon deuoir, si à mon escient le laissois esuanouir & perdre vn si riche nom que le sien, & vne memoire si digne de recommandation, & si ie ne m'effayois par ces parties la, de le resusciter & remettre en vie. Je croy qu'il le sent aucunement, & que ces miens offices le touchent & resiouissent. De vray il se loge encore chez moy si entier & si vif, que ie ne le puis croire ny si lourdement enterré, ny si entierement esloigné de nostre commerce. Or Monsieur, par ce que chaque nouuelle cognoissance que ie donne de luy & de son nom, c'est autant de multiplication de ce sien second viure, & d'auantage que son nom s'enoblit & s'honore du lieu qui le reçoit, c'est à moy à faire non seulement de l'espandre le plus qu'il me sera possible, mais encore de le donner en garde à personnes d'honneur & de vertu : parmy lesquelles vous tenez tel ranc que pour vous donner occasion de recueillir ce nouuel hoste, & de luy faire bonne chere, i'ay esté d'aduis de vous presenter ce petit ouurage, non pour le seruice que vous en puissiez tirer, sçachant bien que à pratiquer Plutarque & ses compaignons, vous

n'avez que faire de truchement : mais il est possible que Madame de Roissy y voyant l'ordre de son mefnage & de vostre bon accord représenté au vif, fera tres-aïse de sentir la bonté de son inclination naturelle auoir non seulement atteint, mais surmontés, ce que les plus sages Philosophes ont peu imaginer du deuoir & des loix du Mariage. Et en toute façon, ce me fera tousiours honneur de pouuoir faire chose qui reuienne à plaisir à vous, ou aux vostres, pour l'obligation que i'ay de vous faire seruice.

Monsieur ie supplie Dieu, qu'il vous doint tres-heureuse & longue vie. De Montaigne ce 30. Aupil, 1570.

Vostre humble Seruiteur

MICHEL DE MONTAIGNE.





A MONSEIGNEVR MONSIEVR DE L'HOSPITAL

Chancellier de France.



ONSEIGNEVR i'ay opinion que vous autres à qui la fortune & la raison ont mis en main le gouvernement des affaires du monde, ne cherchez rien plus curieusement que par où vous puissiez arriuer à la cognoissance des hommes de vos charges : car à peine est-il nullè communauté si chétiue, qui n'aye en soy des hommes assez pour fournir commodément à chascun de ses offices, pourueu que le departement & le triage s'en peust iustement faire. Et ce point la gaigné, il ne resteroit rien pour arriuer à la parfaicte composition d'un estat. Or à mesure que cela est le plus fouhaitable, il est aussi plus difficile, veu que ny voz yeulx ne se peuuent estendre si loing, que de trier & choisir parmy vne si grande multitude & si espandue, ny ne peuuent entrer iusques au fond des cœurs pour y veoir les intentions & la conscience, pieces principales à considerer : de maniere qu'il n'a esté nulle chose publique si bien establie, en laquelle nous ne remerquions souuent la faute de ce departement & de ce choix. Et en celles où

l'ignorance & la malice, le fard, les faueurs, les brigues & la violence commandent, si quelque election se voit faicte meritoirement & par ordre, nous le deuons sans doute à la fortune, qui par l'inconstance de son branle diuers s'est pour ce coup rencontrée au train de la raison. Monsieur ceste consideration m'a souuent consolé sçachant M. Estienne de la Boëtie l'un des plus propres & necessaires hommes aux premieres charges de la France, auoir tout du long de sa vie crouppy, mesprisé es cendres de son foyer domestique, au grand interest de nostre bien commun : car quant au sien particulier, ie vous aduise Monsieur, qu'il estoit si abondamment garny des biens & des thresors qui deffient la fortune, que iamais homme n'a vescu plus satisfait ny plus content. Ie sçay bien qu'il estoit esleué aux dignitez de son quartier qu'on estime des grandes : & sçay d'auantage, que iamais homme n'y apporta plus de suffisance, & que en l'aage de trente deux ans qu'il mourut, il auoit acquis plus de vraye reputation en ce rang là, que nul autre auant luy. Mais tant y a que ce n'est pas raison de laisser en l'estat de soldat un digne capitaine, ny d'employer, aux charges moyennes ceux qui feroient bien encores les premieres. A la verité, ses forces furent mal mesnagees, & trop espargnees. De façon que au de la de sa charge il luy restoit beaucoup de grandes parties oisues & inutiles : desquelles la chose publique eust peu tirer du seruice, & luy de la gloire. Or Monsieur, puis qu'il a esté si non-chalant de se pouffer soy-mesme en lumiere, comme de malheur la vertu & l'ambition ne logent gueres ensemble : & qu'il a esté d'un siecle si grossier ou si plein d'enuie, qu'il n'y a peu nullement estre aidé

par le tesmoignage d'autrui, ie souhaite merueilleusement que au moins apres luy sa memoire à qui seule meshuy ie dois les offices de nostre amitié, recoiue le loyer de sa valeur, & qu'elle se loge en la recommandation des personnes d'honneur & de vertu. A ceste cause m'a il pris enuie de le mettre au iour, & de vous le presenter, Monsieur, par ce peu de Vers Latins qui nous restent de luy. Tout au rebours du Maçon qui met le plus beau de son bastiment vers la rue, & du Marchand qui fait monstre & parement du plus riche eschantillon de sa marchandise, ce qui estoit en luy le plus recommandable, le vray suc & moëlle de sa valeur l'ont fuiuy, & ne nous en est demeuré que l'escorce & les fueilles. Qui pourroit faire voir les reiglez branles de son ame, sa pieté, sa vertu, sa Iustice, la viuacité de son esprit, le poix & la santé de son iugement, la haulteur de ses conceptions si loing esleuees au dessus du vulgaire, son sçauoir, les graces compaignes ordinaires de ses actions, la tendre amour qu'il portoit à sa miserable patrie, & sa haine capitale & Iuree contre tout vice, mais principalement contre ceste vilaine traficque qui se couue sous l'honorable tiltre de Iustice, engendreroit certainement à toutes gents de bien vne singuliere affection enuers luy meslee d'un merueilleux regret de sa part. Mais Monsieur il s'en faut tant que ie puisse cela, que du fruit mesmes de ses estudes il n'auoit encores iamais pensé d'en laisser nul tesmoignage à la posterité : & ne nous en est demeuré, que ce que par maniere de passetemps il escriuoit quelquefois. Quoy que ce soit, ie vous supplie Monsieur, le receuoir de bon visage : &, comme nostre iugement argumente maintefois d'une chose legere vne bien grande,

& que les ieux mesmes des grands personnages rapportent aux cler-voyans quelque merque honorable du lieu d'où ils partent, monter par ce sien ouurage à la cognoissance de luy mesme, & en aymer & embrasser par consequent le nom & la memoire. En quoy Monsieur vous ne ferez que rendre la pareille à l'opinion trefresoluë qu'il auoit de vostre vertu : & si accomplirez ce qu'il a infiniment souhaité pendant sa vie. Car il n'estoit homme du monde en la cognoissance & amitié duquel il se fust plus volontiers veu logé que en la vostre. Mais si quelqu'un se scandalise dequoy si hardiment i'vse des choses d'autrui, ie l'aduise qu'il ne fut iamais rien plus exactement dict ne escript aux escholes des Philosophes du droit & des deuoirs de la sainte amitié, que ce que ce personnage & moy en auons pratiqué ensemble. Au reste, Monsieur, ce leger present, pour mesnager d'une pierre deux coups, seruira aussi, s'il vous plaist, à vous tesmoigner l'honneur & reuerence que ie porte à vostre suffisance, & qualitez singulieres qui sont en vous. Car quant aux estrangeres & fortuites, ce n'est pas de mon goust de les mettre en ligne de compte.

Monsieur, ie supplie Dieu qu'il vous doint tres-heureuse & longue vie. De Montaigne ce 30. Aueil, 1570.

Vostre humble & obeissant seruiteur

MICHEL DE MONTAIGNE.



A MONSIEVR MONSIEVR DE FOIX,

*Conseiller du Roy en son Conseil priuè, & Ambassadeur
de sa Maiefté pres la Seigneurie de Venise.*



ONSIEVR, estant à mesme de vous recommander & à la posterité la memoire de feu Estienne de la Boëtie, tant pour son extreme valeur, que pour la singuliere affection qu'il me portoit, il m'est tombé en fantaisie, combien c'estoit vne indiscretion de grande consequence & digne de la coërtion de nos loix, d'aller, comme il se faict ordinairement, desrobant à la vertu la gloire, sa fidelle compaignie, pour en estrener, sans choïs & sans iugement, le premier venu, selon nos interests particuliers : Veu que les deux resnes principales qui nous guident & tiennent en office, sont la Peine & la Recompense, qui ne nous touchent proprement, & comme hommes que par l'honneur & la honte, d'autant que celles icy donnent droittement à l'ame, & ne se goustent que par les sentimens interieurs & plus nostres : là où les bestes mesmes se voyent aucunement capables de toute autre recompense, & peine corporelle. En oultre, il est bon à veoir que la coustume de louer la vertu mesme de ceulx qui ne sont plus, ne vise

pas à eulx, ains qu'elle fait estat d'aiguillonner par ce moien les viuans à les imiter : comme les derniers chastiments sont employez par la Iustice plus pour l'exemple, que pour l'interest de ceulx qui les souffrent. Or le louer & le meslouer s'entrerespondents de si pareille consequence, il est mal-aisé à fauuer, que nos loix defendent offenser la reputation d'autrui, & ce neantmoins permettent de l'annoblir sans merite. Ceste pernicieuse licence de ietter ainsi à nostre poste au vent les louanges d'un chascun a esté autrefois diuersement reteinie ailleurs. Voire à l'aduenture aida elle iadis à mettre la poésie en la male-grace des Sages. Quoy qu'il en soit, au moins ne se sçauroit on couurir, que le vice du mentir n'y apparaisse tousiours tresmeisnant à un homme bien né, quelque visage qu'on luy donne. Quant à ce personnage de qui ie vous parle, Monsieur, il m'enuoye bien loing de ces termes, car le danger n'est pas que ie luy en preste quelqu'une, mais que ie luy en oste : & son malheur porte, que comme il m'a fourny, autant qu'homme puisse, de tresiustes & tresapparentes occasions de louange, i'ay bien aussi peu de moien & de suffisance pour la luy rendre : ie dy moy à qui seul il s'est communiqué iusques au vif, & qui seul puis respondre d'un million de graces, de perfections & de vertus qui moisirent oisifues au giron d'une si belle ame, mercy à l'ingratitude de sa fortune. Car la nature des choses aiant ie ne sçay comment permis, que la verité pour belle & acceptable qu'elle soit d'elle mesme, si ne l'ambrassons nous qu'infuse & infinuee en nostre creance par les outils de la persuasion, ie me treuve si fort desgarny & de credit pour authentifier mon simple tesmoignage, & d'eloquence pour

l'enrichir & le faire valoir, qu'à peu a il tenu que ie n'aye quitté là tout ce soing, ne me restant pas seulement du sien par où dignement ie puisse presenter au monde au moins son esprit & son sçauoir. De vray, Monsieur, aiant esté surpris de sa destinee en la fleur de son aage, & dans le train d'une tres-heureuse & tres vigoureuse santé, il n'auoit pensé à rien moins qu'à mettre au iour des ouurages qui deussent tesmoigner à la posterité quel il estoit en cela. Et à l'aduenture estoit il assez braue, quand il y eust pensé, pour n'en estre pas fort curieux. Mais en fin i'ay prins party qu'il seroit bien plus excusable à luy, d'auoir enseuely avec soy tant de rares faueurs du ciel, qu'il ne seroit à moy d'enseuelir encore la cognoissance qu'il m'en auoit donnee. Et pourtant aiant curieusement recueilly tout ce que i'ay trouué d'entier parmy ses brouillars & papiers espars çà & là, le iouët du vent & de ses estudes, il m'a semblé bon, quoy que ce fust, de le distribuer & de le departir en autant de pieces que i'ay peu, pour de là prendre occasion de recommander sa memoire à d'autant plus de gents, choisissant les plus apparentes & dignes personnes de ma cognoissance, & desquelles le tesmoignage luy puisse estre le plus honorable. Comme vous, Monsieur, qui de vous mesmes pouuez auoir eu quelque cognoissance de luy pendant sa vie, mais certes bien legere pour en discourir la grandeur de son entiere valeur. La posterité le croira si bon luy semble, mais ie luy iure sur tout ce que i'ay de conscience, l'auoir sçeu & veu tel, tout considéré, qu'à peine par souhait & imagination pouuois-ie monter au de là, tant s'en fault que ie luy donne beaucoup de compagnons. Je vous supplie treshumblement, Monsieur, non

seulement prendre la generale protection de son nom, mais encore de ces dix ou douze Vers françois, qui se iettent comme par necessité à l'abry de vostre faueur. Car ie ne vous celeray pas, que la publication n'en ayt esté differee apres le reste de ses œuvres, sous couleur de ce, que par de là on ne les trouuoit pas assez limez pour estre mis en lumiere. Vous verrez, Monsieur, ce qui en est : & par ce qu'il semble que ce iugement regarde l'interest de tout ce quartier icy, d'où ils pensent qu'il ne puisse rien partir en vulgaire qui ne sente le sauuage & la barbarie : C'est proprement vostre charge, qui au reng de la premiere maison de Guyenne receu de vos ancestres auez adiousté du vostre le premier reng encore en toute façon de suffisance, maintenir non seulement par vostre exemple, mais aussi par l'authorité de vostre tesmoignage, qu'il n'en va pas tousiours ainsi. Et ores que le faire soit plus naturel aux Gascons, que le dire, si est-ce qu'ils s'arment quelquefois autant de la langue que du bras, & de l'esprit que du cœur. De ma part, Monsieur, ce n'est pas mon gibbier de iuger de telles choses, mais i'ay ouy dire à personnes qui s'entendent en sçauoir, que ces vers sont non seulement dignes de se presenter en place marchande : mais d'auantage, qui s'arrestera à la beauté & richesse des inuentions, qu'ils sont pour le subiect, autant charnus, pleins & moëlleux, qu'il s'en soit encore veu en nostre langue. Naturellement chasque ouurier se sent plus roide en certaine partie de son art, & les plus heureux sont ceulx qui se sont empoignez à la plus noble : car toutes pieces egallement necessaires au bastiment d'un corps ne sont pas pourtant egallement prisables. La mignardise du langage, la douceur & la pollif-

sure reluisent à l'adventure plus en quelques autres, mais en gentillesse d'imaginacions, en nombre de faillies, pointes & traits, ie ne pense point que nuls autres leur passent deuant. Et si faudroit il encore venir en composition de ce, que ce n'estoit ny son occupation, ny son estude, & qu'à peine au bout de chasque an mettoit il vne fois la main à la plume, tesmoing ce peu qu'il nous en reste de toute sa vie. Car vous voyez, Monsieur, vert & sec, tout ce qui m'en est venu entre mains, sans chois & sans triage : en maniere qu'il y en a de ceulx mesmes de son enfance. Somme, il semble qu'il ne s'en meslast que pour dire qu'il estoit capable de tout faire. Car au reste, mille & mille fois, voire en ses propos ordinaires, auons nous veu partir de luy choses plus dignes d'estre sçeuës, plus dignes d'estre admirees. Voila, Monsieur, ce que la raison & l'affection iointes ensemble par vn rare rencontre me commandent vous dire de ce grand homme de bien : & si la priuaulté que i'ay prise de m'en adresser à vous, & de vous en entretenir si longuement, vous offense, il vous souuiendra, s'il vous plaist, que le principal effect de la grandeur & de l'eminence, c'est de vous ietter en butte à l'importunité & embesongnement des affaires d'autrui. Sur ce, apres vous auoir présenté ma treshumble affection à vostre seruice, ie supplie Dieu vous donner, Monsieur, tresheureuse & longue vie. De Montaigne ce premier de Septembre, mil cinq cents soixante & dix.

Vostre obeissant seruiteur

MICHEL DE MONTAIGNE.



A MADAMOISELLE DE MONTAIGNE

ma Femme.



A Femme vous entendez bien que ce n'est pas le tour d'un galand homme, aux reigles de ce temps icy, de vous courtoiser & caresser encore. Car ils disent qu'un habil homme peut bien prendre femme : mais que de l'espouser c'est à faire à un sot. Laissions les dire : ie me tiens de ma part à la simple façon du vieil aage, aussi en porte-ic tantost le poil. Et de vray la nouuelleté couste si cher iusqu'à ceste heure à ce pauvre estat (& si ie ne sçay si nous en sommes à la dernière enchere) qu'en tout & par tout i'en quitte le party. Viuons ma femme, vous & moy, à la vieille Françoisse. Or il vous peult souuenir comme feu Monsieur de la Boetie ce mien cher frere, & compaignon inuiolable, me donna mourant ses papiers & ses liures, qui m'ont esté depuis le plus fauory meuble des miens. Ie ne veulx pas chichement en vser moy seul, ny ne merite qu'ils ne seruent qu'à moy. A ceste cause il m'a pris enuie d'en faire part à mes amis. Et par ce que ie n'en ay, ce croy-ie, nul plus priué que vous, ie vous enuoye la Lettre consolatoire de Plu-

tarque à sa femme, traduite par luy en François : bien marry dequoy la fortune vous a rendu ce présent si propre, & que n'ayant enfant qu'une fille longuement attendue, au bout de quatre ans de nostre mariage, il a falu que vous l'ayez perdue dans le deuxiesme an de sa vie. Mais ie laisse à Plutarque la charge de vous consoler, & de vous aduertir de vostre deuoir en cela, vous priant le croire pour l'amour de moy : Car il vous descouurira mes intentions, & ce qui se peut alleguer en cela beaucoup mieux que ie ne ferois moy-mesmes. Sur ce, ma femme, ie me recommande bien fort à vostre bonne grace, & prie Dieu qu'il vous maintienne en sa garde. De Paris ce 10. Septembre, 1570.

Vostre bon mary

MICHEL DE MONTAIGNE.





EXTRAIT D'VNE LETTRE

Que Monsieur le Conseiller de Montaigne escrit à Monseigneur de Montaigne son père, concernant quelques particularitez qu'il remarqua en la maladie & mort de feu Monseigneur de la Boetie.



VANT à ses dernières paroles, sans doute si homme en doit rendre bon conte, c'est moy, tant par ce que du long de sa maladie il parloit aussi volontiers à moy qu'à nul autre : que aussi pour ce que pour la singulière & fraternelle amitié que nous nous estions entreportez, j'auois trescertaine cognoissance des intentions, iugements & volonteiz qu'il auoit eu durant sa vie, autant sans doute qu'homme peut auoir d'un autre : & par ce que ie les scauois estre hautes, vertueuses, pleines de trescertaine resolution, & quand tout est dit, admirables : ie preuoyois bien, que si la maladie luy laissoit le moyen de se pouoir exprimer, qu'il ne luy eschapperoit rien en vne telle necessité, qui ne fust grand, & plein de bon exemple : Ainsi ie m'en prenois le plus garde que ie pouuois. Il est vray, Monseigneur, comme j'ay la memoire fort courte, & debauchée encore par le trouble que mon esprit auoit à souffrir d'une si lourde perte, & si importante, qu'il est impossible que ie n'aye oublié beaucoup de choses que ie voudrois estre sceuës. Mais celles

desquelles il m'est souuenu, ie les vous manderay le plus au vray qu'il me sera possible. Car pour le représenter ainsi fierement arresté en sa braue démarche, pour vous faire voir ce courage inuincible dans vn corps atterré & affommé par les furieux efforts de la mort, & de la douleur, ie confesse qu'il y faudroit vn beaucoup meilleur stile que le mien. Par-ce qu'encores que durant sa vie quand il parloit de choses graues & importantes, il en parloit de telle sorte, qu'il estoit mal-aisé de les si bien escrire : si est-ce qu'à ce coup il sembloit que son esprit & sa langue s'efforçassent à l'enuy, comme pour luy faire leur dernier seruice. Car sans doute ie ne le vis iamais plein ny de tant & de si belles imaginations, ny de tant d'eloquence, comme il a esté le long de ceste maladie. Au reste, Monseigneur, si vous trouuez que i'aye voulu mettre en compte ses propos plus legers & ordinaires, ie l'ay fait à escient. Car estants dits en ce temps là, & au plus fort d'une si grande besongne, c'est vn singulier tesmoignage d'une ame pleine de repos, de tranquillité, & d'asseurance.

COMME ie reuenois du Palais, le lundy neuuiesme d'Aoust. 1563. Je l'enuoyay conuier à dîner chez moy : il me manda qu'il me mercioit, qu'il se trouuoit vn peu mal, & que ie luy ferois plaisir si ie voulois estre vne heure avec luy, auant qu'il partist pour aller en Medor. Je l'allay trouuer bien tost apres dîner : il estoit couché vestu, & monstroist desia ie ne sçay quel changement en son visage. Il me dist que c'estoit vn flux de ventre avec des tranchees, qu'il auoit pris le iour auant iouant en pourpoint sous vne robbe de soye avec monsieur d'Escars, & que le froit luy auoit souuent fait sentir

semblables accidents. Le trouuay bon qu'il continuast l'entreprise qu'il auoit pieça faicte de s'en aller : mais qu'il n'allast pour ce soir que iusques à Germignan, qui n'est qu'à deux lieues de la ville. Cela faisois-je pour le lieu où il estoit logé tout auoisiné de maisons infectes de peste, de laquelle il auoit quelque apprehension, comme reuenant de Perigort & d'Agenois, où il auoit laissé tout empesté : & puis pour semblable maladie que la sienne ie m'estois autre-fois tresbien trouué de monter à cheual. Ainsi il s'en partit, & Mademoiselle de la Boëtie sa femme, & monsieur de Bouilhonnas son oncle, avec luy.

Le lendemain de bien bon matin, voicy venir vn de ses gents à moy de la part de Mademoiselle de la Boëtie, qui me mandoit qu'il s'estoit fort mal trouué la nuit, d'une forte dissenterie. Elle enuoyoit querir vn medecin, & vn apotiquaire, & me prioit d'y aller : comme ie fis l'apres-dinée.

A mon arriuée, il sembla qu'il fust tout esiouy de me voir : & comme ie voulois prendre congé de luy pour m'en reuenir, & luy promisse de le reuoir le lendemain : il me pria avec plus d'affection & d'instance, qu'il n'auoit iamais fait d'autre chose, que ie fusse le plus que ie pourrois avec luy. Cela me toucha aucunement. Ce neantmoins ie m'en allois quand Mademoiselle de la Boëtie, qui pressentoit desia ie ne sçay quel mal-heur, me pria les larmes à l'œil, que ie ne bougeasse pour ce soir. Ainsi elle m'arresta, dequoy il se resiouit avecques moy. Le lendemain ie m'en reuins, & le Ieudy le fus retrouver. Son mal alloit en empirant : son flux de sang & ses tranchées qui l'affoiblissoient encores plus, croissoient d'heure à autre.

Le Vendredy ie le laiffay encores : & le Samedy ie le fus reuoir defia fort abbatu. Il me dit lors que fa maladie estoit vn peu contagieufe, & outre cela, qu'elle estoit mal-plaifante, & melancholique : qu'il cognoiffoit tresbien mon naturel, & me prioit de n'estre avec luy que par boutées, mais le plus fouuent que ie pourrois. Je ne l'abandonnay plus. Iufques au Dimenche il ne m'auoit tenu nul propos de ce qu'il iugeoit de fon estre, & ne parlions que de particulieres occurrences de fa maladie, & de ce que les anciens medecins en auoient dit. D'affaires publiques bien peu : car ie l'en trouuay tout degousté dés le premier iour. Mais le Dimenche il eut vne grand'foibleffe : Et comme il fut reuenu à foy, il dit, qu'il luy auoit semblé estre en vne confusion de toutes choses, & n'auoir rien veu qu'une efpesse nuë, & brouillart obscur, dans lequel tout estoit pefle-mefle, & fans ordre. Toutes fois qu'il n'auoit eu nul desplaisir à tout cest accident. La mort n'a rien de pire que cela, lui dis-ie lors, mon frere : Mais n'a rien de si mauuais, me respondit-il.

Depuis lors, par ce que dés le commencement de son mal, il n'auoit pris nul sommeil, & que nonobstant tous les remedes, il alloit tousiours en empirant : de sorte qu'on y auoit defia employé certains bruages, desquelz on ne se sert qu'aux dernieres extremitez. Il commença à desesperer entierement de sa guerison : ce qu'il me communiqua. Ce mesme iour, par ce qu'il fut trouué bon, ie luy dis, qu'il me fieroit mal pour l'extreme amitié que ie luy portois, si ie ne me fouciois que comme en sa santé on auoit veu toutes ses actions pleines de prudence & de bon conseil, autant qu'à homme du monde, qu'il les continuast encore en sa maladie : & que si

Dieu vouloit qu'il empirast, ie serois tresmarry qu'à faute d'aduisement il eust laissé nul de ses affaires domestiques découfu, tant pour le dommage que ses parents y pourroient souffrir, que pour l'interest de sa reputation. Ce qu'il print de moy de tresbon visage. Et apres s'estre resolu des difficultez qui le tenoient suspens en cela : Il me pria d'appeller son oncle & sa femme seuls, pour leur faire entendre ce qu'il auoit deliberé quant à son testament. Je luy dis qu'il les estonneroit. Non, non, me dit-il, Je les consoleray, & leur donneray beaucoup meilleure esperance de ma santé, que ie ne l'ay moy-mesmes. Et puis il me demanda, si les foibleses qu'il auoit euës, ne nous auoient pas vn peu estonnez. Cela n'est rien, luy fis-ie, mon frere : ce sont accidents ordinaires à telles maladies. Vrayement non, ce n'est rien, mon frere, me respondit-il, quand bien il en aduiendroit ce que vous en craindriez le plus. A vous ne seroit-ce que heur, luy replicquay-ie : mais le dommage seroit à moy qui perdrois la compagnie d'vn si grand, si sage, & si certain amy, & tel que ie serois asseuré de n'en trouuer iamais de semblable. Il pourroit bien estre, mon frere, adioustâ-il : & vous asseure que ce qui me fait auoir quelque soing que i'ay de ma guerison, & n'aller si courant au passage que i'ay desia franchy à demy : c'est la consideration de vostre perte, & de ce pauvre homme, & de ceste pauvre femme (parlant de son oncle & de sa femme) que i'ayme tous deux vniquement : & qui porteront bien impatiemment (i'en suis asseuré) la perte qu'ils feront en moy, qui de vray est bien grande pour vous & pour eux. L'ay aussi respect au desplaisir que auront beaucoup de gens de bien qui m'ont aymé & estimé pendant ma

vie, deſquelz certes, ie le confeſſe, ſi c'eſtoit à moy à faire, ie ſerois content de ne perdre encores la conuerſation. Et ſi ie m'en vais, mon frere, ie vous prie, vous qui les cognoiſſez, de leur rendre teſmoignage de la bonne volonté que ie leur ay portee iuſques à ce dernier terme de ma vie. Et puis, mon frere, par auenture n'eſtois-ie point né ſi inutile, que ie n'euſſe moyen de faire ſeruice à la choſe publique. Mais quoy qu'il en ſoit, ie ſuis preſt à partir quand il plaira à Dieu, eſtant tout aſſeuré, que ie iouiray de l'aïſe que vous me predites. Et quant à vous, mon amy, ie vous cognois ſi ſage, que quelque intereſt que vous y ayez, ſi vous conſormerez vous volontiers & patiemment à tout ce qu'il plaira à ſa ſaincte Maieſté d'ordonner de moy : & vous ſupplie vous prendre garde que le deuil de ma perte ne pouſſe ce bon homme & ceſte bonne femme hors des gonds de la raiſon. Il me demanda lors comme ils s'y comportoient deſia. Je luy dis, que aſſez bien pour l'importance de la choſe. Ouy (ſuyuit-il) à ceſte heure, qu'ils ont encore vn peu d'eſperance. Mais ſi ie la leur ay vne fois toute oſtee, mon frere, vous ſerez bien empesché à les contenir. Suiuant ce reſpect, tant qu'il veſcut depuis, il leur cacha touſiours l'opinion certaine qu'il auoit de ſa mort, & me prioit bien fort d'en vſer de meſmes. Quand il les voyoit aupres de luy, il contrefaiſoit la chere plus gaye, & les paiſſoit de belles eſperances.

Sur ce point ie le laiſſay pour les aller appeller. Ils compoſerent leur viſage le mieux qu'ils peurent pour vn temps. Et apres nous eſtre aſſis autour de ſon liēt, nous quatre ſeuls, il dit ainſi d'vn viſage poſé, & comme tout eſiouy.

Mon Oncle, ma Femine, ie vous assure sur ma foy, que nulle nouvelle attainte de ma maladie ou opinion mauuaise que i'aye de ma guerison, ne m'a mis en fantaisie de vous faire appeller, pour vous dire ce que i'entreprends : car ie me porte, Dieu-mercy, tresbien, & plein de bonne esperance : mais ayant de longue main apprins, tant par longue experience, que par longue estude, le peu d'assurance qu'il y a à l'instabilité & inconstance des choses humaines, & mesmes en nostre vie, que nous tenons si chere, qui n'est toutesfois que fumee & chose de neant : & considerant aussi que puisque ie suis malade, ie me suis d'autant approché du danger de la mort, i'ay deliberé de mettre quelque ordre à mes affaires domestiques, apres en auoir eu vostre aduis premierement. Et puis adressant son propos à son oncle, Mon bon oncle, dit-il, si i'auois à vous rendre à ceste heure compte des grandes obligations que ie vous ay, ie n'aurois en piece fait : il me suffit que iusques à present, où que i'aye esté & à qui-conques i'en aye parlé, i'aye tousiours dit, que tout ce que vn treffage, tresbon & tresliberal pere pouuoit faire pour son fils, tout cela auez vous fait pour moy, soit pour le soing qu'il a fallu à m'instruire aux bonnes lettres, soit lors qu'il vous a pleu me poulser aux estats : de sorte que tout le cours de ma vie a esté plein de grands & recommandables offices d'amitez vostres enuers moy : somme, quoy que i'aye, ie le tiens de vous, ie l'aduoué de vous, ie vous en suis redevable, vous estes mon vray pere : ainsi comme fils de famille ie n'ay nulle puissance de disposer de rien, s'il ne vous plaist de m'en donner congé. Lors il se teust, & attendit que les sousepirs & les sanglots eussent donné loisir à son

oncle de luy respondre, qu'il trouueroit tousiours trefbon tout ce qu'il luy plairoit. Lors ayant à le faire son heritier, il le supplia de prendre de luy le bien qui estoit sien.

Et puis destournant sa parole à sa femme : Ma semblance, dit-il (ainsi l'appelloit-il souuent, pour quelque ancienne alliance qui estoit entre eux) ayant esté ioint à vous du saint neud de mariage, qui est l'un des plus respectables & inuiolables que Dieu nous ait ordonné ça bas, pour l'entretien de la societé humaine, Je vous ay aymee, chérie & estimee autant qu'il m'a esté possible, & suis tout assuré que vous m'avez rendu reciproque affection, que ie ne sçaurois assez recognoistre. Je vous prie de prendre de la part de mes biens ce que ie vous donne, & vous en contenter, encores que ie sçache bien que c'est bien peu au pris de voz merites.

Et puis tournant son propos à moy : Mon frere, dit-il, que i'ayme si chèrement, & que i'auois choisy parmy tant d'hommes, pour renouueller avec vous ceste vertueuse & sincere amitié, de laquelle l'usage est par les vices dès si long temps esloigné d'entre nous, qu'il n'en reste que quelques vieilles traces en la memoire de l'antiquité : Je vous supplie pour signal de mon affection enuers vous, vouloir estre successeur de ma Bibliothecque & de mes liures, que ie vous donne : present bien petit, mais qui part de bon cueur : & qui vous est conuenable pour l'affection que vous auez aux lettres. Ce vous fera *μνημόσυνον sui sodalis.*

Et puis parlant à tous trois generalement, loüa Dieu, de quoy en vne si extreme necessité, il se trouuoit accompagné de toutes les plus cheres personnes qu'il eust en ce monde. Et qu'il luy sembloit

tresbeau à voir, vne assemblée de quatre si accordants & si vnis d'amitié, faisant, disoit-il, estat, que nous nous entraymions vnanimement les vns pour l'amour des autres : & nous ayant recommandé les vns aux autres, Il suyuit ainsi.

Ayant mis ordre à mes biens, encores me faut il penser à ma conscience. Ie suis Chrestien, ie suis Catholique : tel ay vescu, tel suis-je deliberé de clorre ma vie. Qu'on me face venir vn prestre, car ie ne veux faillir à ce dernier deuoir d'un Chrestien.

Sur ce poinct il finit son propos, lequel il auoit continué avec telle assurance de visage, telle force de parolle & de voix, que là où ie l'auois trouué, lors que i'entray en sa chambre, foible, trainant lentement les mots, les vns apres les autres, & ayant le poul abbatu comme de fièvre lente, & tirant à la mort, le visage palle & tout meurtry, il sembloit lors qu'il vint, comme par miracle, de reprendre quelque nouvelle vigueur : le taint plus vermeil, & le poul plus fort, de sorte que ie luy fis taster le mien, pour les comparer ensemble. Sur l'heure i'eus le cueur si ferré, que ie ne sceus rien luy respondre. Mais deux ou trois heures apres, tant pour luy continuer ceste grandeur de courage, que aussi par ce que ie souhaittois pour la ialousie que i'ay eüe toute ma vie de sa gloire & de son honneur, qu'il y eust plus de resmoings de tant & si belles preuues de magnanimité, y ayant plus grande compagnie en sa chambre : ie luy dis, que i'auois rougy de honte de quoy le courage m'auoit failly à ouir ce, que luy qui estoit engagé dans ce mal auoit eu courage de me dire. Que iusques lors i'auois pensé que Dieu ne nous donnaist guieres si grand auantage sur les accidents humains, & croyois mal-aysement

ce que quelque-fois i'en lisois parmy les histoires : mais qu'en ayant senti vne telle preuue, ie louois Dieu de quoy ce auoit esté en vne personne de qui ie fusse tant aymé, & que i'aymassé si cherement : & que cela me seruiroit d'exemple, pour iouer ce mesme rolle à mon tour.

Il m'interrompt pour me prier d'en vser ainsi, & de monstrier par effect que les discours que nous auions tenus ensemble pendant nostre santé, nous ne les portions pas seulement en la bouche, mais engruez bien auant au cueur & en l'ame, pour les mettre en execution aux premieres occasions qui s'offriroient, adioustant que c'estoit la vraye prattique de noz estudes, & de la philosophie. Et me prenant par la main : Mon frere, mon amy, me dit-il, ie t'asfeure que i'ay fait assez de choses, ce me semble, en ma vie, avec autant de peine & difficulté que ie fais ceste-cy. Et quand tout est dit, il y a fort long temps que i'y estois préparé, & que i'en scauois ma leçon toute par cueur. Mais n'est-ce pas assez vescu iusques à l'aage auquel ie suis ? l'estois prest à entrer à mon trente-troisième an. Dieu m'a fait ceste grace, que tout ce que i'ay passé iusques à ceste heure de ma vie, a esté plein de santé & de bon-heur : pour l'inconstance des choses humaines, cela ne pouuoit gueres plus durer. Il estoit meshuy temps de se mettre aux affaires, & de voir mille choses mal-plaisantes, comme l'incommodité de la vieillesse, de laquelle ie suis quitte par ce moyen. Et puis il est vray-semblable que i'ay vescu iusqu'à ceste heure avec plus de simplicité & moins de malice, que ie n'eusse parauenture fait, si Dieu m'eust laissé viure iusqu'à ce, que le soing de m'enrichir, & accommoder mes affaires, me fust entré dans la teste. Quant à moy, ie

fuis certain que ie m'en vays trouuer Dieu, & le feiour des bien heureux. Or par ce que ie monstrois mesmes au visage l'impatience que i'auois à l'ouyr : Comment, mon frere, me dit-il, me voulez vous faire peur? si ie l'auois, à qui seroit-ce de me l'oster qu'à vous? Sur le soir, par ce que le notaire furuint, qu'on auoit mandé pour receuoir son testament, ie le luy fis mettre par escrit, & puis ie luy feus dire s'il ne le vouloit pas signer : non pas signer, dit-il, ie le veux faire moy-mesme. Mais ie voudrois mon frere qu'on me donnast vn peu de loisir, car ie me trouue extremement trauaillé, & si affoibly que ie n'en puis quasi plus. Je me mis à changer de propos, mais il se reprit soudain, & me dit, qu'il ne faillloit pas grand loysir à mourir, & me pria de sçauoir si le notaire auoit la main bien legere, car il n'arresteroit gueres à dicter. L'appellay le notaire : & sur le champ il dicta si viste son testament, qu'on estoit bien empesché à le suyure. Et ayant acheué il me pria de luy lire : & parlant à moy, voylà, dit-il, le soing d'une belle chose que noz richesses : *Sunt hæc quæ hominibus vocantur bona*. Apres que le testament eut esté signé, comme sa chambre estoit pleine de gents, il me demanda s'il luy feroit mal de parler. Je luy dis que non, mais que ce fust tout doucement.

Lors il fit appeller Madamoyfelle de Saint-quentin sa niepce, & parla ainsi à elle : Ma niepce m'amie, il m'a semblé depuis que ie t'ay cogneuë auoir veu reluire en toy des traits de tresbonne nature : mais ces derniers offices que tu fais auec si bonne affection, & telle diligence, à ma presente necessité, me promettent beaucoup de toy : & vrayement ie t'en fuis obligé & t'en mercie trefasse&ueusement. Au

reste pour ma descharge, ie t'aduertis d'estre premierement deuote enuers Dieu. Car c'est sans doute la principale partie de nostre deuoir, & sans laquelle nulle autre action ne peut estre ny bonne ny belle : & celle la y estant bien à bon escient, elle traine apres soy par necessité toutes autres actions de vertu. Apres Dieu, il te faut aymer & honorer ton pere & ta mere, mesmes ta mere ma sœur, que i'estime des meilleures & plus sages femmes du monde : & te prie de prendre d'elle l'exemple de ta vie. Ne te laisse point emporter aux plaisirs : fuis comme peste ces folles priuautez que tu vois les femmes auoir quelquefois avec les hommes : Car encores que sur le commencement elles n'ayent rien de mauuais, toutefois petit à petit elles corrompent l'esprit, & le conduisent à l'oyfueté, & delà, dans le vilain borbier du vice. Crois moy : la plus seure garde de la chasteté à vne fille, c'est la feuerité. Je te prie, & veux qu'il te souuienne de moy, pour auoir souuent deuant les yeux l'amitié que ie t'ay portée : non pas pour te plaindre & pour te douloir de ma perte, & cela deffens-ie à tous mes amys tant que ie puis, attendu qu'il sembleroit qu'ils fussent enuieux du bien, duquel, mercy à ma mort, ie me verray bien tost iouissant : & t'assure ma fille, que si Dieu me donnoit à ceste heure à choisir, ou de retourner à viure encores, ou d'acheuer le voyage que i'ay commencé, ie serois bien empesché au choix. Adieu ma niepce m'amy.

Il fit apres appeller Madamoiselle d'Arfat sa belle fille, & luy dit : Ma fille, vous n'avez pas grand besoyn de mes aduertissements, ayant vne telle mere, que i'ay trouuée si sage, si bien conforme à mes conditions & volonte, ne m'ayant iamais fait nulle

faute. Vous serez tresbien instruite d'une telle mais-tresse d'eschole. Et ne trouuez point estrange, si moy, qui ne vous attouche d'aucune parenté, me sôcie, & me mesle de vous. Car estant fille d'une personne qui m'est si proche, il est impossible, que tout ce qui vous concerne ne me touche aussi. Et pourtant ay-ie tousiours eu tout le soing des affaires de monsieur d'Arfat vostre frere, comme des miennes propres. Et parauanture ne vous nuira-il pas à vostre auancement d'auoir esté ma belle fille. Vous auez de la richesse & de la beauté assez : vous estes Damoiselle de bon lieu. Il ne vous reste que d'y adiouster les biens de l'esprit : ce que ie vous prie vouloir faire. Je ne vous deffens pas le vice qui est tant detestable aux femmes : car ie ne veux pas penser seulement, qu'il vous puisse tomber en l'entendement : voire ie crois que le nom mesme vous en est horrible. Adieu ma belle fille.

Toute la chambre estoit pleine de cris & de larmes, qui n'interrompoient toutesfois nullement le train de ses discours, qui furent longuets. Mais apres tout cela il commanda qu'on fist sortir tout le monde, sauf sa garnison : Ainsi nomma-il les filles qui le seruoient. Et puis appellant mon frere de Beau-regard : Monsieur de Beau-regard, luy dit-il, ie vous mercie bien fort de la peine que vous prenez pour moy : vous voulez bien que ie vous descouure quelque chose que i'ay sur le cœur à vous dire. Dequoy, quand mon frere luy eut donné assurance, il suyuit ainsi : Je vous iure que de tous ceux qui se sont mis à la reformation de l'Eglise, ie n'ay iamais pensé qu'il y en ait eu vn seul qui s'y soit mis avec meilleur zèle, plus entiere, sincere & simple affection, que vous. Et crois certainement que les seuls vices de

noz prelats, qui ont sans doute besoing d'une grande correction, & quelques imperfections que le cours du temps a apporté en nostre Eglise, vous ont incité à cela : ie ne vous en veux pour ceste heure demouvoir : car aussi ne prie-je pas volontiers personne de faire, quoy que ce soit, contre sa conscience. Mais ie vous veux bien aduertir, qu'ayant respect à la bonne reputation qu'a acquis la maison de laquelle vous estes, par vne continuelle concorde : maison que j'ay autant chere que maison du monde : Mon Dieu quelle case, de laquelle il n'est iamais sorty acte que d'homme de bien ! ayant respect à la volonté de vostre pere, ce bon pere à qui vous devez tant, de vostre bon oncle, à voz freres, vous fuyez ces extremités : ne soyez point si aspre & si violent : accommodez vous à eux. Ne faites point de bande & de corps à part : ioignez vous ensemble. Vous voyez combien de ruines ces diffentions ont apporté en ce royaume, & vous réspons, qu'elles en apporteront de bien plus grandes. Et, comme vous estes sage & bon, gardez de mettre ces inconueniens parmy vostre famille, de peur de luy faire perdre la gloire & le bon-heur duquel elle a iouy iusques à ceste heure. Prenez en bonne part, Monsieur de Beau-regard, ce que ie vous en dis, & pour vn certain tesmoignage de l'amitié que ie vous porte. Car pour cest effect me suis-je réservé iusques à ceste heure à vous le dire : & à l'auenture vous le disant en l'estat auquel vous me voyez, vous donnerez plus de poix & d'autorité à mes paroles. Mon frere le remercia bien fort.

Le Lundi matin il estoit si mal, qu'il auoit quitté toute esperance de vie. De sorte que deslors qu'il me vit, il m'appella tout piteusement, & me dit : Mon frere, n'avez vous pas de compassion de tant de tour-

ments que ie souffre? Ne voyez vous pas meshuy que tout le secours que vous me faites ne sert que d'allongement à ma peine? Bien tost apres il s'esuanouit : de sorte qu'on le cuida abandonner pour trespasé : en fin on le réueillà à force de vinaigre & de vin. Mais il ne veit de fort long temps apres : & nous oyant crier autour de luy. il nous dit : Mon dieu, qui me tourmente tant? Pourquoy m'oste lon de ce grand & plaissant repos auquel ie suis? laissez moy ie vous prie. Et puis m'oyant, il me dit, Et vous aussi, mon frere, vous ne voulez donc pas que ie guerisse. O quel ayse vous me faites perdre! En fin s'estant encores plus remis, il demanda vn peu de vin. Et puis s'en estant bien trouué, me dit, que c'estoit la meilleure liqueur du monde. Non est dea, sis-ie, pour le mettre en propos, c'est l'eau : C'est-mon, repliqua-il, ὕδωρ ἀγίον. Il auoit desia toutes les extremittez, iusques au visage, glacees de froit, avec vne sueur mortelle qui luy couloit tout le long du corps : Et n'y pouuoit on quasi plus trouuer nulle recognoissance de poul. Ce matin il se confessa à son prestre : mais par ce que le prestre n'auoit apporté tout ce qu'il luy faillloit, il ne luy peut dire la Messe. Mais le Mardy matin monsieur de la Boétie le demanda, pour l'ayder, dit-il, à faire son dernier office chrestien. Ainsi il ouit la Messe, & fit ses Pasques. Et comme le prestre prenoit congé de luy, il luy dit, Mon pere spirituel ie vous supplie humblement, & vous & ceux qui sont sous vostre charge, priez Dieu pour moy, soit qu'il soit ordonné par les tressacrez thresors des desseins de Dieu que ie finisse à ceste heure mes iours, qu'il ayt pitié de mon ame, & me pardonne mes pechez, qui sont infinis : comme il n'est pas possible que si vile & si

basse creature que moy aye peu executer les commandemens d'un si haut & si puissant maistre : ou s'il luy semble que ie face encores besoin pardeça, & qu'il vueille me reserver à quelque autre heure, suppliez le qu'il finisse bien tost en moy les angouisses que ie souffre, & qu'il me face la grace de guyder dorenavant mes pas à la suyte de sa volonté, & de me rendre meilleur que ie n'ay esté. Sur ce point il s'arresta vn peu pour prendre aleine : & voyant que le prestre s'en alloit, il le rappella, & luy dit, Encores veulx ie dire cecy en vostre presence : Ie proteste, que comme i'ay esté baptizé, ay vescu, ainsi veulx-ie mourir sous la foy & religion que Moyses planta premierement en Égypte : que les Peres receurent depuis en Iudee, & qui de main en main par succession de temps a esté apportee en France. Il sembla à le voir qu'il eust parlé encores plus long temps, s'il eust peu : mais il finit, priant son oncle & moy de prier Dieu pour luy. Car ce font, dit il, les meilleurs offices que les Chrestiens puissent faire les vns pour les autres. Il s'estoit en parlant descouvert vne espaule, & pria son oncle la recouvrer, encores qu'il eust vn vallet plus pres de luy. Et puis me regardant : *Ingenui est*, dit il, *cui multum debeas, ei plurimum velle debere*. Monsieur de Belot le vint voir apres midy : & il luy dit, luy presentant sa main : Monsieur mon bon amy, i'estois icy à mesme pour payer ma debte, mais i'ay trouué vn bon creditier qui me l'a remise. Vn peu apres comme il se réueilloit en sursaut : Bien, bien, qu'elle vienne quand elle voudra, ie l'attends, gaillard & de pié coy. Mots qu'il redist deux ou trois fois en sa maladie. Et puis comme on luy entreouuroit la bouche par force, pour le faire aualler : *An viuere*

tanti est? dit-il, tournant son propos à Monsieur de Belot. Sur le soir il commença bien à bon escient à tirer aux traicts de la mort : & comme ie souppois il me fit appeller, n'ayant plus que l'image & que l'ombre d'un homme, & comme il disoit de soy-mesme, *Non homo, sed species hominis* : Et me dit, à toutes peines, Mon frere, mon amy, pleust à Dieu que ie visse les effects des imaginations que ie viens d'auoir. Apres auoir attendu quelque temps qu'il ne parloit plus, & qu'il tiroit des souspirs tranchants pour s'en efforcer, car deslors la langue commençoit fort à luy denier son office. Quelles sont elles, mon frere? luy dis-je. Grandes, grandes, me respondit-il. Il ne fut iamais, suyuis-je, que ie n'eusse cest honneur que de communiquer à toutes celles qui vous venoient à l'entendement, voulez vous pas que i'en iouisse encore? C'est-mon dea, respondit-il : mais mon frere, ie ne puis : elles sont admirables, infinies, & indicibles. Nous en demeurâmes là : car il n'en pouuoit plus. De forte qu'un peu au parauant il auoit voulu parler à sa femme, & luy auoit dit d'un visage le plus gay qu'il le pouuoit contrefaire, qu'il auoit à luy dire un conte. Et sembla qu'il s'efforçast pour parler : mais la force luy deffaillant, il demanda un peu de vin pour la luy rendre. Ce fut pour-neant : car il euanouit soudain, & fut long temps sans veoir. Estant desia bien voisin de sa mort, & oyant les pleurs de Mademoiselle de la Boétie, il l'appella, & luy dit ainsi : Ma semblance, vous vous tourmentez auant le temps : voulez-vous pas auoir pitié de moy? Prenez courage. Certes ie porte plus la moitié de peine, pour le mal que ie vous voy souffrir, que pour le mien : & avec raison : par ce que les maux que nous sentons en nous, ce n'est pas nous propre-

ment qui les sentons, mais certains sens que Dieu a mis en nous : mais ce que nous sentons pour les autres, c'est par certain iugement & par discours de raison, que nous le sentons. Mais ie m'en vais. Cela disoit il, par ce que le cueur luy failloit. Or ayant eu peur d'auoir estonné sa femme, il se reprit & dist, le m'en vais dormir, bon soir ma Femme, allez vous en. Voila le dernier congé qu'il print d'elle. Apres qu'elle fut partie, Mon frere, me dit-il, tenez vous au pres de moy, s'il vous plaist. Et puis, ou sentant les pointes de la mort plus pressantes & poignantes, ou bien la force de quelque medicament chaud qu'on luy auoit fait aualler, il print vne voix plus esclatante & plus forte, & donnoit des tours dans son liēt avec tout plein de violence : de sorte que toute la compaignie commença à auoir quelque esperance, par ce que iusques lors la seule foiblesse nous l'auoit fait perdre. Lors entre autres choses il se print à me prier & reprier avecques vne extreme affection, de luy donner vne place : de sorte que i'eus peur que son iugement fust esbranlé. Mesmes que luy ayant bien doucement remonstré, qu'il se laissoit emporter au mal, & que ces mots n'estoient pas d'homme bien raffis, il ne se rendit point au premier coup, & redoubla encores plus fort : Mon frere, mon frere, me refusez-vous doncques vne place ? Iusques à ce qu'il me contraignit de le conuaincre par raison, & de luy dire, que puis qu'il respiroit & parloit, & qu'il auoit corps, il auoit par consequent son lieu. Voire, voire, me respondit-il lors, i'en ay, mais ce n'est pas celuy qu'il me faut : & puis quand tout est dit, ie n'ay plus d'estre. Dieu vous en donnera vn meilleur bien tost, luy fis-ie. Y fusse-ie desia, mon frere, me respondit-il, il y a trois iours que i'ahanne

pour partir. Estant sur ces destresses il m'appella souuent pour s'informer seulement si i'estois pres de luy. En fin il se mist vn peu à reposer, qui nous confirma encores plus en nostre bonne esperance. De maniere que sortant de sa chambre, ie m'en refiouïs avecques Madamoiselle de la Boëtie. Mais vne heure apres ou enuiron, me nommant vne fois ou deux, & puis tirant à soy vn grand fouspir il rendit l'ame, sur les trois heures du Mercredy matin dixhuitiesme d'Aouft, l'an mil cinq cens soixante trois, apres auoir vescu 32. ans, 9. mois, & 17. iours.





A MONSIEVR MONSIEVR DE LANSAC

*Cheualier de l'ordre du Roy, Conseillier de son Conseil priué,
Surintendant de ses finances,
& Capitaine de cent Gentils-hommes de sa Maison.*



MONSIEVR ie vous enuoye la Mesnagerie de Xenophon mise en François par feu Monsieur de la Boëtie : present qui m'a semblé vous estre propre, tant pour estre party premierement, comme vous sçauiez, de la main d'un Gentilhomme de merque, tresgrand homme de guerre & de paix, que pour auoir prins sa seconde façon de ce personnage que ie sçay auoir esté aymé & estimé de vous pendant sa vie. Cela vous seruira tousiours d'esguillon à continuer enuers son nom & sa memoire vostre bonne opinion & volonté. Et hardiment, Monsieur, ne craignez pas de les accroistre de quelque chose : car ne l'ayant gousté que par les tesmoignages publics qu'il auoit donné de foy, c'est à moy à vous respondre, qu'il auoit tant de degrez de suffisance au dela, que vous estes bien loing de l'auoir cogneu tout entier. Il m'a fait cest honneur viuant, que ie mets au compte de la meilleure fortune des miennes, de dresser avec moy vne cousture d'amitié si estroicte & si ioincte, qu'il n'y a eu biais, mouuement, ny ressort en son

ame, que ie n'aye peu confiderer & iuger, au-moins si ma veuë n'a quelquefois tiré court. Or sans mentir, il estoit, à tout prendre, si pres du miracle, que pour, me iettant hors des barrieres de la vray'-semblance, ne me faire mescroire du tout, il est force, parlant de luy, que ie me reserre & res- traigne au desloubz de ce que i'en sçay. Et pour ce coup, Monsieur, ie me contenteray seulement de vous supplier pour l'honneur & reuerence que vous deuez à la verité, de tesmoigner & croire, que nostre Guyenne n'a eu garde de veoir rien pareil à luy parmy les hommes de sa robbe. Soubs l'esperance donc que vous luy rendrez cela qui luy est tresius- tement deu, & pour le refreschir en vostre memoire, ie vous donne ce liure : qui tout d'un train aussi vous respondra de ma part, que sans l'expresse deffense que m'en fait mon insuffisance, ie vous presenterois autant volontiers quelque chose du mien, en reco- gnissance des obligations que ie vous doy, & de l'ancienne faueur & amitié que vous auez portée à ceux de nostre maison. Mais Monsieur, à faute de meilleure monnoye, ie vous offre en payement vne trefasseuree volonté de vous faire humble seruice.

Monsieur ie supplie Dieu qu'il vous maintienne en sa garde.

Vostre obeissant seruiteur

MICHEL DE MONTAIGNE





A MESSIEURS MESSIEURS LES IVRATS
DE LA VILLE DE BOVRDEAUX.

+



ESSIEURS i'espere que le voiage de Mon^r de curfol apportera quelque commodite a la ville aiant en mein vne cause si iuste & si fauorable. Vous aues mis tout lordre qui se pouuoit aus affaires qui se presantoint les choses etant en si bons termes ie vous supplie excuser encores pour quelque tamps mon absance que i'acourcirai sans doubte autant que la presse de mes affaires le pourra permettre. Iespere que ce sera peu cependant vous me tienderes s'il vous plait en votre bonne grace & me comanderes si l'occasion se presante de m'emploier pour le seruice publicq & votre Mon^r de curfol m'a aussi escrit & auerti de son voiage Ie me recomande bien humblemant & supplie dieu

Messieurs vous doner longue & hureuse vie. De montaigne ce 21 may 1582

Vostre humble frere & seruitur

MONTAIGNE



AV MARESCHAL DE MATIGNON.

+



ONSEIGNVR ceus de ce cartier
qui estoient alles vers le roy de
nauarre sont de retour despuis
deus iours Je ne les ai pouint
ueus mais ils n'ont raporte que
l'inclination a la paix fuiuant ce
que ie uous ai escrit & n'ont
rien de nouveau sauf un' assamblee generale &
extraordinere qui se fait lundy a s. foi de plusieurs
ministres Si une grande compaignie de diuerse sorte
de ians & de sexes se rant demain ceans come ie
l'atans ie vous ferai part de ce que i'y apranderai
& vous baise tres humblemant les meins suppliant
dieu

Monseigneur vous doner longue & hureuse vie de
montaigne, ce 21 ianu. 1584

Votre tres humble seruitur

MONTAIGNE



AV MARESCHAL DE MATIGNON.

+



ONSEIGNVR ie ne vois icy rien
digne de vous toutesfois sous le
titre des faueurs que vous me
faictes & de la priuaute que vous
me dones pres de vous iose vous
faire celeci fulemant pour vous
auertir de ma sante qui s'est vn
peu amandee au changement de lair Je me randis
ici d'une trette qui est bien longue Je trouuai pres
de ceans que des ians de bien de la reformation
de f. foi auoit tue un poure tailleur de cinquante ou
soixante coups de cifeaus sans autre titre que de lui
prendre vint sous & vn manteau qui en vaut deus
fois autant Je vous baise tres humblement les meins
& supplie dieu vous doner

Monseignur tres huruse & longue vie,
De montaigne, ce 19 aueil 1584

Votre tres humble seruitur

MONTAIGNE



A MONSIEVR MONSIEVR DV PVY

*Conseiller du Roy en sa Cour de Parlement de Paris
A Xaintes.*

+



MONSIEVR laction du fr de
uerres prisonnier qui m'est tres-
bien conue merite qu'a son iuge-
mant uous aportes uostre douceur
naturelle si en cause du monde
uous la pouues iustement apporter
Il a fait chose non sulemant
excusable selon les loix militeres de ce siecle mais
necessere & come nous uiuons louable Et l'a fait
sans doubte fort presse & enuis Le reste du cours
de sa uie n'a rien de reprochable Le uous supplie
monsieur y emploier uostre attantion uous trouueres
lair de ce fait tel que ie uous le represante
qui est poursuiui par vne uoie plus malitieuse
que n'est laeste mesmes Si cela y peut aussi ser-
uir ie vous ueus dire que c'est vn home nourri
en ma maison apparante de plusieurs honestes
familles & surtout qui a tousiours vescu honora-
blement et innoçamment qui m'est fort ami En le
sauuant uous me charges d'une extreme obligation

ie vous supplie treshumblemant l'auoir pour reco-
mande & apres uous auoir baïse les meins prie
dieu vous doner

Monsieur longue & hureuse vie Du caftera ce
23 d'auril

Votre affectionne seruitur

MONTAIGNE





A MESSIEVRS MESSIEVRS LES IVRATS
DE LA VILLE DE BOVRDEAVS



ESSIEVRS, Iay receu vostre Lr^e
& [verray de vous] aller trouuer
le plus tost que Ie pourray. Toute
cette cour de Sainte-Foy est sur
mes bras, & se sont assignes a me
venir voir. Cela faict Ie seray en
[plus] de liberté Ie vous enuoie
les Lr^{es} de monsieur de Vallées sur quoy vous vous
pourrez resoudre ma presence ny apporteroit rien
que de l'ambarras & Incertitude de mon choix &
opinion en ceste chose.

Sur ce Ie me recommande humblement a vostre
bonne [grace] & supplie Dieu vous donner messieurs
longue & heureuse vie.

Vostre humble frere & seruitur

MONTAIGNE

De Montaigne ce x Décembre 1584.



AV MARESCHAL DE MATIGNON

+



ONSIGNVR sur plusieurs contes
que M^r de Biffonse m'a fait de
la part de Mon^r de Turenne du
iugement qu'il fait de uous &
de la fiance que ce prince prant
de mes auis encore que ie ne me
fonde guieres en parolles de court
il m'a pris enuie sur le disner d'escrire a Mon^r de
Turenne que ie lui disois adieu par lettre que i'auois
receu celle du roy de nauarre qui me sambloit
prendre un bon conseil de se fier en l'affection que
uous luy offries de lui faire seruice que i'auois
escriit à madame de quissen de se seruir du camps
pour la commodite de son nauire a quoi ie m'en-
ploierois enuers uous & que ie lui auois done
conseil de n'engager a ses passions l'interest & la
fortune de ce prince & puis qu'elle pourroit tant
sur lui de regarder plus a son utilite qu'a ses
humeurs particulieres Que vous parliez d'aler a
Baione ou a lauanture offrirois ie de vous suiure
si i'estimois que mon assistance vous peut tant soit
peu seruir Que si vous y alliez le roy de nauarre
vous sachant si pres fairoit bien de vous conuier

a uoir ses beaux iardins de Pau Voila iustement la substance de ma lettre sans autre harangue Je vous en enuoie la responce qu'on m'a raportee des ce soir & si ie ne me trompe de ce comancement il naitera bien tost du barbouillage & me samble que cette lettre a desia quelque air de mescontantement ou de creinte Quoi qu'il die ie les tiens ou ils vont pour plus de deus mois & la se trouuerra vne autre forte de ton Je uous supplie me renuoier cele ci aueq les autres deus Ce portur n'a affaire qu'a nostre despesche sur quoi ie uous baise tres humblement les meins & supplie dieu vous doner

Monfeignur longue & hureuse vie

De montaigne ce 18 ianu. 1585

Vostre tres humble seruitur

MONTAIGNE





AV MARESCHAL DE MATIGNON

+



ONSEIGNVR ie n'ai rien appris despuis, encore que i'aie ueu asses de ians de ce trein ceans l'estime que tout a uuide si non que m^r du ferrier y soit demure pour les gages S'il uous plait de uoir une lettre que le s^r du pleffis m'escriuit despuis, uous y trouuerres que la reconciliation y fut bien entiere & pleine de bone intelligiance & ie croi que le **maître** lui en ara communique plus priuemant qu'aus autres sachant qu'il est de ce gout come est aussi m^r de Cleruan, qui uous a ueu despuis Si ie dois uous faire compaignie a Baione, ie desire que uous meintenes uostre deliberation de retarder dans le carefme, affin que ie puisse prandre les eaus tout d'un trein Au demurant, i'ai appris qu'il n'est rien qui desgoute tant le mari que de uoir qu'on s'entant aueq la fame I'ai eu nouuelles que les iurats son arriues à bon port & uous baïse

tres humblemant les meins suppliant Dieu uous
doner

De Montaigne, ce 26 ianv. 1585

Monseignur longue & hureuse vie

Votre tres humble seruitur

MONTAIGNE

MONSEIGNVR uous me faictes grande faueur de
uous agreer de l'affection que ie montre a vostre
seruice & uous pouues assurer de n'en auoir pas
acquis en guiene de plus nettement & sincerement
vostre mais c'est peu d'acquet Quand uous deuries
faire place ce ne doit pas estre en tamps qu'on se
puisse uanter de uous l'auoir ostee





AV MARESCHAL DE MATIGNON

+



ONSEIGNVR l'home par qui ie vous escriui dernierement & enuoiai vne lettre de m^r du Plessis n'est encores reuenu Despuis on me mande du fleix que mes^{rs} du ferrier & la marseliere sont encores à s. foi, & que le roy de nauarre vient d'enuoier querir quelque reste de trein & dequipage de chaste qu'il auoit icy, & que sa demure sera plus longue en Bearn quil ne pantoit. Suiuant quelques nouuelles instructions de m^r Roquelaure, & fauorables il s'enreua vers Baïone & daqs, pour leur monstrier que le roy a pris en tres bone part l'entree qu'il y a faicte Voila ce qu'on me mande Le reste du païs demure en repos & n'y a rien qui bouge Sur quoi ie uous baise tres humblemant les meins & supplie dieu vous doner

Monseignur longue & hureuse uie

De Montaigne, ce 2 feur. 1585

Vostre tres humble seruitur

MONTAIGNE



A MESSIEURS MESSIEURS LES IVRATZ
DE LA VILLE ET CITTÉ DE BOVRDEAVX
A BOVRDEAVX



MESSIEURS Iay prins ma bonne part du contentement que vous m'escriues auoir des bonnes expéditions quy vous ont este rapportees par Messieurs voz deputes, & prens a bonne augure que vous ayes heureusement achemyne ce commencement d'année esperant m'en conjoir avecques vous a la premiere commodité. Je me recommande bien humblement a vostre bonne grace & prie Dieu vous donner Messieurs heureuze & longue vye

Vostre humble frere & seruitur,

MONTAIGNE

de Monta ce viij^e feburier 1585.





AV MARESCHAL DE MATIGNON

+



ONSEIGNVR i'espere que la pierre qui uous pressoit derniere-
mant que uous m'escriutes ce
fera escoulee a bon marche come
un' autre que ie uuidai en mesme
tamps Si les iurats arrivarent le
iour qu'on les atandoit à bour-
deaus & qu'ils foint uenus en poste ils pourront
vous auoir apporte des nouuelles fresches de la
court On faict ici courir le bruit que ferran a esté
pris, a trois lieues de nerac, alant a la court &
ramene à Pau Auffi que les huguenots ont failli a
surprendre Taillebourg & Tallemont en mesme
tamps & quelques autres dessein pour daqs &
baione Mardi une trope de bohemes qui roule ici
au tour il y a longtamps aiant achete la faueur
& secours d'un iantilhomme du pais nome le borgne
la siguinie, pour les eider d'auoir raison de quelques
bohemes qui sont en un' autre trope dela leau en la
terre de gensac, qui est au roy de nauarre ledit la
siginie aiant assamblé uint ou trante de ses amis sous
couleur d'aler a la chaffe aueq des harquebuses pour
les canars aueq deus ou trois des diëts bohemes, du

cofté deça, alarent charger ceus dela & en tuarent un la iuftice de genſac auertie, arma le peuple & uindrent faire une charge aus affaillans & en ont prins quatre un iantilhomme & trois autres & en bleffarent trois ou quatre autres le reſte ſe retira deça leau & de ceus de genſac il y en a deus ou trois bleſſes a mort leſcarmouche dura longtams & bien chaude la choſe eſt ſubiete a compoſition car de lun & de lautre parti il y a beaucoup de faute Si le ſ^r de La rocque, qui eſt fort de mes amis ſe doit battre par neceſſité a Cabanac du puch ie ſouhete & lui conſeille que ce ſoit louin de vous Sur quoi ie vous baiſe tres humblemant les meins, & ſupplie dieu uous doner

Monſeignur longue & hureuſe uie

De Montaigne, ce 9 feur. 1585

Vostre tres humble ſeruitur

MONTAIGNE

MONSIEGNVR ma lettre ſe fermoit quand iai receu la voſtre du 6 & celle de m^r de Villeroy qu'il uous a pleu m'enuoier (par un home que le cors de la uille m'a enuoïé) pour m'auertir de l'heureuſe expedition de leurs deputes le ſ^r de la mote me mande auoir a me dire choſes qui ne ſe peuvent eſcrire & que ie lui mande ſ'il eſt beſouin qu'il me uieigne trouuer ici Sur quoi ie ne fois pouint de reſponce mais quand au comandement qu'il uous plait me faire de uous aller trouuer ie uous ſupplie tres humblemant croire qu'il n'eſt rien que ie face plus uolantiers & ne me reietterai iamais ſi auant en la

solitude ny ne me deffairai tant des affaires publiques qu'il ne me reste une singuliere deuotion a vostre seruice & affection de me trouuer ou uous seres Pour cete heure, i'ai les botes aus iambes pour aller au fleix ou le bon home presidant ferrier & le sr de la marseliere se doiuent trouuer demain aueq dessein de uenir ici apres demain ou mardi l'espere uous aler baisser les meins un iour de la femmeine procheine ou uous auertir s'il y a iuste occurance qui m'en empesche Je n'ai receu aucunes nouuelles de Bearn mais poifferre qui a esté à bourdeaux m'a escrit a ce qu'on me mande & done la lettre a vn home de qui ie ne l'ai pouint encores receue l'en suis marri





AV MARESCHAL DE MATIGNON

+



ONSEIGNVR ie uiens d'arriuer
du fleix La marseliere s'y est
trouué & dautres de ce conseil
Ils disent que despuis l'accident
de ferran & pour cet effaiet
frontenac est uenu a Nerac auquel
la reine de nauarre diët que si
ell' eut estime le roy son mari si curieus qu'elle
eut faiët passer par ses meins toutes ses despeschés
& que ce qui s'est trouue dans la lettre qu'elle escrit
a la reine sa mere qu'elle parle de s'en retourner
en france que c'est come en demandant auis & en
deliberant mais non pas come y estant resoluë &
qu'elle le met en doubte pour le peu de conte qu'on
faiët d'elle si apparammant que chacun le uoit
& conoit assés Et frontenac diët que ce que le roy
de nauarre en a faiët n'a este que pour la deffiance
qu'on lui auoit done que ferran portoit des me-
moires qui touchoient son estat & affaires publiques
Ils disent que le principal effaiët est que plusieurs
lettres des filles de cete court a leurs amis de france
ie dis les lettres qui se sont sauuees car ils disent que

quand ferran fut pris il eut moien de ieter quelques papiers au feu qui furent confomes auant qu'on les peut retirer ces lettres qui restent appretent fort a rire l'ai ueu en repassant m^r ferrier malade a s^t foi qui se resout de me uenir uoir un iour de cete semmeine dautres y seront des ce soir le ne m'atan pas qu'il y uieigne & me samble atandu son eage l'auoir laisse en mauues estat toutesfois ie l'atanderai & si uous ne me comandez le contrere differerai a cete cause mon voiage uers uous sur le comancement de lautre semmeine vous baissant sur ce treshumblemant les meins & suppliant dieu

Monseignur vous doner longue & hureuse uie de montaigne ce 12 feur.

Votre tres humble seruitur

MONTAIGNE

Le dict ferran auoit mille escus sur lui dict on car toute cete information n'est guiere certeine





AV MARESCHAL DE MATIGNON

+



ONSEIGNVR m^r du ferrier me
uient d'escrire que le roy de
nauarre se doit randre à mon-
tauban Ils sont ici autour en alarme
de quelque trope de ians de cheual
qu'ils disent estre logee de lautre
coste de la riuiere, en basadois

Si i'en sçai nouuelles auant que ceteci soit close ie
uous en auertirai & y arenuoie cete nuit Ce peut
estre la compagnie du roy de nauarre qui s'assamble
pour faire montre, de quoi i'ay ceans des iandarmes
qui s'y vont randre Vous uerres les bruits qui
courent en ces cartiers, parce que le marquis de
Trans m'escrit l'ai ueu la lettre de poifferre il n'y
a rien sinon qu'il auoit a parler a moi de la part
des dames chose qu'il estoit besouin que je sceusse
mais qu'il ne pouuoit lescrire n'y retarder son par-

temant Surquoi esperant bientost auoir cet heur de
uous baïser les meins je supplie dieu uous doner

Monseignur, longue & hureuse uie

De Montaigne ce 13 feur. 1585

Vostre tres humble seruitur

MONTAIGNE

MONSIEVR ioblois a uous dire que les prisoniers
qui estoient a gensac de quoi ie uous ai escrit sont
en liberte sauf le procureur de la terre de Monrauel
qui a este pris par compaignie & rancontre n'ayant
aucune participation a tout cela & s'estoit trouue sur
les lieux pour quelque execution de iustice





AV MARESCHAL DE MATIGNON

+



ONSEIGNVR ie viens tout presentement ce dimanche matin de recevoir uos deus lettres suiuant les quelles ie monteroie a mesme heure a cheual sans ce que le presidant eimar qui partit hier de ceans a les miens les quels jatans a ce soir avec esperance de partir demain pour uous aler trouver & ne pouvant faire a cet' heure a cause des eaus desbordees partout ce chemin d'ici a bourdeaux en une journée ie m'en irai coucher a Faubrenet pres du port de Tourne pour uous trancher chemin si uous partes cependant & me pourrai randre mardi matin a podensac pour y entendre ce qu'il uous plaira me comander Si par ce porteur uous ne me changes d'assignation ie uous irai trouver mardi a bourdeaux sans passer leau qu'a la bastide Les nouvelles que j'ai receu de Pau de lunsiesme c'est que le roy de nauarre s'en aloit quelques iours apres au Boucau de Baïone, dela a Nerac de Nerac à Bragerac & puis en Seintonge

Madame de gramont estoit encore bien mal Sur quoi,
je uous baïse tres humblemant les meins & supplie
Dieu vous doner

Monseigneur, tres hureuse & longue uie

Vostre tres humble seruiteur

MONTAIGNE





AV MARESCHAL DE MATIGNON

27 may 1585.



ONSEIGNVR i'ai receu ce matin
vostre lettre que i'ai commu-
niquee a mons^r de gourgues &
auons disne ensamble ches mons^r
de bourdeaus Quand a lincon-
ueniant du transport de l'arant
contenu en uostre memoire uous
uoies combien c'est chose malaisée a pouruoir tant
y a que nous y arons leuill de plus pres que nous
pourrons Je fis toute dilijance pour trouuer l'home
de quoi uous nous parlates. Il n'a pouint este ici
& m'a monsr de bourdeaus montre une lettre
par la quelle il mande ne pouuoir uenir trouuer
le dict s^r de bourdeaus come il deliberoit aiant este
auerti que uous uous deffies de lui Sa lettre est de
auanthier Si ie l'eusse trouue i'eusse a lauanture suiui
la uoie plus douce estant incertain de uostre resolu-
tion mais ie uous supplie pourtant ne faire nul doubte
que ie refuse rien a quoi uous seres resolu & que
ie n'ay ny choys ny distinction d'affaire ny de per-
sone ou il ira de uostre comademant Je souhete que
uous aies en guiene beaucoup de uolantes autant
uostres qu'est la miene On fait bruit que les galeres

de nantes s'en uient uers brouage. Mon^r le mareschal de Biron n'est encores desloge. Ceus qui auoint charge d'auertir mons^r d'Vfa disent ne l'auoir peu trouuer & croi qu'il ne soit plus icy s'il y a este Nous sommes apres nos portes & gardes & y regardons un peu plus attantifueuant en uostre absance Laquelle ie creins non fulemant pour la conseruation de cete uille mais aussi pour la conseruation de uous mesmes conoissant que les enemis du seruice du roy tantent asses combien uous y estes necessere & combien tout se porteroit mal sans uous Ie creins que les affaires uous surpranderont de tant de costes au cartier ou uous estes que uous seres longtamps a prouoir par tout & y ares beaucoup & longues difficultes S'il suruient aucune nouuelle occasion & importante ie uous despecherai soudein home expres & deues estimer que rien ne bouge si uous n'aues de mes nouuelles Vous suppliant aussi de considerer que telle sorte de mouuemans ont acoustume d'estre si inpourueus que s'ils deuoint auenir on me tiendera a la gorge sans me dire gare Ie ferai ce que ie pourrai pour tantir nouuelles de toutes pars & pour cet effai&t uisiterai & uerrai le gout de toute sorte d'hommes Iusques a cete heure rien ne bouge M^r du londel m'a ueu ce matin & auons regarde a quelques aiancemans pour sa place ou i'irai demain matin Despuis ce comancement de lettre i'ai appris aus chartreus qu'il est passe pres de cete uille deus iantilshomes qui se disent a monsieur de guise qui uient d'Agen sans auoir peu sçauoir qu'elle route ils ont tire On atant a Agen que uous y ailles Le s^r de mauuefin uint iusques a canteloup & de la s'en retourna aiant appris quelques nouuelles Ie cherche un capiteine rous a qui mapparrante escrit pour le retirer a lui aueq tout plein

de promesses La nouuelles des deus galeres de nantes prestes a descendre en Brouage est certeine aueq deus compaignies de ians de pied Monsieur de mercure est dans la uille de nantes Le sr de la courbe a dict a m^r le presidant nesmond que monsieur d'elbeuf est audeça d'angiers & a loge ches son pere tirant uers le bas poitou aueq quatre mill' homes de pied & quatre ou cinq çans cheuaus aiant receuilli les forces de mons^r de Briffac & d'autres & que monsieur de mercure se doit iouindre a lui Le bruit court aussi que monsieur du meine uient prandre ce qu'on leur a assamble en auuergne & que par le pais de forest il se randerà en rouergue & a nous c'est a dire uers le roy de nauarre contre le quel tout cela uient monsieur de lansac est a Bourg & a deus nauires armes qui le suiuent Sa charge est pour la marine. Je uous dis ce que i'aprans & melle les nouuelles des bruits de uille que ie ne treuue uraisamblables aueq des uerites affin que uous saches tout uous suppliant tre' humblemant uous en reuenir incontinent que les affaires le permetteront & uous assurer que nous n'espargnerons cepandant ny nostre souin ny s'il est besouin nostre uie pour conseruer toutes choses en lobeissance du roy

Monseignur ie vous baïse tref humblemant les meins & supplie dieu uous tenir en sa garde De bourdeaus ce mecredi la nuit 22 de mai

Vostre tref humble seruitur

MONTAIGNE

Je n'ai ueu persone du roy de nauarre on dict que m^r de Biron la ueu



AV MARESCHAL DE MATIGNON



ONSEIGNVR ie uous ai escrit
bien amplemant ces iours passés
Ie uous enuoie deus lettres que
iai receu pour uous par vn home
de m. de rouillac Le uoisinage
de m^r de vaillac nous remplit
d'alarmes, & n'est iour qu'on ne
m'en done cinquante bien pressantes Nous uous
supplions tres humblemant de uous en uenir incon-
tinant que vos affaires le pourront permettre l'ai
passe toutes les nuits ou par la uille en armes ou
hors la uille sur le port, & auant uostre auertisse-
mant y auois desia veille une nuit sur la nouuelle
d'un bateau charge d'hommes armes qui deuoit
passer Nous n'auons rien ueu & auant arfoir y fusmes
iusques apres minuit ou m de gourgues se trouua
mais rien ne uint Ie me seruiss du capiteine Seintes
aiant besouin de nos soldats Lui & massép ramplirent
les trois pataches pour la garde du dedans de la uille
l'espere que uous la trouuerres en l'estat que uous
nous la laiffates l'enuoie ce matin deus iurats auertir
la cour de parlement de tant de bruits qui courent
& des homes euidammant suspects que nous scauons y

estre Sur quoi esperant que uous soies ici demain au plus tard ie uous baïse tres humblemant les meins et supplie Dieu uous doner,

Monfeignur, longue et hureuse uie,

Votre tref humble seruitur

MONTAIGNE

De Bourdeaus, ce 27 de mai 1585

Il n'a esté iour que ie n'aie esté au chateau trompette Vous trouuerres la plate forme faicte le vois larcheuesché tous les iours auffi





A MESSIEURS MESSIEURS LES IVRATS
DE LA VILLE DE BOVRDEAVS



ESSIEURS, jay trouue icy par
rencontre de vos nouvelles par
la part que monsieur le mareschal
men a fait. Le n'espargneray ny
vie ne aultre chose pour votre
seruice et vous laisseray à iuger
sy celuy que je vous puis faire
par ma présence à la prochaine election vaut que
je me hazarde daller en la ville veu le mauvais
estat en quoy elle est notamment pour des gens quy
viennent dun sy bon air comme je fais. Le mappro-
cherai mercredy le plus près de vous que je pourray,
est à Feuillas se le mal ny est arriue, auquel lieu
comme jescris à monsieur de la Motte je serai tres
ayse davoir cest honneur de voir quelquun dentre
vous pour receuoir vos commandements e me
décharger de la creance que monsieur le mareschal
me donnera pour la compagnie, me recommandant
sur ce bien humblement a vos bonnes graces e priant
Dieu vous donner,

Messieurs, longue et heureuse vie. De Libourne
ce 30 juillet 1585.

Votre humble serviteur et frere,

MONTAIGNE



A MESSIEVRS MESSIEVRS LES IVRATZ
DE LA VILLE DE BOVRDEAVX



ESSIEVRS Je communiqué à m^r
le mare[schal] la Lr^e que [vous]
m'aues enuoyé et ce que ce [por-
teur] ma dict auoir charge de
uous de me fe[re] entendre et
ma donne charge uous prier de
luy enuoy[er] le tambour quy a
este à bourg de vostre part Il ma dict aussy qu'il
uous prie fr^e incontinant passer a luy les capp^{es}
S^t Aulaye et Mathelin et fr^e amas du plus grand
nombre de maliniers et matelotz quil se pourra
trouuer. Quand a ce mauuais exemple et inuzité
de prandre des femmes et des enfans prisonniers
Je ne suis aulcunement dauis que nous limitons a
l'exemple d'aultruy. Ce que Je aussy dict a mon dict
sieur le mareschal quy ma charge vous escrire sur
ce fait ne rien bouger que n'ayes plus amples nou-
uelles. Sur quoy Je me recomande bien humble-
ment à voz bonnes graces et supplie Dieu vous
donner Messieurs longue et heureuze vie

Votre humble frere & seruiteur

MONTAIGNE

De Feuilhas ce xxxj Iulhet 1585.



AV MARESCHAL DE MATIGNON



ONSEIGNVR mademoiselle de Mauriac est apres a faire le mariage du s^r de Mauriac son fils aueq l'une des feurs de mons^r d'aubeterre les choses sont si auancees à ce qu'on me mande qu'il n'y reste que l'assistance de mad^{lle} de Brigneus sa fille aisnee qui est a lectore aueq son mari Elle uous supplie tres humblemant ottroier vn passeport a sa dicte fille et son petit trein pour uenir a Mauriac et come estant son parant & aiant cet honur d'estre conu de uous ell' a uolu que ie vous en fisse la requeste et m'a enuoié vne lettre qu'elle dict estre de mons^r d'aubeterre ie croi a ces mesmes fins Je uous la fois tres humble & tres affectionee si c'est chose qui ne uous apporte despleir et inportunite Si non au moins cete cy seruira a me ramanteuoir en vostre souuenance dou me pourroit auoir desloge et mon peu de merite et le long tamps qu'il y a que ie n'eus l'honur de uous uoir Je suis

Monseignur vostre tres humble seruitur

MONTAIGNE

De Montaigne ce 12 juin



AV MARESCHAL DE MATIGNON



ONSEIGNVR uous aues sceu
nostre bagage pris a la forest de
villebois a nostre veue despuis
apres beaucoup de barbouillage
et de longur la prinse iugee iniuste
par monsieur le prince Nous
n'osions cependant passer outre
pour l'incertitude de la surete de nos persones
de quoi nous deuions estre esclercis sur nos passepors
Le ligueu a faict cete prinse qui prit m^r de Barraut
et m^r de la rochefocaut La tampeste est tumbee sur
moi qui auois mon ariant en ma boite Le nen ai rien
recouuert et la plus part de mes papiers Et hardes
leur sont demurees Nous ne uismes pas monsieue
le prince Il s'est perdu cinquante tant descus pour
monsieur le comte de Thorigny vn'euiere dariant
& quelques hardes de peu Il adestourne son chemin
en poste pour aller uoir les dames eslorees a montre-
for ou sont les cors des deus freres & de la grand
mere & nous reprint hier en cette ville dou nous
partons presantement Le uoiage de normandie est

remis Le roy a despesche messieurs de Belieure
et de la guiche vers monsieur de guise pour le
semondre de uenir a la court Nous y ferons judi

D'Orléans ce 16 feur. au matin

Vostre treshumble seruitur

MONTAIGNE





A MADEMOISELLE PAULMIER



ADEMOISELLE, mes amis sçavent que dez l'heure que ie vous eus veue, ie vous destinay vn de mes liures : car ie sentis que vous leur auiez fait beaucoup d'honneur. Mais la courtoisie de monsieur Paulmier m'oste le moyen de vous le donner, m'ayant obligé depuis à beaucoup plus que ne vault mon liure. Vous l'accepterez, s'il vous plaist, comme estant uostre auant que ie le deusse; & me ferez cette grace de l'aymer, ou pour l'amour de luy, ou pour l'amour de moy; & ie garderay entiere la debte que i'ay enuers monsieur Paulmier, pour m'en reuencer, si ie puis d'ailleurs, par quelque seruice.





AV ROY

SIRE



C'EST estre audeffus du pois et de la foule de uos grans & importants affaires que de uos ſçauoir preſter & deſmettre aus petits a leur tour ſuiuant le deuoir de uoſtre authorité royale qui uous expoſe a toute heure a toute ſorte et degré d'homes & d'occupations toutesfois ce que uoſtre maieſté a deigné conſiderer mes lettres et y comander reſponce i'eime mieus le deuoir a la benignité qu'a la uigur de ſon ame. l'ay de tout temps regardé en uous cette meſme fortune ou uous eſtes et uous peut ſouuenir que lors meſme quil m'en falloit confeſſer a mon cure ie ne laiſſois de uoir aucunement de bon euil uos ſuccez a preſant aueq plus de raiſon et de liberté ie les embraffe de pleine affection Ils uous ſeruent la par effaiet mais ils ne uous ſeruent pas moins icy par reputation le retentiſſement porte autant que le coup Nous ne ſaurions tirer de la iuſtice de uoſtre cauſe des argumans ſi fors a maintenir ou reduire uos ſubietz come nous ſeſons des nouuelles de la proſperité de uos entrepriſes et puis aſſurer uoſtre maieſte que les

changemens nouueaus qu'elle uoit par deça a son aduantage son heureuse issue de Diepe y a bien a point secondé le franc zelle & merueilleuse prudence de monsieur le mareschal de Matignon. duquel ie me fois accroire que uous ne receues pas iournellement tant de bons & seignalez seruices sans uous souuenir de mes assurances & esperances l'atans de ce prochain esté non tant les fruits a me nourrir come ceus de nostre commune tranquillité et qu'il passera sur uos affaires aueq mesme tenur de bon heur faisant euanouir come les precedantes tant de grandes promesses de quoi uos aduerseres nourrirent la uolanté de leurs homes. Les inclinations des peuples se manient a ondees si la pente est une fois prinse a uostre faueur elle s'emportera de son propre branle iusques au bout l'eusse bien desire que le guein particulier des soldats de uostre armee et le besouin de les contanter ne uous eut desrobe nomeemant en cette uille principale la belle recommandation d'auoir treté uos subietz mutins en pleine uictoire aueq plus de solagement que ne font leurs protecturs & qu'a la differance d'un credit passagier et usurpé uous eussies montré qu'ils estoient uostres par une protection paternelle et uraïement royalle A conduire tels affaires que ceus que uous aues en main il se faut seruir de uoies non communes Si s'est il tousiours ueu qu'ou les conquestes par leur grandur et difficulté ne se pouuoient bonement parfaire par armes et par force elles ont esté parfaites par clemance & magnificence excellans leurres a attirer les homes specialement uers le iuste et legitime parti S'il y eschoit rigur et chastiemant il doit estre remis apres la possession de la maistrise. Vn grand conquerur du temp passé se uante d'auoir done autant d'occasion

a ses enemis subiuguez de l'eimer qu'a ses amis
Et icy nous sentons desia quelqu'effai&t de bon prognostique de l'impression que reçoient uos uilles desuoiees par la comparai&on de leur rude tretimant a celluy des uilles qui sont sous uostre obeissance. Desirant a uostre maiesté une felicité plus presante et moins hasardeuse & qu'elle soit plus tost chérie que creinte de ses peuples et tenant son bien necefferemant atahé au leur ie me reiouis que ce mesme auancement qu'elle fai&t uers la uictoire l'auance aussi uers des conditions de paix plus faciles Sire uostre lettre du dernier de nouambre n'est uenue a moi qu'asture et audela du terme qu'il uous plaifoit me prescrire de uostre seiour a Tours. Je reçois a grace singuliere qu'ell' aie deigné me faire sentir qu'elle pranderait a gre de me uoir, persone si inutile mais siene plus par affection encore que par deuoir. Ell' a treslouablement rangé ses formes externes a la hauteur de sa nouvelle fortune mais la debonaireté & facilité de ses humeurs internes elle fai&t autant louablement de ne les changer Il luy a pleu auoir respet non sulemant a mon eage mais a mon desir aussi de m'apeler en lieu ou elle fut un peu en repos de ses laborieuses agitations Sera ce pas bien tost a Paris Sire et y ara il moiens n'y fante que ie n'estande pour m'y randre

Vostre treshumble & trefobeissant
seruitur et subiet

MONTAIGNE

De montaigne le 18 de Ianu.



AV ROY

SIRE



CELLE quil a pleu a uostre majeste
mescrire du vintiesme de juillet
ne ma este rendue que ce matin
et ma trouue engage en vne fie-
bure tierce tres violente populaire
en ce pais despuis le mois passe
Sire je prens a tresgrand honneur
de receuoir vos commandemens et nay point failly
descrire a monsieur le mareschal de matignon trois
fois bien expressement la deliberation et obligation
enquoy jestoie de laler trouuer et jusques a luy
merquer la route que je prendrois pour laler joindre
en seurete sil le trouuoit bon a quoy nayant heu
aucune responce jestime quil a considere pour moy
la longueur et hazard des chemins Sire vostre
majeste me fera sil luy plaist ceste grace de croire
que je ne plaindray jamais ma bource aux occasions
ausquelles je ne voudrois espargner ma vie le nay
jamais receu bien quelconque de la liberalite des
Rois non plus que demandé ny merité et nay receu
nul payement des pas que j'ay employes a leur
seruice desquels vostre majeste a heu en partie
cognoissance ce que jay fait pour ses predecesseurs

je le feray encores beaucoup plus volontiers pour elle je suis Sire aussy riche que je me souhaite. Quand jauray espuise ma bource aupres de vostre majeste a paris je prendray la hardiesse de le luy dire et lors sy elle mestime digne de me tenir plus long temps a sa suitte elle en aura meilleur marche que du moindre de ses officiers

Sire

je suplie dieu pour vostre prosperite et sante

Vostre tres-humble & trefobeissant seruitur
et subiet

MONTAIGNE

De montaigne ce second de septembre





A ***



MONSIEUR, ie uous fai cet escrip
veu laage aultremant que besoing
le comande, vous asseurant ie
scay recognoistre honestes de
vostre dire mieulx que ie uous le
fest presentemant. Or, en lestat
incertain de nostre espargne, jai
print attention de ne faillir à lencontre de ce
quaue montres de soing & d'attache que ie scais
uons debuoir de longues années pour bons & loyaux
seruices mesme ie vous le veus si bien prouuer
que voicy le tiltre dont Monsieur Estienne pour-
uoiera à lacquittement toutefois que se presenteres
a luy. Voila ce que ie supplie m'estre accordé
comme tesmoignage de uostre bonne amitié & chose
fort de mon goust dont ie tiens le caut pour recours.
Sur ce ie prie Dieu uous donner longue et heu-
reuse vie. X de ma 1590.

MONTAIGNE



Handwritten text in a cursive script, likely a title or header, located at the top of the page.



Vertical handwritten text on the left side of the page, possibly a date or a reference number.

Small handwritten text or signature located below the central ornament.



TABLE DES CHAPITRES

LIVRE TROISIEME

(SVITE)

	Pages.
De l'incommodité de la grandeur. Ch. vii.	1
De l'art de conferer. Ch. viii.	9
De la vanité. Ch. ix.	42
De mefnager fa volonté. Ch. x.	121
Des boyteux. Ch. xi.	153
De la phyfionomie. Ch. xii.	168
De l'experience. Ch. xiii.	207

LETTRES DE MONTAIGNE

	Pages.
Avertissement.	287
A Monseigneur de Montaigne	291
A Monsieur de Mesmes.	293
A Monseigneur de l'Hospital.	296
A Monsieur de Foix	300
A Madamoiselle de Montaigne	305
A Monseigneur De Montaigne	307
A Monsieur de Lanfac	326
A Messieurs les Jurats de la ville de Bourdeaux. . .	328
Au Marechal de Matignon	329
Au Marechal de Matignon.	330
A Monsieur Du Puy.	331
A Messieurs les Jurats de la ville de Bourdeaux . .	333
Au Marechal de Matignon.	334
Au Marechal de Matignon.	336
Au Marechal de Matignon.	338
A Messieurs les Juratz de la ville de Bourdeaux . .	339
Au Marechal de Matignon	340
Au Marechal de Matignon.	343
Au Marechal de Matignon.	345
Au Marechal de Matignon.	347

	Pages.
Au Marefchal de Matignon	349
Au Marefchal de Matignon	353
A Meffieurs les Iurats de la ville de Bourdeaux . .	354
A Meffieurs les Iuratz de la ville de Bourdeaux . .	355
Au Marefchal de Matignon	356
Au Marefchal de Matignon	357
A Mademoifelle Paulmier	359
Au Roy	360
Au Roy	363
A ***	365



IMPRIMÉ PAR A. QUANTIN

ANCIENNE MAISON J. CLAYE

POUR

ALPHONSE LEMERRE, ÉDITEUR

A PARIS



Stanford University Libraries



3 6105 014 173 673

Stanford University Library
Stanford, California

In order that others may use this book,
please return it as soon as possible, but
not later than the date due.



